

2

SPECVLVM
OMNIVM STA-
TVVM TOTIVS OR-
BIS TERRARVM,

IMPERATORIS, PAPÆ, REGVM, CARDINA-
lium, Patriarcharum, Archiepiscoporum, Ducum, Episcoporum, Princi-
pum, Abbatum, Comitum, Prælatorum, Baronum, Presbyterorum,
Nobilium, Clericorum, Ciuium, Mercatorum, Opi-
ficum, & Agricolarum;

Sortem generis humani, eiusque commoda & incommoda representans;

AUCTORE

RODERICO EPISCOPO ZAMORENSI ET CALA-
guritano in Hispania, Romanæq; Ecclesiæ Castellano & Referendario.

Cui ob similem materiam est adiunctum

MACABRI SPECVLVM MORTICINVM.

¶ utrumque recensitum & editum ex Bibliotheca

V. N. MELCHIORIS GOLDASTI

HAIMINSFELDII & C.



HANOVIAE apud Heredes Ioan. Aubrii, Anno 1613.



THE VOICE AT A MILE TO THE WEST

THE VOICE AT A MILE TO THE WEST
THE VOICE AT A MILE TO THE WEST

THE VOICE AT A MILE TO THE WEST
THE VOICE AT A MILE TO THE WEST

THE VOICE AT A MILE TO THE WEST
THE VOICE AT A MILE TO THE WEST

THE VOICE AT A MILE TO THE WEST
THE VOICE AT A MILE TO THE WEST

THE VOICE AT A MILE TO THE WEST
THE VOICE AT A MILE TO THE WEST

THE VOICE AT A MILE TO THE WEST
THE VOICE AT A MILE TO THE WEST

THE VOICE AT A MILE TO THE WEST
THE VOICE AT A MILE TO THE WEST



ILLVSTRIBVS AC

Generosis Dominis,

DN. ZDENCKONI

ADALBERTO POPPELIO, BA-
ronià Lobkowitz, Domino in Chlumez, &c. S. Cæs.

Maiestatis Consiliario, & Supremo Regni
Bohemix Cancellario:

NEC NON

DN. GEORGIO BARONIA

Schœnach, Domino in utroque Karelitz & Mil-
cken, S. Cæs. Maiestatis Consiliario, & Magni

Ducatus Silesie Marchionatusque

Lusatia Cancellario:

Dominis suis fauentibus & gratiosis,

**MELCHIOR GOLDASTVS HAIMINS-
FELDIVS, &c. S. P. D.**



*Notiens recordor eorum sermonum,
ILLVSTRES ac GENEROSI DOMINI,
(recordor autem quam sapissime)
quos familiariter mecum cadere de
rebus publicis tum Praga dignaba-
mini, tum Francofordia, totiens temperare mihi
vix possum quin exclamem;*

Edmii versio Moribus antiquis res stat Germana virisque.

Adeo enim in vobis (præfiscine hoc dixerim) elucet atque emicat prisca illa maiorum virtus, adeo cana & antiqua fides, ut utrum prius in vobis demirer, summamne politica prudentia, an moderationis ecclesiastica, quarum utraque Imperium nostrum sanctissime constitutum & firmatum est, equidem ambiguus sim. Etsi Catonem, propter civilem eius conuersationem & iustos mores, venerata est Romana antiquitas quasi cælis delapsum, quid de vobis Germani sentiemus, quos nouimus Dei immortalis munere atque dono turbata huic Reipublic. concessos esse, ut prudentia vestra remigio clauus illius temperetur ac moderetur? Hoc namque ad munus & officium Cancellariorum attinere, Leges Imperii nostri, quarum sancendarum pars Serenissimus Rex Bohemia, tamquam Archiprinceps & Elector Imperii non minima exstitit, ordinauerunt. Quarum monitu, & insuper experientia teste ut didicistis, a nulla violenta solere esse diuturna, ita è contrario verum esse vetus illud verbum experiri, omnia b moderata durare. Eodem quippe modo cum Reipublica ingenio comparatum est, quo cum vini natura, quod nec dulce nimis, (quamquam id vulgo & generosum, & nobile, & præstantissimum appelletur ac censeatur) nec nimis acerbum ferre atatem

a ex Aristot.

b Senec. in
Troad.

EPISTOLA DEDICATORIA.

tempore est, sed quod est, pro ratione aeris & loci, inter utrumque: sic Status publicus, nisi pro tempestatibus, occasionis & rerum conditione misceatur, vix ac ne vix quidem est, ut constans ac perpetuus perseveret. Non longius abibo: Regnum vestrum Bohemia videamus. Quod nunquam felicius, numquam quietius, numquam tranquillius existit, quam quum à Divis nostris Sacratissima memoria Imperatoribus, Sigismundo, Maximiliano II. & Rudolpho II. pace Religionis æquabili constituta, civiliter & moderate gubernari cœptum est. absque quo temperamento certissimum est constatq. inter omnes, latissimas illas Imperii nostri provincias, quæ sub Regni vestri unionem constitutæ sunt, Bohemiam scilicet, Silesiam, Moraviam, & Lusatiam, non modo in perpetuo motu existituras, sed in alia omnia Dominia, exemplo Borussia ac Livonia, abituras fuisse, quam potius vim machinosam perpe-
suras. Et dubitabimus adhuc, an consilia vestra pro pace populi, cuius ^csalus suprema lex est, instituta, & ^ccurare.
ad stabilendum ac conservandum hoc numquam satis laudandum moderamen directæ, ex usu esse cū Imperiis, tum Regni debeant? quum ^dtēpori cedere, ^dDionysius: Caro in li-
ex Catone, optimo sapientiæ moralis magistro & au- ^bello de Mor-
tore, admodum adolescentuli edocti simus. quod ^{rib.}
præceptum ut est eximium, & cunctorum Magi-

MELCHIORIS GOLDASTI

*stratum animis imprimendum, ita non minima pars prudentia ciuilis à Sapien-
tibus reputatur: & cuius siue ignorantia seu contemptus multas persape
Respublicas pessumdedit: nostram etiam Moganam
pronuper pene perculit & euertit. Usque adeo*

*c. Horat. li. 1.
epist. ad Numa.
mod.*

*e Infani sapiens nomen feret, æquus iniqui,
Vltra, quam satis est, virtutem si petit ipsam.*

*Hoc autem moderamen ciuile pendet ex perfecta co-
gnitione ordinum cuiusq; Reipubl. non modo ut rite
recteq; institui, verum etiam ut iam institutū iuste
possit conseruari. Quo facto (sodes) Medicus, qui
Moderatori Resp. in dissimili genere quodāmodo si-
milis est, curabit astantē agrotum, si partes humani
corporis, in quib. laboratur, non habet perspectas &
explorat as? nec viscerū morbos interiores tenet, nec
callet affectiones cutaneas? Quos it ut in persanan-
dis morbis Medicorum filii tantopere inter se dissen-
tiant: quib. haut secius Politici nostri animati sunt;
qui, ceu Medici nec constitutionum humani cuiusq;
corporis, nec regionum, nec aeris, nec aquarum mo-
deratam in temperie obseruant qualitatem; ita ipsi
nec status cuiusque Reipubl. nec ingeniorum, nec
morum, nec legum, nec consuetudinum populi sibi
notant & sectantur rationem. Omnino impruden-
ter, & cum periculo plerumque vniuersi corporis,
singulorumque eius membrorum.*

Nam

EPISTOLA DEDICATORIA.

* Nam quoniam variant animi, variabimus artes:

^a Quid li. 2.
de Remed.
amor.

Mille mali species, mille salutis erunt.

Vnde quod olim non minus eleganter quā vere Medicorum parens Galenus de Medicis, quibus salus hominum priuata commēdata est, dixit, id nos multo iustius de Reipubl. Administratoribus, quibus salus publica proposita est, effari possumus: ^b Non esse mirandum scil. complures tantum in Reipublica operibus aberrare, quantum etiam cognitione falluntur.

^b lib. 1. ad
Glauc. c. 2.

Perspecta ergo atq. cognita constitutione corporis quam complexionem vulgo vocant, & morbi causa; si sanabilis est, igitur demum medicinam adhibere decet parti affecta aptam, eamque tempore opportuno. Quam temporis occasionem qui spernit & insuper habet, eum me Deus rerum omnium esse imperitissimum oportet & extreme infrunitum; & aurem eius vellere debet, quod experienter Vates Sulmonensis in Remediis cecinit:

^c Temporibus medicina valet: data tempore profunt;

^c Ouid. lib. 1.
de Remed.
amor.

Et data non apto tempore vina nocent.

Quo quid aptius in morbos Reipublic. dici aut scribi poterat? Quos persanare experti ac prudentis est Medici, nō cuiusvis Agyrtæ, aut Stentoris circumforanei, qui temere ad violenta medicamina, ad ferrum etiam & ignem, quasi praesentissima remedia, confugiunt. O imperitos & insensatos! Qui nesciunt ^d ulcera esse in Republica, ut

^d Hippocrat.
li. 3 aphor. 6

MELCHIORIS GOLDASTI

in corpore humano, qua nec ferro nec igni sese curari patiuntur:

e Ovid, lib. 3.
de Ponto.

Nec esse in Medico, semper releuetur ut ager,
Interdum docta plus valet arte malum.
Afferat ipse licet sacras Epidaurius herbas,
Sanabit nulla vulnere CORDIS ope.
Tollere nodosam nescit medicina podagram,
Nec formidatis auxiliatur aquis.
Cura quoque interdum nulla est medicabilis arte;
Et si sit, longa est extenuanda mora.

Cuiusmodi morbus in Republica esse putatur persuasio Religionis, quam, ubi tam longe lateque irrepfit, ut radices in locis publicis & frequentioribus egerit, existimare oportet prope immedicabilem. Ob id a curatione Medico, id est, Moderatori Reipublice, aut plane desistendum est, si crimine vacare velit internecionis; aut conueniendum, donec malum longa temporis mora, iuxta Poetam, extenuetur.

f in Aphorism.

Est etiam Hippocrateum illud nobile, & πείποιτα φάρμακόν, ab omnibus Sapientibus, tum in Repub. gubernanda, vitis que quibusdam tempestive exscindendis, tum etiam in aegritudine animorum sananda, iure laudatum semper & usurpatum. Quod vere & αἰνέσιον apophthegma, si in eorum, qui Respubl. præsunt, pectora altius descendisset, pauciora, ut quidem nos putamus, funera Respublicar. hodie

EPISTOLA DEDICATORIA.

die videremus. Nunc dum (ut Galeni verbo utar) cognitione falsi vniuersum Reipubl. corpus, cuius forte particula aliqua laborat, medicamentis ag-grediuntur, fieri non potest, quin vniuersam quo-que Rempubl. simul concussam, perditum & profligatum eant. Ut appareat, praua solum & vitiosa, non bona pariter & sana, in affectis locis curanda esse, ni velimus perpetuo periclitari & naufragari.

Ad vos, ILLUSTRES ac GENEROSI DOMINI, si perniciosas id genus hominum curationes non probatis, scil. vos pro officio vestro facere, quod vobis incumbit, ut iis obloquamini, qui qui tam de illi sunt, sacri profani, Clerici an Laici, & quantum in vobis est, damnosis eorum conatibus viriliter resistatis, qui non priuatim in Legem Aquiliam, more imperitorum medicorum, sed publice in Legem Iuliam Maiestatis, hoc est, ^a aduersus populū Germanū, Bo- hemum, &c. & aduersus securitatē eius, cōmittunt.

a Vlpian. in
l. i. D. ad L.
Iul. Maiest.

Etenim ad utrūq. Ordinē, ex cuius membrorū cōpa-gine vnū corpus Reip. ferruminatū & consolidatum est, pertingit officiū vestrum amplissimū, quod prae-cipue in recta Legum & Canonū custodia versatur.

Hac Reip. membra ex utroq. Ordine cōflata vo-bis, ILLUSTRES & GENEROSI DOMINI, Auctor istius libri, ceu in speculo quodā dilucido, cō-templanda & cognoscēda proponit. Et primo loco Po-

liticum Statum adumbrat, altero Ecclesiasticum. Est siquidem Ecclesia in Republica, si Optato Episcopo Milevitano credimus; & quidem pars eius dignissima, si qua fides sanctorum Patrum testimoniis est habenda; cuius terrenum ac visibile caput in Regno Rex, in Imperio esse censetur Imperator.

Ambo Ordines sub uno hoc capite in bene constituta Repub. moderatè regere, & in officio cōtinere, artis opus est, nō techna aut machina. Quæ ars nihil aliud est, quā prudētia ciuilis; quā alii scientiā politicā, Stoici & Hebraorū Rabbini Sophiā vel Sapientiā dixerere. Technas & machinas (ita dolos & fraudulēta cōsilia interpretor) Moderator Reip. nosse debet, quē admodum Medicus venena, Philosophus elenchos & sophismata, nō ut iis utatur, sed ut sciat & sibi cauere, ubi necessum est, & mederi intoxicatis, aut obuiare abutētibus. Verū hac ex Speculo isto melius, quam meis verbis, intellegetis. Quod Illustrib. vestris nominib. placuit inscribere, nō ut inde cognoscatis, quā difficile quāue laboriosū opus sit, Reip. habenas moderari, qui iā domi ab ineunte aetate docti, & prater ea longo rerū usu plurimāq. experientia satis id perspectum habetis, sed ut existat publicum aliquod testimonium constantis meæ in vos ut prope dicam incredibilis, ut vere dicam summa obseruantia.

Et Tua quidem Generositati, ILLVSTRIS POPPELI,

EPISTOLA DEDICATORIA.

eo commendatior hic Auctor esse debet, quo Seneca tui est studiosior & addictior. Tui, inquam, Seneca, cuius dicta & scripta sic auide hausisti, sic tenaciter memoria mandasti, ut Pythagora *μεμνημένος* iam fabulosa esse desierit, quum senex Annaei anima in te delapsa reuixisse videatur. Nec ipse tantum in lecti-
tandis & quasi heluadis sapientissimi Romani Prin-
cipis, eiusdēq. Aulici, egregie cordatis & catis sentē-
tiis acquiescere voluisti, nisi eas etiam Illustri ac Ge-
nerose Coniugi tuae commendares conciliaresq. Cu-
ius Generositas (credite Galli ac Itali, & cedite) sum-
mum Philosophorum parentem & Apostolorum
coetaneum, velut optimum viuendi magistrum, in
tantum amare perhibetur, ut soleat

Nocturna versare manu, versare diurna.

Rem loquor, sed infra famam, nec supra fidem, quam
constātissimo Regiorum Cōsiliariorum relatu acce-
pimus. Et propemodum infelices occupationes meas
putabā, quibus Praga districto non licebat per tem-
poris angustias ad splēdidissimam tuam Aulam ac-
cedere, & dignari tā Illustris matrona, supraq. sexus
Arctoi cōsuetudinē sapiētis, generoso affatu, ad quē,
parario ac p̄xenet a Nobil. & Amplifs. Iohāne Bapti-
sta Eyseno a Lehrberg, IC. & S. Cas. Maieft. Cōsilia-
rio, utriusq. nostrū, tua qdē Generositatis obseruan-
tissimo, mei vero amātissimo, perhumaniter me (in-

uitus id narro, inuidia declināda causa; dicam tamē,
 rumpatur ut ilia amulis meis) non semel inuit aue-
 ras. At ô infeliciore longe morbum meum, qui me la-
 tantibus & iubilantib. amulis meis Francofordia in
 tantū afflixit, ut pedib. ager vix rheda iisdē inuidio-
 sa ad Palatium Imperiale vectus, in Antecameram
 lētis gressib. repere, ibiq. tuo alloquio, dilata interim
 pra grauiorib. Imperii negotiis Sacra Imperatoria
 audietia, nonnunquā frui potuerim; ne dū tua mēse,
 aut aliorum Principum ac Dominorū, clementissi-
 me (absit iactantia dicto) ac gratiose vocantiū, cōdi-
 cere. Sed & Tua Generositas hanc meā excusationē,
 oculatus vid. infirmitatis mea arbiter, corā admisit;
 & ego nunc firmior redditus, eius rei sempiternum
 hoc mnemosynon statuo; testorq. apud oēs, ad quos
 forte hac scriptio mea peruentura est, me cum Tua
 Generositati, tum ceteris omnib. Bohemia Proceri-
 bus, ea debere, quae rara & prope incredibilis comi-
 tas, beneuolentia, humanitas, & officia, quibus me
 sibi (quamquam nomine Illustrissimorum meorum
 Principum) quascertatim deuincire studebant, me-
 ritissimo commerentur. Quid enim memorem Illu-
 strissimum Sigismundum Bathorium, S. Rom. Im-
 perii Principem, & Regni vestri Wladickam? quo
 nemo Christianorū Principum, dū adhuc Transyl-
 uania, Valachia & Moldauia imperio potiretur,
 celebra-

EPISTOLA DEDICATORIA.

celebratio in orbe uniuerso exstitit, siue rerum gestarum magnitudinem spectemus, seu gloriam inclita fama. Quid Illustres ac Generosos Bohemix Wladickas in genere? quid nominatim Baronem Adamum Iuniorem à Wallenstein, Dominum in Gratz trans Sazaw & Loositz, S. Cas. Maiestatis Consiliarium & Supremum Regni Bohemia Prouincialem Maiorem domus? Quid Carolum Comitem à Wartenberg, Dominum in Rohosch & Skal, S. Cas. Maiest. Consiliarium: & filium eius Ioannem Georgium, eiusdem Maiestatis Cameraarium, qui generis ac virtutis prestantia meruit, ut sibi Illustrissimi quondam Principis ac Domini, Dom. Ottonis Henrici Comitis Palatini Rheni, & Ducis Bauaria, &c. filia desponsaretur; quorum utriusque parentis & filii, gratiosa gratiatam familiariter usus sum, ut in consuetudinem pane quotidianam verteretur? Quid Comitem Henricum Matthæum à Thurn, Dominum in Welisch, & Carološteini Burggrauium; illum (inquam) Turcarum terrorem? Quid Baronem Slawatam à Chum & Koschmberg, Dominum in Straschi, Hradzy, Teltzsch, & Carlstein, S. Cas. Maiest. Consiliarium? Quid Baronem Leonhardum Collo-nam à Fels, Dominum in Engelsburg, &c. S. Cas. Maiest. Consiliar. & Capitaneum Maiorem? Quid

Baronem Wenceslaum Wilhelmum à Rupa, Dominum in Trnauan & Zitenic, illud politicissimi & litteratissimi ingenii decus. S. Caf. Maieft. Confiliarium? Quid Baronem Adamum à Trautmansdorff, &c. S. Caf. Maieftat. Camerarium, Confiliar. Bellicum, Capitaneum Maiorem, & Hadschierorum Aulicorum Praefectum? Quid Comitem Carolum Hannibalem Burggrauium à Thona, S. Caf. Maieft. Camerarium, Illustriſſimi Abrahami in Sileſia prapotentis Comititis, Domini mei ſingulari affectu propenſi & gratioſi, filium acheredem? Quid Comitem Henricum Slickium à Paſſaun, Baronem in Weiſſkirchen? Quid Baronem Ehrenfridum à Munchwitz, &c. S. Caf. Maieft. Confiliariũ & Aſſeſſorem in ſanctiori Conſiſtorio Imperiali? Vehe-
 menter ſim iniurius oportet, & bipedum ingratiffimus, ſi ullo unquam tempore paterer tantam offici-
 orum memoriam ex animo meo elabi. Nec etiam pro homine Germano facerem, ſi id faxim ſciens.

Etenim Sclauicum Germanis iam ab antiquiſſimis temporibus in vnam nationem, vnã ciuitatem, vnum ius ac leges, vnã fraternam ſocietatem & germanam vnionem coaluerunt, quemadmodum Eyſenus noſter & ego fuſe demonſtrauimus in iis Conſultationibus, quas à Legatis Regia Maieſta-

EPISTOLA DEDICATORIA.

iestatis rogati, pro Serenissimi Regis & Corona Bohemorum iuribus ac privilegiis, cum Norimberga, tum Praga rescripsimus. Ut vehementissime fallantur, & tam in Bohemicam gentem, quam ipsum sacrum Imperium, sint iniuri, qui processus & appellationes ad Aulam Pragensem ea de causa improbare atque inhibere sat agunt, quod (ut aiunt) extra Germaniam sit constituta. Qui si scirent, tantum Imperium, quantum Germani possident, ex bona parte Bohemorum coniuncto sanguine participeq; virtute partum esse, & hinc Regnum Bohemia iura Electoratus nactum, ipsum Regem in S. Imperii Archipincernam adoptatum, profecto aliter sentire inciperent. Et ut silentio prateream Regni vestri Proceres, Rosenbergios, Wartenbergios, Hasenburgios, Wilhartizios, Slickios, Lyppanos, Swanbergios, Colditzios, alios, qui Liberis Imperii Comitibus ac Baronibus adscripti, (haut scio an obseuda, qua ab Imperio forte possidebant, an alia in Imperium prestita officia) non modo Imperialibus Recessibus & Decretis generalibus subscripsisse, verum etiam in ipsis Comitibus inter Status immediatos adsedisse memorantur: Quis monumenta historiarum, & Imperii nostri documenta legit, nec sibi notavit Episcopum Pragensem, qui nunc Archiepiscopus à Rege Bohemia eximitur,

MELCHIORIS GOLDASTI

olim inter Imperii Principes ius sedendi & suffragandi in Comitibus Germanicis, seu Principem Germanum, habuisse: cuiusque instituendi ac inuestiendi ius penes Imperatorem fuisse? Quis nescit Ioannem Episcopum Luthomischlensem sub Carolo IV. & Michaellem de Paceſt Canonicum Pragensem, Casparumque Slickium, homines Bohemos, sub Sigismundo Imperatore, S. German. Imperii (ancel-lariorum munere perfunctos esse, & Archiepiscopi Moguntini vices in Aula Casarea geſſiſſe? Quis non audiuit, ciuitatem veterem Pragensem in Liberis & immediatis Imperii ciuitatibus olim fuisse recensitam? qua nunc Electorum Bohemia sedes ab Episcopo Bambergensi (ut fertur) in feudum recipitur, tamquam Heidelberga (aliis est Amberga) à Palatino, Wittenberga à Saxone, Custrinum à Brandenburgio: qua & ipsa quondam Ciuitates Libera solum Imperatorem immediate recognoscebant, sicut alibi à me prolixius ostenditur. Quin immo quis ignorat, nisi hospes in rebus Imperialibus, bis in Ciuitate Pragensi Comitia Generalia ab Imperatore & Ordinibus Imperii celebrata fuisse? Sed quorsum me abripit amor gentis Bohemica?

Ad tenunc, GENEROSE SCHOENACHE,
seſe conuertit oratio mea; qui me per viſum um-
quam

EPISTOLA DEDICATORIA.

quam nec notum, tamen ex sola librorum meorum recordatione, accedente praesertim Casareorum Regiorumque Consiliariorum, quorum consuetudine impense delectabar, beneuola commendatione, in fauorem Gratiae tuae recipere, & illustri conuiuio aduentitio (id à me commemoratum intellegas velim, nō ex vlla ambitionis cupiditate, aut studio vana & inanis gloria, sed ineuitabili necessitate, adquam me cauteriata aduersariorum meorū impudentia adegit, ut eorum mēdacia dicta & criminosa calumniae, quas publice in me petulanter sparserunt, Tu atuiq; similiū Heroum ac Magnatum cōtestatione retundantur) conuiuio inquam, ad quod cunctos Regia Maiestatis Consiliarios inuitaueras, hospitem esse Praga volueris. Et bene sit Eyseno nostro, cuius hac cuncta gratia est. Ego vero iam collectis sarcinis in procinctu eram, domuitionem parans. At qui, ais, eam vicem promittebas Francofordiae in Comitibus Electoriis rependere? Ita est: sed quam ibi Hygyana parum propitia vixerim, oculatum testem moneam scilicet si me excusare apud Tuam Generositatē velim, quod tam benigniter etiam illic qua in praesentiarū, qua per amicos arcessitus; ad hospitium tuum non interuiserim. Nunc autem pristinae valitudini, Dei OPT. MAX. ope ac comitate, restitutus, nihil prius nec antiquius habui, quam ut nomen meum expedirem.

*Quod ab obliuione Generositatis Tuae fors est
 ut vindicare debeat Hispanus iste Episcopus, qui
 Referendarii munere in Aula Romana functus est.
 Quo vel solo nomine Generositati tuae ingratus esse
 non potest, quia Referendarius fuit & apud Principem
 prapotentissimum, & in Curia totius orbis fre-
 quentissima. Floruit autem hic Auctor sub Friderico
 III. Imperatore circiter annum Christi MCC
 CCLXV. Habet quidem multa praeclara & lectu
 dignissima, nec minus iucunda, unde me non parum
 profecisse ingenue fateor, sed & nonnulla habet, quo-
 rum tractatio ut blandidica est & assentatoria, ita
 ad Domini est nutum ac voluntatē, quam offendere
 verebatur, suauiter conficta. Nec enim eo nomine
 adulationis arguendus est, quod etius, quem sibi ad-
 monendum sumpsit, benevolentiam mellitis verbo-
 rum globulis & quasi sesamo ac papauere sparsis, con-
 ciliare studuerit. Sic frustra piscator moraretur ad
 scopulum, nisi eam hamis imposuerit escam, quam ap-
 petere pisces solent. At ego vero numquā licere mihi
 patiar, ut in alienis scriptis euiandis & corrup-
 pendis, improbabili aduersariorum meorum more,
 mango fiam. Quis sic ingeniatus sum, ut tamen si li-
 bris vetustis eruendis ac promulgandis me natum ac
 destinatum putem, tamen nefas esse ducam vel sylla-
 bulam in alienis scriptis obediē, nedum integra ver-
 ba,*

EPISTOLA DEDICATORIA.

ba, phrasas, sententias, & periodos mutare, castrare, seu (ut media etatis verbo utar) charaxare, & prorsus expungere. Nec moror aduersarios, qui etiam mihi dicam scripserunt, cuius ipsos nouimus reos esse & obnoxios. Nam absq; publicis diplomatis & documentis foret, quibus fides mea uero vincitur, est mihi conscientia mea mille testes. Quam satis mihi est, si Supremo Cancellario, si Generositati tuae, si denique eiusdem Strenuissimis, Nobilissimis & Amplissimis Collegiis, S. Cas. & Regie Maiestatis Consiliariis, D. Doct. Eyfeno, D. Ottoni à Nostitz & Equiti, D. Doct. Felici Riedingero, D. Doct. Ioanni Martino Rebmanno, D. Doct. Ottoni Melandro, D. Doct. Ioanni à Laber, Dn. N. à Stang Equiti, &c. necnon D. Ioanni Plateisio à Platenstein Secretario, D. Leandro Ruppelio Agenti, D. Bartholomaeo Brunnero Concipista, &c. amicis meis suauissimis & iucundissimis, approbare possim. Quorum apud omnes bonos & cordatos viros vel unius iudicium plus valere debet, quam centum uisilitigantium meorum maledictum.

Eo etiam magis, quia industria mea specimen atq; studium in iuuanda communi patria, & ornando sacro Imperio, Illustrissimis, Illustribus, Generosis, Nobilibus, & Spectabilibus Silesia ac Lusatia, Ducibus, Principibus, Comitibus, Baronibus, Equitibus & Ciuibus, gratum acceptum uel esse, abunde mihi fidem Legatorum fecerunt, quos ad humanitatem & liberali-

tatem factos Praga sumus experti: Nec rari nobis sermones de Ordinibus Silesia, eorum origine, statu, priuilegiis ac libertatibus fuerunt; quibus saluis, sese patrocínio ac protectioni Regum Bohemia aduersus vim & incursiones Polonorum, post eorum ab Imperio defectionem, cum consensu & scito Imperii, commendauerunt. Sane Episcopum, Duces, & Ciuitates quasdam Silesia fuisse olim immediatos Imperii Status, ex Diplomatribus vestris & Ordinationibus, quas in Collectione Constitutionum Imperialium tomo primo nunc publicamus, euidenter elucescit. Et de Marchionibus quidem Budissinensi ac Gorlicensi in Lusatia; Ducibus Vratislauiæ, Lignicensi, Brigeni, Saganensi, Oppolia, Ratibaria, Carnouia, Swidnicensi, & Teschinensi in Silesia: Ciuitatibus item, Budissino in Lusatia, Vratislauiæ, Stinauiæ, Glogouia, &c. in Silesia, ex actorum publicorum & historiarum monumentis compertissimum est. Quid multis? Nonne Episcopum Vratislauiensem computant inter vetustissimos Imperii Germanici Principes? Et in Caroli IV. Imperatoris Curia Pretislaum Episcopum; in Sigismundi, Michaellem Canonicum Vratislauiensem, officio Cancellarii Imperialis praefuisse, in Constitutionibus Casareis obseruamus. Quid autem vetera commemoro & saculo nostro ignota? Qui nouit
Domini-

EPISTOLA DEDICATORIA.

Dominum Haniwaldum gente esse Silesium, is eundem nouit à Secretis fuisse Imperialibus, & etiamnum esse Consiliarium in sacro Imperiali Consistorio.

*Hac habui, ILLUSTRES ac GENEROSI DOMINI, quæ pro horum conditione temporum ad vos perscribenda inter varias meas occupationes duxi. Si recte dixi, compos factus sum voti mei: sin, dicta indicta sunt. Faxit Ioua Opt. Max. ut vestris studiis atque consiliis fiat gloria in supremis Deo, & in terra pax, erga homines beneuolentia. Quo voto meo finio, & ut me gratia vestra in posterum quoque commendatum habeatis, id Generositates vestras obnixè veneror. Datum Hano-
uia, a. d. X. Kalend. Febr. A. C. N.*

∞ I O C X I I I.

PAVLO BURGER,
ECCLESIAE MAIORIS ARGENTI-
nensis Summissario, viro integerrimo, Ioannes
Botzheimus Decretorum Doctor
Salutem.

NOVISTI, amicissime Paule, Illustrem Do-
minum Philippum de Duno & Lapide su-
periori, insignis Ecclesiae nostrae Argenti-
nensis Praepositum, utriusque nostri aman-
tissimum. Hunc ego satis admirari non possum, ho-
minem tanta nobilitate splendentem, opibus felicem,
& in Principum aulis aditum; praeterea cui nil, quod
velit, desit; adeo & eruditorum esse & eruditionis affe-
ctatorem. Is cum mense proximo hic apud nos de-
geret, frequenter libros & cultiores historias sibi affer-
ri curavit, quibus & ingenium suum exercitaretur, &
animus recrearetur. Cui dum infiniti codices deferun-
tur, vnum sibi ex omnibus delegit, qui *Speculum huma-*
nae vitae inscribitur: in quo commoda & incommoda,
laudes & pericula omnium statuum miro ingenii arti-
ficio describuntur; quo tanquam exemplari rerum o-
mnium agendarum vteretur. Mirum est quanta sedu-
litate, quanta frequentia, quanto affectu librum hunc
lectitauerit homo claritudine natalium insignis; cum
plerique huius generis hominum ex magna parte (hac
maxi-

EPISTOLA.

maxime tempestate) totos se beluinis voluptatibus dant, osoresque sint & studiorum & studiosorum. Hic autem, ut à cunabulis fere incessanter inter literas literatosque educatus, ita ingenium suum ingenuis disciplinis semper excoluit, semperque cum doctissimis versari voluit. Vnde & id sibi peculiare assumpsit, ut ubique hominem singulari doctrina excellere audiat, is ab eo ad mensam amicitiarum parentem vocetur, amicitiamque cum eo familiarissime contrahat. Hoc Ioanni Keisersbergio concionatori tam facundissimo quā doctissimo; hoc Iacobo Wimphelingio præceptoris meo amabilissimo; hoc innumeris aliis omnifariam doctissimis viris contigit. Inde & mihi (qui nondum primæ literarum rudimenta degustavi) cū homine magnifico fluxit iucundissima familiaritas, qua ut peculiariter glorior, ita maxime delector. Tu vero, Paule, ab eo ita diligaris, ut sine te rarissime disscumberet: mutuiter autem tu adeo hominem obseruas, adeo suspicis, adeo veneraris, ut hunc librum (qui tunc vnicum Domini solatium erat) non tam ob egregiam materiam sententiarumque maturitatem, quarum refertissimus est, quam ob Domini illius fauorem amoremque formis elegantioribus excudendum impressori tradere velle videbaris. Sed quid moræ interciderit, nescio profecto, an negotia illa domestica & forensia, quæ plurima habes, te interceperint. Perge, qua cepisti, studiosis benefacere, maxime cum & doctorem & doctrinarum tuipse virtute innata sis obsequentissimus. Non deerit tibi opera Iacobi Wimphelingii præceptoris mei, viri

EPISTOLA

vndecunque doctissimi, qui curabit, vt non minuse-
mendatus liber ab impressore exeat, quam elegans. Va-
le, & que inter tuos habeto. Datæ die VI. Ianuarii, Anno
septimo supra M. D.

PAVLVS BVRGERVS LIBRVM
hoc titulo proscriptit.

SPECVLVM VITÆ HVMANÆ.
IN QVO DISCVTIVNTVR COMMODA ET IN-
commoda, dulcia & amara, solatia & miserie, prospera & ad-
uersa, laudes & pericula omnium Statuum.

AVtor nobilissimi huius libri fuit Dominus Rodericus Epi-
scopus Zamorensis, Castellani & Referendarius Papæ
Pauli II. in Theologia, vtroque iure, & omnibus aliis bonis lit-
teris doctissimus, summus Christianæ religionis cultor &
defensor, feruentissimusque & constantissimus
salutis animarum zelator.

RODERI-

**RODERICI EPISCO-
PI ZAMORENSIS, CASTELLA-**

ni & Referendarii Papæ Pauli II.

**S P E C V L V M
VITÆ HVMANÆ**

AD SANCTISSIMVM ET BEATISSIMVM
Dominum, Dominum PAVLVM Secundum, Pontificem Ma-
ximum, Liber incipit dictus Speculum vitæ humanæ; quia in eo
cuncti mortales, in quouis fuerint statu vel officio, spiritali aut
temporali, speculabuntur eius artis & vitæ prospera & aduersa, ac
recte viuendi documenta: editus à **RODERICO ZAMOREN-**
SI, & postea **CALAGARITANO EPISCOPO HISPANO,** eiusdem Sanctitatis in Castro suo Sancti
Angeli Castellano.

Sanctissimo ac clementissimo in Christo Patri ac Do-
mino, Domino Paulo Secundo, Sacrosanctæ Romanæ
& vniuersalis Ecclesiæ summo Pastori & Pontifici
Maximo, eiusdem sanctitatis obsequentiſſimus seruulus &
familiaris, Rodericus, Episcopus Zamorensis Hispanus, ac
castri sui sancti Angeli de urbe fidelisſimus Castellanus & Re-
ferendarius, seipsum cum vtriusque hominis humilima incli-
natione. Cogitanti mihi hanc munitissimam Romanæ tuæ
urbis, immo totius orbis amplissimam sancti Angeli arcem,
tuæ sanctitatis iussu, tuæ auctoritate & dignatione custodienti,
ubi aliquid oris superest, quid dignum tuæ Sanctitati in his tui

PRÆFATIO AVCTORIS

felicissimi pontificatus beatis initiis offerre valerem : video nil omnino mihi ceterisque mortalibus superesse, quod aut ad laudem, aut ad commonitionem pertinere possit. Tecum enim habes ea omnia virtutum ornamenta, quib. omnis laus recte comparatur. Tecum denique tanta insidet sapientia, quin potius à natura innata ingenii vis, tantaque prudentia rerumque omnium experientia, ut nullis egeas exterioribus adiumentis. Verum ego gloriæ & nominis tuæ sanctitatis anidissimus, existimaui paululum aliquid (utinam dignum) tuæ sanctitati offerre; in quo dum ingens occupationum sarcina paulisper tuam Sanctitatem respirare permiserit, habeas in hoc opusculo tuæ Sanctitati dicato, aliquas paruitatis intellectus mei ineptias, ut in eis recreationis gratia, non tam delecteris, quam tui acutissimi ingenii calamo atque censura emendes & corrigas. Dignum namque existimaui, ut cuius corpusculi mei membra tuis obtines obsequiis perpetuo deuincta, eius, etiamsi quæ sunt animi vires possideas, & dum exterioris hominis partes sese ad tua deuouent obsequia, debilis quoque & rudis interior intellectus ad tuæ Sanctitatis gloriam non dormisset, quoset, ut eidem tuæ Beatitudini seruiat uterque meus, immo tuus homo.

Venit igitur sæpe in mentem, Beatissime Pater & Pontifex Maxime, quam varia quamque diuersa sunt cunctorum hominum studia, variæ artes, varia officia, varia denique viuendi genera, adeo ut anxius dubiusque sit plerumque hominibus vitæ suæ modus, dubia in hoc seculo viuendi fors, nec satis eligere possint, quod tandem vitæ studium, quam viuendi formulam securius assequantur. Cum enim humanus animus non modo bonum simpliciter, sed (teste Aristotele) sum-

mum

AD PAPAM PAVLVM II.

mum bonum naturali conamine appetere videatur: nihil certe deesse videtur, nisi recta eligendi ratio. In ea igitur nonnunquam error contingit, illa potissimum ratione, quia cum iuxta Philosophi sententiam electio non nisi de præcognitis existat, pro eo quod nemo, quod ignorat, eligit; ut ille in recte eligendo deficiat necesse est; qui diuersorum statuum viuendique generum dulcia & amara, commoda & incommoda, non satis agnoscit. Ut igitur noscamus, quales à nobis artes, qualia studia, qualiaue conuersandi aut viuendi genera, dum in hoc fallaci seculo vagamur, & quo ordine deligenda sectandaque sint, decreui pro modulo ingenii, quod in eare sentio, tua sanctitati dedicare, tuoque nomine consecrare. Nec ab re quidem, cum enim ad te unum omnis vitæ modus, omnis mortalium status, & humana conuersatio atque conditio referatur, tuque cunctorum mortalium sis norma, moderatio & speculum, tu denique cunctorum viuendi generum non solum distributor sed emendator existas; recte tibi uni huiusmodi opusculum dirigendum atque dicandum fuit, eritque eius libri titulus Speculum vitæ humanæ. Nam veluti in materiali speculo unusquisque non modo sua, sed & aliorum intuetur aut pulchra aut deformia, & quid commendandum quidue emendandum sit: sic in hoc opusculo, tanquã in limpidissimo speculo, liquido conspiciet dulcia & amara, recta aut deformia cuiusvis status & artis totius humanæ vitæ; quo fiet, ut apertissime agnoscat, quid in seipso ac vita & sorte sua, & demum cæterorum mortalium laudandum, sequendum siue reprehendendum & corrigendum sit.

Quemadmodum igitur (teste Gelasio Papa) duo sunt vitæ genera, quib. orbis principaliter regitur, & omnium mortalium conuersatio pender: aliud vid. eorū qui tēporaliter, aliud illo-

PRÆFATIO AVCTORIS

rum qui spiritualiter viuunt: ita duos sub breui compendio tractatus attingam. In primo quidem de cunctis temporalibus statibus seu secularibus artibus & viuendi formulis breui agemus, incipientes à summo temporalis culmine, videlicet. *Casarū, Regum & Principum*, usque ad bubulcos & infima vita homines. Et in ea parte diuersos hominum viuendi modos in temporali statu degentium, variaque artium & occupationum secularium genera, quibus homines sese ad plurimum conferre aut implicare solent, breui perstringam. Et quid in eis anima profectus, aut temporalis honoris, vel commodi aut incommodi, laboris vel periculi lateat, succinctius atque exquisitius quam potero explicabo. Tandem de cunctis fere malis, suppliciis, pœnis, mortibus ac damnis corporalibus, nec non de cæteris intrinsecis & inuisibilibus ærumnis ac mentis afflictionibus, quæ ab origine mundi homines tam boni & innocentes, quam mali & peccatores magis excellentes, & nominati in omni statu existentes perpepsi sunt, & indies mortales omnes patiuntur, & de causis eorum ad utramque partem breuissimè subiiciam.

In secundo libro de spiritualis vitæ statu & viuendi genere sermo erit: qui cum binarius sit, quorum alter Ecclesiasticus, alter Regularis siue Monasticus existat, de utriusque principijs, natura & origine, auctoritate, institutione ac differentia; nec non necessitate & utilitate, excellentia & prerogatiuis, sed & de eorum aculeis, laboribus & periculis agendum erit. Incipiendo à summo Pontifice, qui omnium statuum vertex est, atque totius vitæ humanæ exemplare speculum existit: Deinde cæteros omnes Ecclesiæ status & ordines particularius discutiam; ut tandem discat humanus animus, & si ubique sit labor & dolor, ubique ad virtutes ac vitia via

fit,

AD PAPAM PAVLVM II.

fit, cui potius vacare & se accommodare debeat, ut tandem
 dulcorem simul & amaritudinem cuiusque status considerans,
 illam viuendi normulam eligat, quæ & fragilitati naturæque
 suæ potius conueniat, minusque periculi, sed pluris habeat au-
 xilii ad bene beateque viuendum. In quibus quicquid à me
 differendum erit, tuæ Sanctitatis, quæ fidei magistra est, cor-
 rectioni & emendationi remitto: quam Altissimus
 diuine & feliciter protegat &
 conseruet.

PRÆFATIO UTILIS,
IN QUA AVCTORIS HUIUS LIBRI
vita, eiusque studia recoluntur, & tandem admonet ad studia
legis diuinæ potius quam humanæ, & de effectu legum
humanarum, & de ordine procedendi
in hoc libro.



VERVM Beatissime Pater, vt aptior dulcior-
que sit circa præmissa dicendi ordo, exper-
tam à me in eage luctam, atque in me ipso
exercitatum dissensionem interferam, tene-
boque typum Dialogo similem; dum hone-
stum quendam atque modestum altercations
modum inter piam matrem ac nonnul-
los contribules & amore mihi coniunctos dudum habitan., cir-
ca vitam eligendam meam breui perstrinxero. Quo fiet, vt dum
rem gestam fideliter enarro, pollicitum persoluam ordinem. At-
tingo iam breuem, sed iocundam palæstram.

Patre itaque vita functo, infantulum me pia mater ad lite-
rarum studia destinavit; vbi post prima illa literarum rudimen-
ta Dialecticæ & Philosophiæ laudatis studiis, non quidem vt de-
bui, sed vt valui, parumper operam dedi. Rursus post aliqua tem-
poris interstitia in eis consummata varix diuersæque inter piam
matrem & contribules ac consanguineos, opiniones fuere. Ma-
ter siquidem, vt erat totius sanctimonix & honestatis sectatrix, ac
eximix deuotionis & virtutis cupida, & optabat quam maxime
ad spirituales me scientias conferre deberem. Illi e contra: Quis
enim, inquit, patris nomen aut tenebit aut suscitabit? Nam
cum pater inter illius castri conciuēs præcipuus & populi quod-
dam caput fuerit, elaborandum est vt filius patrem imitetur. De-
inde quis generis atque familiæ honorem tenebit? quis rursus
matri

AD PAPAM PAVLVM II.

matri viduæ, fratrum sororumque pupillorum necessitatibus
 compatiatur? quis denique totius familiæ & domus onera
 supportabit? Quare suadebant illi, vt ad seculares me scientias
 conferrem, quæ suis sectatoribus honores comparant, summas
 amplasque afferunt diuitias. Clamabat tamen pia mater cum
 Hieronymo ad Demetriadem virginem, dicens: *Instruendam in
 teneris annis debere esse animam diuinis eloquiis, vt coruscante verbo Dei,
 Diaboli astutia repellantur, vt adolescens resistere sciat, quemque hostem
 pro residuo vite habiturus est.* Addebat rursus mœsto animo, in
 diuina lege paucos admodum, sed in prophanis studiis huma-
 nisque legibus plurimos laborasse; secularibus denique ar-
 tibus, quas recte *seculi lucratiuas* vocant, gymnasia plena ef-
 se. Quare dolebat apprime, quod omnes fere legem Dei a-
 spernarentur, in qua cum Rege & Propheta iubentur *meditari
 die & nocte*. Quippe veluti cæci atque ignaui, ita passim dere-
 linquerent fontem aquæ viuæ, & foderent in cisternis dissipatis,
 secularibus videlicet disciplinis, quæ nec dulces nec vias a-
 quas continere possunt. Rursus illi, vt Iuridicus sapientias se-
 ctari deberem, summopere suadebant; Canonicam videlicet &
 Ciuilem: quoniam habitus ille Iuridicus eius generis erat, qui
 votis piæ matris faciebat satis, vtpote quæ, si ad sensum legisla-
 toris leges ipsæ referuntur, normam bene recteque viuendi tribu-
 unt, docentque quo virtutis & rationis tramite, quo disciplinæ
 vigore Ecclesia atque mundus ipse regatur. Sed & præbent do-
 cumenta atque veras explicationes illius iuris naturalis, non scri-
 pti, quod cum Apostolo *insitum est in cordibus nostris*, & tanquam
 lumen vultus diuini signatum est super nos: alterum, videlicet *non
 ledere*, & ius suum unicuique tribuere. Cui siquidem iuri natura-
 li non distinctum, quinimmo idem videtur esse ius diuinum
 cunctos mortales commonens, vt quæcunque volumus faci-
 ant nobis homines, ea eisdem & nos faciamus. Tandem victa
 est mater pia: at si vinci pietas non potuit, propinquorum suasio-
 nibus timida satis acquieuit. Decretum est ergo, vt eis ipsis stu-
 diis vacarem. Commonebat tamen maternus amor, vt inter hu-
 mani iuris regulas, diuini nequaquam essem immemor. Et
 licet (vt dicebat) pulchrum admodum sit de iustitia humana

PRÆFATIO AVCTORIS

agere, necessarium tamen sibi videbatur diuinam non obliuisci. Addebat denique, quod cum contra ius iniuria fiat, tunc me rectum verumque Iuristam crederet, si nullam Deo iniuriam inferrem. Quippe tunc optimus Legista euaderem atque præclarus, si sua immortalī Deo iura, suasque leges immaculato calle seruafsem. Tandem pro quodam (vt ita dicebat) iocali semper memorabili illud Propheticum mihi summopere relinquebat: *meditandum die ac nocte*, quia *beati immaculati in via, & qui ambulant in lege Domini*. Subiiciebat tamen postremo, vt ab illis penitus studiū animū abstraherem, quæ non veritate, sed fabulosis figmentis homines, & præsertim iuuenes, oblectantur, vt recte cum eodem Propheta dicere possem: *Narrauerunt mihi iniqui fabulationes, sed non vt lex tua.*

Accepta igitur materna benedictione, aptatisque ad studia necessariis rebus, Salamantinæ me contuli Vniuersitati, vbi per decem annos eisdem luridicis legislationibus vacauī: memor tamen Sapientis præcepti: *Ne dimittas legem matris tue*. Nonnumquam inter sedula iuris exercitia, veluti cuiusdam solatii gratia, sacrarum literarum lectioni me raptim conferebam. Sed & Philosophiæ, præsertim morali, dulcedinem tanto ardentius prægustabam, quanto vltra ea oblectamenta, quæ doctrina ipsa ad morum informationem adducit; plenius tamen atque vberius cūctorum iurium legumque humanarum verum intellectum elicere videntur. Adde quia (vt semper mihi visum est, idque & Cicero in *lib de legib.* ait) postergatis morali Philosophiæ doctrinis atque principiis, neminem contingit in iure ipso eruditum præclarumque euadere. Tandem vero expletis studiorum cursibus assuetis, Doctoratus insigniis extiti (vtinam digne) rogatus.

Sed illico grandis admodum inter matrem piā & consanguineos ac attinentes concertatio suborta est: sed longe maior inter vtrumque meum hominem conflictus inualuit. Instabat enim tempus, petebat ætas, ipsa quoque ratio & affinium expectatio poscebat, vt tandem aliquem futura vitæ modum eligerem. Et quia, teste Gelasio (vt præmisimus) duo sunt viuendi genera, quibus hic totus orbis regitur & sustentatur; alterum eorum, qui se spiritualiter in sortem Dei dedicant: alterum eorum, qui se secula-

AD PAPAM PAVLVM II.

cularibus præbent negotiis: alii Ecclesiastici, alii vero Laici. Ea de re illi, ut secularem vitæ formulam captarent, quia eam protēnitores ipsi honestissime seruarunt. Mater vero, veluti quæ nedum corpusculum intra eius viscera duxerat, sed & educauerat, atque ad eum usque statum perduxerat, & ob eam rem plus diligebat, suadebat non statim à me eligendam fore vitæ formulam: sed hortabatur, ut prius matrem ipsam ex acie vna, cæteros vero consanguineos & amicos ex altera audirem, altercantes super cunctas vitæ humanæ artes & viuendi modos: incipientes à statu temporali, qui primo mortalibus occurrit, ut illius falsis prosperitatibus & veris calamitatibus plene conspectis, tandem ad spirituales statum (qui optimi finis rationem habere videtur) me, ut optabat, transferrem. Acquieuerunt affines discussioni, acquieui & ego. Illi ergo, ut animo tenero dulcorē in status & vitæ temporalis facilius imprimerent, decreuerunt à summo terreni status culmine, Imperiali videlicet & Regali inchoare, ut ex illius sublimitate & felicitate, quæ multos indices facit felices, ad aliquem temporalem viuendi modum allicerent. Tandem vero cæteros alios terrenos viuendi modos tangere & discutere mentis erat, usque ad vltimos bûbulcos, necnon ad iustitianos homines.

His igitur pro quadam præfatione introductis, accedendum est ad rem ipsam. In duos igitur libellos (ut præmisimus) hic liber diuiditur: in quibus discutiuntur & examinantur materię infra scriptæ, ut in tabula sequenti apertius declaratur.

PRÆFATIO AVCTORIS

DE MATERIIS PERTRACTANDIS IN primo libro, & de tabula Capitulorum eius.

PRIMVS liber agit de cunctis statibus & exercitiis siue viuendi modis temporalibus, incipiens à Cesare a potestate & Regali dignitate, quæ culmen habet omnium temporalium statuum usque ad bubulcos ac infimas artes exercentes. In quo discutiuntur & examinantur commoda & incommoda, dulcia & amara, fauores & labores, solacia & miseria, facilitates & difficultates, prospera & aduersa, quietudines & pericula vniuscuiusque status & vita huius temporalis seu forme viuendi in hoc seculo.

Cap. I. De primo ac sublimiori statu, temporali videlicet, Imperiali & Regali, ac aliorum Principum: & de status culmine & excellencia, ac de illius felicitate & prosperitate, necnon de eius commoditatibus, prarogatiuis, laudibus & praconiis.

II. De infelicitate status Imperialis & Regalis, & plurimis curis, oneribus, miseriis, calamitatibus atque incommodis istius status; & quæ Reges & Principes comitantur: & tandem de innumeris periculis principantium.

III. De alio viuendi modo in hoc seculo, videlicet de exercitiis & vita Curialium, & eorum qui Principum fauores & officia sequuntur: & de laudibus & commendatione huius status.

IV. De laboribus, oneribus & incommodis ac periculis status & vite Curialium; & fauores, curias seu officia Principum sequentium. In quo capitulo & in tribus rubricellis sequentibus, specialiter agitur de septem vitiis, quæ Officiales Regum & Curiales comitantur. Agitur etiam de calamitatibus Procuratorum Regum & alia officia exercentium; & an in curiis Regum acquiratur verus honor.

V. De nobilitate generis, scientia & morum: & quid sit, & quomodo ortum habeat, & an à Regum sola voluntate & concessione acquiratur.

VI. De multiplici nobilitate, & an sola generis nobilitas in deferendis honoribus praeferatur strenuitati, aut scientia, vel virtuti hominis ignobili genere.

VII. De laudibus & praconiis nobilitatis generis, & de illius virtutibus.

VIII. De vanitate nobilitatis humana, & de eius vitiis & Nobilium excessibus.

AD PAPAM PAVLVM II

cessibus, & de falsa nominatione nobilitatis, & de illius incommodis.

IX. De armata militia & exercitio armorum, & de laudibus & commendatione huius exercitii, & an vacantes armis sibi veri cines & partes ciuitatis.

X. De laboribus & oneribus atque incommodis vite militaris ac exercitii armorum, & de periculis huius status; & de causis, quibus hoc exercitium dissuadetur.

XI. De vita & statu coniugali in sancto & immaculato matrimonio, & de utilitate, laudibus vite coniugalis super alia viuendi genera.

XII. De oneribus & incommodis & laboribus plurimis vite coniugalis, & de causis, propter quas non expedit uxorem ducere.

XIII. De magistratu iudicum, & de officio & munere iudicandi populos, & presidentis ciuitatibus; & de laudibus huiusmodi officiorum, & commendatione talis exercitii.

XIV. De oneribus & laboribus & incommodis Praefecturae, & Iudicaturae, & Praesidentiae in populis; & de periculis huiusmodi exercitii.

XV. De exercitio & officio Consulum & Rectorum urbium & provinciarum; & de periculis huius status.

XVI. De laboribus, oneribus & incommodis Consulum & Rectorum urbium & provinciarum; & de periculis huius status.

XVII. De alio exercitio & viuendi genere in hoc seculo, videlicet de aduocandi & patrocinandi officio in iudicio; & de laudibus huius scientifici & artificiosi exercitii, & de utilitatibus ex illo prouenientibus, & quomodo supplet natura defectus.

XVIII. De incommodis, oneribus & laboribus exercitii aduocationis in causis & iudiciis; & de periculis huius status & modi viuendi; & de damnis, quae ex eo veniunt reip. & quomodo litigia nutriuntur ex Aduocatorum copia, & quomodo humanitas iusticia potest impleri in iure naturali.

XIX. De alia viuendi arte, videlicet de Notariis, Tabellionibus & scribis; & de huius artis laudibus, utilitate & commendatione ac necessitate.

XX. De miseriis, calamitatibus ac laboribus & periculis Notariorum, Tabellionum, & de illorum fraudibus & dolis.

XXI. De exercitio agriculturae, & de laudibus & commendatione huius naturalis & innocentissimi exercitii; & de utilitatibus generi humano ex illa prouenientibus; & quomodo Deo acceptum est.

XXII. De incommodis, oneribus, difficultatibus & laboribus agricul-

P R Æ F A T I O A V C T O R I S

tura, & de aculeis & miseriis huius status. Et narrantur plura de hoc viuendi genere circa eius sollicitudines & anxietates; & quomodo repugnat præclaris ingeniis agricultura ipsa, & quales debent esse agriculatores.

XXIII. De diuersis aliis modis & artibus viuendi in hoc seculo, & præsertim de artibus mechanicis in genere, & utilitate earum: & quot sint artes mechanicae, & qualiter earum exercitia profunt, & quæ artes sub eis comprehendantur, & quomodo in dictis artibus clari multi euaserunt.

XXIV. De dissuasionem in genere vitæ mechanicæ, & quomodo, licet sint artes necessariae, tamen non est necessarium illarum habere exercitium; & quare mechanicae artes inuientæ sunt, & quis sit illarum finis, & quare sic appellantur, & an sint utiles ingeniis hominum: & an artifices sint veri ciues & partes ciuitatis.

XXV. Particulariter agitur de prima arte mechanicâ, videlicet de tanificio & cæteris artibus, quæ ei subalternantur, & de illius utilitate & incommoditate, dulcibus & amaris.

XXVI. De secunda arte mechanicâ, videlicet fabrili, armatura aut architectonica: & de partibus eius, & de utilitate & prærogatiuis illarum, ac de incommodis, miseriis & oneribus earum.

XXVII. De tertia arte mechanicâ, videlicet de navigatoria & artibus ei subalternatis, & de utilitate & laudibus earum; demum de laboribus, miseriis & periculis, quæ eas comitantur.

XXVIII. De quarta arte mechanicâ, videlicet de venatoria, & artibus ei subalternatis, & de laudibus & utilitate earum; & de laboribus, miseriis & periculis, quæ eas comitantur.

XXIX. De quinta arte mechanicâ, videlicet de agricultura & partibus eius, & de earum utilitate, dulcore & amaritudine; ut supra diximus in XXVII. & XXVIII. capitulis.

XXX. De pastorali arte, & de eius utilitate ac incommodis, miseriis & laboribus.

XXXI. De sexta arte mechanicâ, videlicet theatrica & ludis, & de partibus ei subalternatis, & de diuersitate omnium ludorum; & de illorum utilitate & damnis.

XXXII. De septima arte mechanicâ, videlicet de medicinâ, & de eius necessitate & utilitate & laudibus; demum de illius abusu, laboribus & periculis.

XXXIII. De arte mercandi & vendendi, quæ ipsa mechanica est, & sub navigatoria continetur, & de eius necessitate & utilitate; demum de illius infelicitate, fraudibus, dolis atq; periculis.

XXXIV. De

AD PAPAM PAVLVM II

XXXIV. De artibus liberalibus in genere, & de illarum laudibus & utilitate; & quare vocentur liberales; & de illarum incommoditate & abusu.

XXXV. De duabus liberalibus artibus, videlicet Grammatica & Dialectica, & de ortu earum & causis, quare inuenta sint; & de earum laudibus, ac demum de earum abusu & incommoditate.

XXXVI. De Rhetorica & eloquentia, quae tertia est liberalium ars, & de illius ortu, utilitate & laudibus. Rursus de eius abusu, & qualis debet esse orator, & quid valeat eloquentia sine sapientia, & quod aliquando sit mortifera.

XXXVII. De Mathematicis scientiis in genere, & de eorum ortu & fine.

XXXVIII. Particulariter de prima scientia mathematica, videlicet de Astronomia & de eius laudibus & utilitate: demum de illius incommoditate ac incertitudine, laboribus & damnis.

XXXIX. De secunda scientia mathematica, videlicet de Musica, & de eius laudibus & utilitate; ac de illius incommoditate, miseriis & laboribus.

XL. De tertia & quarta mathematicis, videlicet Arithmetica & Geometria, & de earum laudibus & utilitate; & de illarum incommoditate ac inutilitate & laboribus.

XLI. Sub brevi Epilogo recolligit auctor cunctas alias artes, & genera viuendi in hoc seculo; in quo ostendit misérias, labores & pericula omnium statuum; & ostendit eas omnes plures habere aculeos & misérias, quam gaudium, quiete & securitate, discurrens per omnes modos viuendi in hoc seculo.

XLII. Inquiruntur causa, quare a prima mundi origine boni & mali in quoniam statu existentes, diuersas misérias, poenae, cruciatus, plurimaeque mala & incommoda corporaliter passi sint; & breuiter enarrantur calamitates in specie omnium fere magis excellentium personarum vtriusque testamenti.

XLIII. Ostenditur, homines in quouis statu viuentes non solum poenae excilii, cruciatus & mortes, & cetera corporalia incommoda assidue pati: sed & alias diuersas intrinsecas mentis afflictiones, ut nusquam vita & sorte sua contenti sint. Et breuiter tangit particulariter omnes fere huiusmodi mentis querelas & molestias ad vtramque partem.

DE MATERIIS PERTRACTANDIS IN SECVNDO LIBRO, & de tabula capitulorum eius.

Secundus liber de statu vite spiritalis, qui in duos subdividitur status seu viuendi modos, videlicet in statum Ecclesiastici ordinis, hoc est, Papam,

PRÆFATIO AVCTORIS

Cardinales, Archiepiscopos, Clericos & Ecclesia ministros: Item in statum Monasticum sine Religioforum, in quo sunt capitula sequentia.

CAP. I. De sublimitate & excellentia dignitatis summi Pontificatus, & de incomprehensibili eius auctoritate & potestate, & de illius necessitate & utilitate, & de altissimis eius mysteriis.

II. De spiritualibus incommodis, amaritudinibus, miseriis, aculeis, nec non mentis afflictionibus, periculis & laboribus summi Pontificatus, ubi plurima summorum Pontificum calamitates & spiritus perturbationes narrantur.

III. De plurimis temporalibus incommodis, amaritudinib. & miseriis ac calamitatib. Romanorum Pontificum, & de illorum promptis & ei coniunctis laboribus & periculis, anxietatibus & inseparabilibus arumnis.

IV. De alia infelicitate & calamitate Romanorum Pontificum, videlicet quod parum vivunt in Pontificatu, & de causis & rationibus huius brevitatis vite, potius in eisdem summis Pontificibus, quam in aliis Monarchis & Principibus.

V. An sit verum uniformiter, quod Romani Pontifices parum vivunt in Papatu. Agitur etiam de verissimis causis brevitatis vite summorum Pontificum: & an in vivendi periodo Romani Pontifices differant à ceteris mortalibus.

VI. Assignantur causa & rationes quare illorum opinio non sit tenenda, qui dixerint, summis Pontificibus, bonis & reprobis, uniformiter insitum & proprium esse, ut in Pontificatu parum vivant.

VII. Respondetur motui illorum, qui dixerunt Papam parum vivere in Papatu; & quo sensu sit intelligenda prædicta opinio, & quomodo cum veritate possit saluari.

VIII. De excellentia & prerogativa status & dignitatis Cardinalatus, & de perfectione huius status, & de laudibus & praeconiis eius.

IX. De plurimis anxietatibus & aculeis, laboribus & periculis status & dignitatis Cardinalatus, & de oneribus quæ incumbunt huic dignitati.

X. De sublimitate, excellentia status & dignitate Patriarcharum, Archiepiscoporum, Episcoporum, Prælatorum & Presbyterorum, ministrorum Ecclesie, & de perfectione status eorum in genere & in communi.

XI. De differentia & comparatione Ecclesiasticorum, videlicet Episcoporum & aliorum inferiorum Prælatorum & Clericorum inter se adinvicem; & quis gradus sit dignior & perfectior.

XII. De plurimis difficultatibus & aculeis, laboribus & periculis status Episco-

AD PAPAM PAVLVM II.

Episcoporum & Clericorum, & de malis ministris Ecclesie, & de multis abusibus, vitiis & inordinationibus illorum in genere & in communi.

XIII. De dignitate & prerogativa officii Decanatus in Ecclesia, & de illius honore & veneratione, & de eis qui ei competunt; demum de pluribus oneribus & afflictionibus, ac defectibus & periculis Decanorum.

XIV. De dignitate & prerogativa officii Archidiaconorum, & de honore & veneratione ei debitis, & de his qui ad eum spectant; demum de pluribus oneribus & afflictionibus, defectibus & periculis illorum.

XV. De dignitate & officio Cantoris & Primicerii, & de honore & veneratione ei debitis, & de his quæ ad eum pertinent; demum de pluribus oneribus & calamitatibus, defectibus & periculis eorundem Cantorum.

XVI. De dignitate & honore officii Thesaurarii vel Custodis Ecclesie, & de his quæ ad eum pertinent; demum de pluribus oneribus & calamitatibus, afflictionibus, defectibus & periculis illorum, qui talia officia habent.

XVII. De dignitate & prerogativa officii Scholastici in Ecclesia, & de his quæ ad hoc officium spectant; demum de pluribus oneribus, afflictionibus & calamitatibus ac defectibus & periculis scholasticorum.

XVIII. De præeminentia & utilitate officii Archipresbyteri, & quantæ sit venerationis, & de his quæ ei competunt; demum de pluribus oneribus & afflictionibus, defectibus & promptis periculis Archipresbyterorum.

XIX. De prerogativa & magna utilitate officii & gradus Canonicorum, & quantæ sit honoris & reputationis, & quid ei congruat; demum de innumeris huius status oneribus & afflictionibus, defectibus & periculis.

XX. De præeminentia, necessitate & utilitate officii Sacerdotum Curatorum, Rectorum curam animarum habentium; demum de pluribus huius status laboribus & calamitatibus, defectibus & periculis.

XXI. De secundo statu spirituali, videlicet Religiosorum, & de motibus & auctoritatibus, quæ adducuntur ad probandum statum Ecclesiastici ordinis præferendum esse statui Religionis; & per consequens Ecclesiasticum ordinem esse præeligendum.

XXII. De prima comparatione horum duorum statuum, videlicet qualiter hi duo status Clericorum & Monachorum se habent alter ad alterum comparatus; & quis eorum sit eligibilior, quantum ad eminentiam & perfectionem status, & etiam vite & sanctitatis.

XXIII. De alia comparatione horum duorum statuum Clericorum &

PRÆFAT. AVCT. AD PAP. PAVLVM IL

Religiosorum inter se adinuicem, videlicet quis sit eligibilior tanquam simpliciter humanior & tolerabilior.

XXIV. *Assignantur responsiones ad obiecta contra Religiosos pro tuenda opinione illorum, qui sentiunt Religiosos esse in perfectiori statu, quam Decani, Archidiaconi, & alii inferiores Clerici post Episcopum. Vbi discutitur, quæ sit perfectior vita, actiua vel contemplatiua; & de eorum adinuicem comparatione.*

XXV. *De excellentia & laudibus vitæ Monasticæ ac Religiosæ, ac de pluribus causis propter quas eligenda sit, quam alius viuendi modus.*

XXVI. *De difficultatibus vitæ Religiosæ, & de laboribus & aculeis Religiosorum in genere.*

XXVII. *Particularius & latius de promptitudine periculorum huiusmodi status in specie, & de malis Religiosis & abusibus illorum.*

XXVIII. *De inclinatione & dispositione naturali, & diuersitate complexionum hominum quantum ad religionem, & de consilio in talibus.*

XXIX. *De comparatione Religiosorum inter se adinuicem, & primo de comparatione Solitariorum ad socialem vitam agentes, & quæ vitæ sit perfectior altera.*

XXX. *De comparatione Religiosorum vitam socialem agentium inter se; & quæ Religio socialis alteri sociali sit perfectior, & utrum Religio eo quod artior, sit perfectior.*

RODERI-

RODERICI ZA-
MORENSIS EPISCO-
PI ET REFERENDARII CV-
RIÆ ROMANÆ

Incipit Liber Primus

DE STATV ET VITA SECVLAR-
ri Laica & Temporalis.

CAPITVLVM I

*De primo & sublimiori statu temporalis; qui est status & gradus Im-
perialis & Regalis, ac aliorum Principum secularium: & de su-
premo huius status & dignitatis culmine & excellentia; de illius-
que gloria & felicitate; necnon de eius prerogatiuis, commodita-
tibus, laudibus & praeconiis super alias temporales dignitates.*

SPER cunctas humanas temporalesque di-
gnitates, & sublimitatis eminentias, Imperia-
lis & Regalis status culmen & excellentiam
obtinere. Huius itaque fastigii splendor &
laus tanta est, ut satis exprimi non possit. Sed (ut
paucis agamus) sicut nomen eius, ita & laus
eius. *Imperatoris* quidem nomen ab imperan-
do dictum est. *Regis* denique à regendo, ut græce *Basis* à sustinen-
do. Quid enim gloriosius, quid felicius, quam vnum intueri mor-
talem hominem ceteris hominibus imperantem, cunctos regen-

A

*Rex obedi-
endum.*

tem, & ad libitum ferentem? Isti sunt, qui teste Iob, portant orbem. Huius certe eminentissimi status, honor, laus, gloria & excellen-
tia ex eo etiam maxime patet, quoniam, teste scriptura, *illis tan-
quam sublimioribus potestatibus omnis anima subdita est.* Quare & iux-
ta Christi præceptum, Cæsaribus atque Regibus à cunctis fideli-
bus honor exhibendus est, subsidia præstanda, & quibus *vestigal*
vestigal, & quibus tributum tributum. Illis denique *tanquam præcullen-*
tibus & à Deo missis (teste Apostolo) parendum est: quia non sine
causa supereminentem, terrentemque *gladium portant, ad coher-
tionem malorum, laudem vero bonorum.* Illorum quidem sunt quas in-
colimus vires: illorum castra atque possessiones: & cuncta ter-
rena, dicente *Augustino: Quo iure defendis villas, nisi Imperatorum Re-*
gumque iussu? Quis igitur non felicem, non cunctis prælatum hunc
excellentem statum dixerit, qui omnibus subuenit, omnibus pro-
dest, & omnium saluti & commoditati providet? In qua re Reges
ipso Deo assimilari, approximarique plurimum cernimus. Quia
solus ipse vitæ necisque hominum dominus est, salutem mortali-
bus confert, vel dando si eguerint, vel parcendo si deliquerint,
vel indulgendo si supplicauerint. qui non sibi sed reipublicæ nati
sunt, dum discordias pacificant, oppressos à potentibus eripiunt,
provincias pace gaudere faciunt, violentias cohibent, iusticiam
seruant, malos dissipant, & quicquid agendum est, siue ad bene
beateque viuendum, siue ad res ipsas politicas feliciter gubernan-
dum, finemque debitum dirigendum legibus, præceptis, ac iustis

*Rex Deo s-
imilis.*

*Imperialis
potestas illi
missa.*

*Rex pater
patria.*

lationibus disponunt. Rex enim similitudo siue imago quædam
diuinitatis est in terris, dum id ipsum agit in limitato circumscri-
ptoque regno, quod Deus in vniuerso. Hinc Reges in Exodo *Di*
vocantur. In his est provinciarum quas regunt, summa potestas. Ta-
ceo de Imperatore, cuius auctoritas nullis est circumscripta limi-
tibus: qui princeps est maximus atque optimus, qui cœleste habet
arbitrium, & iura præceptaque ab eo tradita diuinitus emanari
creduntur. cui est pro lege voluntas, pro libito sanctio, pro arbi-
trio ratio. Est denique Rex pater patriæ, amans quos regit, prote-
gens quos gubernat. Rursus huius sublimissimi status excellen-
tia, ex illius necessitate ac utilitate facile agnoscitur. Nam voluti
cunctis hominibus naturale est in societate vivere, sic aliquem
esse

esse oportet per quem multitudo regatur. Nam iuxta Philosophum: *Multis existentibus hominibus, & unoquoque id quod sibi congruum est providente; multitudo ipsa facile in diversa dispergitur, si modo aliquis non sit, qui curam multitudinis obtineat.* Nec illud sapiens Salomon ignorabat, inquit: *Vbi non est gubernator, dissipabitur populus.* Denique illa hominibus à natura innata societas rumperetur, si non foret aliquis præsidens, cuius ope prauorum audacia arceretur. Quia, teste Augustino: *A diuina dispositione regna sunt condita, Reges instituti, ut malorum peruersitas castigaretur, & bonorum vita & innocentia conseruetur.* Et alibi: *Regale fastigium locus est superior, sine quo populus regi non potest.* Imperatoria ergo vox & Regalis auctoritas iniquos fugat, insolentes castigat, obrectatores despiciat, bonos præmiat atque fouet, & cunctis influit vitæ & honoris alimenta. Est enim Rex in regno, veluti in naturali corpore caput. Constat quidem caput ipsum membris vigorem influere. Quia teste nostro Seneca: *Quid vales corporis robur? quid validitas lacertorum? quid velocitas pedum? nisi capitis velut principis sui imperialis quædam amminiculetur potestas, à quo vel desitiuntur vniuersa, aut omnia fulciuntur.* Sine capite, inquit, iacet truncus ignobilis, sine honore, sine nomine. Sed nec in humanis tantum eius summa consistit felicitas. Nam præter eam exteriorem (quam prædiximus) super cunctos mortales excellentiam, si bene Rex optimeque regit, immortalis Deo tanto propinquior, tantoque acceptior est, quanto liberior. Sed & cap-
Rex Deo pro-
piuor.
tigitior fuit in eo peccandi licentia, qui potuit transgredi, & non est transgressus; in quo peccare noluit voluntas, etiam si immineret peccandi impunitas. Grandis certe gloria, grande præmium. Nam quotquot superat potestate terrena, superat & felicitate æterna. Scriptum est enim: *Quia domus Dauid erat sicut domus Dei.* Veluti enim fideliter regendo, Dei officium gessit in populo, sic ad præmium propinquus ei hærebat in cælum. Quippe apud antiquos, boni rectique Principes in Deos transformari putabantur. Et (ut grandi negotio breuem finem imponamus) quanta sit huius sublimis status felicitas, non minus ex his quæ terigimus, quam ex eo cognoscimus, quoniam *nulla* (ut aiunt) *maior est felicitas, quam multos facere posse felices.* Id certe felicitatis genus, nulli magis Regibus conuenit. Quamobrem (ut ego arbitrator) illa sapiens

regina Saba, non modo Salomonem regem felicissimum dixit, sed & eos qui ei seruiebant ac ministrabant, seruosque seruatorum suorum perbeatos asseruit. Quæ res agit, vt omnis humanus animus, si iuiptius immemor, si contemptor, si denique sui parui pensor fieri non velit, ad eandem ipsam sublimitatis dignitatem decurrat. Atque si natura suffert, si prudentia sufficit, si fortuna ardet, si potentia iuuat, ad illum omnium felicissimum statum totis respiret conatibus. Quodq; si minus tam excelssæ cedri culmen ascendere nequit, ramusculis saltem illius insideat; quoniam aut vberissimo felicitatis fructu, aut saltem protectionis illius vmbra suauissima non frustrabitur. Ceterum auget excellentiam Regalis & Imperialis principatus, agere de eius origine & differentia, & quis illorum sit antiquior & iustior Principatus. de quibus latius diximus in libro, quem nuper edidimus *de Monarchia & origine & differentia Principatus*. & iterum in libro *Defensorii status ecclesiastici*, quarto tractatu.

*Remittit ad
alios duos li-
bros suos.*

CAPITVLVM II

De infelicitate status Imperialis & Regalis, & plurimis curis, oneribus & miseriis, calamitatibus atque incommodis illius: & quæ Reges & Principes comitantur: & tandem de innumeris periculis Principantium.

VERA semper illa Sapientis sententia fuit, quia *maiore studio miseriarum causas, & dolorum alimenta, quam vitam conquirimus: atque audius ea inuestigamus & præligimus, quibus more pile huc atque illuc iactamur, quam ea quæ plenissimam securitatem & veram felicitatem tribuunt.* quod certe nulli animantium præter homini accidit. Illa enim non iudicio rationis, sed naturæ instinctu vtilia eligunt. Nos vero ingenio & animi acumine vigentes, blanda quadam atque fallaci aura ridente, falso iudicamus, putantes id esse beatum, id perpetuum, quod facile ruit. Nec mouemur, quia assiduo conspiciamus quosdam, quos sicut leuis fortunæ ritus atollit, sic leuis ilico fletus deiicit, vt recte de eis dicere possimus cum Propheta: *Deieciisti eos dum allenarentur.* Nec nos vincit, quod cernamus nemi-

nem

nem tam securum tamque mane quietum, vt non ante crepusculum à moerore, à casu, à lapsu superetur. Cuius certe rei culpa in nobis est, qui facile ab his quæ cupimus, trahimur & superamur. Qui enim animos ad hos vanos seculi fastus accommodat, vt pro fructu folia, pro grano paleas, pro vera felicitate vmbra capiat necesse est. Audita certe atque cum tota mentis attentione auscultata est, summa Regum ac Cæsarum felicitas; illorumque dignitas, maiestas, celsitudo, atque vtilitas ad cælos vsque perducta. Sed, nisi fallor, fallitur, qui illa falsa non iudicat, qui aperto oculo vera esse non conspicit. Dicam ergo non pari eloquentia, sed vt puto veriore sententia, Regalis huius status calamitates, miseriae atque pericula. In primis itaque fateor clarissimum Regis nomen fore, sed durissimum officium: clara nomina, res obscuræ; sed & difficillimum omnium ministerium, magis certe seruare difficile, quam nomine delectabile. Quid enim vtilitatis affert nudum dignitatis nomen, vbi res ipsa deest? Quid enim Cæsar, quid rex aliud suscipit, nisi fulgidas compedes, claram miseriam? quæ si hominibus nota essent, non homines tantopere de vno solio litigarent: quinimmo mirandum est, quod non plura sint regna quam reges. Suscipit certe rex collapsa erigere, sparsa colligere, recuperare perditâ, deformia reformare. Sed & si illa (quod rarum est) exprobauerit, reliquam laudem illius successor metet. Putasne reges his temporibus ad id prouchi, quod nomen ratioque Regis expostulet? vt sit Reipublicæ autor, Ecclesiæ cultor, refugium pauperum, tutor pupillorum, defensor viduarum, oculi cæcorum, lingua mutorum, baculus senum, vltor scelerum, metus malorum, gloria bonorum, malleus tyrannorum, pater regum, moderator legum, & ærarii publici dispensator? Falleris certe. Mutatus est enim illorum color optimus, atque pro illis operibus alia sibi inæqualia vendicant, quæ ilico audies. Alienant quippe Reges aut dissipant Imperii & Regni bona, cuius sunt administratores, non domini. Ecclesiam, quam tuendam susceperunt, eiusque ministros persequuntur: à quibus tributa, pecunias & banana exigunt, cum tamen eorum orationibus longe plus regnum augeant, quam illorum armis. Populum demum affligunt taliis, & exactionibus corpora iniuriuntur, quos Propheta signat in-

*Regis officii**Contra Principes.*

quiens: *Quare atteritis populum meum, & facies pauperum commolitis?* Hi (ut alibi scribitur) *quod crassum est comedunt: quod fractum est non alligant; quod infirmum est non consolidant; quod abiectum est non reducunt, quod perit non querunt.* Eos itaque alius Propheta non Reges, sed infideles Principes & socios furum appellat. Taceo quod aliena dominia occupant, vicinos habere nullos vellent, limites confundunt, iusticiam non faciunt, quæ Dei sunt negligunt. Quid igitur felicitatis est solo nomine Rex censeri, & quæ regi digna sunt respuere? aut quid honoris est tutores reipublicæ appellari, & illius euerfores effici? Cogor illud Adriani Hispana familia nati, verbum optimo Principe dignum, ad memoriam reuocare, quod illum sæpius in Senatu dixisse fertur. Dicebat enim, *ita se Rempublicam gesturum, ut scires populi rem esse, non propriam.* Rursus reges non tam ad gloriam & honoris fastigium, quam ad curam, sollicitudinem, ac indicibiles misérias & pericula assumuntur, adeo ut vix aliquis regnare optaret, si recte attenderet, quam grauis Regis sarcina sit, grauior finis. Assumuntur quidem Principes non ad quietem, non ad securitatem: quinimo ad seruitutem & quandam carceris speciem. Quæ enim maior est captiuitas, quam iugiter circumcingi populi multitudine, & quasi circumligari? Nam (ut noster inquit Seneca) *possum in qualibet parte urbis solus sine timore incedere, quamuis nullus sequatur comes, nullus ad latus gladius.* Rex vero armatus, & armatis munitus in publicum prodeat necesse est. Quem multitudo gladiatorum oblaet, & quocumque descendat, magnus illum apparatus sequatur. Assidue enim omnium, quos regit, timore constringitur. Unde Seneca, *Regnantibus multo peius periculum est quam his qui indicantur.* Hi enim singulos timent, illi vniuersos. Itaque illud Labentii Equitis Romani verum est: quia *Necesse est ut multos timeat, quem multi timent.* Cuius illa (ut putamus) ratio erit, quia *quem quis metuit, perire cupit.* Et iuxta Ennium: *quem metuumt, oderunt: & quem quis oderit, perisse experit.*

Huius certe Regalis fastigii onera, curasque grauissimas, atque prompta pericula, nonnulli sensari Principes peroptime cognouere, illaque experti sunt. Nam Augustus & Diocletia-

nus,

nus, alter de dimittendo Imperio cogitabat, alter iam dimisit, nec reuocatus assensum dedit. Deinde Marcus Aurelius & Pertinax: quorum alter ad Imperium euocatus, tristior effectus, multa de miseriis Imperii amicis disseruit: alter semper Imperium exhorruit. Adde quod Regnum non semper iuste Principes acquirunt, sed plerumque ferro. quare ferro etiam seruatur; ac ferro plerumque amittitur. O quot legimus, quot audimus, quot vidimus in eculeo fortunæ motos! quot magno impetu rotatos! alios ex altiore fastigio prolapsos! Quot Cæsares, quot Reges, aut hostium aut suorum manibus à summo solio pulsos, vitam simul & regna amisisse. Quot Reges à regno in captiuitatem, à sceptro in carceres transire: alios exules plurimos in acie cæsos, & domi capite truncatos: & alios (quod durissimum est) laqueo à se suspensos. Et (vt paucis agamus) vbicunque Reges sunt, pericula eos comitantur, & semper in medio existunt hostium, non solum cum in bello, sed cum in vrbe se recipiunt.

Rursum inter cæteros homines amicitia quam maxime necessaria atque utilis ac delectabilis est: sed hanc Reges minime habent. nam cum inter parentes & liberos ac fratres adinuicem, virosque & vxores firmissimæ omnium atque arctissimæ sint amicitia: apud Reges vero (vt sæpe videmus) filius à patre, & pater à filio; coniunx à coniuge, & frater à fratre capiturque atque necatur, vt quos ipsa natura ad amandum compellit, regnandi auiditas cogit, ita odio esse, vt plerumque de sua nece cogitent.

*Amicitia
vita inter
Reges.*

Demum plurima facit Rex, quæ nedum amorem suorum impediunt, sed eos reddunt sibi inimicos. Exigendæ sunt enim pecuniæ à subditis ad necessarios sumptus: puniendi sunt facinorosi: prohibendæ iniuriæ: confiscanda bona multorum: cogendi sunt bella agere: domus agrosque deferere, quæ vna res subditis molestissima est, & omnem amorem repellit. Denique cui fides deest, magno bono eum carere nullus hæsitat. Quæ enim familiaritas, qui vsus, qui congressus iocundus esse potest absque fide? Quis enim familiarem, quis seruum aspicere potest, si ille infidelis existat. Reges vero de nullo aut raro fidem habent; quod ex eo licet cognoscere, quod nõ facile cibis ad se delatis cre-

*Causa odi
in Reges.*

*Reges omnia
genus homi-
num timet.*

dunt, nisi à seruitoribus prægustentur, ne quid male edant formi-
dantes. Cæterum regibus nunquam fit satis optando, & minus
consequendo. Cæteri enim homines aut ædes cupiunt, aut agros:
Reges vero vrbes, prouincias, regiones, arces, quas adipisci dif-
ficilius periculosiusque est, quam eas res quæ ab aliis cupiun-
tur. Et (quod omnium infelicissimum est) Reges ipsi, tam bo-
nos quam malos, tam sapientes quam insipientes formidant. For-
tes quoque timent, ne aliquid audeant gratia libertatis. Prudētes,
ne quid aduersus eos machineptur. Iustos, ne dedignentur ab eis
gubernari. Potentes & diuites verentur, ne subditorum potentia
& diuitiæ eis notiuæ reddantur. De quibus Iob pulcre ait: *Sani-
tus terroris semper in auribus eius.* Adde quod Reges nunquam
naturalium rerum abundantiam exoptant. vbertatem agrorum
odiunt, ne fertilitate rerum subditi difficilius iugum seruiendi
patiantur. Demum nullum Regibus gaudium cum securitate
est. timent celebritates hominum; timent festa; timent solitudi-
nes non custoditas; timent ipsos custodes, nec inermes illos ha-
bere volunt, nec dearmatis plurimum confidunt. quo fit, vt,
quid ipsi velint, ignorent. nōne ista infelicitatis signa sunt? Quod
si forte magnum quis putet in Regibus, & propterea beatos eos,
quia facile multis prodesse, & inimicis obesse possunt, nimium
in ea re fallitur.

*Beneficentia
reges non sa-
cit felices.*

Qua enim ratione Rex benefacere amicis potest, cum aperte
sciat, quod quāto plura quis ab eo ceperit, tanto citius cupit effu-
gere? nullusq; sit, qui earum rerum, quas sibi principes largiuntur,
suas esse putat, quam si eo loco sint, aut ipsi tam potentes fuerint,
vt etiam si Rex cupiat, nullo modo possit auferre? Inimicis vero
nec obesse nec prodesse audent. Accidit enim illis, veluti habenti-
bus extrennuos equos, sed feroces, quibus nec illi uti possunt,
propter timorem, nec alienant propter virtutem.

*Regnum di-
misorum dis-
ficile.*

Sed & inter alias huius Regalis status infelicitates, illa non
parua est, quoniam & si Reges non ignorant statum eorum
multis miseriis, calamitatibus & periculis plenum, tamen nec
se ab eo prouide eximi nec tute liberari sciunt, nec sponte cede-
re possunt, qui semel Regnum assecuti sunt. In qua re cunctorum
principum, illa omnium miserrima condicio est, vt miserā ipsam
relin-

relinquere non valeant. Quo enim pacto Principes possent tot pecunias restituere, quot ipsi diripuerunt? Aut tot vincula pati, quot ipsi ingesserunt? aut tot mortibus mori, quot ipsi necauerunt. Cæterum quod gloria, laude & honore Reges, cunctos mortales superent, hoc vnum est (vt mihi satis videtur) quo reges omnium hominum miseres existant. nam nec obseruatiā nec honoris reuerentiā, illorum præsertim, qui nos aut non iuuāt aut inuiti seruiunt, grata nobis esse potest. Quin immo quanquam hoc sæpe fieri intelligamus, vt qui maxime Principes suos timet, qui eos oderunt, hi maxime eos obseruent, colant, venerentur, munera mittant, assurgant: ad ea tamen non amor sed timor compellit; licet hæc omnia seruitutis sint signa. veri enim honores aliis ex causis gignuntur. Et, vt finem miseriis huius status imponam, in eo rapinas, deprædationes reperiri libet: vt de eis Propheta dicere videatur: *In medio populi Principes eius quasi lupi rapientes prædam.* in eo iniurias, in eo vindictas, in eo spes anxias, in eo honores vanos, cupiditates, furores: in eo nulla est quies, nulla animi tranquillitas; in eo paucorum est subuentio, multorum oppressio; paucis gaudium, multis obprobrium; quibusdam præmium, plurimis supplicium; omnibus labor, sibi pœna & crux. atque (vt cuncta vno claudam verbo) Rex in regno sentina est in naui, in quam vitam omnium officinarum sordes, miseriæ, calamitates & spurcitix decoquuntur ac infelicitèr reducuntur.

Demum illorum infelicissimas miseras agnosces, si de successoribus cogitabis. nam quidam inquit Sapiens: *Quis potentior fuit Alexandro? ei tamen successisse legitur non suus sed alterius filius.* Successorem Iulio Cæsari non fecit natura, sed adoptio. Imperialis domus totum relege atque reuolue progressum: reperies, quia periit memoria eorum cum sonitu: transis, & ecce non sunt, nec inuentus est locus eorum, & ad inferos descendentes: eiusque heredes aut ignoti aut extranei (ne dixerim hostes) successerunt: Rursus si cœlesti ac æterna felicitate Reges dignos putas; recte intelligis, si quā præmio digna agant. Felix ille, sed quis est, & laudabimus eum? Rarus vt Fœnix est. nec ab re sapiens Salomon & Rex tanta regum expertus pericula dicebat: *præter paucos, omnes reges commiserunt peccatum, & reliquerunt legem*

potentis & gloriam perdidit. Vnde Isidorus: *Difficile est Principem regredi ad melius, si viciis fuerit implicatus: quod per abruptum licenti: in omne facinus viciorum labitur. & quanto excelsior, tanto peccatum grauius: quia potentes potenter tormenta patientur.* Omnes namq; peccatores, quos sub se in vita habuit, in futuro seculo supra se plagali poena habebit. Vnus ex sanctis tractatoribus dicebat: *Miror si quem contingat saluari ex his, qui principantur in tantis ruinis & tanta pigritia.* Vnde tamen eos currentes & sponte se in aperta pericula iactantes. Hinc in Euangelio scribitur: *Emi villam, quam multo labore acquisiui:* id est, precio animæ comparauit. Hæc sunt igitur præmia status regalis, hæc gloria, hæc excellentia. Ascende igitur quicumq; es, si placet ascende, sed ea lege vt leges naturamque sedis patiaris.

CAPITVLVM III.

De curialibus: & de exercitio & vita & moribus illorum, & aliorum Potentum, Ducum, Comitum & Baronum, ceterorumq; qui Principum fauores & officia sequuntur. & de laudibus & commendatione huius status.

GLoriosa plurimum, Cæsarum atq; Regū amicitia semp fuit. Vbi n. eminens est atque excellens totius humani honoris & gloriæ mundanæ culmen, ibi ingens gloria, ibi sempiterna nominis & honoris fama vt cōparetur necesse est. si itaq; regis amicitia aut fauor arridet, plerumq; breui laboris & temporis compedio, immensa præmia homines cōsequetur. Et si cui, itq; ea fors est, vt Principi carus existat, æternum sibi & tandem suæ posteritati, familiæ, generiq; nomen, deinde honoris & gloriæ perpetui monumentum relinquit. Nam (vt aiunt alibi) *negotari fortunam ferre est: cū Regibus vero amicari, sup. a fortunam ascendere est.* Pro hac igitur consequenda, omnis humanus animus impendendus est, veluti quæ dignitates summas, quæ opes, quæ honores, quæ deniq; famam & perpetui nominis gloriam, laudem & præconiū, suis lectatoribus præstat. Quid enim dignitate, gloria & honore præstantius? Quid generoso & animo nobili, auidius exoptari potest? Hinc Seneca noster Cordubensis, *pro immenso munere habiturum se gratiā & famam apud*

apud posteros precabatur. Et Statius presentem honoris & fama gloriam, benignum iter operibus suis ad futuros statuisse dicebat. Et Ouidius Naso sibi nomen indelebile futurum seq; ore populi legendum, predicandumque letabatur. Dicebat denique

— Non paruas animo dat gloria vires,
Et secunda facit pectora laudis amor.

Ad quā vtiq; rem nos vehementer natura ipsa inuitat. Nam vt Poflicatus ait, & ante vnus ex Philosophis dixerat: *Non caret mysterio, quod honor cum h littera describitur, quæ non nisi quadam vehementi cordis nostri aspiratione pronuntiari valet. Quo aperte monstratur, naturali quodam impetu atque desiderio hominibus inlitum esse, ad honorem & gloriam aspirare.* Deniq; Aristotelem non paruum honoris & laudis præconium affecutum legimus, ex eius ad Alexandrum amicitia. Et Senecam non medio rem amplitudinis & decoris laudem adeptum non minus ex Claudii Neronis ad eum affectu. Sed & Virgilius ex ea apud Cæsarem familiaritate, per omnia secula se victurum prælagit. sed quid hæc commemoras? Cunctos certe, quos summes, quos excellentes, quos honore, laude, & fama viros præstantes aspicimus, non nisi apud Reges tales incepisse, aut Reges tales effecisse liquido comperiemus. Nec enim abre laudatilla in factis litteris Regina Saba, beatos & felices dicebat, non modo eos qui Salomoni regi assistebant, sed & qui ei obsequabantur. Ex quibus liquido constat, quam honorabilis sit vitæ formula in Regum curiis versari. Hæc & similia, amici suadebant, vt hoc viuendi genus diligerem.

CAPITVLVM IV.

De laboribus, oneribus & incommodis, ac periculis potentum Curialium: ac fauores, curias seu officia Principum sequentium in quo capitulo & trib. rubricellis sequentibus specialiter agit de septem vitiis, quæ Officiales Regum & Curiales comitantur. Agit etiam de calamitatibus Procuratorum Regum, & alia officia exercentium: & an in curiis Regum acquiratur verus honor.

Tremebat stupida bona mater hæc audiēs: clamabat alta voce, latere sub herba anguē. nec (vt dicebat) venena dāt, nisi melle cir-

cumlinita. Et quanquam potentum ac curialium vita à prælocutoribus plurimum laudata existat: Sub eius tamen fronte, plurima latere incommoda atq; pericula asserebat. Verum in primis id Suetonii sæpe à sapientibus audisse dicebat, quoniam *qui carus est Regibus, vilis est sibi anima, vilis quies, vilis securitas, ocium atque virtus.* Iunge his commune periculum omniū, qui principibus seruiunt. De quo Crispus ait: *Nam regibus tam boni quam mali suspecti sunt. Semper enim, ut aiunt, Principibus aliena virtus formidolosa est.* Id autem, quod de amicitiiis præcorum Principū ad quosdam commemoratum est, propositū apertissime probare videtur. Quis enim carior apud Alexandrū Aristotele? Quis apud Cæsare Claudium Neronem Lucio Seneca? Quis apud Tiberium Serano? quorum ruinā nouimus. Ut enim Sapiens quidā dicebat: *melius quisq; Regibus incognitus foret, quā amatus.* Et iterum: *In Regib. par malum est, si quē oderant aut diligant: nisi quod odium fugat, amor detinet.* Quod si laborib. si sudore, si periculis plurimis Regi carū se quis futurū putat; cogitet, lōge tutius erit, longeq; facilius, Regis lupni & conditoris omniū amicitiam tantopere quæsisse. Rursus si p hodierna temporis malicia, quæ rara amicitia est, quis tam imprudens est atque insulsus, qui sibi Regum duraturas firmasque amicitias putet, aut potius fingat; cogitet quid inde ad eos quos diligere simulat, quos certe fortunæ splendor, tumorque animi omnium inæqualium facit contemptores. Adde quia ut fortuna instabilis, sic Principum voluntas varia & inconstans est: quanquam stantē perseverantia, res ipsa boni modicum, mali vero atq; periculi multū habet. Deniq; bonam sibi spem promittunt, qui Regibus famulantur. Quis enim tam imprudens videri cupit, qui spem ponit in tanta tempestate? Sed verum est, quia (ut noster Quintilian. ait) *veluti multa timeantur, quæ optanda sunt: sic multa sperantur, quæ timenda essent.* Qui ergo Principum fauores desiderat, quid nisi libertate, ocio, vitæ securitate, amicitia priuari desiderat. forte in talem quis Principem sperat, à quo facile falli aut damnari potest. Mobilis est enim cuiuslibet Principis animus, & tanto mobilior, quanto à plurib. concutitur. Nec enim propter rerū varietates cuncta ratione pōderat: & q; cunctos mortales à Regum amicitiiis auertere iuste deberet, illud eis cōmune est, quia plerumq; non qui plus habent sapiētiae aut

aut virtutis, sed qui plus ab ea alieni sunt, gratiores illis existunt. Nec qui plus ingenio aut artibus modulator, sed qui plus adulatur, ille gratiæ fauorique proximus habetur. Sed si cetera sileamus, quis nisi *demon*s aut rerū experts, Regum fauores tantopere desiderat? in quibus non nisi varios rerū motus, vrbiū mutationes, pestiferas nouitates, famem, bella, discordias, indies conspiciamus. Si igitur hæc tibi placent, ad Regum amicitias aspira.

2. *De periculo & laboribus Officialium Regum: specialiter de eorumdem Principum Procuratoribus.*

Fortasse dices, videmus passim ad honoranda regis officia, aut rerum suarum vtiliora ministeria, omnem fere hominem, etiam podagra & quouis articulari morbo ligatum, velocissime atque audissime currere. Ex quib. honor, vtilitas, nobilitas, libertas, status, securitas mortalibus indubie proueniunt. Sed (nisi fallor) erras grauissime. Quid enim, si Regis Procurator aut rerum eius gestor exstas: nunquid putas ideo ei carior, tibi vtilior eris? Volo confideres, quia illius gerere negocia laboriosum est, cui placuisse perpetua seruitus est, displicuisse discrimen, supercilium græue, & quod grauius est, paratum est proleui offensione supplicium. Adde quia qui Regis procuracionem suscipit, necesse est multis displiceat, & tandem domino. Rursus periculosius Deo displiceat necesse est. Namque Regis iussu, aut eius emolumenti gratia, enormia regno mala & ingentia multorum damna, vel perpetrare vel dissimulare eum oportet. Sed nec id puto tacendum, quia qui Regis gerit negocia, qua die id infelix officium suscepit, ea die sibi viuere desit: omnisque libertas, omnis quies, omnis iocunditas abierunt: pro quibus innumeros labores, afflictiones & mordaces linguas, & ultra vires curas sibi gratis permutauit. Infelix certe exercitium. nam qui vnus est Procurator, multorum hostis est: & dum Regi placet, regno infestus est. Quippe quem explere oportet, quicquid sibi iniungatur a Rege, etiam si in aliorum perniciem tendat. Et (vt pauca agam) Regis procuratio honorabile exilium est. honorabilis certe titulus, sed difficilis ratio, & sub iudice ventulanda; coram quo habebis accusatores multos, excu-

Regis procurator multis & Deo displicet, libertatem perdit.

factores nullo. Et quod perniciosius est, implebis domum tuam vento, & fama saltarum diuitiarum, alienas autem veris.

3. De periculo & labore officialium & dilectorum Regum & Principum.

Alia præterea discute. perquire Regum officia, administrationes, curas omnes. Ididem reperies, quæ etsi non ignoremus ea omnia periculis plena esse, cernimus tamen à multis sapere esse optata, sæpeque magnis empta pecuniis, quæ sitaque periculis. Sicque tam cæca est mens hominum, ut pericululis ematur periculum, precibus atque laboribus comparatur discrimen. Nec enim in illis deest pecunia, sed deest virtus: non deest fastus, sed deest castus: non deest sublimis, sed deest humilis: non deest adulator, sed deest veritatis amator: non deest sæuus fraudator, sed deest rectus consiliator. Taceo septem illa funestissima vicia, quæ palatino, Regumque officiales infallibiliter comitantur. Primum quidem, honorum dignitarumque ambitio est. Nam teste Cicerone: *Difficile est potestatem cupienti, seruare equitatem.* Et sequitur: *Facillime impellitur ad res iniustas, qui fauoris & gloriæ cupidus est.* Locus enim aulæ lubricus est. Secundo: Regios fauores sequentibus, mendosa & seductoria adulatio familiarissima est. *Habet enim* (ut inquit Polieratus) *curialium adulatio comites, dolum, fraudem, prodicionem, mædaciū.* Hic est ille liquor olei sædissimus, quo curiales vngunt caput Regis ut eum decipiant. Quod ad eos cum sancto rege David dicere debet: *Oleum peccatoris non impinguet caput meum.* Ab his iniquissimis adulatoribus laudatur peccator in desideriis suis. Tertium viciū regis domesticos comitatur: videlicet sæda atque improba munerum receptio. Quæ (ut scriptura ait) *excitant sapientes & subuertunt verba iustorum.* Sine his certe quotidianis distributionibus, qui principi assistunt, qui rerum suarum curam gerunt, vix viuere possunt. Nam, teste Seneca: *Veluti canes acerrimi non nisi oblato cibo mansuescunt:* nec aliter Palatini quenuam audire, minus exaudire volunt. quinimo (teste Plinio) *veluti sunt quidam homines fascinares voce, alii qui videndo interimunt, maxime quos irati conspiciunt;* sic Palatini fascinantur pestilentius, quos intuentur. Hi enim ad se venientes non modo loquendo, sed vacuos videndo interimunt. Vnde Polieratus ait: quia *Curiales & medici in eo cōueniunt, quia vendunt verba sua: prope aliquando precium recipiunt ut taceant.* Mirum prodigiosum: quod homi-

Septem an-
licorum vi-
na.

hominum genus. in ceteris vitæ modis quidā operas, nūquā vero verba ipsa vendunt. Hi etiā silentium alii vendunt, q̄ est in rerum natura: hi quod nihil est, magno distrahunt precio. Et (vt paucis agā) Palatini libera illa atq; gratuita sensuum corporalium officia aliquando etiā, vt illi non exerceant, vendunt, vt si te late vident, aut grate audiunt vel loquuntur: ē vestigio vero, si te toruo gestu conspiciunt vel audiunt, aut non loquantur, cogeris miser vterq; euentu propinare, vt vel augeas fauoris affectum, vel tollas amoris defectū. Adde quartū Palatini viciū: videlicet improbā officiorū venditionē. De qua Polycratus ait: *Improbitas curialiu eo vsq; innotuit, vt de testimonio cōscientia, de venustate morū, de odore opinionis, de sinceritate causa, de torrese eloquētia, nisi precio interueniente quis frustra cōfidat.* Secundum illud Ouidii:

Ipse licet venias musis comitatus Homere,

Si nihil atuleris, ibis Homere foras.

Quintū Aulistarū viciū nō est ceteris funestius: simulata videlicet amicitia: fictio. Fingunt se palatini multos amare, qui oēs odiunt; quod cum facto opus est, facile comperies. Nam vt ait Iuuenalis:

Quantum quisque sua numorum seruat in arca,

Tantum habet. & fidei.

Hinc Tullius:

Vera amicitia difficillime reperiuntur in his, qui in honoribus versantur. Et Seneca: *Errat qui in aula querit amicum.* Sextum Palatinorum viciū his proximum est: videlicet versuta machinatio ad extorquendum, & pauperes expoliandum. Inueniunt nanq; qui principibus assunt, plurimas extorquendi vias. Quos Hieronymus asserit crudeliores esse leonibus & lincibus, qui licet ore rabido deuorant, tamēdiu tamen memoriam depradandi non perdunt, quamdiu venter est vacuus: ubi vero pasta est sanguine seueritas, cum saturitate succedit obliuio.

Septimum Palatinorum viciū est comestationum, libidinum & voluptatum vacatio. Quos signat Esaias: *Qui consurgunt mane ad ebrietatem sectandam, & poscentes sunt ad bibendum vinum, & fortes ad miscendum ebrietatem. de nocte diem faciunt & nocte vigilat.* Hos dicit Seneca, *vomere vsedant:* quorum palatus non nisi ad preciosas escas excitatur, vt tandem venter vino æstuans, vacet libidini. Agam ergo finem, & dicam cum Bernardo, ad eos, qui Regum amicitias sequuntur: *Tu in curia Principum sedes, cum diuitibus in occultis, vt interficias innocentem. Denique insidiaris, vt rarias*

pauperem. ibi dextera tua repleta est muneribus: ibi res pauperum violenter rapiuntur: ibi laudatur peccator in desideriis animæ suæ, & iniquus benedicitur: ibi laudas quod non debēs: operaris quod non licet; loqueris quod non decet. Hæc igitur studia, hi mores, hæc artes, Officialium Regum: hæc exercitia Palatinorum & eorum, qui Regum fauores & amicitias sequuntur. Hac igitur lege ascende, si placet, ad tantam potentiam, aut ad tantam dementiam.

4. *An verus honor acquiratur in curiis Regum & Principum.*

Rursus auditas forte consequendi honores te trahet ad Regū amicitias appetendas. Disces enim, honorem esse de generis bonorum: & teste tuo Philosopho per se ab honestis viris expectandum fore: qui non nisi ex principum amicitiiis provenire solet, veluti in quibus & ex quibus, cunctarum dignitatum, & bonorum cumulus residet atque dependet: sed ad ceteros derivatur. Ad quæ ego paucis respondebo. Crede itaq; mihi fili mi: quia, teste tuo Cicerone, *Homo qui summa vanitate versatur, nullam effigiem vere virtutis, sed umbram sectatur.* Est enim honor ipse & gloria, solida quædam res & expressa, non obumbrata. Ille enim verus est honor, illa veræ laudis & famæ gloria, quæ ex meritis ac virtute constat. Plerumque enim his, qui auram favoris Principum sectantur, familiaris est gloriæ vanitas. quin immo nonnunquam viciorum laudatrix est fama popularis. Vnde Socrates (ut inquit Valerius) *eos honorem verum consequi posse ait, qui id agunt, ut quales videri cupiunt: tales ipsi essent.* Prudens enim vir (ut inquit Bernardus) *laboris sui fructum, non in honore, non in fama (quæ multi sæpe falso acquirunt) sed in conscientia ponit.* Hinc Augustinus *conscientiam attendere nos iubet, non quidem honoris famam.* Hic enim falli potest, conscientia nunquam. Rursus nec dignitatum maximarum culmine lætari recte possunt, qui Regum amicitias & fauores quaritant. *Dignitas enim (ut inquit Tullius) honesta, cultu ac virtute & honore digna est.* Auctoritas, quæ cum laude provenit, non dignitas, sed dignitatis usurpacio appellanda est. Hinc Boetius: *Nunquam virtutibus ex dignitatibus honor accedit: sed potius ex virtute dignitati honor accrescit.* Nam collata improbis dignitas, non modo emittit indignos, sed prodit potius

tius & ostendit. Accedit, quia regiam vmbra sequentes, plerumque non virtute, sed vicio: non merito, sed precio: non electione, sed adulatione dignitates assequuntur. Quare ex eis honorem verum eos consequi non posse perlucidum est.

CAPITVLVM V.

De nobilitate generis & scientia ac morum: & quomodo ortum habuit. & an à Regum & Principum sola voluntate & concessione recte acquiratur nobilitas.

PLVRIMVM falluntur, qui generis claritatem, quam nobilitatem vocamus ex sola principum amicitia, fauore aut largitate quærunt. Pro cuius rei apertiori cognitione aliqua de nobilitate non satis à modernis tacta, breuius, quam rei magnitudo exposcit, disseremus. In primis igitur prætermittemus de illa nobilitate dicere, quam *theologicam* aut *supernaturalem* vocant, qua quis Dei gratia acceptus est illi: sed nec de *naturali nobilitate* tagemus, qua aut liber, aut ingenio vel intellectu callēs, nobilis appellatur. Agemus itaque de ea carnis nobilitate, qua quis vltra plebeos homines dignior, acceptior atque honorabilior reputatur: quam nonnulli *nobilitatem politicam* appellant. Inquiremus igitur primo quid sit ea carnis nobilitas: demum quando, quomodo, & per quæ & qualia media acquiratur. Omissis itaque plurimis, quæ in ea re adduci possent, satis est nobis Aristotelis amplecti sententiam. Is enim in *rhetoricis* nobilitatem idem esse voluit, quod virtus generis. Ex eo quidem appellamus quosdam nobiles, quia ex honorabili genere ortum trahunt. Genus vero ea ratione honorabile dicitur, quia ab antiquo multi ex ea progenie insignes, & honorati viri processerunt. Et (vt agamus breuius) ingenuitas ista politica, quam vulgus *nobilitatem* appellat, nihil aliud fore creditur, quam ex aliquo antiquo genere & honorata profapia processisse, in qua ab antiquo plurimi euasere insignes & honorati viri, aut in principando vel præsidendo, aut alios publicos & honestos actus, vel principis iussu, vel populi assensu exercendo. Nec huic sententiæ idem Philosophus contradicere vi-

Nobilitas politica quid sit &c.

detur: cui noster Seneca satis assentit. hi enim nobilitatem *antiquas* dicunt esse diuitias. Quod puramus ideo dictum esse, quia secundum communem hominum opinionem omnia mensurantur numismate, ut verum sit quod sapiens ait, quia *Pecunia obediunt omnia*. quo fit ut pecunia ipsa precium esse videatur cuiusque rei. Ex hoc enim quod aliqui sunt diuites, facile reputantur digni ad principandum, seu in populis praesidendum. Et eo ipso creduntur esse insignes & honore digni. Ex qua re inoleuit eundem Philosophum & Sapientes dicere, nobilitatem esse *antiquas diuitias*. Non utique ut solae antiquae diuitiae simpliciter nobilitatem pariant: sed (ut idem Philosophus in *quinto Politicorum* ait) exigitur quod simul cum diuitiis assistant progenitorum virtus & merita, eo modo quo diximus. Sunt itaque diuitiae non formaliter inducentes claritudinem generis: sed instrumentaliter tanquam signum nobilitatis. Sed nec alio mysterio vacat, quod ipse Philosophus & Sapientes, nobilitatem *antiquas diuitias* dixerunt: ut videlicet recentes diuitias ad nobilitatem causandam minime sufficere demonstrarent. Cuius causam idem Philosophus in *Rhetoricis* pulche assignat. Ait enim, quia *nuper ditatum esse est quadam in eruditis digitarum*. Ea de re Philosophus ipse tales nuper ditatos, *fortunatos insensatos* recte vocat. Recenter enim ditati nesciunt formare, nec dirigere bona fortunae ad opera virtuosa, sicut antiquitus ditati: qui insignes fuerunt atque diuitiis & potentia, & aliis bonis fortunae virtuose & temperate usi sunt, nolentes a suis degenerare progenitoribus. Ex quo illud apertissimum viderur, quia nuper ditati non recte nobiles dici possunt, pro eo quod non ex insigni genere, nec ex antiquis diuitibus virtuose operantibus processere. Et simili modo aliqui recte nobiles esse possunt, qui ex nobili antiqua prosapia sunt geniti, licet ex aliquo infortunio non sint diuites, sicut illi qui nuper ditati sunt. Sed praedictis Philosophorum sententiis pulchrum est sacrarum scripturarum testimonia addere, a quibus omnis sapientia deriuata est. Illud enim primo roborat Rex & Propheta Dauid. Nam patrum merita posteros nobilitare asserit, cum ait: *Potens in terra erit semen eius*. Et statim subiicit: *Gloria & diuitiae in domo eius*: id est posteritate, quasi dixerit, quia ob patrum praeclara gesta

*Diuitiae sunt
signa nobilitatis.*

Omnia sapientia à sacris literis deriuatur. Sacra literatura etiam de nobilitate facit. Potens in terra erit semen eius. Et statim subiicit: Gloria & diuitiae in domo eius: id est posteritate.

Barth.

gesta, semen eius acquirit potentiam & gloriam nobilitatis : sed & diuitias, quæ simul præcipua sunt fundamenta, & partes substantiales nobilitatis generis, vt prædiximus. Rursus scribitur in Ecclesiastico: *Deus honorat patrem in filios.* Et addit: *Benedictio patris firmat domos filiorum.* id est, merita clara parentum, quibus benedicuntur, commendantur ac honorantur : firmantque filios in vera nobilitate carnis. Et sequitur in expresso : *Gloria enim hominis ex honore parentum: & dedecus filii pater sine honore.* Quæ pulchra sententia insinuat gloriam nobilitatis quam maxime pendere ex parentum honore : veluti e contrario ignobilitas & dedecus filios sequitur, si illorum patres non insignes & minime honorati fuerint. Et hoc iterum idem Sapiens confirmat, cum subiicit: *gloria diuitum honoratorum apprehendet & filios:* videlicet in gloria nobilitatis. Liquidò igitur demonstratur, quia veram carnis nobilitatem non solæ diuitiæ generant, quia scriptum est: *Nan magnificauit virum peccatorem diuitem.* Itaque virtus, merita & præclara parentum gesta (quæ eos insignes & honorabiles reddiderunt) veram carnis ingenuitatem ad posteros transmittunt. sed & positiua iura, ea quæ dicta sunt quam maxime confirmant: veluti quæ, si recta iura sunt, à diuino iure moralique & politica doctrina discrepare minime conuenit. Habent enim nobilitatem ex tribus confici, Natalium antiquitate, Honoribus & Diuitiis: licet diuerso modo, vt prædiximus. quæ omnia vt notissima pertransco. Ex quibus liquidò intueri vnusquisque potest, quod non recte dici possit, Principes sua voluntate eos efficere posse nobiles, qui ex plebeis erant sunt parentibus. Requisitus quadam die atque plurimum laceratus Sigismundus Cæsar à quodam plebeio sibi admodum dilecto, vt illum nobilem faceret, non insulse, sed docte simul & facete respondit: *diuitem, inquit, aut exemptum te facere possum, nobilem vero minime:* vt antiquatas diuitias, longæquamque ingenuitatem, non recentem Principis gratiam, veros efficere nobiles demonstraret: qui plerumque nulla obistente virtutis ac probitatis causa, plurimos claros fecisse arbitrantur; quos potius exemptos quam ingenuos

dixerim. Politica igitur atque ista vulgata generis claritas, non alieno privilegio, sed priscorum probitate & virtutis opere comparatur. quæ quanto antiquior, tanto nobilior & magis relucet à parentibus relicta quam à Principe sine virtute donata. Sed teste Philosopho, ideo *nobilitas in antiquitate laudatur, quia in eis antiqua fuit virtus.* Nec propterea illud nego, quia nobilitas carnis tempore incipit, & tempore definit. Et veluti incipit probitate parentum cessat & viciis successorum: adeo ut plerumque claritatem, quam longa tempora produxerunt, vna dies perimat. De quibus recte dici posset, quia cum se nobiles fingunt, tunc tales esse desinunt. Fateor etiam plurimos fore, qui strenuitate, virtute, opera in rempublicam collata, meruerunt, ut nobiles sint, cum fiunt, non cum nascuntur. Quibus & si priscorum suorum clara facinora desint, iuuat propria strenuitas & propria virtus. Quia ut aiunt, nesciunt cor ad nobilitatis actus magis inuitet aliena quam sua probitas: aut potius moueant defunctorum quam viuorum præsentiumque exempla, ut in octauo capitulo in fine dicemus. Sed certe tales verius nobiles esse incipere, quam plene perfecteque claros esse dixerim.

*Nobilitas
potest desinere.*

*Nobiles qui
dam fiunt,
qui non nascuntur.*

*An Cæsar
possit facere
nobilem.*

Putarunt ergo ex præmissis plerique sapientes non inuisse: Cæsarem aut Regem, plebeum hominem, verum nobilem facere non posse; cum nobilitas ipsa carnis à progenitoribus naturaliter in posteros procedere videatur. Idque in Ecclesiastico Sapiens affirmare videtur. Ait enim, quasi in eodem casu dixerit: *Noli querere ab homine dignitatem, nec à rege honorem:* scilicet nobilitatis & claritatis. Accedit ad hoc, quia constat principem mutare non posse naturæ cursum: nec nostrum affirmare aut negare aliquid mutat in re ipsa. Putamus tamen distinguendum. Nam si loquimur de nobilitate ad progenitores relata, quia natus aliquis est de non nobili parentela: planum fore credimus, talem impossibile fore per principem nobilem fieri posse, tanquam ex nobili prosapia, cum illa præsupponat iam diu factam esse, nec fieri modo potest. Cum vero loquimur de nobilitate ad seipsum relata, tunc putamus regem aut principem nobiles facere posse. Nam creabit eum militem: demum decorabit eum præfectura vel dignitate. Quo casu posteros vere nobilitabit: ipse vero nobilis esse incipiet, qui ignobi-

ignobilis esse desuit. Itaque honor illius auctus est, sed conditio non mutatur. Habebitque quandam nobilitatis imaginem, tamē quoad vulgi opinionem, aut plebeus manebit, aut pręteritę ignobilitatis vestigia non viquequaque cessabunt. Quam quidem opinionem princeps mutare aut delere nequaquam potest. Nec ob stare videtur, quod dici potest, quia talis nobilitas per principem ex mera gratia concedentis indulgetur, non quidem ex meritis, aut antiqua prosapia parentum: quia diximus, licet ea nobilitas ex voluntate dependeat concedentis, terminatur tamen in illius personam, qui debet nobilis effici. Incipit ergo à progenitoribus. quare talem appellare solemus nobilem factum, non natū.

CAPITVLVM VI.

De multiplici nobilitate: & an sola generis nobilitas in deferendis honoribus & premiis, pręferatur strenuitati aut scientiæ vel virtuti hominis ignobilis generis?

Nobilitatis igitur generis dum vim atq; naturam inquirimus, pulchrum erit vt id inuestigemus, in quo plurimorum oberrarunt ingenia. sæpe quidem non ab re etiam Sapientes ipsi dubitarunt, quęnam harum nobilitatum alteri in huius seculi assequendis, aut promerendis honoribus, seu deferendis præmiis præferatur: an ea, quę solum ex genere hominibus prouenit, an altera ex virtutibus, scientiæ & meritis comparata? Quid enim, si quis in armis strenuus, fortis, prudens, non tamen genere nobilis, cum alio concurrat, qui genere clarus est, sed obscurus meritis? Aut quid si sapiens ignobilis cum nobili super dignitate decertat? Quibusdam certe videtur nobilitati antiquati generis simpliciter deferendum. Primo ob suorum in Rempublicam merita. Eo præferim, quia ius naturale nobili opitulari videtur. Constat enim ingenuitatem naturalem potiora iura obtinere, quauis accidentali nobilitate. Rursus (vt est Philosophi in *Ethicis* sententia) nonnulli sunt virtutibus præditi, tamen nobilitate priuati. Facile enim reperiri libet rusticum, aut plebeum fortem, prudentem, animosum in his quę ei congruunt: principari tamen aut præsidere.

nesciret. Denique non videtur nobilitatem perdi posse per vitia filiorum. Nam Sapiens in Ecclesiasten ait: *à principe stultum possum in sublimi dignitate*, ex quo innuit nobilem esse licet stultum. Demum eam partem philosophus tueri videtur, qui in Politicis ait, *Ingenuitatem clari generis esse opus laudabile*. Constat enim ex operibus laude dignis deberi honoris præmium & reuerentiam. Postremo philosophus ipse & alii sapientes, nobilitatem ipsam *antiquitas diuitias* diffinierunt, nec aliis virtutis amminiculis opus esse. Econtra quibusdam videtur ignobilem progenie, tamen actu strennuum, fortem & prudentem, & longe fortius sapientem, nobili generis præferendum. Ut enim ait laureatus Petrarcha, & ab alio sapiente didicit, *quanto sit nobilior rusticus vir fortis, quam ignauus nobilis*. Illud nobis aperte demonstrat (si mente pensamus) quanto sit melius nobilitatem fundare quam euertere. Sed & qui eam partem tuentur, aiunt, quia iuxta philosophum in *Politicis*, dignitas & honor, ad quam nobilitas ordinatur, præcipue distribui debet secundum proportionem & excessum bonorum animæ, non secundum excessum bonorum corporis. Cuius causam idem Aristoteles in *primo Politicorum* assignat: videlicet quia talibus bonis corporis & fortunæ contingit male & bene vti. Quo fit, ut non recte in eis vera possit locari nobilitas, licet organice talia bona eam ipsam ingenuitatem condecorent. Si enim in exterioribus fortunæ bonis nobilitas confisteret, tunc quanto diuor quis foret, tanto esset nobilior, quod asserere nihil aliud est quam illam falsam sed faciam curiusdam mulieris amplecti opinionem, quam Philosophus in *rhetoricis* refert. Quia cum interrogatur, an optaret filium sapientem vel diuitem? illa respondit, optimam certe fore sapientiam. videbat tamen sapientes ipsos diuitum ianuas frequentare, & non econtra. Cum igitur nobilitas inter extrinseca bona computetur, constat nullum propter eam solam honorandum fore. Et hoc est, quod Aristoteles ipse subiicit, inquit, potius homines honorandos esse propter intrinseca, quam extrinseca bona: adiiciens, quia nobilitas sola progenitorum non facit formaliter hominem clarum. Adde quia felicitas, ad quam omnis humanus animus suspirat, nequaquam consistit in his exterioribus bonis:

In bonis corporis & fortunæ non consistit nobilitas.

Faciam mulieris ab Aristotele refertur.

bonis : nobilitatem vero nemo negabit esse aliquid felicitatis. quod ipse Philosophus testatur inquiring ; nobiles genere fortunatos & felices dici. Rursus eam partem roborare videtur naturalis ratio. Si enim genere nobilis, tamen vitiosus, plusquam virtuosus ignobilis honoraretur, absurdum admodum sequeretur: videlicet, quod vitia præmiarentur dignaque honore forent, & virtutes pellerentur. Quod Aristoteles in *politicis* damnat, ^{Qui vero sint honorandi.} dum regulam tradit : *neminem debere honorari nisi secundum excessum virtutum* : quæ sunt bona animæ, ut prædiximus. Denique ipsa scientia homines nobilitat, ut iura clamant. Hinc lex civilis habet : *Ulpianus Iurisconsultus recte nobilis appellatur, non quidem propter genus, sed propter scientiam & abundantiam meritum.* ^{Scientia nobilitat.} Faciunt plurimum pro hac parte præclara Salustii verba, de quibus statim in fine octavi capituli. Valida certe utrîque iacula emittuntur: dubiamque admodum atque ancipitem controuersiam agunt : pro qua diluenda, & veritate elicienda, longa discussione opus esset. Nonnulli enim sibi scioli quædam dixerunt, quorum principia ignorare videntur, dum solum nudas theoricæ iuris sequuntur. Ego vero fateor me ignorare cum eis. ipsam tamen ignorantiam explicando, *putarem recte dici posse, nobilem antiqui generis simpliciter præferendum ignobili, aequalibus ambobus scientia aut meritis existentibus.* Primo, quia nobilis gradum gradui adiicit, ut iura testantur. Si vero esset inæqualitas, non arbitror habendam esse rationem nobilitatis. Tanta enim posset esse huius ignobilis strennuitas & meritum prærogatiua, & alterius nobilis tantus viciorum excessus, quod secundum omnium opinionem, ignobilis merito deberet anteferrî. Primum ipsa lex probat. Ait enim, quia *licet qui meritis & labore vicit, præmio quoque & honore vincere debet, tamen quia proximis sacrorum seriniorum genitus reperitur, facilius antefertur.* & ita consuetudo obtinet. Et in hoc residere videntur nonnullæ positiones iuristarum. Licet igitur huiusmodi positio, secundum præsentem iustitiam, vera credatur, eam tamen insufficientem, nimisq; generalem dixerim. Qua de re arbitror intelligendam fore, quemadmodum Philosophus in *Politicis* subtilius explicat. Quid enim si nobilis & ignobilis, virtutis & scientiæ æqualia sint me-

Opinio iuristarum de nobilitate.

rita, tamen in eo actu aut honore, de quo agitur, ignobilis nobilem excederet? Pone enim, inquit Philosophus, *utrumque concurrere ad officium fistulandi, aut citarifandi. nemo sane mentis diceret nobilem, quia talem, ignobili in eam trito preferendum.* Nec aliter in honoribus principandi aut præsidēdi, si ignobilis ad eum actum aptior putatur secundum virtutem: licet à nobili nedum nobilitate carnis, sed in quibusdam aliis meritis excedatur: tamen recte quo ad illum actum præferendus est ignobilis. Cui sententiæ nonnulli iuris diuini & humani interpretes annuere videntur. Aiunt enim, aliquando nobilitatem carnis præferendam scientiæ etiam in ecclesiasticis honoribus, cum per potentiam nobilium rebelles arcentur, qui pacē perturbant. Nam tales nobiles longe facilius ecclesiam tueri valent, quia, ut aiunt, Respub. ecclesiastica non tantum indiget oculo doctrinæ, sed & manu, ut luporum rabies cōprimatur. Vbi tamen scientia ad hæreses extirpandas opus esset, præferretur sapiens. quo sensu intelligenda sunt sacrorum canonum decreta, & sanctorum dicta doctorum: præsertim Hieronymi dicentis: *Non sanguini, sed vitæ & doctrinæ honores distribuendos.* Sed & illud, videlicet cum scientia hominem nobilitet atque illustret, merito tanquam preciosius & nobilius bonum similiter præferendum credatur carnis nobilitati tanquam bono corporis. Itaque utraque nobilitas excedit & exceditur secundum æqualitatem aut inæqualitatem meritorum, & naturam actus, in quem concurrunt. Idque paucis (sed sapientibus) verbis Gregorius dicere videtur in Pastoralis, cum ait: *Quis nescit in natura gemmarum carbunculus hyacintho præfertur? tamen rubei coloris hyacinthus præfertur pallenti carbunculo. Quia & illi, quod ordo naturæ subtrahit, species coloris adiungit; & hunc, quem naturalis ordo prætulit, coloris qualitas desert.* Sic itaque intelligenda sunt, quæ in oppositum adducuntur. Illa præsertim, quæ in Ecclesiastico habentur; dicebam, inquit, *melio rem esse sapientiam quam vires.* Et rursus: *quomodo sapientia pauperia est contempta.* Ex quibus facile ad utrasque rationes respondere libet, ad eas præsertim, quæ concludere videntur, quia si natus nobilis, tamen viciosus, ignobili virtuoso præferretur, tunc laudaretur atque honoraretur viciū. Quia dicimus, eos non honorandos tanquā formaliter bonos & virtute præditos, sed tanquam bonos instru-

menta-

mentaliter, & vt signum bonitatis: veluti commendamus vrinam
sui natura fœtidam repræsentatione, quia signat bonitatem, id est
corporis sanitatem.

CAPITVLVM VII.

*De laudibus, præconiis & commendatione nobilitatis generis: & de
illis virtutibus & utilitate.*

CONsuetum igitur ordinem sequentes, post præmissa quæ de
nobilitate adduximus, afferenda sunt breui sermone pauca
ex multis. laudum præconia, prærogatiuæ & excellentiæ nobili-
tatis humanæ: & ilico eiusdem vanitates, incōmoda, damna & pe-
ricula, afflictiones & ærumnæ succinctè recensenda. Et quāquam
ex his, quæ paulo ante tetegimus, facile libet attingere, quāta sit hu-
ius ingenuitatis excellentia, quanta vis: ex his maxime, quæ ilico
subiciemus, eiusdem nobilitatis splendor & gloria vberius resul-
tabit. nec certe est illa præclarissima gēma, humanæ naturæ diui-
nitus missa, qua (vt cætera taceā) homo non à casu, nō fortuito, nō
deniq; ab accidēti, sed ab ipsa rerū natura dignior & excellentior
habetur. Cæteræ quidē humanæ dignitates, honores, cæteraq; bo-
na homines subsequuntur. nec vero generosa nobilitas vna cum
homine cōcipitur: quippe ante ab ipsa lustratur, quam à parentib.
nascatur. Quod sanctus patriarcha Iob perpulere demonstrat, cum
ait: *Gloria eorum à partu, ac ab utero & conceptu honor illius.* Hinc in Ec-
clesiastico Sapiens ait: *Gloria hominis ex honore patris.* Et licet teste
propheta: *Mortales homines natalibus aequales sumus: veluti filii excelsi o-*
mnēs, adeo vt vnus fons omnium sit: ipsa tamen generosa nobili-
tas alios aliis præfert. Et iuxta Apostolum, velut stella differunt à
stella, sic gloriosa ingenuitas hominem discernit ab homine, ne
pari laude aut honoris præmio perfruantur, qui inæquali virtutū
& generis claritate illustrentur. Quis enim alti seminis propagi-
nem negabit suam nobilitate posteritatem? quam potius exaltat:
sicut vilis & abiectus à sua vilescit. Vnde quidam ex sapientibus
in versu dicebat:

Nobilitas hominis est mens Deitatis imago:

*Nobilium
sex conditio-
nes.*

*Nobilitas hominis, virtutum clara propago:
Nobilitas hominis humilem releuare iacentem:
Nobilitas hominis mentem frenare furentem:
Nobilitas hominis est turpia nulla timere:
Nobilitas hominis natura iura tenere.*

Denique vt in *rethorici* Philosopho placuit, *nobilitati omnes pene virtutes famulantur, ad quas ipsa natura parens peculiariter cateris nobiles ipsos inclinat.*

Primo quidem humiles & mansueti nobiles existunt, elationē fugiunt, pro eo maxime, quia eorum progenitores potētia & diuitiis recte & moderate vsi fuere. quo fit, vt nō facile superbia inflatur, quemadmodum qui nuper atq; recenter ditati sunt. Secundo nobilitati deseruiunt magnanimitas. quę res agit, vt cōtumeliosi minime existant. Hi n. cum ad magna suspirent, parua iniuria nusquā cōmouentur, parcunt, indulgent, sufferunt tanto facilius imbecilibus, quāto resistunt fortius superbis. Tercio nobilitatē conciliat temperantia. Sunt n. nobiles vt plurimum in reipub. cura occupati: ea de re assueti sunt temperate viuere. Quarto, nobilitas est plurimum honoratiua, nec aliorum despectiua. Non enī reputant nobiles alia bona nisi animę: quare virtuti deditos non despiciūt. Quinto nobilitatem ipsam prudentia & industria comitatur. Subtiliter enim generosi inuestigant, quid eos agere oporteat. Quoniam plurimi illosū opera intuentur, & quicquid agant, qualiterque domi viuant, quid teneant, vicini omnes nouerunt, & velut exploratores eorū sunt constituti. Quo fit, vt solliciti, intenti, prudentes & cūcta prouidentes existant. Sexto, nobilitas affabilis est & plurimum curialis. Communiter enim versantur in regum domibus & principum curiis. sicut ē vestigio rustici tanquam solitarii, rudes & siluestres in campis viuunt: & ob eam rem (vt Philosopho placuit) nequaquā sunt bene conuersatiui. Postremo nobilitas ipsa non solum viuētib; sed & morientibus laudes & pręconia parit. nec modo nascendo quæritur, & viuendo conseruatur, quinimmo sæpe etiam (quod mirabile est) moriendo augetur. Idque gloriosus ille Machabæorum dux non negauit, de quo Scriptura ait, quia elegit nobiliter mori potius quam suū dūm esse peccantibus.

CAP.

CAPITVLVM · VIII.

*De vanitate nobilitatis humane: & de vitiis quæ eam comitantur:
 & de plurimis excessibus nobilium: & de falsa nominatione nobilitatis: & de illius incommodis, laboribus & periculis.*

COgit iam aduerfantium turba, vt huius tam laudatæ ac caducæ, sed & inanis carnis nobilitatis vanitatem, ignauiam, inconstantiam, cæteraque incommoda, afflictiones, ærumnas & pericula paucula ex multis attingamus. In primis itaque illud vellem semper cunctis mortalibus menti defixum esse, quod vnus ex Sapientibus ait, quia *si humana naturæ obscenam fabricam & turpem materiam conspiciamus, de terrena carnis nobilitate disputare nil aliud videbitur, quam de stercoreis aut luti claritate certare.* Vnde apud Machabeos scribitur: *Gloria eorum sterqus & vermis.* Quod & Esaias non ignorauit, cum ait: *Magistratus & honor illius quasi lutum.* Quid enim superbit terra & cinis? Vnde Chrysostomus: *Vana est nobilitas carnis infructuosa & pudorosa atque nociua, nisi comitetur virtus.* Et Boëtius: *Quam, inquit, inane & quam fictile nobilitatis nomen, quis non videat?* Quare splendidum re, si tuam non habeas, aliena claritudo non efficit. Et Apuleius, in honoribus, inquit, assequendis, noli aliena appetere. *Aliena voco, quæ parentes pepererunt: cum ridiculosa iactantia sit de alieno gloriari.* Et poeta Petrarca laureatus ait: *Sicut posterorum macule parentibus non obsunt, sic nec maiorum splendor descendentes illustrat.* Vnde ad quendam dicebat: *Mallem per teipsum alii, quam tu per alios noscereris.* Et subdit: *quia mira res est id videri cupere, quod non sunt.* Fures, adulteri, tenebras querunt: sola hæc vana & falsi nobilitas, licet vicijs obtenebrata, lucem querit, agnosci appetit: cui sanum esset consilium nesciri. Qui ergo veri nobiles esse cupunt, aliquid agant, vt sint nobiles: quia & maiores sui nisi aliquid præclarum egissent, nunquam nobiles fuissent. Demum, vt Hieronymus ait: *Nihil aliud video in generis nobilitate appetendum, nisi quod appellati nobiles quadam necessitate constringuntur, ne à progenitorum probi-*

sate degenerent. Quis tamen non videt plurimos filios à suorum claritate degenerasse? Quippe qui quanto patres fuere clariores, tanto ipsi euasere obscuriores: ut tot labores filii perpeti videantur in sectandis viciis, quot patres eorum in sectandis virtutibus: tot denique studia, solertias filii in perdenda nobilitate impendant, quot illi in acquirenda habuere. Idque ut quidā Sapiens ait, in African filio libet intueri: qui licet ex patre clarissimo genitus, plurimis viciis sorduit. etsi nobilitas per manus tradi potuisset, clarissimum illum Africanus pater effecisset. Verum illum pater potuit amare, sed non potuit illi gerare: hereditatemque vniuersam locupletem, quæ sua erat, ei in testamento preliquit, claritudinem dimisisse non valuit. Quæ res apertissime probat, quia aut nobilitas ipsa nihil omnino erat: aut pater, qui omnia reliquit, eam in bonis suis non habebat. Falso igitur asseratur nobilitatem à parentibus suscepisse, quam ipsi libenter dimisissent, si valuissent aut habuissent. Omnis successio etiam vilissimarum rerum iudicio testatoris accipitur: sola nobilitas sua voluntate non transmittitur. O quot patres infinitam suæ lucis eclipsim in filiis patiuntur! ut verum sit quod scribitur, quia dant maculam gloriæ parentum. Demum quantum discrimini, quantum periculo proximum sit, inconstanti & volubili rei animum dare, nemo est qui nesciat. Volubilis enim atque inconstans est hæc nobilitas, & omni mobilitate mobiliior. Qui enim heri arabat, hodie militat: & qui heri per vrbes medias aureis habenis superbus incedere, populosque regere solebat, hodie per qualem campum pigros boues paruo pugione sollicitat. Seruorum filios in folio sæpe vidimus: & filios regum in ergastulis. Quid ergo instabilius? quid variabilius? quare nobilitatis assentatoribus minime assentiendum puto. Aiunt enim, pro eo eam ipsam ingenuitatem, magni fore precii, & quia naturaliter hominibus inest. Ego vero non satis video, quo pacto verum dixerint. quod ex eo primo patet: quia tunc omnes homines nobiles essent. Adde: quia ea vere naturalia sunt, quæ semper & ubique intunt, ut Philosopho placuit. Nobilitas vero tam volubilis est, ut mulier, quæ heri clara fuit, hodie sine eius culpa, immo recte & sancte agens, si plebeo nupserit, ingnobilis efficiatur. Et idem in eo, qui propter delictum nobilitatem

*nobilitas à
parentibus
transferri
non potest.*

*Nobilitas
inconstans*

*Nobilitas
naturaliter
hominibus
non inest.*

tem

rem perdit. Quo fiet, vt aliqua temporis parte infelix homo sit nobilis, & alia ignobilis: & è vestigio. Rursus nec omni loco nobilitas inest. Sarracenus enim nobilis à nobis capus, proculdubio ignobilis erit, quia seruus effectus. Et simili modo, si catholicus ab infidelibus capiatur. Denique id ipsum & in milite conspiciamus. Non enim militia vbiq; & vniformiter nobilitatem efficit. Nam cum de equestri dignitate leges & ciuilia iura loquuntur, solum milites vrbs Romæ nobiles appellat. Habent denique nobiles quædam peculiaria sibi que naturalia, forte dixerim indelebilia vicia. Ad quæ teste Philosopho in *rhetoricis*, quam maxime natura ipsa inclinatur, ipsi tamen actualiter operantur. Primo quidem Nobiles plurimum sunt honoris appetitui, & ambitiosi. *Est enim* (vt Aristoteles ait) *naturale homines accumulare velle ad id quod habent*, quare dum ditari incipiunt, indies volunt fieri ditiores. & qui honorantur, cupiunt effici honorabiliore. Nobiles vero, cum eorum genere honorabiles videantur, idcirco peroptant accumulare ad ea quæ habent, conanturque fieri honorabiliores. Quod fit vt nimium honoris & potentie sint appetitui, veluti ad id proximiores. Secundo, vituperabile admodum vitium & monstro simile, nobiles ipsi naturaliter amplectuntur. Sunt enim, eodem Philosopho teste, *adeo elati, vt etiam progenitorum sint vt plurimum despectores*. Cuius ea ratio putatur, quoniam se reputant nobiliores atque maiores, quam eorum patres. quod ideo contingit, quia, vt idem Philosophus subdit, *semper nobilitas longe facta maior est quam propinqua*. Testis est huius detestandi facinoris nobilis ille Alexander magnus, qui rege Philippo & patre vitis nescio si virtutibus maior extitit. De quo Policratus ait: quia & si pater plurimis artibus, *arbis imperii consequendi fundamenta iecisset, tantam gloriam filius ferre non valebat*. Quinimo tam incontinentissima fuit inuidia paterna gloria, vt cum patris triumphos, virtutes, praeclaraque gesta audiret, lacrimas pro dolore extorqueret, easque despiciebat. forte dixerim minuebat, ac si paterna virtus omnium à se gestorum gloriam eriperet. eos vero, qui talia referebant, propriis plerumq; nauibus interficiebat, aut rari ad pœnis inuebat. Rursus parua sunt nobilitum vicia, quæ teigimus, nisi alia eis familiarissima addideris. Primo quidem, Deum & Ecclesiam, quæ illos regerant, contemnunt: quibus cum nobilitatis iactura ipse com-

*Nobilium
quædam
vitia.*

*Alexandri
magni in pa-
tri laudes
inuidia.*

minatur inq̄uens: *Qui me contemnuunt, non erunt nobiles.* Secundo, nullus est illis plerumque in delinquendo pudor, nulla verecundia. Quippe qui falso putant se licentiam peccandi, cum carnis ingenuitate impetrasse: non attendentes, quia iuxta Ambrosium: *verecundia exercendi turpia ingenuos & claros prodit naturales, Inuerecundia vero obscuros reddit.* nec aliena virtus a propriis facinoribus exculat. Hinc nobilis ille tenator Boetius: *Nescio, inquit, quo pacto ex se obscurum aliena claritudo clarum reddat.* Recte igitur Apulcius tales vocat *sordida loca, sole illuminata aut umbras deformes.* Et subdit: *quia huiusmodi nobilitatem ipsam, quæ virtutis instrumentum constituta est, ut scutum vel castrum faciunt, quo cum eo licentius se flagitius dedant atque defendant.* Tertio, ingraticudo & infidelitas plerumque eos comitantur. *Præter enim, inquit Canon, Non potest principi esse fidelis, qui Deo est infidelis.* Si igitur putantes se nobiles, Deum, cuius expensis viuunt, diuersis peccatis offendunt, recte ingrati quippe & proditores sunt, & merito vilissimi plebei censentur. Quarto cum verum nobilem faciat magnanimitas, qua quis bona corporis ut parua contemnit; & magna, videlicet bona animæ, appetat: nobiles plerumque parua amplectuntur, & magna negligunt. Quinto, munifica liberalitas, quæ maxime nobilibus congruit, procul est ab eis. Nam cum beatius sit dare quam accipere, nobiles in eo se ingenuos & claros fore putant, si ab aliis extorquent, si rapiant. Interrogatus quidam sapiens a nonnullis nobilibus, *quæ nam foret verior maiorque nobilitas?* Ille, *indigentibus, inquit, munifice dare.* cui illi acquieuerunt. Rursus sapiens ipse ad eos: *dicite, inquit, versa vice: quam putatis vilioiorem ignobilitatem?* Et illi, *oppositum, inquit, sententia tua. Cum enim summa sit nobilitas munifice dare: consequens erit ut summa sit rusticitas atque extrema ignobilitas auferre.* Quibus sapiens: *Verum, inquit, & rectum in caput vestrum iudicium pronuntiastis. Cui enim assiduo a pauperibus sua auferatis, viles, & seruiles sed & ignobiles vos ostenditis.* plurima certe detestanda sunt vicia nobilibus cōiuncta atque vnita: quæ facilius ab eis committuntur, quàm scriptis quibuslibet referuntur. Et hæc paucis verbis Hieronymus explicabat, inq̄uens: *Plerumque nobilitas carnis ignobilitatem parit mentis.* Liquet igitur ex præmissis, quanta sit hominū vanitas, tanta vanitate vexari, si verū est quod scriptura ait, *quia in vanitate sua comprehenditur vir.* Comprehenditur,

*Quæ nobilitas
est verior.*

rut,inquā, homo in sua vanitate, dum plurimis sese periculis subiicit, ut vano, inani atq; nudo nobilitatis nomine se putet decorari. quod in Deuteronomio scriptura luculenter insinuat; inquit: *No est sine periculo, qui super re vana nomē assumpsit.* Quid enim vanius? quid funestius? quam de meritis parentum gloriari, qui in se fordet? Quid de patrum laude prædicari, qui à suis viciis deturpatur? Hinc pulchre Salustius in oratione ad Marium. Nam cum æmuli, generis ignobilitatem ei obiecissent, in eos sic inuehit: *De iure me, inquit, despiciunt: faciunt idem maioribus suis, à quibus virtute ac præclaris gestis nobilitas cepit. si invident honori, inuideant & labori: inuideant innocentia atq; periculis meis.* Et rursus: *Videte, inquit, quam inique cōtemnāt. quod enim sibi ex aliena virtute arrogant, id mihi ex me non concedunt. mihi nona nobilitas est, quam ut puto longe sanctius est peperisse, quam ut illos acceptā corruptisse.* Et iterum subdit: *Fateor: imagines non habeo, dicere tamen audeo; vita mea, mores, hasta, vexillum, & alia militaria dona, cicatrices deniq; & vulnera illata corpori meo. Hæc sunt meæ imagines, hæc ingenuitas, non hereditate relictæ, sed laboribus, sed periculis meis acquisita.* Hæc ille. Hæc paucula de nobilitate: quæ cum via quædam ad armatā militiam existat, ne tu fili carissime, qui militiæ inermi hucusque vacasti, armatam à te nondum expectam, tanquam virtute carentem omnino despicias; aut ad illam veluti summam, gloria & honore refertam, inde liberatus aspires: Expediens fore puto, ut huius militaris status & vitæ, primo dulcia & prospera, deinde amara & afflictiva agnosca.

CA. TVLVM. IX.

De armata militia & exercitio armorum: & de laudibus & commendatione huius exercitii: & an vacantes armis sint veri ciues & partes civitatis.

PLURIMA & laudata præclaraq; exercitia mortalium hominum adinuenit industria. Sed inter illa ònia nihil armata militia excellentius, nihil præclarius & gloriosius. Ea enim exercitatio, utilitate, honore ceteris præstat. Per militiā siquidē & armorū exercitiū, reip. quies atq; salus quiritur ac cōservatur, & ab òni hostili vastitate

Militia manibus comparatur.

liberatur. Cuius exercitii laudes, utilitatem, primo ipsa humana indigentia demonstrat & extollit. ut enim antiqui voluerunt, militia recte manibus comparatur, quæ naturæ imperio parata est ad corpus iuuandum. Sicut enim manus sunt in corpore naturaliter institutæ ad repellenda nociua, ad percutienda infestantia, ad attrahenda necessaria, & ad conseruanda aliâ membra corporum, illaque augenda; sic milites ad ista conficienda in rempub. pernecessarii existunt. Vnde Valerius de necessitate ac profectu militiæ ait: *Disciplina militaris acriter retenta principatum Italia Romano Imperio peperit: multarum urbium, multorum regnorum, validissimarum gentium, regimen largita est.*

Militia necessaria.

Præterea sunt aliæ institutionis eius causæ, ortus atque necessaria principia, quæ illius necessitatem præclare ostendunt. Est enim homo ipse imbecillis atque natura infirmus, sibi ipsi nequaquam sufficiens. Itaque societate & conuentu hominibus opus est: ut quod seorsum agentibus, singulis desit, id per mutuam operam de multitudine socia nanciscantur. Hunc catum Philosophus in Politicis *ciuitatem* vocat: cuius (ut Hypodamus scripsit) tres censuit partes fore necessarias. Primam quidem; agricolarum: Secundam artificum. Tertiam, propulsatorum belli & arma tenentium. Qui ergo tam præclarum militiæ & armorum initium cernit, nusquam tam insigne exercitium damnabit. Nec enim agriculatores, sed nec artifices in ciuitate præstabunt, absque propulsatoribus belli: quorum opera, salus ciuitatis, cuncti denique status, & ipsa sacra tuta sunt. Plato etiam in his quos de reipub. scripsit libris, cum ceteros status in ciuitate instituisset, vnum necessarium genus hominum longe ceteris anteposuit, qui arma tenerent, ciuesque alios ab hostibus defenderent: quibus mirifica priuilegia tribuit, honoreque & dignitate ceteros voluit antecellere. Quodque si minime honorantur, pauci fortes reperientur. Nam iuxta sententiam Aristotelis, *apud illos inueniuntur fortes milites & rationes, apud quos fortissimi quique honorantur.* Et Cicero: *lacent semper, & parum vigent, qui apud quosdam non decorantur.* Ea ergo respub. tyrannidem sapit, quæ fortes aut sapientes minime honorat. quis enim clarissimos milites cunctis non anteponet, quorum pietas in patriâ studiosa est: & mors pro illius salute sæpe ab eis offertur?

Hinc

Trium ciuitatis partium.

Hinc Bruti, Publicolæ, Camilli, Scipiones celebrantur. Si enim milites in repub. deessent, virgines passim raperentur, matres familias ad libidinem traherentur, sacra simul & prophana polluerentur, tandemque cuncta cædibus & incendiis misera quadam conditione miscerentur, & tandem quicquid prauis hominibus liberet, id innoxios atq; innocentes pari oporteret. Has vitæ militaris vtilitates & bellicæ, Aristoteles conspiciens in septimo Politicorum ait, quod *merito bellicis artibus vacantes, proprie sunt partes ciuitatis: & eos veros ciues appellat.* Subdit enim, quod prædicti *bellici homines, item cõsiliatui, iudicatiui, ac etiã sacerdotes sunt veræ partes ciuitatis.* Mercatores vero, in quantum tales, & agricolæ ac artifices, Mechanici & mercenarii, quantumcunq; sint diuites, licet necessarij sint in ciuitate, non tamen sunt veræ partes nec ciues illius. Cuius ratio est secundum eundem Philosophum, quia potissima causa & ratio, quare quis est ciuis aut pars ciuitatis, quærenda est ex ratione totius ciuitatis. Et ratio totius ciuitatis quærenda est ex fine, ad quem tendit omnis bene ordinata politica: quæ est felicitas, velut finis totius reipub. Constat enim impossibile esse, felicitatem sine virtute existere, quæ est principium eius. Itaque non facit ciuitatem, neq; eam constituit, plurimos in ea simul viuere: sed debet esse communicatio bonarum actionum ad finem bene & virtuosè viuendi. Nec etiam constituit ciuitatem vt adinuicem viuant, nec iniustum sibi faciant. sed nec ciuitas noscitur instituta gratia mercaturæ, aut commutationum, licet sint necessaria: sed est instituta gratia bene viuendi per se & sufficienter. Quo fit, vt partes ciuitatis & cuiuslibet reipublicæ, determinentur ex virtute: quæ est operatio hominis virtuosa & perfecta. Manifestum est autem mercatores, agricolas, & mechanicas artes ducentes, non proprie esse ciues, neque per se sufficienter fore partes ciuitatis; quia vita eorum admodum vilis & abiecta est, cum non ad virtutem dirigat aut ordinat homines, sed principaliter ad luctum & questum proprium. imò contraria est virtuti, quæ fundata est in honesto: mercatura vero & ceteræ mechanicæ fundantur in vili. Præterea veris ciuibus & partibus ciuitatis necessaria est vacatio ab operationibus vilibus: & oportet aliquando intendere actibus intellectualibus, & talibus operationibus, quæ generant vir-

*Sacerdotes
veræ partes
ciuitatis.*

*Finis reipub.
est virtuoso
vivere, &
hæc felicitas
politica.*

tutem. quod facere non possunt mercatores, agricola & artifices, qui omnino sunt dediti artibus suis. Sacerdotes vero secundum eundem Philosophum, ac consiliatui bellici & iudicatiui, veræ sunt partes ciuitatis, quia non essent tales, nisi in eis esset prudentia politica. Nam exempli gratia: in bellicis hominib. est prudentia, per quam quis est aggressiuus terribilius, quando & quomodo expedit. Nam dicit Philosophus in secundo Politicorum, quod vita militaris multas habet partes virtutis. & sic de consiliatiuis & iudicatiuis ac de sacerdotibus; quia determinant de virtute. ideo sunt veræ partes ciuitatis.

*Ratio quare
sacerdotes
sunt partes
ciuitatis.*

*Militia no-
men unde
dicatur.*

Rursum inuestigandum est de nomine *militis*. Nomen itaque *militie* quidam ideo appellant, quod à malo arceret: quasi à *malo arcendo* dictos: quod malum arceant à ciuitate. Alii vero nomen *militis* græcè dicunt, quod duritiam significat: quasi eos *non molles* esse conueniat. Nonnulli tamen à *mille* numero *militem* dictum putant: quasi ex mille electus. Ex omni igitur *militie* nomine, atque principis, causis & effectibus facile cognoscitur, quantæ gloriæ & excellentiæ sit *militie* vacare. Taceo de dignitatibus, de honoribus, tam excellentis exercitii: qui tam ingentes tanquam per insignes existis, ut eius virtute sepe acquisita regna, comparata culminum imperia videamus. Quo fit ut omnis generis animus merito ad eam aspirare debeat. Demum vero milites gratissimum Deo holocaustum offerre possunt, & in eodem exercitio beati saluique fieri valebunt. Unde Augustinus ad Bonifacium: *Noli (inquam) extimare neminem Deo placere posse, qui militaribus armis ministrat. In his erat sanctus David, cui Dominus tam magnè præbuit testimonium. In his plurimi illius temporis iusti fuerunt. In his erat ille Centurio, qui Domino dixit: Non sum dignus ut intres sub tectum meum. Et iterum Gregorius summè ait esse militie laudem, si quicquid imperatur vituliet, i obtemperatur.* Adeo bellandi officium sine culpa est, ut etiam sub rege sacrilego & pagano militare recte possit quicunque catholicus. si tamen non sit contra diuinum mandatum id quod præcipitur, vel utrum sit, certum non est: ut diffusius contra *Manichæos* Augustinus deducit. Hinc igitur amici, & contribules pluribus ad me verbis referebant, ut *militie* armisque exercitio operam dare. Addebant quoniam progenitores & sanguine coniunctos hanc viuendi conditionem lectos non ignorabam.

*Milites beari
possunt.*

CAPITVLVM X.

De militia laboribus, oneribus, atque incommodis eiusdem vitæ militaris ac exercitii armorum: & de periculis huius status: & de causis, quibus hoc exercitium dissuadetur.

ASurgit mater non pigra his auditis: & vitæ huius militaris & arinorum exercitii dampna, incommoda atque pericula, ac si armis ipsis experta, eisq; rebus trita fuisset, his suasionibus re- colebat. Militiæ sectatores ac arma tenentes, quod militiæ, quod armorum officium sit, ac quid sua professio postulat animo ge- rere & pensare debent. Siquidem miles primo sacramenti atque professionis sibi maximū onus incumbere videbit, vt repub. tu- eatur, iniurias arceat: & cum Apostolo *cōtentus stipendiis suis neminē concutiat*. Hæc est eius professio, hoc officiū. quæ si ab eo recte ge-
Iuramentū militis & officium.
runtur, magna sunt laude & gloria digna. Si vero ea non gesserit miles, proculdubio dedecorat illa omnia, quæ sunt vel officio mi- litis, vel eius professioni connexa. Cum igitur tutandi (vt dixi) of- ficiū militis sit, nihil tam turpe, nil tam intolerabile, nil tã per- niciosum, quàm si ipse, qui defensionis nomen habet, vim atq; in- iuriam afferat ciuibus: vt vnde salus expectatur, inde & scelus na- scatur. A ceteris namq; hominib; illatæ aduersus ciues iniuriæ de- testabiles admodum sunt: à milite vero si inferantur, scelerata, impia atque funesta sacrilegia sunt. & vt paucis videatur, quan- tum nefas sit pauperes à militibus impugnari: hinc intelligi de- bet, quia si inopes debilesque miles ipse despiciat, nec aliis impu- gnantibus resistat, merito proditoris nomē incurrit. Quis enim
Militis in- iurantes proditoribus similes.
dubitatur, quin proditor flagiciosus ille sit, qui rem custodiæ fideiq; suæ commissam hostibus patefecit? aut verius ipse dirupit? Mi- lites ergo ciuium inopumque custodes, non solum officio, sed fi- de, sed sacramento, sed vi atque natura professionis ad hoc vnum agendum principaliter constituti noscuntur. Si ergo pauperum ciuiumque tutamen prætermittunt, quos potius ipsi sacrilego ex- pilant conatu, summa proculdubio proditio existimanda est. sed tanto insignius facinus erit, si per se ciues impugnent. quæ omnia an à militibus armigerisque nostri temporis obseruentur, facile libet agnoscere. Equidem verum est ad contraria modorum

*Milites mer-
catorum apo-
stata.*

studium militum. Student nanque cui noceant, cui vim & iniuriam afferant: & quæ sunt plane officio suo aduersa, ea exercent impune. Nec sunt contenti militiam dedecorare atque frædare: sed perimere eius virtutem naturamque videntur. Obliuiscuntur siquidem suæ professionis. Ad id solum tendunt, vt satis diuitiarum habeant: studium lucrificandi capient: mercaturam denique exercent, quæ in eis sordida atque deformis est, qui non solum mercando aut lucri captandi gratia negotiando, quasi quidam apostata à sua religione censentur, sed quodammodo desertores atque transfugæ videntur, quia repudiata religione turbæ se immiscant, ac pecuniæ quæstui intendunt. Taceo sordidiora plerumque ab eis experta compendia. Taceoq; locandi publica vectigalia passim eos assumere, ceteraque vilia officia exercere. Taceo in nundinis tabellarios atq; numularios inuerecunde plerumque constitutos fore, qui tam præclarum exercitium infamare & penitus deturpare non verentur: adeo vt indigne falsoq; insignia militaria gestent, & nitorem auri, quod deferre eorû dignitas iubet, sordido quæstu coinquinari non pudet. Quis igitur ad hoc exercitiû aspirabit, in quo non nisi nomen omni nudatû effectû prodolor remansit? Sed hæc parua cui libet intuenti videbuntur, si crudeliora quædã alia contemplatur. Et in primis illud Scipionis occurrit, q; militare volentibus dicere solitus erat, quia pauca unicuiq; militiam desideranti visa sunt vitæ mala, nisi militiâ addiderit, quæ inquit semper vel in gloriam, vel periculo expositiû, aut contemptui deditum esse oportet. Adde quod Apostolus ait, quia vita nostra militia est super terram. Hanc igitur cû nascendo profiteamur, quid alia nouæ militiæ professione opus est? Nam ibi fortissimum corpus ferro armatur, hic animus contra dolos, linguam, versutias & fraudes permuniri debet. Nescio igitur, quid armari exterius iuuat, cum intus in anima bellum sit. Nec illud diffiteor, quia plurimos militia ad amplas opes, sed & ad summos honoris status prouehit. Sed nisi fallor longe plures ad inopiam, ad carceres, ad seruitutem, ad violentam subitamq; mortem eodem tramite perueniunt. Nam vt laureatus inquit Poeta: *Ex quo quis profiteri militiam animum habuit, nisi dehonestare arma voluerit, semper animam in manu parituram habeat necesse est. Corpus vero non dicam in periculo esse, sed ipsum quoq; periculû in corpore.*

Semper

Semper n. *aures militis (vt Vegetius ait) vox illa regia intonat: disce ferire, intrepide mori.* Et rursus breue sed horrēdum militi prouerbum est: *vel occides, vel occideris.* in hoc omne præclarum genus militiæ versatur. Adde rursus ad dissuasionem huius vitæ militaris, quæ supra tetigimus in VIII. capitulo, cum de nobilitate egimus. Has igitur piæ matris inuictas rationes cōtemplans, a secularium militiæ armorumq; exercitio alienum me reddere concepi. Sed ilico affinium amicorumq; turba carne & sanguine (vt arbitror) reuelantibus, ad reliquum militandi genus incremem, acerbe grauitaq; virgere visi sunt. Cum enim (vt dicebant) magnam ætatis partē circa humani iuris disciplinā expenderim, congruum quin imo debitū videbatur, vt quæ in theorica profecerim, ad praxim deducerem, & quæ studio ipso attigeram: iam mundus ipse conspiciat. Dicebāt enim quod *habens experientiam, seu operationem* (vt philosophus inquit) *etiam sine arte magis laudatur, magis etiā proficit in operādo, quam habens artes sine experientia.* Vt igitur in ea vel alia viuendi arte vtilius agerem, necesse erat vxorem ducere, quæ firmat homines in vnoquoque viuendi modo, & discurrendi per orbem occasiones tollit. Quare ad eam coniugalem vitam infra scriptis persuasionibus commonebant.

Militis prouerbium.

CAPITVLVM XI.

De vita & statu coniugali in sancto & immaculato matrimonio: & de necessitate, vtilitate, laudibus & prerogatiuis vite coniugalis super alia viuendi genera.

Vlde coniugalis status quam sanctus, quam immaculatus, atq; necessarius existat, nemo est qui nesciat, nisi qui se hominē ac ex viro & scēmina natum ignorat. Hic vitæ innocentissimæ status præcipue iuuenibus admodum expedit, ne alienis illicitisque libidinibus misceantur, & bonis castisque coniugii fructibus perfruantur. Hic status coniugalis necessarius fuit ad cōseruationem speciei humanæ. nam tribus euidentissimis & necessariis causis fuit institutus. Primo propter proles generationem, vt habeat esse naturale: item vt possit nociuis obuiare: rursus vt habeat esse vigoratum, vt possit proles subsistere, & tādē valeat sibi similem generare. Secundo propter concupiscentiæ refrenationem. Ter-

Tres causæ institutionis matrimonii.

tio propter viri glorificationem, quia (vt inquit Apostolus) *mulier est gloria viri*: quia Deus dedit homini adiutorium feminam, non ad carnalem concupiscentiam, sed vt haberet gloriam de femina, cum eum imitatur in sanctitate, & prolem ex eâ generet quæ gloriam Deo præstet, & sit ad gloriam viri, quæ gloriatur & quodammodo perpetuat in filio, qui est eius imago. Ex quibus facile agnoscitur, quia hæc beata coniugalis vita pro aliquo tempore magis expediens & necessaria videtur, quam continentia siue virginitas; & ideo præligenda. quæ res agit, vt eo euentu longe melius sit vacare coniugali copulæ, quam continentia: videlicet eo tēpore, quo multiplicatio generis humani pernecessaria fuit, vt completeretur numerus electorum, quemadmodum in simili videre libet. Nam teste philosopho in *topicis* philosophari simpliciter melius est quam ditari: verum tamē indigenti necessariis, melius est ditari quam philosophari, & pro tempore illo præligendum, secundum Thomam. Rursus ad hanc coniugalem vitā plurima, & præsertim tria, inducere & inclinare homines videntur: scilicet natura, recta ratio, & gratia. Natura quidem: quia propter prolem & naturalem aueritatem conseruādi speciem & perpetuandi seipsum per filios. Demū recta ratio, qua inclinatur cōiunx ad seruandum fidem coniugi. deniq; gratia, videl. sacramēti. Hanc igitur viuendi formam beatam & gloriosam fore nullus sane mentis ignorat. Cuius status necessitas, vtilitas & sanctimonia, ex multis colligi possunt: sed præcipue ex decem eiusdem status excelsis laudibus & mirificis præconiis. Prima igitur eius excellentia instituentis est excelsa auctoritas. Nec enim istum sanctissimum ordinem aut Augustinus aut Hieronymus aut monachorū pater Benedictus, sed Deus ipse ore, factoque instituit. Secundum præconium ex loci prærogatiua pender: cum in paradiso institutum recta fide credamus, paradiso in quā terreno & cœlesti: quia, vt sancti Tractatores aiunt, misso sopore Adam raptus est in spiritum: & (vt aiunt) curiæ cœlesti interfuisse creditur, ibiq; virtutes tanti sacramenti plene cognouit. *Denique tertia dignitas erat videl. institutionis eius antiquitas.* Quarta excellentia est vnitas duorum in vno corpore; quia scriptum est: *Erunt duo in carne vna.* Quinta temporis excellentia, quia in statu innocentia, quādo nec peccati quæ-

Tria inducunt nos ad matrimonium

Decem matrimonii dignitates.

uis rubigo initium sumpserat. Sexta dignitas ex eo colligitur, *quod hunc solum ordinem tanquam immaculatum, Deus ipse saluum fecit*, indignationis atq; diluuii tempore, quo fornicatores omnes vtriusq; sexus æterna aquarū voragine deleuit. Septimo gloriosam virginē Deus delegit hunc ordinem assumere, quanquam virginitatē voluisset, matrimonii verum sacramētum non respuit. Nec paruū videtur præconium matrimonii, cū Dei filius tam diu distulit carnem suscipere humanā, quousq; virgo beata sub matrimōnio foret legitime cōstituta. Octaua dignitas coniugalis ex eo cōstat, q̄ Christus hoc matrimonii sacramentū nō modo sua præsentia, sed miraculo illustrat, vt Iohannes refert Euangelista. Nona excellentia patet, quia ex eo vniuersa fit propagatio humani generis. Quin immo (vt inquit Hieronymus contra Vigilantium) *si virginitas laudatur, cur matrimonium non vehementer amatur, ex quibus virgines procreantur?* Decimum aliud matrimonii præconium non inferius aliis omnibus videtur, quia carnis copula, quæ sine illa mortalem generat culpam, eius virtute nedum à peccato immunis, quinimo plerumque meritōria efficitur. Adde, quia *matrimonium non solum mundum, sed paradisum replet* (vt inquit Ambrosius) per quod scelera pene infinita, incestus, multa denique scelera, vitantur, & ingentia bona quærantur. Ex his igitur attinentes, me ad coniugalem vitam cogere quodammodo conabantur.

CAPITVLVM XII.

*De oneribus & incommodis, & laboribus plurimis vita coniugalis:
& de causis, propter quas non expedit uxorem ducere.*

FLuctuabat ubiq; animus, sed ad me reuersus piæ matris consiliū periturus accessi: an igitur vxorem ducere, consulebam. Illa vero, quæ (vt sæpe postea retulit) diuturnas pro me lacrimas & vota sua altissimo dederat, vt in suam me sortem traheret, tanquam rabida quædam leæna, longe contrarium suadebat. quinimo ne incautus tam imminens naufragium subitem perirogabat, atq; seuerè cōponebat. Dicebat enim, mariti hominē licet

dulce, plurimis tamen ærumnis fore refertum. Quis enim (inquit) onera matrimonii facile ferre potest? Quis quarundam vxorum insolentias? Quis pompas? quæ (si pauperes sunt) facile ab hominibus contemnuntur. Si diuites, dotes eas tumidas, genus insolentes, forma vero suspectas reddit: deformitas quoque reddit inuisas. Quarum lingua (vt Plutarchus voluit) nil perniciosius: quarum audacia nil prodigiosius: quarum improbitate nil inexas quabilius cogitari potest; quæ iurgiis & contentionibus obtundunt viros. Semper enim conqueruntur, semper exprobrant, semper insidiantur. Et (vt Cato dicebat) *quos coniunx diligit, illa odit*. Eis enim cum cætera defunt, nunquã tamen lacrimæ, gemitus, atq; suspiria, vt fastis suis fiat satis. ornamentorum vero ambitione adeo ardent, vt cunctas opes labefactent, miserosque cogunt maritos in quæstus, in dira prodire scelera. Et quod periculosius est omnium, qui vxorem duxit, cum Apostolo *quæ mundi sunt cogitat*, & effeminatos virorum animos, & ab omni speculatione reddunt penitus alienos. Taceo tandem, quod in maritos fraudes exercent, quod simulationes, quod proditones, quod plerumq; suppositos partus, quod mētitas enutricationes, quod alieni seminis susceptas mēsses. Et vt facere & perpulcre quidam sapiens dicebat, & ridiculum magis est, lugent postea innocentes mariti, has sibi extinctas vxores laudant, prædicant in vrbibus quasi pudicas, quarum impudicitia corda eorum vulnerantur. Cogunturque honoris non perdendi gratia recte mentiri. Quod si dotem amplam quis cum vxore assequitur, tanto superbior efficitur. Quo certe superbix stimuli sunt cuiuslibet vxoris, forma & dos. Mulier enim bene dotata, mariti domina, vxor non est: nil sibi illicitum putat, quæ suas opes quotidie mariti comparat egestati: & que a viro pascitur, dominam se putat, non sociam. Vnde recte dicebat quidam sapiens, quia *vnde dos ingreditur, inde libertas, inde verecundia, inde obedientia egreditur*. Licurgus enim recte leges fecit, vt *mulieres indotatæ nubèrent, ne pecunia potius quam vxores eligerentur*. At si pauperem quis vxorem ducit, non vnius diei, sed totius vitæ hospitem, fortè hostem, comparat. Et vt paucis multa comprehendam, qui vxorem ducit, cum Apostolo *cogitat quæ mundi sunt, & quomodo vxori complacent*: cui dum quis placet, sibi atque aliis

Causa superbia vxorū, Forma & dos.

aliis displiceat, inutilisque sit, oportet. Econtra qui sine vxore est, aptior efficitur ad ea, quæ Dei sunt. Vnde Augustinus cum in *Soliloquiis* non tam sibi quam nobis loqueretur: *Nihil enim (inquit) sentio quod magis deiciat animum virilem, quam blandimenta femina corporumque ille contactus, sine quo vxor haberi non potest.* Hinc Hugo de sancto Victore: *Non est vxor ducenda viro sapienti & litteris dedito. Primo, quia studium sapientie impedit, nec potest quis libris & vxori pariter seruire. Denique, multa sunt, quæ matronarum v-
sibus necessaria sunt. Alterius enim amorem suum suspicatur odium. Rur-
sus attende, quod nulla est vxoris electio, sed qualis aduenerit, talis est du-
cenda. si iracunda, si fatua, si deformis, si superba, si fœtida, cuiuscunque vi-
tii est, post nuptias discimus, equus, asinus, canis, & vilissima mancipia
prius probantur. Et iterum idem Hugo: Non est quieta vita hominis, quam
inquietas vxoris suspicio, sollicitas ancillarum sumptus, conturbat filiorum
peruersitas. Qui igitur prudens est, vitabit ea omnia prompta pe-
ricula, quæ ex nuptiali vita prouenire solent. Et licet fatendum sit
(teste Augustino) quod *actus coniugalis bonus sit, continentia tamen me-
lior.* Habet enim status continentium supra statum coniugale sex
coronas præminentie. Primo, quia continens habet maiorem di-
gnitatē, pro eo quod per continentiam homines assimilantur an-
gelis. Secundo maiorem puritatem. trahitur enim spiritus per actū
coniugalem ad immunditiam carnis, & efficitur quasi caro. Ter-
tio habet maiorem libertatem, quia vir non habet potestatem sui
corporis, sed vxor: & econuerso, secundū Apostolum. Quarto ha-
bet maiorem vilitatem: quia qui vxorē habet, sollicitus erit quo-
modo placeat vxori: quare diuissus est. Quinto habet maiorem
sanctitatem: quia coniugati tribulationem carnis habent, & im-
pulsionem maiorem, quam non coniugati. Sexto habent maiorem
vilitatem, quia maius præmium, & maior fructus sibi debetur.
Merito igitur sapiens vir continentium sanctissimum statum præ-
elegit. Quæ omnia attendentes sapientes, ac humani iuris inter-
pretes, non inulse coniugio carnali spirituale connubium præ-
tulere, vt videre libet in statu continentium, & eorum qui in or-
dine Ecclesiastico in hac terrena vita militant, vt tandem in su-
pernis triumphent. Aiunt enim, id ipsum spirituale coniugium
non solum dignius esse quam carnale, sed honorabilius atque fœ-*

*Vxor litteris
dedito duct-
da non est.*

*Continentia
sex corona
præminen-
tia.*

cundius, sed & securius & fortius. His itaque auditis, quippe à matre, præsertim cum fletibus expositis, decreui a coniugio paulisper subsistere. Verum attinentes & amici, si pro tunc matrimonio onera subire non placebat, ad publica me saltem transferrem officia, & præsertim ad iudicandum populos, præsidendum vrbi- bus, his suasionibus commonebant.

CAPITVLVM XIII

De magistratu iudicum, & de officio & munere iudicandi populos, & præsidendi ciuitatibus: & de laudibus huiusmodi officiorum, & commendatione talis exercitii.

PRæfecturæ atque iudicandi munus, quâ necessarium vitæ humanæ, quam excellens & præclarum sit exercitium, & à cunctis mortalibus honori habitum, nemo est qui nesciat, nisi qui legibus subiici recusat, aut alienis iacturis ditari peroptat. vt enim Hieronymus ait: *nisi primus homo imaginem Dei in se peccando violasset, nequaquam homo homini subiectus esset: nec alius alium iudicasset. fuisset enim sibi unusquisque index.* Nam à principio non dixit Deus homini, vt præsit hominibus, sed dominamini, inquit, piscibus maris, & volatilibus cæli, ac bestis terræ. postquam vero peccatum inter homines inualuit, iurgia, rixæ, bella, & seminaria discordiæ crescere cœperunt. Fuit igitur necessarium ad comprimendum iniquorum cupidines & violentias, vt diuina prouidentia homo homines iudicare possit: vt quos natura ipsa, aut amor ad bonum non prouocat, saltem timor hominis coerceat. Et hoc est, quod alibi ad eundem sensum Augustinus ait, quia cum populi multitudo ab his, qui maiores sunt, opprimeretur, expediens admodum fuit ad aliquem confugere virtute & auctoritate præstantem, qui iniurias cohiberet, & summa infimis pari æquitate coaquaret, legumque transgressores puniret, qui apud quosdam magistratus, apud alios præfides, alibi prætores siue potestates, communius vero iudices à iudicando appellati sunt. hi apud gentiles plurimum honorabantur. de quibus Valerius ait, quia *Apollo requisitus de iustis magistratibus, respondit senescire, utrum Deorum numero, an hominum aggregari deberent.* adeo enim hoc

hoc exercitiū illustre apud eos fuit, vt illud omni potentatui præferrent. quid enim, teste Cicerone præclarus, digniusque inter mortales exercitium excogitari potest, quam vnum hominem in republica reperiri, qui communi utilitati seruiat; qui communia pro suis, sua pro communibus habeat; qui velit & sciat personam ciuitatis gerere, dignitatem, decus sustinere, legesque obseruare, iura tueri atque exequi, & postremo cuncta, que ad rempublicam pertinent, fidei sue commissæ meminisse. Magistratus siquidem atque ius dicendi potestatem habentes, non modo terrenorum principum aut populorum, sed immortalis Dei autoritate & vice funguntur. Est enim latissima eorum potestas & iurisdictio, veluti qui vitæ simul & necis hominum Domini penitus constituti sunt. Hinc Apostolus dicebat, *qui me iudicat, Dominus est*. Hi ergo iudices atque prouinciarum potestates, atque rectores, cum recte agunt; Deo pariter & hominibus acceptissimi sunt. Scriptum est enim: *Beati qui iudicium faciunt, & iustitiam in omni tempore*. Et iterum per Sapientem: *Qui custodit & iudicat iustitiam, ipse exaltabitur*. Nec modo in æterna vita eorum exaltatio erit, sed in hoc seculo sublimantur. De quo per eundem Sapientem dicitur: *Iustitia eleuat egerem*. Vnde & noster Isidorus: *magna est, inquit, laus recte iudicâs, qui sicut nocere ciuibz nescit, ita prodesse omnibus nouit. aliis enim præstas censurâ iustitiæ, alios bonitate iudicii sine personarum acceptione suscipit; nō infirmat iustitiā auaritiæ flamma; nec studet auferre alteri quod cupiat*. Et subdit: *Hi sunt veri iudices: qui sicut de iusto iudicio ditari non appetunt, sic æterno premio coronantur*. Demum vero iudices, si locupletes fieri peroptant, id quam facile eis sit, nemo ambigit. Nam qui ciuili auctoritate & potentatu funguntur, paruo temporis compendio longas consueuere congregare diuitias,

CAPITVLVM XIV.

De oneribus & laboribus & incommodis præfecturæ, & iudicaturæ, & præfidentia in populis: & de periculis huiusmodi exerciti.

Sed post huius exercitiū laudes, videlicet iudicandi & præfidentis honorem tantopere commendatum, ilico mater bona illius status prementia onera atque aperta pericula enarrabat.

*Iudicium
quatuor
pericula.*

quæ tot sunt, ut vix enarrari queant. In primisque veniebat in mentem, quod scriptum sæpe audierat: *Noli fieri iudex, nisi virtute valeas rumpere iniquitatem.* Qui se igitur talem extimat, vanus est aut temerarius. denique inter cetera, quatuor pericula iudicantem comitantur, quæ omnia vel alterum vitare difficulter quisquâ mortalium potest. Primum siquidem periculum ex eo maxime imminet, quia plerumque ex causarum multitudine, defectus accidit sollicitæ discussionis. quod itaque periculum cauens beatus Iob, dicebat: *Causam quam nesciebam, diligentissime inuestigabam.* Super quo Gregorius: *Ad proferendas sententias vidcamus ne vnuquam precipites simus, ne temere indiscussa iudicemus, & qualibet audita mala statim moueant.* Secundum iudicis periculum sequitur: affectus videlicet atque inordinata passio. quæ tanto certius eos comitantur, quanto difficilius ab eo separantur. Vnde Augustinus quasi pro quodam miraculo narrat: *Alpium collegam suum nullo affectu, odio, timore, atque premio iustitiam subuertisse.* Tertium, iudicis periculum paratur ex obliqua intentione, aut iniusto animo. Vnde scriptum est: *Quod iustum est, iuste exequaris.* quasi dicere velit: Non est satis iudici iusta decernere, sed necesse est, si periculû vitare cupit, ut iusta iuste decernat, id est recto animo agat ea quæ leges iubent. Narrat siquidem Gregorius, quendam sanctum virum vidiſſe iudicem, quem cognouerat, in locis tereterrimis magno pondere ferri ligatum. à quo cum quaereretur, quidnam hoc esset? Responsum est, quia eo solo ea patiebatur, quia cum iudex esset, siquid pœne atque vindictæ, et iam secundum leges alicui uiuens inferebat, plus tamen crudelitatis desiderio, quam publico zelo monebatur. Quartum periculum iudices continue temprat donorum videlicet & munerum cupiditas. Quis enim ille est, de quo verè dicere possimus: *Qui discutit manus suas ab omni munere, hic in excelsis habitabit?* Ea siquidem pericula tanto iudicibus promotiora sunt, quanto difficilius euitantur. Vnde Isidor. *Multi tribunalis ascendant, sed rari iudices inueniuntur, qui populos legum moderamine regant.* Et si cetera ad hoc vitandum periculum persuationi desint, illud Petrarchæ occurrebat, quia iudex ipse populorum, honorato quodam exilio dominatur, dum ocium domesticum cum externa sollicitudine permutatur. Amara certe & turbida iudicum fors est. Habent enim domum non modo muneribus apertam, sed & litibus: silentio vacuam, queri-

querimoniis plenam, iurgiiſque reſertam. Quicquid languidum, quicquid ægrotum in prouinciæ ſeu ciuitatis viſceribus latet, totum ſibi tractandum curandumq; reſeruatur. Vnde Plautus ille Comicus *durum admodū opus* dicebat *multos corrigere*, quod hinc patet, quia ſeſe corrigant pauciſſimi. Adde illud Plutarchi præclarū exemplum, qui cum iudex eligeretur, renuit dicens: *quare ſic iudicabo, quaſi ſtatim ab aliis iudicandus*? nec modo ab hominibus iudex ipſe iudicatur; quippe in quem totius populi oculi vertuntur: ſed durius à Deo ſummo omnium iudice iudicari timet, dicente ſcriptura: *iudicium durifſimum his qui præſunt*. Poſtremo pudor eſt, quod iudicibus & magiſtratibus pudor nullus ſit his præſeſſe, quibus ſubeſſe dignius fuerat. Cum igitur talia docta mater recoleret, omnem iudicandi ambitum manu quadā ab animo erumpere viſa eſt. Sed dum iudicandi tribunalia tantopere abhorrerem, ad cetera reip. honeſta & publica munera condeſcendere: & præſertim officium *conſulum Ciuiſatum*, quos appellamus *Reſtores contribules*, ipſi his ſuaſionibus hortabantur.

CAPITVLVM XV.

De exercitio & officio conſiliariorum, principum, & urbium, & prouinciarum, & de vtilitate, laudibus & præconiis huiusmodi vniendi.

Magna ſemper reip. conſulendi auctoritas fuit. *Conſules* enim ſiue *conſiliarii* à conſulendo recte dicti ſunt: quorum prouidentia reſpub. regitur, eorumq; conſilio aduerſa ciuitatis pelluntur: quies eius atq; tranquillitas eorum ſtudio & induſtria comparatur. Eſtq; eius generis officiū ipſum, vt altifſimo Deo continuū obſequium & reip. præſidium afferat. Vnde Auguſtinus de verbis Domini: *Nec vtiq; remp. gerere criminoſum eſt: Sed tunc demum illicitum eſt, ſi vt diuitias priuatas augeas, remp. adminiſtras*. vt enim inquit Philoſophus: *Nil tam vtile eſt ciuitatibus & regnis, quam ſtudioſorum habere conſilia*. Quorum officium (vt ait Tullius) eſt *utilitatem ciuiū ſic tueri, vt quicquid agant, ad remp. referant, obliui cōmodorum propriorum*. Quid enim eſt dignius? quid reip. vtilius? quid Deo acceptius? quā remp.

Conſule officium.

*Consiliarii
similes gu-
bernatori-
bus in navi.*

pacatam quietamque tenere, & consilio plerumque explere, quod armis & multorum cadibus effici non possit. Nam (ut inquit Tullius) *non viribus aut velocitatibus, aut celeritate corporum, res magna geruntur: sed consilio & auctoritate & scientia presidentium.* Consiliarii enim rerum publicarum plus agunt, quam qui corpora iaculis hostium exponunt. Similes enim sunt gubernatoribus in navi; qui longe plus agunt, nauem dirigendo, quam ceteri aut nauigando, aut pugando. Vnde & *in bellis parum possunt arma: ubi non est consilium:* ut ait Tullius. Philosophi enim & consilio vigentes, plus consilio in bello paceque egerunt, quam armis. Vnde Sapiens ait: *Cum dispositione consilii initur bellum: & erit salus, ubi multa consilia.* Alexandrum quidem eo potissimum tam ingentes victorias obtinuisse legimus, quia consiliariis bonis cuncta agebat, ut inquit Trogus Pompeius. Et propterea consiliarii principum, necnon consules & rectores prouinciarum, urbium, magno semper honori fuere, & patres patrie recte ab antiquis appellabantur. Ad hoc itaque exercituum & viuendi formam amici & contribules his & plurimis persuasionibus me trahere moliebantur. Addebant praeterea, hunc viuendi modum genitorem meum veluti honestum & sine crimine delegisse. Nec erat inconueniens filium laudata honestaque patris exercitia ac vestigia imitari.

*Consiliarii
patres patriae
appellati.*

CAPITVLVM XVI.

De laboribus, oneribus & incommodis consulum siue consiliariorum & rectorum, urbium & prouinciarum: & de periculis huius status.

*Consiliario-
rum pericu-
la:*

Sed vix amici verba finierant, qui officium consulendi in ciuitatibus tantopere collaudabant: & ecce mater anxia occurrit, & plurima nedum onera, sed incommoda & pericula huius vitae & exercitii, prudentissime relegebat. Sed inter cetera id Catonis commemorabat, quoniam *difficillimum est quempiam sic recipere, ut prosit simul & placeat.* sed longe difficilius est, ut sit ei in verbo veritas, in consilio fides, in commissis silentium, in imperando suauitas. & tandem euentum non virtus, sed fortuna moderabitur. Iterum illud Platonis in rep. occurtebat: *Parua (inquit) ciuitas aegre regitur: magna vero urbes difficiles regimine existunt.* Quare qui ad huiusmodi ministe-

ministerium suspirant, necesse est illud Lactantii fateantur: *Parum est* (inquit) *nobis domesticarum curarum, qui publicas adoptamus.* denique quis putat consules ipsos vel consiliarios à principibus vel populis amari, quos potius grauant quam iuuant. Quod si extrinsecus honorari à populo cernamus, labiis credo: cor autem singulorum ciuium longe est ab eis & pauperum præsertim, quos durissimis exactionibus deuorant. Sed & si à populo pro aliquo tempore amari colique eos videamus, in mentem veniat, quis populo Scipionibus carior fuit? Quis Camillo? Quis Rutilio & Metello? Quis Salomone græco? quis Hannibale? quis Licurgo? ad quos amor ingens, atque ardens feruor fuit popularis: sed ilico in odium, in contemptum versus est. Quorum illa fuere præmia fori: videlicet labor, iniuria, accusatio, mors, exilium, carceres. Sed certe illud Cætonis præclare dictum est, quia *inter ea quæ prospera fortuna largita visa est, nil tam pestilens, tamque inconstans, quam populi fauor, cuius ad posteros functa hereditas est.* Adde, quia cum ad huiusmodi consulendi munus non nisi iurisiurandi sacramento accedant consilarii & rectores, totiens deierare videntur, quotiens senatum ingrediuntur. Rursus cum (iuxta Ciceronem) *eos qui de Reip. consultant, ab amore, ab odio, ab ira, à timore liberos esse oportet:* vix aut raro contingit consiliarios, consules urbium, & rectores, ab his passionibus fieri alienos. Denique quam viles in consulendo Reipublicæ existant, tristis ille euentus demonstrat. quia reipublica plurimum eorum crudelissimo aut inertissimo consulatu indies pauperior, illi vero ditiores euadunt. Nec aliis opus est testimoniis, præter id quod infaustis atque infelicibus nostris diebus cernimus. quia ea ipsa consulendi officia atque gubernandi rempublicam munera, non ut olim inuictis delata videmus, sed potius à sollicitantibus ablata. Et quod maiori mœrore refertur: ea ipsa officia, quibus pauperes opprimuntur, non paruo precio emuntur. Difficile namque & perrarum intuemur, ut quæ magno exoptantur affectu, & longo quærantur labore, liberaliter impendantur. Et (ut paucis agam) longe difficilius erit, ut quæ multo comparantur auro, sine auro reddantur. Hii ergo non tam consulunt, quam consumunt, non tam regunt, quam premunt, non tam protegent, quam lædunt. defendunt (ut ipsi inquirunt)

*Consilarii
ditiores, reip.
pauperiores
efficiuntur.
Consiliario-
rum officia
emuntur.*

republicam. Sed fateor ab aliis, & non semper: sed à seipsis minime, veluti qui ciuibz grauissimas imponunt collectas, non in rempublicam exoluendas, sed sibi imbutandas. Hii consules dicuntur à consulendo non reipubl. sed sibi. gaudent consiliarii & consulis nomine, à cuius re & effectu plurimum sunt alieni. Pauperum domus euertunt, vt suas construunt: miserorum casellas, agros atq; prædia subhastant, vt ipsi vilius emant; culpaque proximus est, qui eos in licitatione vicerit. Hæc fili mi (inquit mater optima) exercitia, studia, desideriaque, sunt consiliariorum, consulum atque rectorum, pestiferi nostri temporis: ad quæ tu ipse conspice, si libet aspirare. Materna igitur monita adeo visceribus meis infixæ fuere, vt ad huiusmodi consulendi ministerium nullo pacto aspirarem. Sed ilico patruelles, atque sanguine & amore cōiuncti sese ingerunt, vt aliud vitæ genus assumerem, quod (vt dicebant) à cunctis mortalibus, virtutis, honoris, & gloriæ cupidis, semper exoptatum est: videlicet tanquam aduocatus patrocinant di exercitio versari. ad quod his suasionibus commonebant.

CAPITVLVM XVII.

De Iurisperitis ac de aduocandi & patrocinandi officio, in iudicio & extra: & de laudibus iuridicæ scientiæ, ac necessitate & utilitate huius scientifici & artificiosi exercitii, & quomodo supplet natura defectus.

*Iuris operam
daro insigne.*

*Iuris discipli-
na sancta
pernecessaria*

Patrocinari in causis, ac in iuris humani subtilibus disceptationibus versari, semper laudabile insigneque exercitium fuisse nemo ambigit. Ea enim officia (vt Salustius ait) *honestiora apud omnes habitæ sunt, quæ ingenio, quæ intellectu, quæ denique eloquentia, ac dicendi suadendique artificio constant.* Sic ergo iuris disciplina honesta, sancta & pernecessaria vitæ humanæ extitit: & ob eam rem omni tempore plurimum fuerit commendata. Eadem ratione disciplinam ipsam sectantes, qui *iurisperiti* seu *consulti* appellati sunt, vtiliter ac laudabiliter & necessatio vtuntur iuribus humanis: quæ non nisi ad lites inter homines dirimendâs, amicitiamque, atque ipsam rempublicam augendam, instituta sunt. Hinc Iustinianus ait: *Ad-*

uocati

uocati qui dirimunt ambigua facta causarum, non minus provident huma-
no generi, q̃si praliis armisq; parentes patriamq; saluarent. Et alius sapiens:
Magna cōmendatione dignos eos facit, qui quod iustū, quod bonū, quod equū
est, hominibus persuadent. Est ergo huius exercitii honestas atq; ne-
 cessitas, admodum manifesta. sed & vtilitas publica manifestior.
 Quantum vero in eodem nobili exercitio priuatæ sit vtilitatis, ne-
 mo est qui ambigat. Habuit tamē inuidos omni tempore hoc sci-
 entificum & honestum exercitium. nonnullis enim non satis, nec
 recte intelligentibus, visum est leges ipsas, atq; legum interpretes,
 & iurisperitos causam dare litigiis, illaq; quam maxime interire. in
 quos pulcre Cicero in eis quos *de legibus* edidit libris, inuehit. ait e-
 nim: *Verius ignoratōe legum, occasiōe litigiis parare.* Ignorantes enim
 leges, voluptates & appetitus suos putant & optant legibus iuuari
 posse. quare inquit Cicero: *Cunētos consulunt, an sit lex, quæ suo possit*
suffragari appetitui aut cupiditati. quo fit vt ipsarum legum ignorātia, *Iuris igno-*
 non iurisperiti, viam litigiis præstent. Adde aduersus iurisperitos *rancia non*
 aliam non minorem emulationem. nonnulli enim perualum ha- *iurisperiti*
 bent id, quod ex ipso exercitio laudato comparato, improbe atq; *lites fouet.*
 illicite fore quæsitum. Plane non ita sentiebant antiqui Philoso-
 phi & Sapientes. sed nec catholici tractatores, qui in constituen-
 dis determinandisq; hominum dissidiis, iudices, testes & aduoca-
 tos assistere decreuerunt. solis tamen iurisperitis licitum esse vo- *Iurisperitis*
 luerunt, suum consilium iuste vendere potuisse: Cuius inter cete- *solus licet*
 ra illa à Philosopho ratio assignatur, quia iudex ipse & testis, com- *vendere con-*
 munes sunt personæ, & pro vtraq; parte constitutæ: Aduocatus *silium.*
 vero alteram tantum fouet partem, à qua licite honesteq; salariū
 exigit. Huius præterea nobilis ac scientifici exercitii excellentia,
 ex pluribus illustratur effectibus. *Est enim mortalium hominum desi-*
 derium, vt ad id potissimum tendat (eodem Philosopho teste) vt verita-
 tem agnoscat. Quare ad ipsum in rebus agilibus audius humana
 properat inquisitio: præsertim cum ob eas hominum cupiditates,
 quæ à vero, quæ à iusto plerunque diuertere cogunt, propter rerū
 humanarum varietates, difficulter quidem veritas ipsa & iusticia
 agnosci potest. Hinc per Isaiam Prophetam de humana iusticia
 dicitur: *Tanquam partus menstruat, & vniuersa iusticiæ vestrae:* vt hu-
 manam iusticiam difficulter attingi & cognosci posse liquido de-

*Iurisperiti
per necessarii.*

monstraret. Auarus enim quam iustus homines lites & iurgia mouent. Quia (vt inquit Sapiens) *Deus fecit hominem re-ctum, & ipse immiscuit se infinitis quaestionibus.* Fuit ergo necesse humano generi iurisperitos constituere, quorum industria & expectata iurisperitia, eas sine bellorum fragoribus quaestiones deciderent, quas humana peruersaque auaritia attulit. Laudantur igitur plurimum, atque merito diuersis honorum titulis illustrantur iurisperiti, qui veritatem aperiunt, & inter hominum cupidines per suae scientiae coniecturas & regulas quid verum, quid iustum sit explicant, docent, atque è tenebris ad lucem usque deducunt. Quorum tanta vis est, vt non vnquam eas veritates, quas vel natura, vel industria, verius astutia humana, in damnum simul & poenam peccati humani generis occultas fecerit, ipsi iurisperiti sui ingenii subtilitate ad reip. quietam atque nostram commoditatem reuelent. Plurimae siquidem veritates incognitae, plurimae iniusticiae impunitae manerent, si iurisperorum cessaret sapientia, & sua quaerendarum rerum studiosa sagacitas, contemptui, aut non vsui haberentur. Denique nemo vnquam dubitauit, verum & iustum multo esse meliora, quam falsum & iniustum. Esset enim rationi dissonum, si verum à falso, iustum ab iniusto vinceretur. Quod utique funestum in rep. saepe accideret, si iuriconsulti deessent. Quorum id praecipuum studium est, iustum ab iniusto, falsum à vero discernant. Rursus quam necessarium humanae reip. hoc exercitium fuerit, ex eo patet, quoniam (vt Philosophus inquit in ethicis) *Sunt nonnulli homines pessime quidem persuasibiles, qui non facile credunt, nisi certissima videant signa, aut fortes habeant persuasiones.* Aduocati igitur plurimum sunt commendandi, qui virtute scientiae iuridicae certissimas vel propinquas, imo fortissimas persuasiones eliciunt, & illa iudiciis suadent ad iuuandam innocentiam, & reprimendasque violentias & iniusticias. Vnde Cicero hanc iuris disciplinam extollens: *Hae, inquit, ad omnes res priuatas atque publicas tuendas, instituta est.* Et iterum: *haec ars tuta est, haec honesta, haec illustris: qua saepe multa res pub. salua facta sunt.*

Denique (vt Philosophus voluit) omnes artes inuentae nascuntur ad supplendos humanae naturae defectus, vt libet exempli gratia

gratia vnum inferere. Natura enim ipsa lapides ligna atque fer-
rum producit; sed minime domum efficit, quare recte & neces-
sario ars domificandi inuenta est, quæ id ipsum supplet, quod na-
tura defecit. Simili modo natura parens lanam & linum: sed non
vestes, producit. salubriter ergo atque necessario artes texendi,
atque suendi inuentæ sunt. Natura ergo quanquam homini in-
strumenta loquendi dedit, non tamen virtutem tribuit persua-
dendi. Sed arte effectum est, vt homines studio ipso atque mira-
bili artificio, vi quadam dicendi consequantur, conceptus videli-
cet suos imprimere posse audientium animis: sicut natura mini-
me dedit homini vim discernendi congruam ab incongruo, nisi
per grammaticę scientiam: nec verum a falso nisi per dialecticam.
Licet dederit instrumentum cognoscendi verum à falso, videli-
cet loquelam & intellectum. Oportebat ergo pro conseruatione
humanæ vitæ, & tollendis inter homines dissidiis, vt naturæ hu-
ius defectus suppleretur per iurisperitos, qui ipsum iustum & re-
ctum iudiciis persuadent, secundum traditas legislationes: &
nonnunquam iustum & rectum distinguant, limitent & mode-
rentur, secundum particularium casuum occurrentias, & legisla-
toris mentem. quæ omnia perirēt, nisi iurisperiti essent, qui ea ho-
minibus suaderent. Et (vt paucis agamus) summa est excellentia
huius exercitii, quo ipsa vniuersalia statuta humana, quæ genera-
libus atque indeterminatis verbis statuuntur, lucidius intelli-
guntur. Nam per iurisperitorum subtilem & ingeniosam applica-
tionem dictarum legum, ad causas particulares, mentem legum
interpretantur. Et tandem vero per hoc nobile aduocationis of-
ficium insones defenduntur, oppressi releuantur. & vt paucis
multa comprehendamus, iustitia periret, si deesset qui iustitiam
allegaret. Ex quibus facile cognoscitur, quanta sit huius exerci-
tii honestas, quanta necessitas, quanta denique utilitas. Sed vix
affinium & amicorum sollicita instantia verba finierant; cum ma-
ter clamitans dicebat illud Sapientis: Fili mi, *si te lactauerim pecca-*
tores, ne acquiescas. Et tandem aduocatorum vitam ac exer-
citium, eorumque aperta discrimina & pericu-
la sequentibus verbis dis-
suasit.

CAPITVLVM XVIII

*De incommodis & oneribus exercitii iuristarum, & artis aduocatio-
nis in causis & iudiciis: & de periculis huius status & modi viuendi:
& de damnis, quæ ex illo veniunt reipub. & an litigia nutri-
antur ex aduocatorum copia, & an humana iusticia potest imple-
ri in iure naturali.*

Iuris peritorum eorū præsertim qui forenses causas agunt, in iu-
dicio, quos aduocatos vel causidicos appellamus, quam sit dā-
nosum periculosumq; exercitium, nemo apertius, quam aduoca-
tus ipse, vnquam intellexit. Sed & quantum hominibus sit inutile:
quippe & perniciosum nemo rectius agnouit, quam qui pro eius
infortunio aduocato indiguit. Huius exercitii damna, discrimi-
na atque pericula non facile enarrari possent. Ex multis autem
paucula quædam in medium adducenda decreuimus. In primis
naturam artis atque exercitii considerare oportet. Est enim eius
generis patrocinatio in causis: quia difficile est aduocato & cau-
sidico vnum iuuare, quin alterum lædat. cui pulcre Ambrosius
dicere videtur, *qui non potest alteri subuenire, nisi alter lætatur, comodi-
us est neutrum iuuare quam grauare alterum.* Vnde super illo verbo:
impio præbes auxilium, Augustinus inquit: *callidi argumentatores & in-
risperiti fallaces, dum cupiūt ditari, vix prauaricationis periculum fugiunt,
controuersias actionesque causarum contra ipsa iura vertunt, & ut aduersa-
rios coerceant, in sionibus legum ad illudendos indices exquisitis exemplis,
multiplices intellectus, & cauillosas à legibus eliciunt coniecturas.* Quid i-
gitur in eius laudem non facile inuenio. vendunt enim linguam
suā, quæ Spiritus sancti donū est. Quæ de re Augustinus de seipso
in lib. confessionū loquens, ait: *Placuit mihi subtrahere ministeriū lin-
guæ meæ, à mundanis loquacitatis meæ, neceteri mei exēplo itā nō legē Domi-
ni, sed forensia bella mercarentur, & ex ore meo arma furori suo accomodare.*
Rursus nō illis puto assentiendū, qui negant causidicos lites nutri-
re, sed potius pscindere contendūt; ex Ciceronis verbis argumen-
tū fumentes, quæ recte intellecta eos lædunt. Aut enim eos, qui leges
ignorant, voluptates & appetitus suos putant legibus innari posse, & inde
legum

*Aduocatus
linguam
vendit.*

legum peritos consulunt, ut eis dicant appetitus suos legibus sequi posse. Sed ea verba quid aliud sonare videntur, quam aduocatos lites gignere, dum voluptuosis & cupidis hominibus suadent legibus posse explere, quæ leges ipsæ verant. Quis enim tam amens est, qui leges iustas asserat iurgia nutrire, quas dicit Cicero in eodem *de legibus*, esse viciorum emendatrices, virtutumque commendatrices? Sed ex mente Cicero. elici posse, non leges sed legibus abutentes, qui sunt legistæ, lites nutrire & educare perspicuum est. *qui ut nascantur lites, spæ victoriæ victis promittunt, adducentes innumera fallaciarum repagula, & assuiciarum obfacula,* secundum Polieratum. Qui enim cæcus non est, liquido videbit, quia non hominum negotia, non causæ, non controuersiæ suscitant aduocatos. quinimo (ut oculis cernimus) aduocati ipsi causas gignunt, litigia suscitât, controuersias fouent, immo mouent atque nutriunt. Præbeant huic veritati testimonium ea loca, quæ certe beata dixerim. vbi si defunt aduocati, ibi causæ ipsa quoque litigia defunt. vbi vero aduocatorum turba strepit, ibi litium anfractibus tota ciuitas ardet, nec domus aliqua à litigio vacat.

*lani legum.**Aduocati ex magna parte lites pariuus*

Vidi ego in Germania vrbes quamplurimas populatissimas quidem atque optima politia gaudentes, in quibus ciuis vnus iuris ignarus in decidendis causis penitus inexpertus, totius ciuitatis causas breui momento pacifice & incredibili silentio terminabat: vbi nec assistentia erat aduocatorum, nec allegationum ingeniosa alteratio. Srupenti igitur mihi atque quærenti: cur in tanta vrbe tam parua atque perpauca causæ agerentur? quidue causæ erat, quod nullus ibi aduocatus adesset? Responsum tandem est: cum faceto modestoque risu, vltimum esse causam primi. Addebantque, ut ego mihi ipsi inquirendo satisfacerem: ac si aperte dixissent, pauculas admodum causas in tribunali:bus esse suis; cuius rei illa erit ratio, quia nullum, qui eas proponeret, aduocatum facile admittebant. Profecto non inuisum eorum dictum puto. plurimi quidem nequaquam plerumque litigarent; quin imo aliquid forsitan iniuste paterentur, nisi aduocatorum pronitas adesset, atque eorum sollicitudo, qui vincere pollicerentur. Nemo certe, nisi insanus, sine armis bellum tentat. Quippe plurimi salui fuere, quia illis arma defuere; & longe plures periire armorum fiducia penuria. Tolle enim frenetico arina, præstabis & vitam ::

Lani Germania à politia; etiam in penuria aduocatorum.

tolle cupidis litigandi ministros, simul tolles & lites. Cupit enim omnis artifex (vt philosophus in *ethicis* voluit) sua laudare opera simul & dilatare. Sic poeta sua poemata laudat, a cunctis recipi optat. sic *faber* (vt inquit Hieronymus) sua *fabrilia tractat*, studetque summopere, vt totus orbis ea indigeat. Citharista denique omnes exoptat dies esse faustos atque solennes. Armorum & machinarum artifex, nuptiarum aut pacis tempora infesta habet: & generaliter de pace non cogitat, qui cum bello lucratur. Nec aliter agit aduocatus, alienas cupit controuersias, propinquorum & causas exagitat, qui suas non litigat: dissidendo, litigando lucratur, qui mendicaret, si quietissime omnes viueret. Et (vt paucis dicam) desunt lites, si desunt qui lites cupiunt, atque sollicitant. Denique Apostolus ait: *seruos Dei non decet litigare*. Quomodo igitur alienas opes litigando querere possumus licite, qui nostra proximis offerre iubemur? Et iuxta dominicum consilium *petenti chlamidem, pallium non negemus*. Denum vero illud ego verissimum puto, quia longe minus reip. Christiane nocium videbitur, si iudiciorum strepitus, si causarum deceptiones non habeat, si aduocatorum penuriam patiatur; quam si per causarum & litigatorum atque aduocatorum copias caritatis ordo pereat, quæ in litigando seruari minime potest. Et iterum longe minus perniciosum arbitror, quosdam forsitan iniuste opprimi ob defensionis aduocationisque defectum, quam plurimos, imo ipsam temp. eiusque quietem, tot tantisque (vt cernimus) litium perturbationibus, concuti atque subuerti, quæ veluti quædã incendia, cunctas resp. adurunt atque confundunt. Postremo quis causarum, quis fori aut iudicialis strepitus tam auidus est, quem non moueant, imo terreant plurimum illa Bernardi verba. qui cum ad Eugenium ageret, ac eum inducere conaretur, vt fideles ad diuinam legem discendam, sectandamque alliceret, & aduocatorum astutias fugiendas esse ostenderet: *quotidie*, inquit, *perstrepunt in tuo palatio leges, sed Iustiniani, non Domini iuste ne etiam istud? Tu videris. Non certe. Lex Domini immaculata conuertens animas, ea aut non tam leges quæ lites sunt, & cauillationes subvertentes iudicium. Tu ergo pastor & episcopus animarum, qui mente obsecro sustines coram te silere illam, istas garrures Puto quod etiam hæc peruersitas te compellat ad Dominum dicere cum prophetis: Narrauerunt mihi iniqui fabulationes: sed non vt lex tua. Hæc Bernardus*

*Aduocati
pacem odiunt
inftar militum.*

*Aduocatus
vni penuriam
resp. non est
nocua.*

de humanis legib. & earum ſectatorib. Rurſus, niſi fallor, fallitur, quiſquis qui litigandi officium aſſumit. & longe magis fallitur, qui artes litigandi & cōtendendi eligit, in quibus propter nocendi facilitatē *quanto quis doctior, tanto nequior euadit*, vt de aleatoribus Policratus ait. Vnde Auguſtin. *forma* (inquit) *in eis eſt litigioſa, hoc ipſo laudabilior, quo fraudulentior*. Fateor enim, vtilis eſt iuris ſcientia, ſi eius profeſſores intra eius limites agerent, & legum terminos nō transgrederentur. Sed plurimi illis abutuntur, & falſo legum intellectu, & nouis interpretationibus, ſacris legibus illudunt. Quod ſi ſecus agerent, pauperes admodum & inopes, fateor tamen felices viuerēt. Ea de re ſancti viri periculum tam promptum imminere hoc exercitiū tenentib. cernentes, merito perfectis & Deo dicatis viris nedū forēſium cauſarū interdiciunt exercitium, ſed humanarum legum ſtudiū. quarū inter cæteras illa eſt ratio, ne videl. iuriſperiti magnū extiment eam iuſtitiā, quam ipſi continēt & venerātur, & quā leges humanę docent, reſpectu eius iuſtitię, quā lex Dei cōtinet & venerātur. Iuſtitia n. humana, quā leges ſeculi proſitētur, impleri indubie poteſt facultate & naturę viribus, q̃ ex eo maxime patet, vt alia taceā, quoniam Chriſtus in euangelio ex duob. naturalibus præceptis oēs leges & prophetas pendere dixit, prout pulcre Auguſt. deducit in *epiſtola ad Voluſia*. Diuina vero iuſtitia nō niſi ſupna gratia impleri poteſt. quare ad hūc ſenſū veri⁹, q̃ paulo ante Iſaias dicebat de hūana iuſtitia, *pannus mēſtruatus, iuſtitie veſtre ſunt*.

Sed nec alienū ab hoc propoſito videtur, q̃ Dominus in euangelio ait: *Niſi abūdauerit iuſtitia veſtra pluſquā ſcribarum & phariſeorū, nō intrabitis in regnū celorū*. Quod vtiq; recte dici poteſt de humana iuſtitia: quanquā iuriſpiti & cauſidici aſtrucere nitūtur, vt Chriſtus fidelib. ſuis dicere videatur, niſi abūdauerit iuſtitia veſtra pluſquā ſcribarum & phariſæorum, id eſt legiſtarū & iuriſperitorum, humani iuris, non intrabitis in regnū celorū. Nec n. eſt iuſtitia, q̃ ex humanis reſultat legib. ſola ad ſalutē ſufficit, cū illa (vt philoſoph⁹ in *politicis* voluit) ſolum reipublicę terrenam quietudinem appetat. Cuius gratia plurima, quę lex diuina vetat & punit, ipſa permittit aut iubet. Vnde Auguſtinus: *Hac lex, quę de regendis urbibus datur, multa pro temporali pace aut permittit aut iubet, quę lex diuina grauiffime punit, vt in concubinato atque uſuris; demum in præſcriptioni-*

*Aduocatus
quanto do-
ctior, tanto
nequior.*

*Legum ſtu-
dium cui in-
terdictum
ſit viris ſa-
cris.*

buis & multis aliis reperire libet. Denique lex ipsa humana, vt præmissum est, virtuti humanæ & naturali innititur, quæ nequaquã ad æternam felicitatem sufficit sine speciali auxilio diuinæ gratiæ: quod aliter est sentiendum de diuina iustitia, quæ tota Dei & a Deo est. Dabo igitur, inquit mater, pluribus persuasionibus finem, si id solum dixerim, quia humani iuris sectatores solo nomine iuris latantur, cum rem ipsam non habeant: quinimo sub iuris atque iustitiæ obtentû, ipsa iura & iustitiam persequuntur, vt recta de eis dicat vera iustitia, *filios enutriti & exaltati, ipsi vero spreuerunt me.* Tandem quis ille legista est, & laudabimus eum? qui (vt inquit Augustinus) dicat clientulo suo, recipe, quod mihi, cum tibi adesssem, obtulisti? redde aduersario tuo, quod me iniuste patrocinate abstulisti? cuius opera decepto iudice & circumuentis legibus vicisti? Longe satis euagatus sum in describendis aduocatorum periculis: sed expertus dixi. Turpe enim videbatur patricio ignorare ea in quibus versatus est. Quasi ergo mihi maternis his, imo diuinis commonitionibus edoctus, forensium atque ciuiliû causas & iudicia penitus statui deferere. Victi ergo & superati contribules, ad aliud vitæ genus innocentissimum, vt dicebant, videlicet notariorum, me transferre verbis atque suasionibus sequentibus nitebantur.

CAPITVLVM XIX.

De notariis, tabellionibus & scribis: & de huius artis laudibus, vtilitate & commendatione ac necessitate.

*Notariorum
necessitas.*

TAbellariorum siue notariorum ars & viuendi formula, quam honesta, honorabilis & laudata sit, ex plurimis, præsertim illius necessitate & vtilitate, facile cognoscitur. Periret siquidem omnis iudiciorum tela, nisi essent notarii, qui acta conscriberent. periret ipsa veritas & fides in contractibus & commerciis hominum: periret omnis ordo in iudicio forensium causarum, nisi esset aliqua fidelis publicaque persona, cui iudex crederet de his, quæ ab vtraque litigantium parte, aut offertur aut dicuntur. Item sunt instituti notarii ad confirmationem veritatis: sed cû ipsa
vtri-

veritas vbicunque sonuerit, ab illo est qui dicit: *Ego sum via & veritas*. recta certe ratione notariorum officium valde laudabile erit, quia in veritatis comprobatione & confirmatione radicem & fundamentum suscipit. Demum huius artis laudes & utilitates ex eo parent, quia publicæ utilitati deseruiunt. Hii namq; nedum apud pedaneos minoresque magistratus, creditum & auctoritatem obtinent, sed apud reges & principes, & cuncta eminentia tribunalia acceptissimi & familiarissimi existunt: quorum manibus admiranda fide instrumenta, priuilegia & literæ ad perpetuæ rei memoriam conficiuntur. Et post multa temporum secula, ex horum sola notariorum subscriptione, indubitata probatione inducunt. Hii typum tenent Euangelistarum Christi, qui eius gesta & acta in Evangelio tam fideliter, quam vtiliter descripserunt. Et vt cæteras huius artis commoditates & laudes omittam, qui illam exercet, magna lucra summos honores assequuntur, vt breui tēpore ac paruo labore, opulenta utilitatis compendia adipiscantur, & tandem ab omnibus honorantur, quia omnes illis indigēt.

CAPITVLVM XX.

De miseriis, calamitatibus ac laboribus & periculis tabellionum & tabelliorum, & illorum fraudibus & dolis.

INter cæteras vitæ humanæ artes, & modos formulasque viuendi, scribarum atque notariorum artem miseram, calamitosam ac multis ærumnis plenam nemo ignorat, nisi qui tam felix fuit, vt nec litem in iudicio habuerit, neque actor nec reus extiterit, nec contrahendi gratia tristi illorum ministerio eguit. Breui igitur huius artis calamitates, infelicitates, labores atque pericula adducemus, pauca ex multis colligentes. In primis igitur fatemur: habent tabelliones officium publicum, sed priuatum exercent negotium: reipubl. seruiunt, sed rei familiari deseruiunt: non illam, sed istam augent: communes sunt personæ, sed propria sunt lucra. Demum tabellarii ipsi seruos se esse publicos noverint, quos iureiurando constat astrictos, vt quotiens rogari eos a quoquā in omni causa cōtingat, ferre eos testimoniu oporteat. *Notariorum persona sunt publica, lucra sunt priuata.*

Nemini autem dubium existit, tam astrictos reip. seruos non esse illius dignitatis atque felicitatis, ut paulo ante depictum est. Eius vero artis labores, fraudes, doli, atque pericula ex eo constant, quia natura ipsa impellitur homines gratis fidem ipsam seruare, veritatem attestari, ac de illa libere ubiq; ferre testimonium, miser tamen tabelliones soli sunt, qui non nisi pecunia de fide dicere ac rogari velint: nec aliter quam precio interueniente veritati fidem accommodent. pauper siquidem fide petit veritatis, ille Mammona exigit iniquitatis. Turpis igitur est, qui precium turpiter accipit, pro eo quod gratis exhibere tenetur. quo fit, ut hanc vitæ formulam exercentes, nedum iustitiam, sed ipsam iniustitiam vendant. quare (teste Augustino) nihil inordinatius esse potest. nam iustitiam vendere, iniquitatis est: iniustitiam vero, rabiosa inania. In cæteris enim contractibus, res vendita alienatur a venditore, & transit in emptorem: sed in hoc infelici contractu nullam iustitiam habet notarius venditor. Sic miser artifex ipsam veritatem (ad quam corroborandam eruendamque creatus est, & quæ eum honoratum reddit) inhonorat atque vilificat, dum eam (ut præmissum est) precio exponit. Apud antiquos enim tabellarii alebantur à publico, eratque gratuitum officium. eo igitur seculo aureo certe laudabilis erat tabellionica ars, laudabile exercitium: nunc vero quia ad precium exponitur, merito in sordibus computatur, secundum Policratum. Rursus notarius seruus est iustitiæ, quæ virtutum regina est & domina, qui ergo dominam suam vendit, ut proditor iudicandus est. O quot falsæ ab eis constituuntur instrumenta, proce quidem, vel precio! O quot contractus fabricant, rei gestæ substantiam longe aliter scribentes, quam partes professæ sunt! O quot falsas clausulas interserunt, alæque iustas abolent, verba cancellant, dictiones vitiant, in multorum læsionem atque iacturam! O quot neglectus (ne dixerim dolos) in iudiciis & contractibus committunt; annos, indictiones, d' em atq; locum prætermittunt! Nec testes adhibent naturæ rei necessarios, literas scripturamque diuersificanti, quæ de re instrumenta suspensa aut dubia redduntur. O quot errores, fraudes & machinamenta ab eis admittuntur! Ob quas res innumera litigia, immortales contentiones ibi nascuntur, ubi sopiri debuerunt. De-

num

*Notarii fide
sine precio
non faciunt.*

*Notarii ius-
titiam &
iniustitiam
vendunt.*

*Notarii o-
lim ex arto
publico ale-
bantur.*

*Notarius
seruus iusti-
tiæ.*

*Notarius o-
lim ex arto
publico ale-
bantur.*

mum prothocolla nō retinent, & diuersa plerumq; ab illis instru-
 menta eduntur. Pleriq; vero literas, contractus & instrumenta, su-
 per vsuris & contra iuris præcepta conficiunt; parui facientes, q
 ex cate infames, inhabileq; euadunt. O quot collusiones agūt in
 iudicio! quot deceptiones apud iudicē! quot falsas attestaciones!
 quot supfluas dilationes! quot acta inutilia scribunt, vt crescat re-
 gistrū, processusq; in precio augeatur. Taceo quia excessiua sala-
 ria exigūt, crimen cōcussionis non verentes; omnia precio agunt;
 nec calamum quidē manu capiunt, nisi pecunia assit. *Notarii o-
mnia precio
agunt.* taxas exce-
 dunt. de quibus Greg. dicere videtur, quia *multo sceleratius ille acci-
pit, quā alius offert.* Hii certe crudeliores sunt illis latronibus, qui in-
 sidias adhibent. Nam isti palam rapacitatis auaritia viuunt. cete-
 ri n. hostes in suorum tantum hostium sanguine armantur. assissi-
 ni in quorundā hominum necem pecunias accipiunt: isti vt cru-
 delissimi carnifices, ciuium, amicorum, cūctorumq; hominū op-
 pressione letantur, & omnium litigantiū vitā extinguunt. Quid n.
 prodest iustum habere iudicem, sed rapacem notarium? Hinc Isi-
 dorus, *ad delictum pertinet iudicis, improbos habere ministros.* Ais forte,
 quid ad rem? locupletes sunt notarii, nunquam egentes, vbiq; ho-
 norati. quod & ego fateor. Sed & illud Ciceronis semper verum
 esse putauī: *nil fore utile, nisi honestum iustumque sit: nil honorificum, nisi
 in virtutis radice, quæ gratuita est fundetur.* Nam (vt idē Cicero sub-
 dit) *Nullum emolumentum est fallere; nullum commodum lucris inhiare,
 splendorisque nomen amittere.* Adde quia utilitas illa familiaris non
 potest tantum afferre, quantum auferre. Quæ enim alia causa Ge-
 sabel omni seculo maledicta erit, nisi quia eius non vero testi-
 monio Agab rex vineam abstulit Naaboth? Ea de re eidem Gesa-
 bel dictum est iussu Domini: *canes comedent Gesabel.* Denique (vt
 paucis multa concludam) notarius cupidus rempubl. offendit,
 Deum contemnit, cui se iureiurando astrinxit, iudicem mētien-
 do decipit, partes lædit. De his Augustinus dicere videtur, quia
*similes sunt locusta animal pestifero: nocet enim mordendo, consumit no-
 cendo.* Nisi ergo abundauerit nostra iusticia plusquam simi-
 lium teribarum, spem non habeamus conse-
 quendi fructum iustitiæ, quæ est re-
 gnum cælorum.

CAPITVLVM XXI.

De exercitio agricultura, & de laudibus & commendatione huius naturalis & innocentissimi exercitii, & de vtilitatibus generi humano ex illa prouenientibus, & quomodo Deo acceptum est.

*Agricultura
innocentissi-
ma à Deo
præcepta.*

Agriculturam optimum esse viuendi genus nemo ambigit, nisi qui viuere nescit. Hic enim vitæ modus primus omnium est, à Deo altissimo humano generi tributus. Dictum est enim homini, *in sudore vultus tui vesceris pane tuo*. nec dixit, in sudore vultus alieni, vt in cæteris officiis & viuendi modis liquido contingit: in quibus alieno labore, alienoque sanguine & sudore plurimos pasci & nutriti, quinimo & lasciuire videmus. Nequaquam enim Deus homini hoc exercitium præcepisset, nisi primum innocentissimum, deinde ei gratissimum agnosceret. Hoc denique vitæ genus veras naturalesque diuitias gignit, alia exercitia industriales, & (vt ita dixerim) adulterinas diuitias comparant. Igitur inter vtrasque diuitias illa est differentia: quoniam primæ humanum genus sustinent, secundæ corrumpunt: primæ delectant, secundæ cruciant: primæ satiant, secundæ angunt. Quod enim tam felix vitæ genus esse potest, quam naturalibus insidere laboribus, & possessiones, agrosque ad vbertatem pro communi omnium vsu deducere. Quarum rerum innocentissima cura cæteras omnes noxias curas fugat. Gesserunt agriculturæ vsum non solum antiqui primæ ætatis, sed & omnium ætatum viri præstantes atque clarissimi: nec modo publica officia, quinimo & imperia, magnæque fastigia, huius cupidine atque dulcedine dimiserunt. Hanc Cato Censorinus exercuit, de quo scriptum est: *optimus senator, arator, optimus imperator*. Quem igitur pudebit cum Catone terram colere? Quis turpe cogitabit, quod ille pulcrum eligit, qui præter rerum gestarum gloriam etiam in nostris Hispaniis præclarissime triumphauit? Denique in cæteris huius mortalis vitæ occupationibus, vacant homines artibus, in hoc naturæ: in cæteris vacant sagacitati, in hoc sanctæ simplicitati, in aliis superfluitati, in hoc necessitati, in cæteris vacant ornatus, in hoc victui: in cæteris va-

cant.

cant homines paucis aut multis, in hoc omnibus. Qua ratione ceteris viuendi modis iuste antefertur. Teste enim Philosopho, *quanto aliquid est communius, tanto est praeclarior*. Est ergo illud vitæ genus eligibile, quod pluribus confert, & paucioribus nocet. Deum non parum huius vitæ præconium auget, quia cessant in hoc viuendi modo ea omnia diuinæ offensionis & peccandi incitamenta, ac promptæ actiones, quæ aliis negociationibus sese vltro offerunt. Vt enim quidam ex sapientibus ait: *Inter hominum vitia viuere, & vitia hominum vitare, non tam præclarum quam varum; nec tam laudabile, quàm difficile est*. Quis enim in agro laborans aliena vsurpat? quis deierat? quis blasphematur? quis superbit? aut quis irascitur? aut inuidet? qui optare sibi soli bona non potest, quin aliis eueniant. Quis denique agriculturæ intendens inimicatur? Quid aliud odit, nisi grandines? cui maledicit, nisi tempestatibus? quid denique auare cupit, nisi ea quæ aliorum non sunt? Sed & quis fornicatur, quem non ciborum preciositas, sed fames & pauperula mensa spectat, & demum ipsa lacertorum lassitudo & diurnus totus labor, dormire potius, quàm lasciuire cogit? Rursus in ceteris vitæ occupationibus illud communissimum est, ut quanto homines pluris emolumentum aut census habent, tanto minus Deo retributionis & honoris tribuunt; ita ut verum sit illud Prophetæ, quia *faciet as panis causa sit iniquitatis in homine*: in hoc tamen viuendi modo plus omnibus Deo redditur, & (ut ita dixerim) plerumque plus quam quis habet Deo offert. Nonnunquam enim oblati Deo decimis, expensisque deductis, nil superest nisi labor, adeo ut plurimi anni etiam vberissimi agricultoribus ipsis steriles sint. Recte igitur antiquum verumque in Hispania prouerbum fuit, quia *agricola martires habentur*. Neque enim semel sanguinem fundunt, ut pinguiorem terram hominum vsibus reddant, sed dictim sudore & cruore madent, ut nos viuere possimus, & suis tormentis & assiduis cruciatibus foueamur. His ergo monitionibus suadebatur affines agriculturæ vacandum, etsi non personaliter, per seruos saltem, & colonos, ut mos est plurimorum virorum illustrium. Sed nondum illi verba finierant, ecce mater occurrit, hunc viuendi modum summopere dissuadens rationibus sequentibus.

Agricultura pluribus confert: paucioribus nocet.

Agricultura dormire potius quam lasciuire facit. Homo quanto ditior, tanto minus retributionis Deo tribuit.

CAPITVLVM XXII.

De agricultura incommodis, oneribus, difficultatibus & laboribus: & de aculeis & miseriis huius status: & narrantur pulchra de hoc viuendi genere, circa eius sollicitudines & anxietates: & quomodo repugnat praeclaris ingeniis, & quales debent esse agricultores.

Laudatus satis à vobis est agriculturæ vsus; quē certe necessarium atque delectabilem fore, nemo est qui ambigat. habeat tamen aculeos suos. vt enim inquit Plinius in eo quem edidit de naturali historia libro, *agricultura innocentissima atque beatissima vita quondam initium fuit*, nunc vero maioribus longe laboribus, nouisque vitiiis obnoxia est. Vt enim in Georgicis Virgilius ait, & primo à diuina scriptura discimus, non utique homo terræ & agris, sed terra homini seruire debuerat. Hominum ergo culpis effectum est, vt terra possessoribus suis, sine labore non respondeat: & plerunque labor ipse siuctus dulcedine careat. Mortalis ergo indigentia atque necessitas, terram ferro sollicitare, mirisque blanditiis mollire coegit. In qua colenda quot labores? quot corporis? quot animi sollicitudines homines perferunt, nemo nouit, nisi qui terram colit, adeo vt verum sit illud Petrarchæ: *qui triticum seminat, seminat & sollicitudinem*. Et iterum quod Poeta dicit, quia *granum plurimorum est, sed anxietas seminantis*. ita vt proprio loquendo, ager animus sit, cultura intentio, semen cura, & messis labor: quas res agriculor vberime percipiet. læta vindemia, dum tamen cum pruina & grandine pepigerit. O quot inutiles araturas, quot mortalium hominum anxias curas agricultura affert: & qui per anni circulum diligentias egit plurimas, vnius horæ rabida tempestas abstulit. quod si cœli tranquillitas adsit, quanto plura seminasti, tanto plures necesse est pascas grues, pluresque domi mures, volucres denique hospites habebis inuitus. Nec enim notiora agricolis sunt, quos nescio quid ad seminandum cogat, nisi quia ita diuina prouidentia voluit, vt et si labores, pericula

Agricultorem spiritum plerumque dilectum suum ferunt.

ricula, agricola experiatur, laborare tamen non desinet, quem spes plerumque delectat sine fructu. Demum vero illud certissimum est, multis tamen incredibile, quia in colendis agris, ornandisque vineis vix fertilitas sumpibus equatur. Adde, quia (vt Gregorius dicebat) *bonum est agros colere, si nihil melius quod fieri possit, inuenitur.* Agriculturæ igitur hac nostra ætate operam dare, non est viri excellentis aut præstantis ingenii, nec pro arte, nec pro officio, aut negotio: sed pro ocio & curarum alternatione, vel ipsa cogente necessitate laudabile. Nec enim ars terram facit meliorem; non quidem intellectum meliorem, vires intellectiuas non perficit, sed exteriores exercet. Quare iuste Sapientes agriculturam inter mechanicas computarunt, vt inferius tangemus. Et hæc putatur causa, quare Philosophus in *septimo Politicorum*, agricolas nec mercatores ac artifices & mercenarios, licet sint artes necessariæ in ciuitate, non tamen sunt propriæ artis ciuitatis: quare non veros ciues Aristoteles appellat, sicut consiliarios, sacerdotes, & bellantes & iudicatiuos, prout latius diximus supra in *Capitulo V.* Vt enim inquit vnus ex Philosophis: *Natura studiosa parens dum multas mortalibus artes dedit, distinxit etiam ingenia. & cui quis aptissimus reperitur, illi recte insistet.* Indecens namque atque indecorum videtur, debile corpus fragilesque lacertos, sed docilem animum habentes, colendis agris insistere debere. Pulchrum igitur est atque officiosum, aliud melius agere non valentibus, agros ipsos arare: sed longe salubrius foret non agros, sed animos colere. Verum est tamen, quod terrena animalia terram amant. Rursum satis innocentia agricolarum exercitia verissime fore puto, si tales ipsi agricultores forent, quales antiqui illi innocentissimi & simplicissimi erant: & quales eos debere esse legimus, non quales experimur. Illi enim cum patientia & longanimitate labores ferebant, cum frugum abundantia Deum laudantes, cum sterilitate minime murmurantes, sed cum Iob Patriarcha dicentes: *Dominus dedit, Dominus abstulit, sit nomen eius benedictum.* Sed & tales primi illi agricultores erant, qui (vt cum Propheta loquar) *gladios versebant in vomeres, & lanceas in ligones.* Agricola vero nostris temporis aratrum, stiuam, rastrumq; vertunt in arma, non modo defensiva sed & offensiva, Deum decimis, regem

*Antiqui ag-
rorum cul-
tores inno-
centes fue-
runt.*

*Agricultores
Deum deci-
mis, regem
vectigalibus
fraudent.
Agricola ar-
ma sumunt
& contra
Dominos su-
perbiunt.*

vectigalibus fraudant, fines fundorum confundunt, vel sibi applicant; ecclesiam non reuerentur, contra Dominos superbiunt, foros frequentant; per seruos conductitios, agros colunt; sed per seipso in iudicio litigant, cum per alienos in agro laborant. & dū suum deserunt officium, aliena periculose vsurpant. Hi (proh dolor) auaritia, superbia, pompa, ornatu vario, ampla suppellectili, fraudibus deniq; , dolis, litigiis & versutiis, cunctos negociatores vincunt. Martires autem quo pacto tales agricolas appellem, non video. causa enim martirem facit potius, quam tormenta. Agricultores igitur nostri temporis, martires terrenæ cupiditatis, non Christi dixerim. Et (vt paucis agamus) sicut terram co'un', sic penitus terreni sunt, vt de his recte dicatur: *Ipsi vero terram lingunt & terram comedent.* nec de cœlestibus cogitant, qui semper de terrenis loquuntur, & meditantur. sibi inuicem inuident, alios abhorrent status. Sed plerumq; castigat eos Deus, in eo delicti genere quo peccant. Dignum enim est, vt qui in terram (quæ omnium elementorum humillima & vberissima est) per superbiam & auariciam peccant, eiusdē terræ bonitate priuentur. Ideo dat illis Deus terram fructiferam in falsuginem propter malitiam habitantium in ea. Quo fit, vt terram sui natura fertilem, illorum iniquitas faciat sterilem. Sed vix bona mater dissuasionis agriculturæ verba expleuerat: & ecce fratres, consanguinei pariter & amici, si nulum genus vitæ placebat, ex illis maxime, quæ supra discussa sunt, saltem mechanicas, aut liberales artes seu alium viuendi modum, etiam si foret aliquod exercitii genus, cui plebei homines sese conferre solent, mihi ipsi deligerem, idq; sequenti persuasione agere non erubuerunt.

*Agricultores
terrâ sui na-
tura fertili:
sterilem
faciunt ini-
quitate sua.*

CAPITVLVM XXIII.

De artibus mechanicis in genere & utilitate earum: & quot sunt artes mechanicae, & qualiter earum exercitia profunt: & quomodo diuerse artes sub eis comprehenduntur: & demum deducit, quod in dictis artibus plures viri clari enaserunt, & quod mediocritas vita mechanica non est despicienda.

Repu-

Repudiata sunt à te, inquit amici, ea viuendi genera, q̄ nobiliora atq; honoratiora in hoc seculo videtur, in quib. fere cūctos ingeniosos & studiosos, ac nobiles viros versari conspiciamus. Si igitur occultis incognitisq; nobis causis nullū ex supradictis eligere pponis, nos, qui te plurimum diligimus, & posteritatem ex te quā maxime peroptamus, quā vtiq; perderes, si ad spiritualem vitam transires, te plurimum nō modo rogamus, sed monemus atq; hortamur, vt saltem artifex fias alicuius honesti, aut plebei exercitii. Sunt n. præter nominatas artes & viuendi genera, alia cōplura exercitia & viuendi genera nō inhonesta; quib. et si plebeos homines cōmuniter videamus deditos, alios tamē ingenuos natura homines, quib. ita fors illorum tulit, aut ita voluerunt, vel natura ipsa inclinatur, sæpe cōspiciamus artes exercitiaq; ipsa delegisse. Præeligunt certe nōnulli sub illa mediocri vita agentes, seculi huius breuē cursum innocentes transigere, quam sub magnis statibus periculis. Adde, quia plurimi in eis ipsis infimis artibus clari euaserunt, qui eādem ad altiora sæpe vocati fuere. Non n. artes ipsaq; exercitia animos hominum virtutemq; penitus immutāt, nisi fœdissima sint. Elige igitur aliquā ex mechanicis artibus: quas ipsa omniū parens natura ad vsus hominū pernecessarias instituit, quas nequaquā ipsa prouida gubernatrix natura nobis donasset, si non necessarias, si non viles, si nō honestas iudicasset, & suos sectatores beatos faceret. Sunt enim (vt nosti) artes ipsæ mechanicæ septē numero, ad quas cætera omnia vitæ genera corpus respiciētia (teste philosopho in *politicis*) reducuntur: videl. lanificium, armaturā, siue ars fabrilis, nauigatio, agricultura, venatio, medicina, theatrica. Sub lanificio vero plurima vitæ genera includuntur, puta texendi, torquendi, suendi, & quæ sunt manu, acu, fuso, rota, fibula siue aliis instrumentis, & cætera omnia quæ in materia, lana, lino, pelle, pilo & viminibus continentur. Armaturæ vero adaptatur quicquid armorum est, & quicquid ferro metallisq; continetur, sub qua aurifices, metallarii, monetarii ac alchimistæ militant. Vocatur autem ars ista instrumentalis, non solum, quia instrumentis vtatur, sed etiam quia ex materia illa efficiat plura instrumenta: ad quam etiam pertinet omnis lapidum, lignorum & armarum labor. Hæc duas species habet, architectonicam & fabrilē.

*Artes mechanicæ viles & necessariae.
Mechanica septem.*

Architectonica partes sunt, segmentaria, carpentaria. Fabrilis vero sunt partes, malleatoria, fusoria, sculptoria, & multa alia similia vitæ genera. Navigatio vero continet omnem negotiationem in emendis vendendisque mercibus, & in illis mutandis tam domesticis, quam peregrinis. Alii vero mercaturam ponunt speciem per se. Sed Philosophus eam sub navigatione designat, licet mercatura multis modis accidat absq; navigatione. Sub agricultura vero quicquid in terra laboratur, intelligitur: ad quā pertinet omnis agricult⁹, & quicquid ad nemora ac pascua & hortos pertinet. Ad ven⁹tionē vero ferarum occupatio aucupij, aviūq; volatus pertinet. Et generaliter ad eam pertinet omnis piscatura, & vendendi genus in terra, mari, fluminibus vel aere. Item ad eam pertinet omnis apparatus ciborum, saporum, potuum. Et generaliter omnia officia piscatorū, carnificū, coquorum, cauponū, tabernariorum. Sub medicina vero ipsa medendi ars & chirurgia continetur. Similiter & apothecariorū, pigmetariorū turba, quib; iunge herbistas, & balneorum magistrōs, rasores & similes. Sub theatrica vero aptantur oēs artes ad ludos publicos & priuatos, ac diuersa spectacula pertinentes. Cui viuendi modo hīstriones, bufones, representatores, tragici connumerantur. Dicta est enim *theatrica*, secundū Isidorum & Hugo. *à theatro*, vbi populus ad ludos conueniebat. Fiebant autē ludi in theatro, vbi etiā gesta recitabantur. In gabellis vero choreas ducebant & saltabāt. In gymnasiis luctabatur. in amphitheatro certabant pedibus, equis vel curtibus. in arenis pugiles exercitabantur. in conuiujs, rithmis & musicis instrumentis psallebant, & alea ludebant. in phanis tempore solēni Deorum laude canebant. Antiqui nāq; ludos inter legitimas actiones connumerabant: quia temperato motu naturalis calor nutrebat in corpore, & lætitia mentis reparabatur: vel quod magis credendum est, quia necesse fuit populū aliquando ad ludū peruenire. Et voluerunt (vt inquit Philosophus) determinata esse loca ludendi, ne in diuersis priuatisq; locis conuenticula facientes probrosa & contumeliosa aliqua perpetrarent. Huiusmodi itaq; mechanicæ artes & viuendi genera honestissime à quolibet honesto viro valent exerceri. Nam & sacra scriptura huiusmodi necessarias artes cōmendat, inquit in Ecclesiastico: *In manu artifi-*

et omnis opera laudabatur. Vnus ex Prophetis ait: In porta regis artifices negotiantur.

Aut si forte ceteras artes ingenio præditas peroptas, elige tibi liberales artes; præsertim quattuor ultimas, quas mathematicas vocant, quæ plerumq; magno splendore homines eas sectantes illustrent. Legisti Sulpitium Gallum astronomum plurimum honoris & utilitatis attulisse Romanis. qui cum bello proximi essent contra Persas, ea nocte luna eclipsata est: quo signo stupefacti Romani deliberabant bellum non cōmittendum. At Sulpitius Gallus astronomus publice pronunciauit, non esse malum omen: adducens rationes astronomicas, quibus suasisit populum bellare. q̄ effectum est cum ingēti Romanorum victoria. Sic & apud Athenienses cum sol pateretur eclipsim, plurimi, ne esset mundi finis timebāt. Sed Pericles mathematicus, per rationes astronomicas patriam falso timore liberauit. de cuius scientiæ laudibus atq; abusu latius infra agemus *in XXXVI. cap.*

*Astronomi
quidam lau-
dant.*

Sed de mechanicis & humilibus artibus quam plures claros euasisse compertum est. Legisti Lisippum pictorem ita ab Alexandro fuisse dilectum propter faciem & staturam eius mirifice depictā, vt cum ad magnos prouheret honores. Quid de histrionis arte dicemus. Legisti de Roscio histrione, qui tam excellens in ea arte euasit, vt Romani nunquam meliorē illo testarentur. Nam tā mira coram populo operabatur, & tam præclare ludes in theatro celebrabat, vt ingentē Romani populi dilectionē cōsequeretur, adeo vt senatus nobilibus eum aggregaret. Adde Socratem ipsū fontem sapientiæ, qui artē affectauit citharisandi. in quā clarus euasit, vt illam nobilem artem suę ciuitati incognitā superadderet. Quid de Tito dicam? qui adeo pauperi & vili officio vacabat, vt publicanus esset. & cum gabellas precio colligeret, tam fideliter tamen in eo officio se gessit, vt propter ei⁹ dignitatē, probitatem & fidē creatus à Romanis consul fuerit, in quo mirifice se gessit. Quid de Varrone, qui carnificis officio fungebatur? propter suas tamen virtutes cōsul à Romanis creatus est. sed quid ista cōmemoramus? Legisti apud Strabonē regi Ægypti filiū natū esse, quē nullo studio trahi posse ad artes militares rerū vel sciētificas, sed inclinabatur natura ipsa ad artem fabrile, videbatq; libenter

*Socrates ap-
petuit artem
citharisau-
di.*

fabros, & ad eos cum poterat declinabat. Idq; rex conspiciens de sapientum consilio cum suo arbitrio reliquit, qui tam famosus in arte fabrilis euasit, & tam egregia machinarum & ferramentorum præsidia patri attulit, ut longe plus ei ex illa arte quam ex militia profuerit. Nō est ergo despicienda vita mechanicarum artium: & multo minus mathematicarum. Nam si electione quis mediocrē & humilem statum assumit, hoc certe perfectionis signū est. Beatus enim prædicatur, qui in magnis potuit transgredi, & non est transgressus. tales enim sublimari hic & in superna ciuitate merētur. Vnde Greg. exponens illud Dauidicum: *Nonne cum paruulus esses, in oculis tuis caput Israel factus es? Quia* (inquit) *paruus tibi fuisti, magnus coram me fieri meruisti.* Tanto enim preciosior quis apud Deum existit, quanto sibi abiectior sit. Hinc Cassiodorus: *Laudata est viro- rum sententia, quæ rebus modum imponit* & nos humiliter considerare docet, quam de nobis amici expectant; quia plerumque non fati- at quod bonum putatur. Et iterum: *optimum est moderata gerere, quæ nullus audeat accensare.* Non est deniq; diffidendum de sectatoribus humilium artium, quia in eo exercitio humiliter & fideliter agen- tes facilius, quam in maximis administrationibus constituti viam salutis cōsequi possunt. Adde quoniam deest illis materia, defunt artes, defunt studia ceteros decipiendi & malignandi. *Maiores* (ut inquit Propheta) *sapientes sunt, ut faciant mala, bona autem facere nesci- unt.* Præterea alii ad alia apti nati sunt, quos forte sua naturalis in- clinatio ad parua intuit. qui si magna tentant, deficiant necesse est. Debet ergo attendere vnusquisq; in se ad quod melius natura inclinatur. Vnde Ambrosius *Vnusquisque ingenium suum nouit, idco ad id se applicet, quod sibi aptum videtur.* Cicero: *ad suam cuiusque natu- ram consilium est omne reuocandum.* Et Seneca: *Male respondent co- acta ingenia. Reluctante enim natura virtus labor est.* His & similibus amici & consanguinei persuadent aliquam ex prædictis artibus quam citius fore eligendam. Sed pia mater timida, & ex his, quæ paulo ante audiuit, stupida, illico in hæc verba prorupit.

Humilium
artium ex-
pectant su-
periores sunt.

CAPITVLVM XXIV.

De dissuafione in genere vitæ mechanica, & licet sint artes necessaria, tamen non est necessarium illarum habere exercitium. Item in rubricella sequenti agit, quare mechanica artes inuenta sunt: & quis sit illarum finis: & quare sic appellentur: & an sint utiles ingenio hominum, & an artifices sint veri ciues, & partes ciuitatis.

Fateor, fili mi, magna est vis quibusdam hominibus in dicendo. Nam (tuo Cicerone teste) *tanta est copiose dicentis virtus, ut quod quis audis, etiam si ea ipse sciat, nona se audisse arbitretur.* Quid enim præstantius, quam posse dicendo tenere hominum mentes, & allicere plerumque voluntates ad ea, aut quæ ignoramus, aut aliter scimus? nisi certe perspecta cognitaque res ipsa esset, super qua paulo ante locuti sunt amici & attinentes tui, effecissent profecto inrima verba sua, ut tandem illis acquiescerem. Sed verum est, fili mi, quia (Aristot. teste) *quædam falsa probabiliora sunt, quibusdam veris.* Adde, quia (ut Sapiens ait) *ubi plurima verba, ibi inopia, scilicet veritatis & iustitiæ.* Quippe loquar saluo omnium honore: loquar tamen cum Sapiente, quia *stultus verba multiplicat.* Et iterum: *qui multis verbis utitur, ledit animam suam.* Vnde Gregorius super illo verbo, *vir ventosus non iustificabitur: qui multa loquitur, iustificari nequaquam potest.* quia dum quisque per verba defluit, perdit gravitate silentii, mentis veritatisque custodiam amittit. Habet enim hæc omni- veritas, quia non multis nec ornatis verbis eger, simplex est, & simplicibus contentatur sermonibus. Vnde Augustinus, *satis est ut verba congruentia, non oris eligant industria, sed pectoris sequantur ardorem.* Hinc pulcre Tullius: *ex verborum splendore & dicendi festinitate suspicio quædam artificiosæ apparitionis nascitur, quæ maxime orationi vim adimit.* Et Seneca: *Nihil tam iniquum, quam manifesta verborum præparatio. apparet enim subesse reflexio quid mali.* Redeo iam fili mi ad verba amicorum. plurima certe adducunt, quibuscumque ad plebeam, ad sedam, ad tempemque vitam ducant. Malunt enim (ut aiunt) vilissimis te artibus deturpatum, sed proletem habentem intueri: quam egregiis artibus aut nobili viuenti modo imbutum.

magna esse vim dicendi & persuadendi.

filiiis carentē. Cæca est enim (nisi fallor) mens hominum, quæ p-
 lis pariter perituræ fecunditatem potius, quā virtutis & veræ feli-
 citatis amico peroprat. Audi igitur fili nū, ne dimittas legem ma-
 tris tuæ. & in primis illud Chrysostomi cordi semper habe, quia o-
 mmino iniquum est nobiliora ingenia studiis deturpare minoribus. Noui
 ergo vires intellectus tui. quare (vt cum tuo Seneca loquar) ad a-
 liud te natura edidit, quam vt sis seruus, cum liber existis. Tēte enim
 philosopho: *Artifex artium mechanicarum speciem quandam seruitutis*
patitur, dum intellectu vigens qui liber est, rebus intellectu minoribus ser-
uit. Adde, quia in eis ipsis artibus doli, fraudes, labores, & pericu-
 la non defunt. Vnde apud Mac habeos etiam legitur: *Omnes artifice-*
ces, & operarii iniquitatis, contriti sunt. Cuius etiam causam scribit
 Sapiens in prouerbiis, quia opus instabile, facis impius artifex. Hinc
 etiam Isaias: *Multitudo, inquit, hominum seducta per speciem operis; o-*
pus tamen iniquitatis in manibus eorum. Sed de singulis huiusmodi
 artibus statim latius dicemus. Nec diffiteor, fili mi, quia exerci-
 tia ipsa mechanica necessaria & vtil a plurimum existant: sed an
 ideo eligantur, considerandum. Cloacarum enim atque latrina-
 rum purgandarum vsus, quam necessarius quamque vtilis sit, ne-
 mo ambigit. Sed an ideo à nobili iuvene ac bonæ indolis adolescē-
 te à docto viro eligenda sint, tu ipse animaduerte, & iudicent ami-
 ci, tuique censores. Simile videtur illud Apostoli, quia *quædam in*
nobis membra necessariis sunt, minus tamen honoratiora. Necessariæ igitur
 sunt artes mechanicæ ad politicam socialemque vitam: sed nō
 ab omnibus necessario exercentur. Vnde philosophus in vii. po-
 liticorum ait, quod *exercentes mechanicas artes, non proprie sunt partes*
civitatis nec ciues, licet sint artes necessariae. principaliter enim non dirigunt
ad virtutem, quæ est finis totius politię bene ordinatæ. Et hoc est, quod
 pulcre ait Sapiens in Ecclesiastico: qui cum mechanicas artes no-
 minasset, ait: *Omnes hii in manibus suis sperauerunt, & unusquisque in*
arte sua sapiens est, & sine his non edificabitur ciuitas: sed non sedebunt su-
per sellam iudicis, & testamentum iudicis non intelligunt, nec palam facient
disciplinam & iudicium, sed solum operationi artis vacabunt. Hæc ille.
 Quæ verba apertissime probant, mechanicas artes licet necessa-
 rias ciuitatibus, suos tamen sectatores ineptos efficere, nedum
 ad iudicandum & præsidendum, sed ad alios actus politicos, &

*Mechanica
 artibus doli,
 & fraudes
 non defunt.*

*Mechanica
 artes suos
 sectatores
 ineptos fa-
 ciunt.*

exte-

cætera omnia quæ ingenii, consilii aut disciplinæ sunt. Sed de hoc latius supra tetigimus in v. capit. *huius libri*. Artes igitur mechanicæ exercendæ sunt tantum ab his, qui aliud melius non valent. Verum quia de mechanicis artibus primo sermo adductus est: deinde de liberalibus artibus & mathematicis dicemus: primo de mechanicis, sub quibus omnes artes ad corpus pertinentes continentur.

*Mechanica
artes exercen-
da ab his
qui melius
nesciunt.*

CAPITVLVM XXV.

Quare inuenta sunt artes mechanica, & quæ illarum sit finis.

Quantum attinet igitur ad mechanicas artes: dignum est, ut à quadam radice cognoscas, quare ars mechanica inuenta sit; & quis sit eius finis; & quare sic appellatur; & quot numero sint. Igitur secundum sententiam Aristo. & Hug. in suo *didascalicon*, causa inuentionis earum fuit, ut natura subueniret & occurreret humanis necessitatibus, & defectibus corporalibus. Ex quo elicitur finis illarum. omnium ergo mechanicarum artium finis est, supplementum necessitatum & defectuum corporalium. Nam naturaliter nemo carnem suam odio habuit. Videns igitur humana ratio multiplicem defectum carnis, & corporum humanorum ad occurrendum prædictis defectibus, cepit (ut sollicita) cogitare, in singulis convenientia subsidia. ut igitur facilius, melius, & decentius, valeret natura ipsa prædictis hominum necessitatibus subuenire, excogitauit multiplices artes operatiuas in rebus exterioribus, ad præsidium corporis. ut, artem lanificii operatiuam vestium; & operatiuam armorum de corio, ferro; & sic de aliis. Et sic patet causa inuentionis istarum artium mechanicarum, quia fuit ex desiderio occurrendi necessitatibus & defectibus corporalibus. Et finis illarum est supplementum ipsorum defectuum humanorum. Vocatur autem *mechanica* secundum philosophum & Alfarabium & Hug. in *disco-*
licon quasi adulterinæ, quia mechari faciunt intellectum, circa ea quæ non sunt proprie sua. Item quia opus artificis est, segregata coniungere, & coniuncta segregare. Cum igitur hoc opus artificis non sit naturale, imitatur naturam ut potest. ideo *mechanicum*, id est adu-

*Mechanica
artes quare
inuenta.
Mechanica-
rum finis.*

*Mechanica
intellectum
faciens me-
chanici,
Mechanici
cuius quid.*

rinum vel non proprie naturale vocatur. His igitur visis, tu fili mi tene semper animo tuo, illam antiquorum Sapientum sententia: quoniam *nullo ingenio viro aut de gloria & honore sue virtute certanti conuenit, uti artibus mechanicis, aut seruilibus delectari exercitiis.* Adde, quia licet necessariae, & viles sint, & loco & tempore commendandae, habent tamen aculeos suos, habent pericula & incommoda; quae tanto nobilia hominum ingenia ad terram vsque perducunt, quanto vires solius corporis exigunt. quinimo plerumque aptiores ingenio, inepti ad illa inueniuntur. Rursus non carent dolis, fraudibus & deceptionibus plurimis, ut singulariter & de singulis videre libet, vbi de vniuscuiusque utilitate & laudibus, ac incommoditate & miseria particulariter agemus.

CAPITVLVM XXV.

Vbi particulariter agitur de prima arte mechanica, videlicet de lanificio, & ceteris artibus, quae ei subalternantur: & de illius utilitate & incommoditate, dulcibus & amaris.

*Lanificii
necessitas.*

Lanificii vero ars (ut Sapientes voluerunt) prima inter mechanicas esse noscitur. Sub qua textoria, filatoria & quicquid lana, lino, pilis, sericoque conficitur, & reliquae similes comprehenduntur. Harum artium necessitas atque utilitas tam euidentis est, ut nisi nudus incedere vellet, id ipsum non diffitebitur. Ad tegumentum igitur humani corporis, pudendaque operienda: sed & frigoris æstusque iniurias repellendas, necessariam eam artem inuenit parens natura, perutilem certe & innocentissimam, ac honestis viris, nec minus feminis consentaneam: in qua nec membra deturpantur, nec artus plurimum fatigantur. Hæc ars vitam protegit, ac vitam instruit. Docet enim artifices suos, cunctosque mortales, quam brevis fallaxque sit huius vitæ cursus. quia (teste propheta) *transis velus à sexente vita nostra.* Verum si versa vice huius artis infelicitates, miseriae atque pericula complectamur, longe aliter sentiemus. Sunt enim (nisi fallor) textorum, filarum, lanificum, sutorum, & aliorum, qui lanificio subalternantur, tot machinationum & fraudum figmenta, & deceptionum genera: quot

quot filorum numerosa multitudo in eorum operib. reperitur. In primis igitur huius ministerii artifices Deo altissimo ingrati sunt; *qui dat eis niuem sicut lanam.* id est tantam abundantiā, vt ministret eis lanā vt niuem. Ipsi tamen Deum fraudant decima & primicia, nedum lanæ, sed & hædorum. Rursus postquā Deum cōtempserunt, facile putant proximos lædere: idque multipliciter agunt.

Lanificii artifices Deum contemnunt: hominesque lādunt.

Quis n. exprimere possit, quot sophisticatas telas cōficiunt? quot filorum falsas cōmixtiones adiiciūt? quot furta, quot rapinas cōmittunt? Textunt plerumq; leues pannos, bonā furātes, inutilem lanam apponentes, falso pondere librant. taceo fallacias in filādo, maleq; torquendo, dolos in texendo, falsos adulterinosque colores intingendo. Taceo denique sutorum fraudes ac furta, qui vix nisi ex furto vescuntur. Harum itaque artium fraudes atque miseriae sacra Scriptura commemorat, inquiens per prophetam: *Ve ve filii deserti, qui ordimini telā, sed non per spiritum meū.* Et alibi: *Telas aranea texuerunt.* Quare alius propheta in eos vehementer exarsit. Ait enim: *Qui intelligit te, præcipitabit te, & telā quā orditus es fraudulententer.* Et falsas: *Confundatur* (inquit) *qui operantur, lanā & linum peccentes, & recte non texentes.* Hii enim artifices auaritiæ seruientes, vestes conficiunt lino lanaque contextas, dum idipsum non modo ad litteram agunt, sed suis artibus non contenti ad alienas pariter transeunt. Sunt igitur artes ipsæ & eis similes recte mechanicae, quia mechanantur & non perficiunt intellectum, nec viam virtutibus parant.

Sutores vix nisi ex furto vescuntur.

Mechanica virtutibus viam non parant.

CAPITVLVM XXVI.

De secunda arte mechanica, videl. fabrilī, armaturā aut architectonica, & de partibus eius: & de utilitate eius, & prerogatiuis illarum: & de incommodis, miseriis & oneribus earum.

Fabrilis siue armatura, secunda est ars mechanica: sub qua carpentaria, lignaria, marmoraria, aurificum & quicquid lignis, lapidibus aut metallis fabricatur. Harum quidem artium summa est necessitas atque utilitas. Per eas enim necessitatibus hominum subuenitur. nisi enim ædificia forent, nec homines sub-

Fabrilis necessitas.

*Aurificum
necessitas.*

*Fabri toxicos
gladios
conficiunt.*

sistere possent; omnisque politica conuersario, & diuinus cultus perderentur. Quid enim pulcrum, quid iocundum in orbe foret, nisi vrbes, nec domus, nec templa essent? Nā homines velut fera animalia in speluncis latitent. Aurificum vero & metallorū & sequaciū studia & artes, non modo honesta, sed iocunda & vtilia sunt; qui vasa ad Dei cultum hominumque ornatum atque obsequium parant. Taceo de fabrilī siue armatura, qua fidelia arma ad expellendos hostes fabricantur, & alia plurima, quę explicari sermone nō valent. Si igitur fideliter dictas artes exercent, honestissimā vitam agunt; præsertim si nō ad lucrum, sed ad reip. cōmune bonum intendant, & victum non quæstum inde quærant. Tunc enim beatus est talis artifex, & bene erit ei, qui laborem manuum suarum manducat. Verum tamen non desunt eas artes exercentibus, miserix, calamitates, labores atque pericula. Plenæ enim sunt dolis & fraudibus. Fabri vero plerumque sophistica non vera fabricant, blandos vomeres cudunt, blanda arma atque infidelia, molles gladios, & plerumque toxicatos conficiunt. carius fabrilia sua vendere conantur, quam valeant. Rursus arma vendunt infidelibus; nec sua arte contenti, alienas inquirunt. De quibus ait Isaias: *Nunquid sculpsile constabis faber?* O quot falsas ferri fabricationes, & pro calibe commutationes! quot sophisticata ferramenta! quot falsas cementationes! quot lapides, lignorumque sculpturæ, & picturæ falsas operationes machinantur! Aur fices vero quot metallorum falsas connexiones: quot sophisticationes: quot dealbationes: quot deceptorias alchimicasque operationes, nec reperi-
tas transmutationes: quot metallorum ac monetarum falsas commutationes: quot inutiles & caducas deaurationes, picturas & colorationes, aurichalci pro auro, stanni pro argento pestiferas venditiones: quot mineralium falsas perserutationes agant & conficiant, non facile dicere possemus. Sed verum est illud Hieremiæ ad eos artifices: *Confusus est* (inquit) *omnis artifex in sculptilibus operibus suis.* Fatemur igitur, artes ipsæ vtilis sunt, humana corpora nutriunt; sed animos ad virtutes non inducunt. Implent marsupia, sed à mente non expellunt vitia.

CAPIT.

CAPITVLVM XXVII.

De tertia arte mechanica, videlicet de nauigatoria & artibus ei subalternatis: & de vtilitate & laudibus earum: demum de laboribus, miseriis & periculis, quæ eas comitantur.

Nauigatoria siquidem tertio loco mechanicis artibus subalternatur; quæ eadem cum mercatura videtur. quædā tamen singularia tam vtilia quam inutilia, tam dulcia quam amara, habere dinoscitur. Illius autem necessitas & vtilitas ex eo patent, quoniam sine illa tota pene hominum societas, tota conuersatio periret. & cum nulla prouincia aut ciuitas sola sibi sufficiat, veluti ad quam omnia vitæ necessaria & vtilia, per nauigantium suffragia facilius & aptius res omnes deferuntur. Habetque certe altera ab altera, quod ei deest: ministratque quod superfluit. Demum omnes fere in sulcæ perirent, aut depopulatæ essent, nisi per nauigationes aditus ad eas haberetur. Adde, quia secundum Aristotelem in politica, *necessarium est regno aut ciuitati bene ordinatæ promptam habere nauigationem, si volunt esse liberi.* Nam per nauigationem sunt habiles & parati ad lacessendas & propulsandas iniurias piratarum & latrunculorum. Nauigantes deniq; multa generi humano vtilia afferunt industræ & sagacitatis. sciunt enim vētos agnoscere, portus eligere, secutores futuras tempestates præuident, earumq; ortus & occasus præsciunt, speculantur suo studio aduentus aduersantium nauium. Demum nauigantium vita innocens atq; honesta est nam & Christus nauiculā ascendit, & transfretauit. Apostoli id ipsum sæpe fecerunt. Rursus ab illis omnibus cupiditatibus, libidinibus & voluptatibus, qui in terra ac ciuitatibus hominibus se offerunt, segregati sunt, & tanto Deo sunt deuotiores, quanto proximiores periculis. Veruntamen habet ars ipsa non paruas misérias, calamitates, labores atq; pericula, prout unicuique recte conspicienti facile intueri libet. Ea enim ars plena est miseriis, dolis ac fraudibus. Taceo eius pericula. Si enim deessent, qui naues fabricarent, nullus tāto periculo se exponeret. Quorum dementiā Sapiens miratur, inquires: *Ponentes*

*Nauigatoria
necessaria.*

*Nauigantium
vita honesta*

*Nauigatores
tāto deuoti-
ores, quanto
proximiores
periculis.*

valem in mari, committunt se & vitam suā paruo ligno; cum mare piscibus, terrā autē Deus dedit filiis hominum. Primus omnium Romanis persuasit nauem conscendere Claudius Caudex, ob hoc sic appellatus, quia plurium tabularum contextus, *caudex* apud antiquos vocatur, de quo dicit Seneca, *non vtilem artem inuenisse*. In primis itaque naucularii seu hanc exercentes artem, naues de ineptis putridisque lignis fabricant paruo tempore duraturas. & dum homines se illis committunt, subito dum ludunt absorbentur. quod periculum ex fraude nauculariorum prouenire dinoscitur. Taceo quot latrocinia nauigantes & piratæ indies agunt: quot furta: quot rapinas: inter quos nulla fides, nulla veritas, nullus ad Deum timor, nec ad proximum amor reperitur: sed qui potētiōr est, paruas scafas inuadit. In aliis viuendi modis robatores sunt pessimæ conditionis: in hac misera arte, qui plura deprædatur, eo amplius præmiatur, & archipirata ac magnarum classium princeps constituitur. Nec refero, quod homines in mari submerguntur, aut certe interficiuntur: nec ditantur nauigantes, nisi cum aliorum spoliis. piratas enim & hostes fidei dimittunt: fideles peregrinantes & mercatores inermes insequuntur. Tandem nauigantes quos apprehendere non valent, periclitari cogunt. Miserū certe genus hominum, in quibus nullum est humanitatis vestigium. Cum enim natura ipsa impellente naufragantibus homines cōpatiuntur, hii tamen naues periclitantes, quas tueri deberent rapiūt, dantes afflictionem afflictis. Adde, quia utilis & secunda esset nauigatoria ars, si aer, si venti, si maris fluctus, si scopuli rapidi nauigantibus obedirent. Sed longe certior est tempestas, quam tranquillitas nauigantibus. Denique parua sunt terræ pericula, nisi maris discrimina experiantur. Non enim solum nauigantibus pericula imminēt ab hostibus, sed a mari, sed à piscibus: quibus tutius foret inter homines, quam inter delphines conuersari, qui carnes humanas sitiunt. Et ut paucis agam, nauigantes id habent, ut periculis suis gaudeant. Scriptum est per Sapientem, *qui nauigant mare, enarrant pericula*. Hinc & propheta dicebat: *Pluate naues in die paugris maris*. Sūt igitur hæc artes eatenus viles & commendandæ, quatenus earum artifices eis ita vtuntur, ut instituta noscuntur.

*Nauigantes
agunt furta,
rapinas.*

*Nauigantibus
miserum ge-
nus hominū*

CAPITVLVM XXVIII

*De quarta arte mechanica, videlicet de venatoria, & artibus ei
subalternatis: & de laudibus & utilitate earum, & de laboribus,
miseriis & periculis, quæ eas comitantur.*

Venatoria quarta ars est mechanica; sub qua omnis ferarum
auiumque occupatio, & piscatura, earumque rerum paratu-
ra continetur, vt supra tetigimus. quarum artium utilitatem nul-
lus ignorat. Est enim in primis delectabilis, atq; ad exercitacionē *Venatu v-*
deductionemque temporis accommodata, & ad modestam ho- *silitas.*
minum recreationem instituta. quippe & ad salutem corporis
perutilis, si debitis loco, tempore & sine bono eis fruamur. Adde,
quia toleranda est, si ob necessitatem pro pellibus & carnibus non
ob voluptatem sine strepitu & clamore exercetur. Sed iam huius
artis & vitæ incommoda, labores atque miseras simul & pericu-
la commemoremus. In primis itaque quis prudens gaudium su-
um in fugacissimis rebus collocat? Deinde venatui vacans melio- *Venatu in-*
ris negotii diem perdit. Quid de periculis corporis dicam? quot *commoda.*
foucas venatores præcipites incurrunt? Aquas quoque, stagna,
siluas non sine discrimine percurrunt. Reges vero & magnates,
& si quotiens armis non vacant, venationi se dedant. Inter cetera
tamen incommoda illud paruum non est, quia lassitudinem, se-
nectutem, pluresque ex ea infirmitates nanciscuntur: & (vt dici
solet) paruo solatio plures inæsticiæ comparantur. Quid dicam
de temporis amissione, inutuli occupatione, fructus modicitate,
& tandem punibili vanitate. Quæ enim maior vanitas, quam
quod post paruam bestiolam leporem, natura ipsa timidam, tor-
currunt reges, tot milites, tot cursores, tot buccinarum & comitū
clangores, tot vlu'antium vociferationes. Et (vt paucis multa cō-
prehendam) in scripturis sanctis neminem sanctum venatorem
legimus. Esau enim venator erat, quoniam peccator fuerat. Rur-
sus inter venatores scriptura sacra Nembroth commemorat, qui
robustus venator & oppressor hominum appellatur. Denique venato-
res siluas quærun, vbi venationis colore, peregrinantes spoliant

*Venatores
vita hominum
inhabiles.
Contra ma-
cellarios, co-
quos & cau-
pones.*

atque trucidant. Hæc est eorum venatio, hæc aucupatio. Taceo de alia venationis specie oppressiva, arenaria cum bestiis decertando. Et (vt paucis agamus) venatores densa nemora & solitudines inquirunt, non vt vitam solitariam agant, cui se ineptos sciunt; sed vt feris & volucribus conuiuant, quia hominum vitæ inhabiles sunt. Huic arti subalternantur macellariorum ars ceterorumque coquorum atque cauponum officinæ artes, quarum vsus potius voluptas quam necessitas induxit. Esus enim carniū ante diluuiū incognitus erat. Istorum artes vilissimæ sunt, & fraudibus plenæ ac dolis, vt vnusquisque experitur. Vendunt enim carnes putridas, ouem pro castrone, hircum pro ariete, capram pro capriolo. Decipiunt in pondere; fraudant in precio; & in re ipsa seducunt. quo fit vt dum carnes vendunt, e mentium corpora lædant. De ceteris vero huius artis partibus multa dici possunt: puta de piscatura, & vinorum ciborumque apparatu; in quibus tot committuntur fraudes, vt pudor sit ea commemorare. Harum igitur artium studia, ventri non menti seruiunt. Tolerantur itaque quatenus sufficiunt ad vitæ humanæ alimentum, & bonam corporis valetudinem.

CAPITVLVM XXIX.

De quinta arte mechanica, videlicet de agricultura, & de partibus eius: de cuius utilitate, dulcore & amaritudine supradiximus in vigesimo primo, & XXII. capitulis.

CAPITVLVM XXX.

De arte pastoralis: & de eius utilitate, ac incommodis, miseriis & laboribus.

*Pastorum
utilitas &
necessitas.*

Pastorum quidem artem nonnulli agriculturæ, alii venatoriæ attribunt: vtrūque sit, specialis de ea agendus est sermo. Est igitur utilis pastorum seu bubulcorum ars, atque ad vitæ humanæ indigentiam supplendam admodum necessaria. Hic igitur viuendi modus innocuus est, nemini officit, naturæ operi inquit, Reipub. seruit, à multis est segregata facinoribus & à peccandi occasi-

tionibus aliena, contemplationi proxima, in vtilibus actionibus obuia, eamq; vitæ formulam sancti Prophetæ sectati sunt, & sub *pastoris* nomine reges & prælatos appellarunt. Quippe cuius nomine glorioso Christus nuncupari voluit, inquit: *ego sum pastor bonus*. Verumtamen huius artis plurima sunt incommoda, labores atq; pericula. Primo quidem, ut putamus, vtilius hominibus foret homines potius amare, colere & alere quam pecora. Amant enim quod nec se amari sciunt, nec amantibus vicē reddere possunt. Rursus si animalia per te paueris, occupatissimus bubulcus eris: si per alios pecora bouesq; pascis, tu non pastor modo, sed pastorum seruus eris. Sed & illorum furtis, fraudibus & dolis necesse est credas nunc pecora mortua tua afferent, nunc à feris comesta, nunc in præcipitium dedita: sed & quotidie noua, rumoresq; adducunt, ex quibus dolorem mæsticiamq; concipies. Neq; corū fraudes vitare valebis; ut recte de eis dicat Propheta: *Omnes pastores grauariati sunt*. Et iterum: *Pastores suos pascit ventris*, videlicet avaritiæ. Contra quos alibi scribitur: *Ve pastoribus qui dilacerant gregem suum*. Adde, animalia ipsa, quæ tantopere alis atq; custodis, multis periculis sunt exposita, quæ tam crebra sunt, ut plerumque totum gregem exhauriant. Ut paucis agamus, vtilitas incerta est, certa sollicitudo, dubium lucrum, manifesta pericula.

*Pastorum
incommoda.*

*Pastorum in-
certa vili-
tati certa so-
licitudo.*

CAPITVLVM XXXI.

De sexta arte mechanica, videlicet theatrica & ludis, & de partibus subalternatis: & de diuersitate omnium ludorum, & de illorum vtilitate, damnis & periculis.

Theatrica vero ars ludos respicit, dicta à *theatro*, vbi populus conueniebat. Hæc vero vitæ formula toleranda est, si ludis homines ad eum finem vtuntur, quibus instituti sunt. Teste enim Philosopho, *propter publicam læticiam homines à prauis cupiditatibus, & à nocuiis voluptatibus retrahuntur*, ut supra tetigimus. Conferunt denique ludi ad recreationem humani corporis, ut vigorosius laboribus & vtilibus artibus vacare possint.

*Theatralis
ludi, ad bo-
num finem
instituti à
gentibus.*

Ludus

Ludorum
theatralium
pericula.

enim *moderatus* (teste Philosopho) *cibus est animi*. Nam, inquit Seneca, *Socrates ludere cum pueris non erubescere*. Et Cato laxabat animum curis paucis fatigatum. Idcirco legum conditores festos instituerunt dies, ut ad hilaritatem publice homines cogerentur, tãquam necessarium laboribus interponentes temperamentum. Verum tamen plurimæ sunt huius artis incommoditates, vanitates, miseriæ atque pericula. In primis igitur considerandum est, quia ut mihi satis videtur, apud catholicos theatrale ars minime ponenda nec nominanda præcipitur. Nam (ut inquit Isidorus) *spectacula crudelitatis inspectiones sunt vanitatis, quæ non solum hominum vitiiis, sed demonum insinuationibus instituta sunt*. Proinde nihil debere esse Christiano cum Circensi insania, quæ dicitur *theatrica*; cum amphitheatrica crudelitate; cum atrocitate arenæ; cum luxuria ludi. Deum enim negat, qui talia præsumit. Quinimo fidei Christianæ præuaricator efficitur, qui id denuo appetit, quod in baptismo iam pridem renunciauit, id est, *diabolo & operibus eius*. *Lucius Silla* (ut inquit Seneca,) *primus in circo leones solutos dedit: Pompeius primus elephantes posuit ad spectacula*: nec tamen commendantur bonam rem egisse, nisi bonum fuit more nouo perdere homines. Vnde subdit Seneca: *Sanctius foret ista in obliuionem ire*. Præterea considerent frequentatores ludorum, quod teste Chrysostomo super illo verbo: *Sedit populus comedere & bibere & surrexit ludere: Deus non dat ludere sed lugere, sed diabolus dat ludere, ne luceamus: & dum ludimus, illudimur*. Adde, quia ludus non caret illusione, à qua nomen accepit. Vnde Sara vidit Ismaelem ludentem cum Isaac: *in quo ludo* (ut inquit Augustinus) *vidis illusionem, quæ significabat deceptionem*. Præterea dæmones delectantur in ludis vanis: quia vident homines eis libenter intèdere, & à via virtutis deuiare. Vnde in somno fuit à dæmonibus dictum cuidam Romano, ut ludi in vrbe instaurarentur, secundum Augustinum in *quarto de ciuitate Dei*. Denique in ludis rara est grauitas, prompta est scurrilitas, vanitas, stultiloquium, verba ociosa, mendacia vana, inspectiones, libidinosæ tractationes, in promptu est leuitas, abest modestia, nil aliud in his locis accidit nisi brevis laticia, paruū gaudium, magna temporis iactura, puerilis occupatio. Et (ut quidam Sapiens ait) *ludorum expectator vanus, lusor insanus*, qui nec honeste geritur, nec honeste cerni-

cernitur, adeo vt ignoremus an sit lusor infamior aut spectator. Rursus multi fuere, quos natura mites fecerat, sed spectacula vitia docuere, crudelesque effecere. Nil enim potentius in memoriam descendit, quam quod visu conspicitur. audita facile volant, conspectæ res hærent, etiam inuitis. Fugienda ergo sunt ludorum spectacula, vbi ad horam gaudemus, vt diutius doleamus: & semper videamus, quod vidisse semper displiceat. Porro ludorum varia esse genera cõstat, quæ docuit antiqua illusio. Alii enim aliis delectantur ludis. quidam spectaculis ferarum, quidam histriionibus, quidam palæstris, quidam aleis, sed vbique vanitas. Quid enim tauros, quid feras publice interfici delectationis habet? quasi non sufficiat bellorũ cruor in castris vrbibusq; dictim effusus? De palæstris vero atq; torneamētis quid dici potest? vbi inspicitor vaniloquus, miles insanior. Fit enim seruus totius vrbis. in quo ludo sepe vilior omnium victor euadit. De histriionum bufonumq; vita quid dici potest? nescio quis insipientior euadat, an histrio, vel qui de histriione ridet: forte qui pecunias effundit, vanior est. Quotiens enim histriiones de se dominos ridentes vident, totiẽs ipsi mirantur dementiam se mirantium. Sepe certe histrio aliquid fingit, quo falso audientes delectat, se vere. Alearum vero & taxillorum lusores adeo spureissimã artem exercent, vt in ea arte quanto doctiores, tanto nequiores habeantur. De quib. Philosophus in Politicis ait, quia *aleatores mortuorum spoliatores & latrones, turpes lucratores sunt.* Lucri enim gratia opprobria sustinent. Vnde & Themistocles grauissimos viros & reipublicæ curam gerentes, à ludis leuioribusque solatiis arcendos decreuit, ne respublica ludere videretur. Ipse denique dicebat, *sanctius esse ociari, quam turpiter solatiari.* Ludos vero innoxios ad recreationem & temporis deductionem Christianis non nego, vt musicis instrumentis: vt videbis statim, cum de musica agemus; quæ prætermittuntur pro loco & tempore.

CAPITVLVM XXXII.

De septima arte mechanica, videlicet medicina; & de eius necessitate & utilitate & laudibus. Demum de illius abusu, laboribus & periculis.

L

*Medicina
necessitas.*

Medicinæ veto ars (fateor) inter mechanicas nobilior est, tanquam à natura ipsa hominibus donata: quinimo vitæ humanæ plurimum necessaria, atque à Deo immortalis laudata & honorari iussa. qua corporum morbi curantur, & vitæ intersticia cōseruantur. Deniq; ipsa huius artis naturalis inquisitio commendatissima est. Et (vt paucis agam) utilis admodum & accommoda medicina est, quæ nedum corpora ipsa curat, sed liberiores ad vacandum animum reddit. Nam Philosopho teste: *ex bona corporis valetudine crescunt vires animi*: & bona corporis dispositio animam quoque iuuat, & ad optima quæque disponit. Sed fateor, laudanda plurimum ars medicinæ esset, si bonum subiectum, si virtuti debitum reperit, si deniq; id ipsum sciendi genus optimum ac naturalibus scientiis infallibilibusq; fundamentis communitum, prius medici addiscerent quam exquerentur. Sicut enim (vt aiunt) vnusquisque id agit feliciter, quod optime nouit: ita qui principia medicinæ ignorat, cuius finis sanitas existit, vt sanū egrum reddat, necesse est. Vidi ego plurimos heri aromatarios, hodie medicos: heri barbarum rases, hodie morborum grauium censores: heri herbas ceteraque materialia in apothecis commiscerentes, hodie in principum aulis morbos iudicantes. Si enim etiam sanando, vix nomen boni medici quisque assumit; quonam pacto necando medicandi titulum vendicabit? Quibusdam itaque his similibus me aliquando febricitantem visitantibus, atq; remedia pollicentibus, sed & causas morbi iudicare conantibus, illud ad Philippū, vt in actibus apostolorum legimus, dicebā: *putas ne intelligis quæ dicis*: Quibus dicentibus: *Etiā, ego iterum cum eodē eunucho addebā: quomodo scire poteris, cū aliquis te non docueris*. Mira certe res est, vt enim inquit Hieron. fullones, metallarii, fabri, lignorum cæsores, ipsa quoq; vilia officia exercentes, absque doctore esse non possunt, nec experi audent quæ non nouerunt: sola est medicandi ars, quam sibi passim vnusquisq; vendicat. Alii enim à crebro infirmantibus medicinam addiscunt. Alii à feminis, vt viros curent. Alii ab infidelibus audiunt, vt fideles necent. Alii nescio quibus libellis legunt, vt in miseris corporibus vniformiter exequantur, & (vt aiunt) vno collirio ab eis incognito, omnium oculos volunt curare. quo fit, vt cæcus arte natura videntem cæcum faciat.

Hii

*Heri aromati-
sarius, ho-
die medicus.*

Hii medicinam nescientes, medicina abutuntur: & artem egregiam, quam non nouerunt, profitentur, medicinæ excellenti & illustri nomine gloriantur, quippe quæstus gratia pecuniam ut facere quæzunt. Præmium certe vero medico non modo exiguum, sed sordidum & tanto labori impar, nec ingenio dignum. Ex quibus huius artis difficultates & incommoda in promptu sunt; dum viris excellentibus non creditur, & hac laudatissima arte abutentibus præmia dantur. Adde, quia multa milia hominum talium medicorum insipientia, aut inexperientia forte moriuntur, & dum unum morbum curare satagunt, plures inducunt, assuefaciuntque miseros ægros, ut sine medicinis viuere non valeant, quas nisi aliis parandis minime ipsi tangunt nec degustant. Cetera hominum genera felicem auram, bonamque temporis dispositionem optant: Medici vero aut insanam, aut pestiferam, omnes infirmos esse præter se & suos, desiderant. Quos quidam Sapiens similes dicit eis, qui funera ad corpora hominum sepelienda deferunt: quos Demosthenes Athenis damnavit exilio, eo solo, quia optabant plurimos mori, ut inde lucrum caperent. quod contingere non potest sine multorum morte. Taceo quot morborum prolongationes, quot pestíferas potiones, quot infirmitatum comminationes miseris infirmis ingeruor, & quos abstinentia aut simplici victu, quippe vel herba, si scirent, curare poterant, sumptuosis ultramarinis quippe & adulterinis materialibus, quæ ipsi aut vendunt aut illorum lucrum participant, curare, potius inficere humana corpora moliuntur. Rursus medici causas & naturas ægritudinum dicunt subtiliter, dantque sanitatem verbotenus, adeo ut sicut quidam Sapiens dicebat: *Cum eos audimus, mortuos posse suscitare credimus*: paulo tamen post cernimus inanem esse eandem sanitatis spem, quam ilico insperata mors intercipit. Sed quid plura? Absit, ut de medicis quicquam sinistre dicam. In manibus enim illorum sæpe meis peccatis incido. Itaque mihi ceterisque mortalibus sanum foret consilium eos non exasperare verbis, sed demulcere obsequiis. Quare nec ego sentire audeo, quod omnes clamant: latrones enim, sicarii, venefici homines inhumaniter occidunt: medici tamē humanissime atque officiosissime & solenniter interimunt.

Et si qui aut diuino munere aut naturæ vigore conualescunt, ipsam diuinam gratiam ipsamque beneficium pecunia vendunt, dum sibi sanitatem attribuunt. Nec indignetur medici, quod eorum artem mechanicam dixerim. Nam dicere possum congrue medicinam esse mechanicam, quia est de corpore humano, ex ea parte, qua infirmatur & sanatur. Quod quidem corpus est intellectiuium. Quibus dicendum est secundum Alfarabium, quod hoc non probat medicinam non esse mechanicam. Primo quia licet sit de corpore humano, non tamen operatur in eo medicina proprie secundum quod est intellectiuium; sed secundum quod est sensituium & vegetatiuium. Medicinæ autem ad hoc valent: primo vt iuuetur vegetatiua potentia & sensitiua in operibus suis. Fateor tamen quod aliquando accidit, vt inde iuuetur intellectiua, quia sedatis doloribus, liberius vacatur operibus intellectiuis. Secundo hoc patet, quoniam Aristoteles in libro *de animalibus* tradit doctrinam de humano corpore simul cum doctrina brutali: tamen naturalis scientia speculatiua est, Medicina vero est operatiua & mechanica.

CAPITVLVM XXXIII.

*De arte mercandi & vendendi, quæ ipsa mechanica est, & sub nauigatoria continetur: & de eius necessitate & utilitate: & de-
mum de illius infelicitate, fraudibus, dolis atque periculis.*

Mercatura vero (quæ ad nauigariam pertinet) utilis admodum est ad supplendas inopias prouinciarum: & sine illa commercium inter homines haberi vix posset. huius autem mercatoriarum artis tres sunt partes: (vt ait Philosophus in *primo Politicor.*) scilicet marelaria, id est per mare ferens merces, quæ nauigatoria dici potest: secunda est oneraria: tertia est assistentia, quam quis assistit mercatoribus in pecuniæ & aliarum rerum commutationibus. quæ omnes mercaturæ species à Plutarcho cruibis corporis humani recte comparantur. Veluti enim crura hominis huc atque illuc discurrunt pro necessariis humani corporis; sic merca-

*Mercatores
corporis cru-
ribus assimi-
lantur.*

mercatores pro necessitate corporis reipublicæ. Rursus sicut co-
 xæ & tibix sustentant corpus, sic mercatores reipublicæ suis mer-
 cibus sustentant. Ex quibus conspicitur necessitas & utilitas huius
 artis. quare merito (vt ait Hugo) commendabilis est, veluti quæ
 diuerlas ignotasque gentes conciliat, bella sedat, pacem firmat, &
 tādē priuata bona ad communem omnium vsum immutat. Est
 igitur mercatura non modo necessaria, sed ac commodā utilisq;
 reipubl. & (vt inquit philosophus) est non infimum viuendi ge-
 nus, si ipsorum mercatorum finis ad releuandas indigentias com-
 munitatis reipublicæ tendit. sed si cupiditatis gratia quis mercaturam
 exercet, vix erit innocens. Sunt enim eius artis incommoda &
 pericula plurima. idque ex eo maxime constat, quoniam secun-
 dum sententiam Sanctorum, vix mercatura sine peccato potest
 exerceri. Quis enim huius artis dolos, fraudes, iniquitates & sce-
 lera narrare potest? Profecto non est dictu facile. Et si cætera ta-
 ceam, quot falsæ rerum venalium laudationes? quot mentitæ re-
 rum emptibilium vituperationes? quot defectuum occultatio-
 nes? quot falsæ aut diminutæ mensurationes & ponderationes?
 quot falsæ mercatium commixtiones? quot mendacia? quot per-
 iuria? Contra quos inquit Ambrosius: *O mercator seculi, comparator in-
 ferni, cur in fraudem & deceptionem conuertis naturæ industriam? Cur af-
 fectus rerum defectus? Cur optas pauperibus sterilitatem, vt domus tue cō-
 pures dolosam fecunditatem? Exploras, quando erit sterilior prouentus, quan-
 do rerum inopia. Hanc vocas industriam: quæ potius est calliditatis & cupi-
 ditatis astutia. & quod tu remedium dicis, commercium nequitie potius &
 larcinium est.* Et sequitur, *lucrum tuum damnum multorum est.* Et (vt
 paucis agamus) omne huius artis officium eo tendit, vt ea vten-
 tes lucris intendant, vilius emant, carius vendant, proximos de-
 cipiant. Hos signat Valerius cum ait: *Insidiosissimum fore artem, quæ
 inopum sanguine pascitur: & mendaciis, de veritatis instrumentis o iuuatur.*
 Hac fallacia quasi præclaris artibus gaudet: quorum fraudibus non
 tam alios quam se ipsos fraudant. quia, teste Chrysost. *qui simplici-
 ter negociantur, in omnibus prosperantur: qui versantur in dolis, eis omnia
 aduersantur.* cum scriptum sit in Ezechiel: *Totam annuntiationem visæ
 versunt ad lucrum.* Ideo non perseuerabis substantiā suā. Et iterum: *Frau-
 dabis eum pecunia sua.* Taceo de vsura, quæ vix à mercatura separa-

tur. Cæterum de Campsoria sileo, & pecuniæ commutativa; quæ huic mercandi artui subalternatur, in qua tot doli, tot fraudes, tot rapinæ sunt, quot nummos campsor habet ipse. Harum itaque mechanicarum atq; similibus artium sectatores ultra alia incommoda (teste Philolopho) inepti sunt ad politisandum. Quinimo apud antiquos huiusmodi artibus vacantes, prohibebantur participare nedum principatum, sed magistratum & consulatum ut supra deduximus.

CAPITVLVM XXXIV.

De artibus liberalibus in genere: & de illarum commoditate & abusu, laudibus & damnis, dulcibus & amaris.

Liberales vero artes plurimum fore utiles ad instruendos iuvenes, & necessaria admodum scientiarum genera, nullus sane mentis dubitat nec tu ignoras, qui in puerili agens illis imbutus es: quæ (ut nosti) septem numero sunt, & in duo genera diuiduntur: quia primæ tres primordiales artes vocantur, vel prima sciendi elementa, videlicet *Grammatica, Dialectica, Rhetorica*. Quatuor vero sequentes scilicet *Astronomia, Musica, Arithmetica, & Geometria*, mathematicæ appellantur, id est, doctrina' es, quia per certas demonstrationes docent, ut statim subiiciemus. Quare autem liberales appellantur, & circa mathematicas quæ fuerint causæ inuentionum earum, & quæ sit earum natura, utilitas seu incommoditas, subiiciam. quæ etsi tibi nota sint, volo illa tibi ad mentem reducere, ne illarum oblectamenti allectus, dum illis te totum exhibes, digniora atque excellentiora, ad quæ illa ordinantur, prætermittas. Appellantur itaque (ut nosti) septem ipsæ artes *liberales* triplici ex causa. Primo ut distinguantur ab aliis illiberalibus, ut mechanicis & cæteris seruilibus artibus: quæ ideo sunt *illiberales*, quia ordinantur ad corpus: Animam autem & intellectum male disponunt. Ipsæ autem liberales principaliter ordinantur ad animam, quam disponunt ad vsus & actiones virtutum moralium & intellectualium, vel ad usum perfectissimæ virtutis, quæ est felicitatis. Ex quo potest elici alia propriissima causa

*Liberales
dicuntur ar-
tes ex tribus
causis.*

causa, quare vocantur artes *liberales*, videlicet quia secundum eas, homo per se disponitur secundum intellectum, ad optimum finem, veluti vsum virtutum moralium & intellectualium; vel ad vsum perfectæ felicitatis, quæ est speculatiua. Qui autem talia considerant, naturaliter sunt liberi, quia non sunt serviles, cum intellectu vigent. ideo recte artes ipsæ liberales dicuntur. Fateor tamen secundum philosophum in *octauo politicorum*: quia vtile & commendabile est participare aliquando liberales artes & mathematicas, quarum vsum ordinatur ad exercitium excellentiorum doctrinarum vsque ad certum terminum: sed continue & assidue exercere se in eis vsque ad quamcunque perfectionem, nonnunquam nocuum est; quia continua consideratio in illis retrahit aut simpliciter aut pro parte ab vso virtutis moralis. Tertia vero causa est, quare *liberales* dicuntur; quia liberos, id est expeditos & exercitatos animos requirunt, eo quod subtiliter de rerum causis disputant, & de illis plerumque quæ a sensu remota sunt. Alia causa est, quia antiquitus tantummodo liberi, id est nobiles & ingenui, in eis studere consueuerunt. Plebei vero & ignobiles studebant in mechanicis, propter peritiam operandi. corporalis enim operatio plus congruit plebeis: otium autem & studium nobilibus secundum Hugonem.

CAPITVLVM XXXV.

De primis duabus liberalibus artibus, videlicet Grammatica & Dialectica: & de oris earum, & causis quare inueniæ sunt, & de illarum laudibus & utilitate, ac demum de earum abusu & incommoditatibus.

POSTquam egimus de liberalibus artibus in genere: superest, ut in specie eas breui sermone tangamus. Primo igitur de Grammatica & Dialectica agemus: De Rhetorica vero in *sequenti capitulo* differemus. Vocantur itaque tres ipsæ artes *primordiales*, quia circa prima literarum elementa versantur. Per eas enim aut de congruitate, aut de ornatu sermonis, aut denique de orationis veritate & fal-

*Origo Gram-
matica.*

sitate principalius agitur. Prima itaque *Grammatica*, secundum Alfarabium, à litteris nomen accepit: quæ mater est aliarum artium. Fuit autem causa & modus inuentionis eius, quoniam cum homines inordinate atque ad libitum & sine arte loquerentur, eueniebat ut minus bene conceptus suos exprimere, sed & minus apte audientes intelligere valerent. quo fiebat ut tardius intelligere & intelligi, ac difficilius scientias tradere possent. Qua de causa curarunt sapientes has incommoditates tollere, tradideruntque artificiosum loquendi modum, vniiformem quidem ac congruum, ut omnes conceptus humani, demum cunctæ doctrinæ per eandem artem aptius & liberius significarentur & addiscerentur. Verum etsi vtilis & necessaria ars Grammaticæ sit, quo tamen pacto inter scientias annumeretur, plurimi dubitarunt: pro eo quia Grammatica ipsa solum circa periciam recti sermonis versatur. sermo vero transit, scientia autem est de permanentibus. Adde, quia hæc ars polire linguam, non animum nouit: nec intellectum dirigere, sed labia. Accedit, quia non propter se, sed propter alias inuenta est. quare instrumentum sciendi potius quam scientia secundum quosdam dici potest.

*Logica vtilis
& necessaria.*

Logica secunda est liberalis ars, quæ & rationalis dicitur. Ipsa enim diffinire, quærere, respondere, vera falsis diiudicare, ac subtiliter disputare docet. Necessaria certe & utilis ars: quia, secundum Hugo. in *didascalicon*, per eam subtilibus obiectionibus latens veritas reperitur. Causa siquidem inuentionis eius perutilis admodum fuit, cum enim physicis plures suborirentur opiniones & contrarietates, decreuerunt sapientes de modo altercandi artem tradere. Vidobant enim, quia non posset facile perueniri ad alicuius scientiæ certitudinem sine peritia disputandi. Hanc Salomon omnium sapientissimus in *proverbis* addiscendam admonet, dum nos hortatur, ut intelligamus sermones prudentiæ, versutiasque verborum, nec non parabolas & obscurum sermonem, & dicta sapientum simul & ænigmata. quæ omnia (ut Hieronymus ad Magnum oratorem ait) dialecticorum & oratorum sunt. Sed & Augustin. pro eo inter cetera Logicam commendat, quia exercitatio politioraque reddit ingenia. Sed certe si dialecticæ fructus, si finis attenditur, vtrique reperiemus, quia potius ingenium inaniter fatigat, quam

quam vtiliter perficit. Nam & si condiscipulantem viceris, nō fructum, sed verborum folia consequeris. Hinc Gregor. *sylogistica*, inquit, *diffusatio quid aliud est, quam verbis contendere & audientes subuertere?* Abutuntur enim ea arte plurimi, dum confidentia clamoris verborum veritatem impugnant. Rursus: quisquis ea doctrina versatus, necesse est consuetus loquaris quicquid probare non potes. quia (vt inquit August.) *confirmationem sumit ab homine, quicquid non habetur ex veritate.* Sed & illud verum est; quia sæpe nimium altercando perditur, dum inquiritur veritas, quod satis dolendum est. Idipsum quod ad veritatem iudandam institutum est, ad eam obfuscandam, occultandamq; cum hominum labore studiosissime queritur. Vnde Augustinus in *de doctrina Christiana*, execrabilem dicit artem sophisticam disputandi & libidinem rixandi, quam admonet cauendam. Si enim doctrina foret pietatis, nequaquam sacræ literæ tantopere eam detestarentur, cum aiunt; *Qui sophisticè loquitur odibilis est.* In ea certe (vt ipse Augustin. ait) *victoria verborum & ostentatio ambitiosa queritur*: nec modo tardos: sed plerumque ingeniosos decipit.

Logica abusu.

CAPITVLVM XXXVI.

De Rhetorica, qua est tertia liberalis ars, & de eius ortu & utilitate ac laudibus: Rursus de eius abusu, & qualis debet esse orator, & ad quid valet eloquentia sine sapientia: & quomodo aliquando est mortifera.

Rhetorica tertia est liberalium artium, sic dicta, quasi ornatus sit locutionis, secundum Alfarabium. Veluti n. per Grammaticā congrue loquendi artem addiscimus: ita per rhetoricam ea ornate proferre, quæ didicimus: ex qua re potissima causa illius inuentionis sumitur, secundum Hugo. Est igitur huius artis summa vis, ingens laus. Nam (vt inquit Seneca) *magna res est eloquentia; nec adhuc ulli indulgit, vt totam contingeret.* satis felix est qui in aliqua eius parte receptus est. Hæc certe ornamentum est aliarum scientiarū. quia (vt inquit Cassiodorus) *quicquid in alia doctrina concipitur ab ista sub decore proferitur.* Vnde in Ecclesiastico scribitur: *Tuba & psalterium faciunt melodiam, & supra utrumque lingua suavis.* Et iterum: *Fanus mellis ver-*

Rhetorica utilitas.

Rhetorica
abusus peti-
culosus.

bi composita. Et rursus scriptum est: quia *sipiens in verbis suis monstra placuit.* De laudibus vero eloquentiæ repetere, quæ supra diximus in xxxiv. cap. in principio. Sed certe hæc ars plurimos fallit, dum suos sectatores dicere non scire docet: instruit dulciter verba carpere, non vituliter sapere. Et dum verborum suauitas queritur, vera rerum sapientia amittitur. atque vitinam tantus hodie esset hominū labor ad recte beateque viuendum, quantus ad ornate, bene politeque dicendum. Hinc Firmianus Lactantijs: *Vitinam iam multi benefacerent, quam bene loqui videntur.* Adde, quia plerique ea vituntur non ad salutem, sed ad perniciem. Acerbissime quidem illud referendum quippe & dolendum arbitror, ut videlicet ea, quæ (teste Cicerone) à natura data est ad bonorum hominum conseruationem, in pestem & nocumentum vertatur. Simplex enim est veritas & recta, splendore aut verborum lenocinio non eget, quinimo (ut Quintilianus ait) suspecta est cum ornatur, fingere nescit. Nam quomodo (inquit) fabricabit figmentum, quæ vix climatum depromit sermonem? Insa vero perornata locutio plus proferre, quam conferre solet. Ut verum sit, quod quidam Sapiens ait, quia garrulosa dicendi festiuitas plus sonat quam valet: multumque habet inanitatis & vacui. Idque prudens Seneca non negauit, dum in declamationibus dicit, quia raro hæc inter se cœcunt, ut eadem vox sit dulcis & solida. Hinc Dydimus ad Alexandrum: *artem, inquit, bene loquendi non discimus, nec facundie rhetoricorum oratorumque operam damus.* Cuius officium est fabulantes sermonibus figmentare in mendacia, & innocentie fidem conferre criminibus: qui dum putant se alienæ laudis fructum per iniquam victoriam rapuisse, nesciunt se suæ conscientie perdidisse nitorem. ut recte experiantur illud Lactantijs, quia multi sua etiam facundia mortifera est. Rursus veluti ipsa artificiosa dicendi ars suos alumnos decipit, sic & ab eis fallitur, paremque ei vituperii vicem reddunt, dum eloquentiæ aut rectoris falso nomine gloriantur, eamque tanto scdus detutpâr, quanto nullam partem eloquentiæ attigerunt. Quippe nominari eloquentes delectantur, quinondum loqui inceperunt, ne dixerim didicerunt. Est enim modernorum hominum ingens numerus, qui in eo se res rhetores, perfectos atque facundos oratores euasisse putant, si post pauculas, quibus insudarunt, Grammaticæ literas

ras, postergatis cæteris præclaris scientiis, quæ ipsam eloquentiam nedum illustrant, sed conficiunt, ilico facundia studiis se dædant, librosque Ciceronis & si vis nostri Quintiliani perlegant. Longe certe aliter idem Cicero moderna deplorans tempora in eo libro sentiebat, quem *de oratore ad Quintum fratrem* edidit. Longe secus & ipse Quintilianus cum *de oratoris institutione* ageret. rarum enim aut nullum fatentur optimum esse ea ætate oratorem. Cuius rei illam asserunt non insuffam fore causam. Nam oratorem, inquit, in omni sapientia genere persuadere oportere, ut quæ a libi didicit, cum splendore dicendi proferat. adeo ut qui verum oratorem audit, scire & intelligere plusquam cæteri arbitretur: Quod utique nili diuersis sapientia titulis lustretur, efficere non valebit. Quo enim pacto in sacris literis ille persuadebit, qui eas nusquam legiit? Quoue in naturalibus, qui Aristotelem non vidit? Quo modo in moribus aut iure ciuili perorabit, qui earum scientiarum ne dixerim expers est, sed nec principia nouit? Eadere Cicero mirari definit paucos admodum fuisse oratores, cum eos aut omnia aut multa scire oporteat. Quæ omnia homines complecti perquam difficile est. Hinc August. in *de doctrina Christiana* ait, quendam Sapientem dixisse: quia *oratore oportet non modo delectare, sed docere: nec modo persuadere ut flectat, sed ut vincat*. Constat itaque ea omnia non nudis verborum foliis, sed multiplici sapientia comparari. Talis ergo eloquentia à sapiente prolata, omnidulcore mellis dulcior est: de qua in Ecclesiastico scribitur: *sapiens in verbis amabilem se reddit*. Ut igitur partes laudatæ eloquentiæ quis assequatur, necesse est varia scientiarum suppellectil: constipatus exiltat. Idque in *proverbiis* Salomon permonuit inquitens: *spude sapientia, ut possis digne proferre sermonem*. Quia sententia contemptibilem asserit facundiam, nisi scientia & sapientia fuerit condita. Fateor ergo, hominum mens hodie deprauata, quinimo & penitus obæcata est: adeo ut frondes pro fructu capiant, & fumo pascantur, dum se igni appropinquare putant. Hoc est certe illud tempus, quod Apostolus ad Timotheum præsignabat, cum poetarum fabulas ac fimenta pro veritate ac sana doctrina fideles accepturos in spiritu deplorabat, cum ait: *Veniet ergo tempus, cum sanam doctrinam non sustinebunt: sed à ve-*

*Eloquentia
ut sine sapi-
entia nocet;
sic sapientia
sine eloquen-
tia prodest.*

*Argumentū
praefertur
nilo.*

ritate quidem auditum auertent, ad fabulas autem conuertentur. Adde, quia teste August. Cicero ipse & ceteri, qui rhetoricam docuere, falsi sunt eloquentiam sine sapientia obesse plurimum: & prodesse nunquam: sapientiam vero sine eloquentia plurimum profuisse. Hinc Apostolus ipse vas electionis ad Corinthios de se loquens palam fatetur, se imperitum fore sermone, sed non scientia & sapientia. tantum tamen profecit, quantum mundus capere potuit, & humana ingenia sufferre valuerunt: adeo vt plus ceteris doctrina & praedicatione proficiens, vnus ipse *doctor gentium* meruit appellari. Ipse deniq; & si rhetoricis coloribus non vsquequaqum utebatur, adeo vtiliter disputabat, vt omnes sua sapientia superaret: non vtique (vt ipse alibi ait) vincebat in persuasibilibus humanae sapientiae verbis, quae ad eloquentiam referuntur. quare fideles summopere admonet, ne decipiantur in sublimitate sermonis. Nouerat enim quod ad eundem sensum lob dixerat; *frustra* (inquit) *homo aperit os suum, & absque sapientia verba multiplicat.* Nec id ipsum gentiles veteres, qui eloquentiae studia miro euderunt ingenio, negare videntur. Quippe arbitrati sunt eloquentiam non debere iudicari atque laudari verborum solo splendore, sed secundum grauissimas sententias à vera sapientia sapienter elicitas: vt explicare liber, & gratia exempli dixerim. In conficiendo diademate siue anulo absque proportione longe plus conferre videtur, qui carbunculum, qui gemmas, qui aurum offert, quam aurifex qui modo ea auro ligat, formamq; simplicem adiicit. Omnis itaq; referta oratio gemis sapientiae & sententiarum pondere perficitur, non solis verborum flosculis. parum ergo substantiae vel virtutis, aut solidae pulcritudinis orationi asferre videtur, qui solum rhetoricæ & eloquentiae vacat, veluti qui nuda ex aliena preciosaque materia verba ligat. Qui vero non mendicando, sed sua diffundendo preciosiora ministrat, longe plus conferre visus erit. *Famulatur* itaque (teste Augustino) *eloquentia sapientia.* Nec mirum (vt Hieron. ait ad Magnum oratorem) *si propter eloquii venustatem & dicendi ornatum sapientia vt domina ea vsatur, & aliquando de ancilla atque captiua propter eius venustatem faciat liberam Israelitem: quae & iam diu honorata incedat, quam diu dominam sequitur: sitque contempnibilis, cum sola absque domina splendore prodire*

&

& placere gestis. Postremo audi, quid Augustinus dicat. Ait enim: quia eloquentia solum vacantes minime ingeniosi habentur. Quid enim (inquit) prodest clavis aurea, si aperire non potest? aut quid obest lignea sifosest? Agam igitur finem, si illud vnum dixerim, quia qui sine sapientia eloquentiam profitentur, vanitati inhihi fatentur. Nam nudo verborum ornatui vacantes, humanitatis studia se iactant assecutos. Cum enim (teste Sapiente) *vana sunt studia hominum*; recte oratorum exercitia studia humanitatis sunt quippe & vanitis, dum vanitati sermonis incumbunt. quos pulcre idem Sapiens alibi digito tangit: *Verba (inquit) proferunt plurima, multa que in dicendo & disputando vanitatem habentia.* Sed & Hieremias ad eundem sensum: *Doctrina (inquit) vanitatis eorum lignum est argento inuolutum.* Lignum (inquam) siccum est atque aridum, idque ut splendeat argento inuoluitur. Nec aliter rhetorum verba arida sunt; veluti nullo sapientiae humore aut sententiarum splendore humectata. quare ut fulgeant, argento nudae eloquentiae superinuoluuntur. Quo fit, ut verissimum sit eos studia sequi humanitatis; quin potius vanitatis. Adde quae diximus in praefatione huius libri, quae incipit: *Verum*, ubi aliquid diximus usque ad medium capituli.

Humanitatis studia unde dicta.

CAPITVLVM XXXVII

De Mathematicis scientiis in genere, & de earum ortu & fine.

Mathematica vero doctrinales vocantur, quia per certas demonstrationes quantitatis continuæ docent, ut statim subiiciemus. Has Philosophus metaphysicæ connumerat, & cum illa conueniunt, quia utraque considerat de quantitate continua, sed dispariter. Metaphysicus enim considerat de omnibus quantitativis, prout sunt entia, ut ait Philosophus libro 4. metaphysica: sed mathematicus considerat de quantitate, ut de subiecto; & de illa principaliter agit, illamque demonstrat. Et quia quantitas multiplex est, aut saltem quadruplex, ideo quatuor sunt mathematicæ. Prima enim & nobilior quantitas est circa dimensionem omnium coelestium corporum in se, & inter se per distantias & di-

Mathematica quadruplex.

mentionem ad inuicem, etiā respectu motus & situs illorum & circa istam quantitatem versatur *Astronomia*. Alia est quantitas respectu auditus circa sonos & voces. Nam humana curiositas videns in sonis esse delectamentum, quæsiuit causam eius, ut sibi posset per artem tales delectationes facere & cōtinuare, ut dicit Boetius in *primo Musica*. Vnde docuit quantitatem vocum sub vna concordia & consonantia sonorum coniungere, & in vna proportionē numerali deducere. & hanc proportionem & quantitatem sonorum vocamus *Musicam*. Tertia quantitas respectu numeri versatur, quæ dicta est *Arithmetica*, id est virtus numeri; quia considerat quantitatem numeralem & proprietatem eius, ut ait Ihsidorus. Hæc certè ars magnæ virtutis est, quia nulla aliarum artium indigent; aliæ vero hac plurimum indigent, ut ait Boetius. Quarta vero quantitas versatur circa mensuram, quæ dicta est *Geometria*, id est mensura terræ, quæ ortum habuit secundum Alfarabium in *Egypto*. Cum enim post Nili inundationem possessiones omnes obducerentur limo, ad hoc ut deinceps possessiones certitudinaliter distinguerentur, ceperunt terram lineis & mensuris metiri & parti, ut sic ceteri limites ponerentur in possessionibus. A tali igitur primaria mensura terræ scientia mensurandi nomen accepit, quæ Geometria dicitur. Postea vero creuit inquisitio eius, & deuenitum est ad lineas, & circulos, & triangulos, & ceteras figuras ad eiusdem artis perfectionem.

CAPITVLVM XXXVIII

Particulariter de prima scientia mathematica, videlicet de Astronomia, & de eius laudibus & utilitate: deinde de illius incommoditate, incertitudine, laboribus & damnis.

Astronomia itaque prima est *Mathematica*, & quam antiqui *matheseis* penultima breui appellabant; eamque vilem probabilemque habuerunt: quia (ut ait Poligratus) natura illam inducit, ratio probat, & utilitas & experientia approbat. qui hanc sequuntur, curiosiores sunt cœlestium, ut inuestigent de singulis, quæ

*Astronomia
utilitas.*

quæ sub lunari globo continentur : vtilis certe ad naturales effectus prænoscehdos. Illa enim de siderum motibus magnitudine & distantia pertractat. Euocat enim homines ab his tenebris & grosso aere, & in superiorem illam lucidissimamq; cæli domum tot luminaribus distinctam, oculos & animum inducit. Est enim iocundum fixas stellarum imagines discernere, & erraticas suis locis nominibusq; designare, earumq; cōiunctiones; demū solis & lunæ defectus longe ante prædicere & præuidere. ex quibus plurima comoda consequimur, & non parua pericula & incōmoda vitamus. Rursus non est dubitandum ex motu cœlestium corporum, plurimos futuros rerum euentus dependere; præsertim in illis, qui ex nostro libero arbitrio non procedunt. Vnde secundum doctrinam Sanctorum: *Non sunt culpandi, qui naturales effectus stellarum & planetarum nouerunt & prædicunt.* Nam & in Genesi legitur: *Luminaria cæli ad hoc producta esse, vt sint in signa & tempora & dies & annos.* patet ex prædictis excellentia & vtilitas huius artis. Verum secundum Alfara. hæc ars pro parte mendax est, & hominibus ignota. Quis enim hominū hodie nouit omnium & tam diuersarū stellarū diuersas naturas & effectus? & postea virtutes ex omnibus mixtas, vt cum certitudine determinet euentus, etiā naturales in elemētis & elemētariis cōtingentes, vt absq; dubio dicere possit, taliū stellarum cōiunctio facit necessario siccatatem, & taliū cōiunctio facit aquarū abundantia: & talium pestilentiam, & talium mortem diurnam, & taliū mortem celerem? indubie nemo nouit circa arcana ista certum dicere, sed per coniecturas fallaces asserunt aliqua ex his quæ contigerunt aliquando. & non accidit vni formiter sicut dicunt. Et ideo *astronomia indiciaria* fatua dicitur, & insatiatiua eorum qui sibi vacant, secundum eundem Alfara. Irridenda certe & talium hominum dementia, vt scire velint, quæ in cælo aguntur, quasi consilio cœlestiū interfuerint, atq; recenter inde venerint: cū tamen quid in terra quid in domo vxor aut soror eius egerit, ignorent. Noui ego quosdā astronomos vxores habere non satis pudicas, ipsi camen de aliarum impudicitia coniectabāt. Plurima itaq; incōmoda humano generi ex his futurorū perfortationibus mathematici asserunt. Sed vltra prædicta eminent alia incōmoda & pericula. Nam raro & difficulter sectatores huius

Astronomia incerta diuinationis.

Astronomia fatua insatiatiua.

Astronomia incōmoda.

artis intra moderationis metas continentur, sed cupiditate quadā futura prænoscendi, ad diuersa vanitatum genera eius velamento homines trahuntur. vt (teste Policrato) non tam Philosophiæ species, quam quædam impietatis disciplina sit, & tandem in mathesim producta per vltima conuertatur. Dilatant enim plurimi philacterias huius artis, vt constellationibus & planetis nimium virtutis attribuant, & eis nescio quam auctoritatem præstant in contumeliam creatoris. Et iuxta Apostolum: *Ad sobrietatem non sapientes stulti facti sunt.* Cœlestibus enim constellationibus attribuunt vitam & mortem, ceterosque euentus hominum prædicere conantur: & cetera, quæ pater posuit in sua potestate: non attendentes quæ per Prophetā Deus ad illos irridens ait: *Dicite mihi quæ ventura sunt, & dicam quia dii estis.* Sicigitur mentes hominum futura prænoscere cupientium illudunt, vt tandem liberi arbitrii perimant libertatem. qui pariter & eis credentes, vtinam illud cōsiderarent; quia altissimus sideribus ac stellis tantum dedit vigoris, quantum voluit, sibi tamen retinuit totius opificii principatum. Quæ omnia ipsi auctori Deo exhibent famulatum, iuxta illud: *Cœli enarrant gloriam Dei.* Adeo enim hii homines diuinæ prouidentię illiusque bonitati & potestati detrahunt, vt asserant aliquem faustum, aut fortunatum esse posse, ex constellatione natiuitatis suæ. A quibus (vt quidam Sapiens ait) quærendum esset, an credant ira Dei quibusdam plerumque regna & dominia ablata fuisse simpliciter, & eius gratia & beneplacito alius esse collata. Rursus non credunt, quod eadem diuina ira vel gratia Dei, aut aliquorum precibus potest placari, vt bona data non auferat, & mala merita non inferat: quæ omnia in sacris literis sæpe facta esse legimus. Quod si ea vera fore credunt, necesse est illos etiam credere, quia contra voluntatem creatoris huiusmodi bona hominibus non proueniunt, nec eis auferantur: sed ineffabiliter verum sit, cuncta bona & mala mortalibus ex Dei beneplacito prouenire. Vnde doctissimus Guillelmus Cancellarius Parisiensis pulchre in eo, quem de *uniuerso*, libro edidit, refert facere, quia cum vnus ex astronomis cui-dam ex illius natiuitatis constellatione magnam dignitatem polliceretur, ille ab astronomo quæsiuit: Num si Deus nolle, ille dignitatem affecturus esset? Cui respondit: Nullo id pacto effici posse. Rursus ergo quæsiuit: an si Deus vellet,

vellet, astra & eius natiuitas possent impedire, ne dignitatem assequeretur? siderum &
 Similiter respondit negativè. Tunc ille: Cum ergo utrumque sit in signum
 Dei arbitrio, totum ei committo. Quod vero obiciunt, luminaria cæli
 producta esse, ut sint in signa & tempora: fatendum est in naturalibus.
 Erraret enim Medicus, si flebotomaret in certa luatione vel si-
 gno siderum. Signant ergo sidera futura tempora, an naturaliter
 erunt sicca vel humida: secus in euentibus hominum, qui ex arbi-
 trio procedunt, & per rationem dirigi possent. Tales enim astris
 non subiiciuntur. Pendent enim ex intellectu, quem secundum
 Philosophum constat esse ab extra. Fatendum est tamen, quia in-
 clinatiue astra disponunt certos hōnes ad certos actus: præsertim
 eos, qui nō resistūt passionibus, nec sequuntur rationē. Quo sensu
 dixit Ptolomeus, quia *solus sapiens dominabitur astris*. Stultiorū autē
 infinitus est numerus. Significant ergo astra, quædam naturalia in
 terra, nec ad illa homines cogunt: quinimo ea facile vitare possumus:
 veluti exempli gratia, Eleuatio manus cū gladio, signū est e-
 minentis percussiois: nonnunquam tamen in iocum resoluitur.
 Rursus aliud exemplum succedit. si in capite alicuius vici aut stra-
 tæ vrbis videmus ignem accensum, & ventum validum ex ea pa-
 tre, certe coniectamus domum ligneam, quam ignis & ventus
 petit, comburendā, tamen aquarum copia aut aliis remediis vitari
 potest. O quot felices principes, quot viros clarissimos fefellit, atq;
 infelices reddidit hæc tam falsa & auida futurorum euentuum in-
 quisitio. Testes sunt tres inter ceteros omni seculo percelebres &
 memorandi viri Pompeius, Crassus & Cæsar, quibus (teste Cice-
 rōne) Chaldei omnes, mathematici, ceteriq; aruspices præclaro
 fine in patria morituros promiserunt. quod an verū sit, incertum est
 cōmemorari. ferro enim omnes cæsi; duoque longissime ab Italia
 inhumati, ferarumq; morsib. expositi fuere. Ea igitur atq; maiora
 quippe & deteriora his prouenire assiduo conspiciamus, quos felices
 astronomi præfagiunt. Nec tamen humana mens futurorū a-
 uida auerti vult, ne illorum nugis credat. Mira hominum leuitas,
 mira credendi facilitas, verius dixerim fatuitas. Quam non parum
 Cicero miratur, qui longe magis mendacibus quam vera dicen-
 tibus credunt. Ceteris siquidem etiam probis hominibus non
 facile fides datur, si nō tantū notabili sunt deprehensi mendacio:

*Astrologi
 multos ma-
 gnates de-
 ceperunt.*

*Sacra litera
prohibens
astrologi
damari.*

*Astrologia
scientia est
non pietatis
sed curiosi-
tatis.*

Astronomos vero & coniectores melioris conditionis dixerim, quod contra accidit. Mille enim illorum in grauissimis rebus mendacis, vna fortuita & alias futura veritas fidem præstat. Quo fit vt aliud mirabilius accadat, quod, vt Petrarcha ait: *sine ulla suspitione mendacis libere mentiri possint*, pro eo quia semel potuerunt non mentiri. Adde aliam stupendi & admirandi causam. Cum enim diuina veritas (scriptura sacra teste) nos moneat, ne prædictis coniectoris etiam Prophetis & vera prædicentibus credamus, cum ait in Deuter. *Si surrexerit in medio tui Prophetes: & prædixerit signum atque portentum: & euenerit quod locutus est: non audias verba Prophetæ. Tentat enim vos Deus an diligatis eum.* nihilominus eis ipsi mathematicis, quos non Prophetas, non sanctos scimus, in cunctis credimus, qui paucula dæmonum forte præstigiis prædixerunt. Huius denique exercitii pericula & incommoda, vltra prædicta ex eo conspicias, quoniam illam artem pro fundamento & scuto quodam suæ iniquitatis multi venerantur & colunt scilicet diuinatores, nigromantici, ineantatores, arioli, aruspices, coniectores, cyromantici. Vtunque igitur sit: oro te, fili carissime, hanc artem velut pestem fuge: nec quid astra de te inquiras, sed quid astrorum creator sanxerit, bonis operibus expecta, atque vt ad salutem tuam cedant, iugiter exora: nec ab his coniectoris veritatem speres agnoscere, quibus veritas ipsa ignotior est quam tibi. Fateor enim aliqua astronomiæ species laudata est atque perutilis. Verum tamen (teste Augustino) *potius est scientia curiositatis, quam doctrina pietatis.* nec illam inculpamus, sed vtilius sectandam dicimus sapientiam naturalem, quæ astrorum arti hæret. Illa enim naturali intellectui consona est atque conformis, per quam naturalium rerum animatarum & inanimatarum principia, passionēs, & eorum quæ cælo & mundo continentur, rationes & effectus cognoscimus, ac mutarum rerum possumus causas reddere, quæ mundo miranda videntur. Nec minus iocunda est inquisitio perspectiuæ, & de ponderibus tradita ratio. Fatemur tamē quia in his naturalibus metaphysicis scientiis non Christus, non Prophetæ sonāt, sed Philosophus & Commentator. De quibus ad Damasum dicit Hieron. *quia physici perscrutatores oculos in cælum leuantes, & vltra profundum terrarum in abyssis demerguntur, in vanitate*

sententia

sensus in obscuritate mentis ingredientibus diebus ac noctibus perferuntur, multa ut sciunt, pauca ut sapiant.

CAPITVLVM XXXIX.

De secunda mathematica, videlicet de Musica, & de eius laudibus & utilitate, ac illius incommoditate, miseriis & laboribus.

Musica vero altera mathematica est, quæ ut dixi, consonam multitudinē proportionum suarum in quadam æqualitate vocum conciliat. Hæc certe ars apud Græcos magno semper honori fuit: nec perabatur quis liberaliter eruditus, nisi musicalibus cantibus instructus foret. Quantam autē virtutem Plato harmoniæ tribuit, ex his patet, quæ in *Timeo* tradit. Ait enim, quia *potentissima artium est Musica, cuius harmonia virtus est ad mitigandos dolores animarum humanarum, ipsaq; letificandum similiter & ad ingerendas eis omnes passionēs.* Tantusq; est musicorum in cōmouendis animabus vigor, ut eas cogat mouere corpora sua ēt ad gestus insolitos, quib. motus interiores alterātur. Deniq; per harmonias gratia contemplationis & diuinarum scientiarū studia, non mediocriter iuuantur, secundum Alfarā. Adde mirabile dictu: quia & in bellis equos ipsi musicales concentus incitant: Delphinos quoq; & cetera animalia lætificant. Hanc Socrat. didicit, & adolecentes erudiri in ea iussit, non quod ad lasciuiæ incitamentum, sed ad motus animæ sub regula rationeq; moderandos. sicut enim non omnis vox, sed tantum quæ bene consonat ad soni melodiam facit: ita & motus animæ non omnis, sed qui rationi cōgruunt ad rectā viræ harmoniā pertinet. Augēt eius laudes, quia nō modo delectabilis & utilis est, qua nedum spiritus hominum viuificantur, sed instrumenta sunt ad rectos bonosq; hominū mōres, cuius virtute maligni spiritus cohibentur. Sed quid plura? Animū à curis liberat, & quadam interna lætitia ad exultationem in Deū mentes humanas prouocat. Vnde Propheta: *Exultabūt* (inquit) *labia mea, dū cantauerō tibi.* Sed iam audi illius incommoda. Primo enim eas, quas diximus vilitates, qui musiam audiunt, consequuntur: non quod ipsi artifices. nam, ut ait Aristoteles *audibilia fortius mouent quam sensibi-*

Musica incommoda.

Musica incommoda.

lia, aut per se operabilia. Quinimo, teste Philosopho, propter vehementiam multitudinemq; vocum, læditur cerebrum; læduntur spiritus vitales cantantium; quo fit vt ad mores male dispositi reddantur. quos Aristot. *banauſos*, id est, indispósitos ad res intellectus vocat. Rursus musica & vsus eius per certas melodias ad mollitiẽ disponunt, aliquando ad iram, aliquando ad diuersa alia, quæ distrahunt ab operibus virtutis & intellectus, quare senibus ac magnis & studiosis viris audire & iudicare, non exercere musicam præceptum est. Decet enim (vt Sapientes aiunt) grauem virum non modo manus, sed voces cohibere ad aliorum applausum; quod proprium histionum est. Adde his quæ tangemus infra libro 2. Capitulo XV. vbi de cantoribus agitur.

CAPITVLVM XL.

De tertia & quarta mathematica, videlicet Arithmetica & Geometria: & de earum laudibus & utilitate, ac de illarum incommoditate, inutilitate & laboribus.

Arithmetica & Geometria vtilis & necessaria.

Arithmetica & Geometria vltimæ sunt mathematicæ, & vtilis admodum; quarum altera de numeris, altera de magnitudinibus. In quibus secundum varias relationes parium vel imparium: item linearum, superficierum, aut corporum, varix species numerorum, magnitudinumque constituuntur. quæ cognitio iocunda est. Hæ quidem artes vtilis certe & necessariae sunt, & in scriptura sacra plurimum commendatæ, quia scriptum est: *Omnia fecisti in numero, pondere, & mensura.* Sine enim numero nihil agere possumus. Vt enim inquit Isidorus: *Tolle numerum à rebus, & omnia percunt; nec differrent homines à bestiis ceterisque animalibus, quæ calculi rationem ignorant.* Et idem de Geometria; *Sine enim pondere denique & mensura nec possessiones nec politia forent.* Sed fateor, hæ artes & si vtilis & necessariae sint, non tamen homines conducunt, nec dirigunt ad mores, nec ad felicitatem æternam. Quid enim prodest rerum magnitudines ac extrinsecas quantitates agnoscere, sui vero ipsius intrinsecas qualitates ignorare? Quid rursus quantus sit orbis intelligere, sed quantus

Arithmetica incommoda.

quātus sit eius creator nescire? Aut quid prodest, omnium numerorum proportionem attingere? Quid numerare multitudinem stellarum; & omnibus eis nomina vocare, si vicia, si scelera sui ipsius non computat? Vera igitur geometria est quantitatē & magnitudinem peccatorum attendere, illaque poenitentiae calculo diluere. Vera illa est arithmetica, dies nostros dinumerare, & in quo defecimus computare, dicentes: *Fac mihi Domine notum numerum dierum meorum, ut sciam quid desit mihi*: quia carpentarii sibi vendicant: in quarum usu, pericula, fraudes & doli non desunt. Taceo de falsis computis, de falsis mensuris & ponderibus. Vides, fili mi, huiusmodi mathematicas artes fore alienas ab artibus & scientiis pietatis: quæ ad vitam æternam conducunt, ad quam te dirigere, omnia mea studia tendunt.

CAPITVLVM XLI.

In quo sub breui epilogo recolligit auctor cunctas alias artes & genera viuendi in hoc seculo. In quo ostendit misérias, labores & pericula omnium statuum. & docet eos omnes plures habere aculeos & misérias quam gaudium, quietem & securitatem: discurrens per omnes modos viuendi in hoc seculo.

CErnis iam, fili mi carissime, si ea quæ audisti, tecum ipse recolis ac discutis, explicata esse omnia vitæ genera: cuncta denique humana temporaliaque exercitia: in quibus diuersa mortaliū studia, tam sedulo & vehementer occupantur. Nec enim puto me falli, quoniam humanus animus in illis non tam satiatur quam cruciatur. Si enim recte iudicas, plus in eis laboris quam quietis, plus mœroris quam gaudii, plus luctus quam solatii, plus difficultatis quam facilitatis, plus periculi quam securitatis reperies: quæ omnia opto tecum ipse confideres. Scio enim, quoniam firmissimam laborum, difficultatum & afflictionum partem, pro immortali Deo pertuleris eorum, quæ mortales subeunt, ut seculo diuersis modis seruiant, recte quidem beatus eris. Verum sub breui epilogo plurima tibi ad mentem adducam. Quis enim omnium viuendi generum, ac humanorum exercitiorum & offi-

riorum labores, incommoda, pericula, fraudes quoque & dolos facile memorare posset? Sed (vt breuioribus apud te vtar verbis) à summo culmine vsque ad infimum, à Cæsare vsque ad bubuleum, à Rege vsque ad pastorem: nulla quies, nulla securitas, sed omnibus casibus, periculis, aculeis, laboribus innumeris subiiciuntur: cuncta fraudibus & iniquitatibus subiacent. Regis enim aut Cæsaris clarissimum esse nomen non ambigimus: sed durissimum officium & magis seruare difficile. In excelsum enim & ventosum montem ascendit Rex, quem facilius fulmina feriunt. Nam & si clarus Regis titulus sit, res tamen obscura: nec aliud est quam vitreum & periturum iocale: cæcis & periculis plenum. Demum Reges delirant adulationibus, & (quod periculosius est) retento Regis nomine plerique tyranni fiunt: quorum nonnulli multo iustius sub Rege iusto agerent, & tranquillius quam reges ipsi essent. Locus certe regius nedum ignauus & petulans est, sed & periculosus, laboriosus virtutisque difficilis. Quippe bonus rex, seruus reipublicæ: & malus, hostis illius. Adde, quia rex ea die, qua regnare cæperit, mori capit. Aliis enim vixit moriens: quod difficile creditur à regis hostibus. Si quæ erat olim quies, Regi perit. Sed de Principum miseriis hactenus in secundo huius libri capitulo diximus. Simile omnino de Principibus, de Ducibus & Marchionibus, Comitibus, Baronibus & cæteris potentibus cogitabis, quibus illa indelebilis atque irreparabilis mœstitia addenda est: quia si potentes sint, posse tamen nē regi subiiciantur, nequaquam possunt. Cætera hominum officia, status, artes & exercitia breuioribus attingam verbis. Milites populum reliquum & ipsos subditos non defendunt, sed depredantur: Principum officiales plebem excoquant, thesaurisant sibi non autem reipublicæ thesaurisant. Regia quæque domus & Principum aula, plena est superbis. & quandoque magnatum curia referta est mendaciis, impietas versatur in principum ac quorumlibet belligerantium castris seu tentoriis, quoniam (vt dudum cecinit elegantissimus poeta Lucanus)

*Nulla fides, pietasque viris, qui castra sequuntur
Venalesque manus: ibi fas, ubi maxima merces.*

Sed iam transue ad alios libet. Eques ipse factiosus: armiger pauper

*Reges delirant
ex adu-
latione.*

pauper deprædatur, pedices luctuosi, inferni ministri, venator
 fessus cursitat inaniter, fraudatur auceps, piscator madidus a-
 quas non terram colit, custodes latrones in siluis, iusticiarii
 in foris sicarii, excoriat barbitonsor, lædit cyrurgicus, occidit
 medicus, apothecarius sophisticat aromata, iudices tribunalia
 vendunt, notarii registra falsificant, litigiis immiscet canonista,
 fraudibus dirantur legistæ, fraudat orator, artistæ superflua cu-
 riose rimantur: Theologi bona prædicant, praua agunt: mer-
 cator decipit atque deierat: venditor laudat: vituperat in-
 stitor: scriptores incorrecte depingunt: pictores falsa scul-
 punt: carnifices putrida vendunt: tabernarii ebrios pariunt,
 gulam gignunt. Sed tam cæca est hominum mens: vt ad hæc o-
 mnia & si miseris, periculis, ærumnis plena, tamen vt ad quædã
 solatia ingentia properant, festinant. Currunt enim & discurrunt
 mortales, non quidem per virètia prata, sed per scabrosos sepes, ac
 semitas diuersas. Quidam n. ascendunt mōtes, transcendunt col-
 les, transuolant rupes, transgrediuntur foueas, ingrediuntur ca-
 uernas: alii rimantur viscera terræ: alii profunda maris pene-
 trant: alii opaca nemorum transfodiunt: alii exponunt se ventis
 & imbris, ac tonitruis & maris ac fluminum fluctibus & pro-
 cellis: alii metalla eudunt & confluunt: alii lapides sculpunt &
 poliunt: alii ligna succidunt & dolant: alii telas ordiuntur &
 texunt: alii vestes incidunt & consuunt: alii ædificant domos: a-
 lii plantat hortos & vineas: alii succidunt fornaces: alii extru-
 unt & eudunt molendina: alii piscantur: alii venantur, aucupan-
 tur: & tandem alii mercantur, fæherantur. In quibus omnibus nō
 deficit fraus, dolus & nequitia, ac etiam pericula plurima. Rur-
 sus alii meditantur, cogitant, consiliantur, & tandem decipiuntur.
 alii contendunt: alii præliantur: alii plurima animo voluunt, vt di-
 uersis artibus opes congregent, & quæstus multiplicent, luera se-
 ctetur, & his labor corporis, afflictio mentis & periclitatio anime.
 Quæ omnia hominū studia atq; exercitia, rã vana sunt quæ diuer-
 sa, plena certe periculis, aculeis & laboribus. Quod pulcre nō ne-
 gat sapiens Salomō in quiens: *Cunq; me conuertissem ad vniuersa que*
sub calo sunt, & que fecerunt manus meæ, & ad labores quib; frustra suda-
uerant: vidi in omnibus vanitatem & afflictionē; & quod non sit nisi labor

& afflictio spiritus. Ex concludit: Cuncta res difficiles: nec potest eas homo explicare sermone: prout statim particularius in sequentibus capitulis differemus.

CAPITVLVM XLII.

In quo inquiritur causa, quare à prima mundi origine, boni & mali in quouis statu existentes, diuersas misérias, penas, cruciatús, plurimæque mala & incommoda corporaliter passi sunt. Et breuiter enarrantur calamitates in specie omnium fere magis excellentium personarum utriusque testamenti.

QUam cæca sit mortalium curiosâ inquisitio, erga vitæ formâ eligendam, satis ex prædictis conspiciere libet. Audita siquidem fuit non modo in genere, sed in specie eorum, qui temporaliter & in hoc seculo vitam ducunt, cuncta humanæ vitæ studia, exercitia, artes & officia. in quibus ostensum est parum fore dulcoris, plurimum vero mœroris & afflictionis. Superest igitur pro huius partis complemento, ut eius rei primo causas perquiramus: deinde à nascentis mundi origine, plurimum & fere omnium magis excellentium & egregiarum personarum misérias, penas, afflictiones, incommoda, mala, mortesque teterrimas, particularius & nominatim breui, sed compendioso sermone narremus: nec modo sceleratorum hominum, sed & innocentium. Ut dum vnusquisque bonos simul & malos ea pertulisse cognouerit, nequaquam se magis aut exemptum, aut priuilegiatū reputet. Quid igitur sibi vult, quod nulla viuendi formula, nulla vitæ ars, nulla fors iustorum aut iniquorum hominum, miseriis, laboribus & anxietatibus, cruciatibus ac pœnis careat? Certe quisquis interrogat, mecum ignoret. Si tamen inquirendo aliquid dicere libet, illa fortassis inter cæteras causâ, summaque ratio assignari valebit. Cum enim (teste Hieremia) oculi hominum ad auariciam, ad sanguinem innocentium fundendam, ad calumpniam, ad cursum mali operis inuerti sunt. Quodque & Genesis libri proclamant: quia vidit Deus quod multa malitia hominum esset in terra, & cuncta cogitatio cordis intentia esset ad malum. Et in proverbiis scribitur: Pedes hominum ad malum currunt.

Et

Et iterum in Hieremia: *De malo ad malū egressi sunt. quare recte eos mala sequuntur, qui mala cogitant & operantur.* Quod sensit Dauid cum ait: *Comprehenderunt me mala, quorum non est numerus.* Hinc Gregor. *Nulla dominabitur aduersitas, si nulla dominatur iniquitas.* Nec aliud clamabat Sapiens: *Corda (inquit) filiorum hominum replentur malitia & contemptu in vita sua.* Et subdit: *Et post hac ad inferos deducuntur.* Natura enim humana tam naturaliter deprauata est, ut ex se mutari non valeat. quare necesse est eam comitentur mala, sequantur aduersa. Hinc idem Sapiens: *Nequam est natio illorum & naturalis malitia ipsorum: quoniam non poterat mutari iniquitas eorum in perpetuum. Semen enim illorum erat maledictum ab initio.* Sed dices: iuste quidem malos mala sequuntur: bonis vero præmia non supplicia debentur. Sed audi quid sanctus Iob dicat: *Si impius fuero, ve mihi: & si iustus, non leuabo caput saturatus afflictione & miseria.* Primis enim afflictio pœna est, secundis medicina: illis supplicium, istis exercitium, *omnium tamen (ut ait Sapiens) multa est afflictio.* Quod Apostolus non negauit iniquiens ad Timotheum: *Omnes qui pie viuere volunt in Christo, Christi persecutionem patiuntur.* Nec aliquem idem sanctus Patriarcha excepit cum ait: *Homo natus de muliere breui viuens tempore repletus multis miseriis.* Id enim hominibus summa ratione congruit. Nam cum mens humana ad eam, quam creatus quietem suspiraret, agit diuina prouidentia nos ad illam dirigens, ut in hac valle miseriæ nullis gaudiis, nullis prosperitatibus meritis quietetur: ut tanto vehementius nos æterna illa nondum habita delectent, quanto iam ista adepta cruciant. nec aliud Imperator noster verbo & exemplo docuit iniquiens: *in mundo pressuras semper habebitis.* in quo verbo Gregorius *nemo,* inquit, *sibi promittat quod euangelium non promittit.* Quis tam demens ille est, ut sibi in quouis huiuslibet statu quietem & gaudia promittat? Quippe tribulationes & angustias euangelica, immo Christi vox comminatur. Superest ut exemplis factisque comprobemus, quæ verbis attulimus. In primis igitur quam vera sint facile intuebimur, si cunctas huius sæculi ætates discutimus: si denique nostrorum priscorum vitas ac studia, artes & exercitia perscrutemur. Memores itaque simus dierum antiquorum; cogitemus generationes singulas. Interrogemus pa-

tres nostros, & annuntiabunt nobis : maiores nostros, & dicent nobis. Nam à tempore, quando diuidebat altissimus gentes, & quando separabat filios Adam, omnis creatura, omnis ætas miseriis & ærumnis plena fuit. Incipere autem liber à primo nostro protoplasto. Is à dæmone seductus, quâ male permutauit locum, nos ipsi sentimus. Vxor vero Eua quam male versutiis dæmonum credidit, nos ipsi patimur, quibus plurimas afflictionum misérias infeliciter transmisit : quas sibi nobisque vitasset, si voci creatoris obedisset. Per quorum transgressiones ab ipsa mundi origine omnes morti dediti, non modo mali, sed boni : non peruersi, sed & iusti, recti & innocentes ; non nisi sudoribus, miseriis, & laboribus vitam duxerunt. Abel enim eorum filius innocens, à nocente occiditur. Enoch iustus ab hac vita transfertur. Cain sagitta perfoditur. Lamech primus bigamus exæcatur. Tubalcaym laboribus implicatur : & faber malleator, atque in cuncta opera æris & ferri multipliciter fatigatur. Mathusalem, sicut plurimis annis vixit, sic multa frigora, multaue sensit discrimina. Noe ab ea, quam plantauit, vinea irridetur : atque centum annis in arcæ fabrica desudauit : viditque tremulus cataraclas cœli apertas, ruptosque abyssi fontes. Nemroth tyrannus maledicitur : & præsumptio turrem ædificantium cum eorum supplicio reprimatur. Abraam tentatur & circunciditur. capitur Loth in bello. Saræ vero sterili deficiunt muliebria. Agar expellitur. bellis insudat Ismael. Isaac immolâdus per multas misérias senuit. decipitur Esau suis primogenitis : primogenitus ipse à fratre frustratur. Sodomorum tabernacula vorax ignis consumpsit. vxor Loth curiosa sciendi prohibita, falsè conuertitur in statuam. Rebecca desiderio filiorum premitur. Iacob luctatur : à fratre insidias patitur. Lia licet fæcunda, lipposa dolebat. Rachel pulchra, doloroso partu spirat. Dina indigne violatur. Sichem mechatur. Ioseph à fratribus venundatur. Ruben maledicunt. Simeon & Leui, à patre vasa iniquitatis appellantur. Dan vero coluber : Isachar asinus : Benjamin lupus rapax. Et vt breuius agamus : filii Iacob de scelere pessimo accusantur. pincerna Pharaonis impie incarceratur : pistor suspenditur à domina : carnalibus stimulis Ioseph angitur. populus Israël in luto, palca, lateribus

at feruilibus oneribus premuntur: masculi iubentur interfici: Obsteritrix timore falsum dicit: Moyses cistæ aquisque committitur: Ægyptius in sabulo sepelitur: Cæteros interpestiua mors affligit. Musca percutit grauissima; ranarum multitudo: culices: bruceus: lapides grandines vexant: Tandem rotæ curruum subuertuntur, atque in profundum feruntur: & tenebrosus vorax pontus absorbet. populus sitit, esurit, simul & murmurat in deserto. de porta ad portam quæruntur idololatræ iugulandi. Crematur Nadab. murmurans populus succenditur flammis. Dathan & Abiron terra absorbit. Core ad centrum terræ ruit. igniti in populum sæuiunt serpentes, occidunt Cananei. moritur Aaron. in monte impugnatur Balaam. Moyses dilectus Deo extra patriam moritur. Iherico corrui. lapidatur Achior. succenditur Ay, & eius rex sub æceruo lapidum submittitur. pugnat Iosue. senserunt de cælo lapides Amorrei. Ayoth in ventre pinguiissimo gladium dereliquit. Sexcentos occidit vomere Sangor. perimuntur Sebee & Salmana. Abimalech septuaginta fratres super lapidem regnandi cupidine occidit; eiusque cerebrum non multum post uxor confregit. Iheptre filiam immolat, dicentes Chebolech iugulantur. Philistini, asini mandibula sternuntur: alii cum Sampson templi ruina consumuntur. filii Benjamin occiduntur. moritur Abimelech. flet Anna. cæsus est Israel. Phinees & Ophni moriuntur. cecidit Heli. Goliath perimitur à Dauid. pereunt Philistei. cadunt sacerdotes. percutitur Nabal. perimitur Ionathas. Saulis armiger se fideliter (ne dixerim imprudenter) necat. Transfoditur Aiael. Abner occiditur. Miphiboseth claudus decollatur. Iosabeth percutitur. Oza vincitur. Syri perduntur. Proditur Vrias bene seruiens. luget Thamar. Amon poenas luit. pendet Achitophel. lancea foditur Absolon. Dauid pater dum hostem cernit, occisum filium plangit carissimum. currit Achimas ad malum. decollatur Syba. eneruati à Dauid pereunt. sine culpa interficitur Adonias. occiditur Ioab. idolatrat Salomon: qui cunctos sapientia vincit, à muliercula deuincitur. spernitur Roboam. Ieroboam maledicatur. dolet Asa. vitur Zambri. timet Helias. occiduntur propheta. Micheas sagittatur. cecidit Ochozias. vruntur quinquagē-

rii. irridetur caluitio Heliseus: pueri vrsis lacerantur. leprosus Naaman anxius medelam querit: punitur Giezi. corrui Ioran. feritur Senacherib. agrotavit Ezechias: dies enim mortis prædicitur. e-ruuntur oculi Sedechia. dolet Esdras. luget Neemias. abiicitur ut bestia Nabuchodonosor. occiditur Balthasar. innocens accusatur Susanna. Ionas in pelagorecluditur. Tobias dolet cæcitate. præstolatur Anna. Sara lacrimatur. in periculo Iudith constituitur. Olophernes (quem vix terra sustinebat) à femina capite truncatur. Vasti repellitur: pallet Hester: suspenditur Aman. decedit potens Alexander. opprimitur Eleasar. occiditur Antiochus. perit Lysias. corrui Nichanor. Iudas occubuit. perditur Ionatas. Simeon perimitur: Eliodorus flagellatur. necatur Onias. occiditur Lisamachus. Machabei torquentur. Iob diuersis plagis percutitur, & in sterquilinio tanquam dulci lecto meditatur. Paucula ex multis sufficiant, eorum qui in veteri lege afflictis & tribulati sunt. Taceo eos annumerare, qui sub euangelio & lege gratiæ, diuersis pœnis, cruciatibus, miseriis & malis afflictis reperiuntur? Quis enim Apostolorum plagas? quis Martyrum ignes & gladios? quis innocentum enses & præmaturas mortes enumerare possit? Quorum alii cæsi, alii secti, alii lapidati sunt, alii plumbatis, alii sagittis, eculeisque rubricantur, rotis lacerantur, lignoque afficiuntur, alii bestiarum dentibus traduntur. Libet illud conuiuium hic inferere, quod Cypriano nonnulli attribuunt. in quo ex Scripturis facris plurimos introducit, qui non escas, sed corpora, membra, sanguinem, pericula & labores ad conuiuium conferunt. Ex præmissis igitur attingere libet series & causas malorum & dolorum, quibus mortales corporaliter afficiuntur: ideo ut apertis oculis, conspiciamus, nullum hominum genus ærumnis & miseriis caruisse: nullumque tempus à doloribus & laboribus vacasse. ut recte Rex & sapiens Salomon dicere ausus sit: *Vidi calumnias, quæ sub sole generantur, & lacrimas innocentum, & consolatorem neminem: & laudavi magis mortuos quàm viuos, & feliciorẽ utroq; iudicavi, qui nõ dũ natus est, nec vidit mala quæ sub sole sunt: quoniam vniuersa vanitas & afflictio.* Et rursus in Ecclesiastico: *Quid de vniuerso labore hominis, nisi cruciatus & afflictio?* Et subdit: *Cum sit dies eius doloribus: & ærumnis pleni, nec per noctem mente requiescit.*

CAPITVLVM XLIII.

In quo offenditur, homines in quouis statu viuentes non solum penas exilii, cruciatibus & mortibus, & cetera corporalia incommoda assidue pati: sed & alias diuersas intrinsecas mentis afflictiones, vt nusquam vita aut sorte sua contenti sint. Et breuiter tangit particulariter omnes fere huiusmodi animi querelas & molestias ad vtramque partem.

POSTremo parum est mortalibus, quas paulo ante enarrauimus, miseria, ne dixerim supplicia, calamitates & penas corporales perpeti, nisi plurimis aliis mentis intrinsecis ærûnis & assiduis cruciatibus premantur. Vehementius enim inuisibiles animorû morbos, quam corporeos aut visibiles affligere constat. quare eos difficilius curari posse perspicuum est. quam itaque diuersis & aduersis effectibus secum pugnet mortalium animus, nō alium quā se interroget; sibi que ipse respondeat, quam vario, quamque reciproco mentis impulsu modo huc rapitur, modo illuc, vt nusquam vnus, nusquam integer existat. Quippe secum ipse dissentiens seipsum discerpit. quatenus sine vlla requie ab ortu hominis vsq; ad exitum fluctuet mortalis vita, quamcunq; viuendi formulam eligat. vt recte de eo Iob dixerit, quia homo repletus multis miseriis fugis velut umbra & nunquam in eodem statu permanes. Sed vt cetera taceam: non parua mortalium miseria putanda est, nulla ratione effici posse, vt cuique suæ vitæ formula placeat, cuius plurimos habet inuidos: nulli ars applaudit: nullum fors lætum teneat; sed querulus aliena peroptet, qui sua non satis meruit. age, vt ea ipsa quæ maxime cupierat, assequatur. Certe cum fauorabilis incipit esse fortuna, illico mens emollita timidior & suæ sortis obliuiosa fieri incipit: vt non à casu Flaccus dixerit:

Bene ferre discis fortunam.

Inexplicabilis certe miseria est se miserum semper putare, nec à miseria eripi posse. atque illa calamitas (vt ita dixerim) enim calamitosior est, quando à calamitate respirare non licet. quippe cui quicquid accideret, etiam si lætum iocundumque existat, con-

rimo cruciet. In primis itaque vellem, illud humanus consideret animus, quod ante oculos conspicit. Ego vero plures vidisse sum memor, qui damna, qui pauperiem, qui supplicium, qui mortem carorum, qui peiores morte, videlicet grauissimos morbos æquo animo tu'erunt, qui tamen diuitias, qui honores, qui potentias, qui fastum, qui laudes, qui famam, qui aliorum sine inuidia præconia atque triumphos, quietâ mente ferrent, nullum. Quas liquidem animi passionēs, & si Apostolus *opera carnis* appelleret, quia tamen à fonte cordis profluunt, recte morbi animi censendi sunt. Quid enim aliud ambitio est? quid cupiditas? nisi superbia. Vt enim Augustinus inquit: *Non est ambitio sine elatione: non est cupiditas sine superbia.* quia omnis superbus cupidus est: & omnis ambitiosus elatus. quæ omnia recte animi vitia sunt, veluti ex affectu & desiderio procedentes. Nam (Isidoro teste) *cupiditas desiderio augetur*: cum scriptum sit: *Insatiabilis est animus cupidi.* Digne igitur imperator noster apud Matthæum ait: quia *ex corde exeunt cogitationes male.* Tanges si vis, simul & discere omnium mortalium querelas, ac varias animi afflictiones. Verum audi illico causas atque rationes: vt liquido agnoscat tanto maiores pectoribus humanis inesse miseras, quanto magis obæcati sint, vt cur eas patiantur aut ignorent, aut non satis intelligere velint. Quidam enim non parum animo torquentur super amplioris felicitatis, prosperitatis ac fortunæ carentia. sed certe ignorant, quot periculis ac infinitis & inexplicabilibus curis plenæ sint. Alii tristantur etiam post adeptas, quas optarunt, prosperas fortunas: sed forte aut eos (quod difficile est) ferre non nouerunt, aut recte conspiciunt eas bonis moribus aduersas. Alii murmurant de adueritate, infortunio, & calamitate: sed certe nisi fallor, nō cogitant quod incogniti hominis nota esse calamitas non potest. Alii de eiusdem fortunæ ne dixerim inconstantia, sed fallacia vehementius queruntur: quæ adeo cum eis ludit, vt illos in patria sua, vno prope tempore Dominos effecerit simul & exules: sed certe hi integram fortunæ amicitiam nō amplectuntur, cum eius leges aspernantur, quæ in altum nihil diu manere statuit. Adde, indignum fore vt mores, ludosque illius respiciat, cui se totum deuouit. Alii denique pœnas sentiunt in huius

mortalis

mortalis vitæ incolatu ac plongatione: sed certe hi præ maturam mortem inexpectati id optant quod venisse dolerent. Alii queruntur se persecutiones, impugnationes, atque iniurias diuerſas, tormenta deniq; & exilia perpeti: sed quid ſi aut aliis iſſe ea intulerūt, aut meruerunt? Alii lamentantur, quia tentationis flagella patiuntur: ſed certe eis exercitari minime nouerunt. Alii turbantur plurimum, quia vano honore, inanique gloria non fruuntur: ſed hi aut verā gloriam nō nouerunt, aut forte eos latere melius tutiusque foret. Alii quod deſpecti humilesque ab hominibus reputentur: ſed forte longe plus deiicerentur, ſi plus eleuantur. Alii detractiōes, infamias & opprobria moleſtiſſime ferunt: ſed hi falſis laudibus tument. Alii anguntur ſuper temporalis poteſtatis aut dignitatis ſiue mundani dominiū carentia: ſed his virtus fortaliſ non ſuper eſt, vt ea aſſequantur & ferant: vel hi corruptum habent guſtum talia falſo putantes diuturna. Alii de natura conuerſantur, ob parentelæ & magni generis ſeu nobilitatis deſectum: ſed hi veram nobilitatem non ſatis nouerunt. Alii paupertatem & diuitiarum inopiam implacabiliter ferunt: ſed certe hi falluntur putantes diuitias ipſas poſſeſſores ſuos felicitare, non cruciare. Alii de perditione rerum, de naufragio, ruina, aut temporalium bonorum damno, & deſectu plurimum anguntur: ſed forte his expediens fuit illis carere, quæ cauſam maioris ruinæ præſtabant. Alii amicorum vel carorum amiſſionem vel ſeparationem deplorant: ſed certe putandum eſt amicos non ſatis ſe amaſſe, qui à vitæ periculis eualeſcunt, nec perierunt. Alii de iniqua ſocietate torquentur: ſed forte eos bona non oblectauit. Alii de carentia humani fauoris queruntur: ſed quid ſi odium eis longe plus proſuiſſet? Alii quod ab amicis derelicti exiſtant: ſed quid ſi primo ipſi eos reliquerunt? Vel forte dignum fuit, vt quos virtus non fecit, fortuna dimitteret. Alii rurius ſimiliter lamentantur, quod tam cari paulo ante hominibus viſi ſunt, vt certum in eorum amicitiam venire niterentur, idem tamen ipſi de nulla alia re concordēs, in ſuum excidium quaſi communicatō conſilio conſpirarunt: ſed hi de amicitia æquiocant, aut forte ceſſauit vtilitas.

cuius etiam gratia amici assumpti sunt. Alii quod amicis tædiosi,
 aut etiam onerosi existant: sed quid si grati atque beniuoli fieri
 voluerunt, aut renuerunt? Alii quod inimicitias sine causa patiun-
 tur: sed quid si virtutem non habent reconcilianter? Alii summa
 tristitia afficiuntur, quia non satis voluptatibus delitescunt: sed
 hii falluntur, qui contumeliosos hostes amicos reputant, vel for-
 te ociositatem illas afferentem præscindere nolunt. Alii quod
 refectione temperata careant: sed hi ignorant eam male digerere
 tibus prodesse. Alii quod ieiunio & abstinentia uti non possunt:
 sed certe quia ne possint, volunt. Alii super famis & sitis inedia
 queruli sunt: sed quid si illis saturitas inimica est. Alii super amplæ
 & delicatæ habitationis carentia tristantur: sed his angustus for-
 te locus virtutes donat. Alii super asperis & duris lectisterniis la-
 mentantur: sed certe quia mollia ad luxum inertiamque prouo-
 carent. Alii de vilibus vestibus queruntur: sed hi in domibus regū
 esse cuperent, qui mollibus vestiuntur. Alii quod ceteris huma-
 nis solatiis careant: sed hi satis ignorant plus tristitia quam læta
 quibusdam conferre. Alii quod cum hominibus non conuersen-
 tur aut fabulentur: sed indubie tales ignorant solitudinis dona,
 virtutesque silentii. Alii de omni tristabili euentu queruntur. sed
 certe quia cuncta illis ad votum succedere, quibus sese experiri
 non licuit. Alii non modo turbantur, sed inconsolabiliter tor-
 quentur: quia mali in hoc seculo melius habeant quam boni. sed
 hi non facile credunt, malos nihil habere in cœlis, sicut bonos pa-
 rum in terris. Alii quod in seruitutem redigantur, seu captiuentur
 & incarcerentur: sed hi ignorant, q̃ potior pars hominis, id est, vo-
 luntas, libera est, cui principes non dominantur. Alii tristantur q̃
 oporteat eos diu iugum subiectionis portare: sed hi præesse, non
 subesse optant, nec obedientiæ fructu satis gustant. Alii queruntur
 de obseruantia diuersorum præceptorum: sed hi certe aperte de-
 monstrant, quod eos transgressio delectat. Alii de reuerentia su-
 perioribus exhibenda queruntur: sed hi illam recipere, non
 exhibere cuperent. Alii de carentia propriæ voluntatis: sed certe
 hi tales ignorant, quam graue malum existat propria voluntas.
 Alii de voti emissionē: sed hi certe non satis nouerunt, quod felix
 necessitas, quæ ad meliora compellit. Alii quod seculum derelin-
 quere

Quædam
 claustra
 prius.

quere non valeant: sed certe his ideo valetudo deest, quia valetudo non adest. alii quod religionem ingressi, perseverare nequeant: sed hi certe incepisse dolent. Alii quod excommunicati existant: sed hi certe ecclesie censuram non medicinā, sed pœnam falso putant. alii quod irregulares sint aut inhabiles: sed hi certe non satis humiliari nouerunt. alii quod diuinis officiis & sacramētis careant: sed his forte vtilius foret deuotione & fide suscipere. Alii quod lectio aut vsus sacræ scripturæ eis auferatur: sed certe quia eis aut ad questum aut ecclesie discrimen utebantur. Alii de exauditionis tarditate anxii sunt: sed forte non satis sciunt, quia differt cibum, auget esuriem: alii de rerum temporalium petitionis frustratione anguntur: sed certe quia aliena sunt à vera interioris sui hominis salute. sed de impedimento contemplationis queruli sunt: sed quid si ad pietatis actiua opera sunt efficaces? Alii de augmento negotiationis: sed forte contemplationi inepti sunt, aut illa eis permolesta est. Alii quod virtutibus careant, viciis se dedant: sed verum est, *nō nisi à seipso quis leditur*. Alii q̄, faciliter vitia sequantur: sed hi vitiis resistere nolūt. Alii difficulter virtutes amplectuntur: sed certe, quia cōfragosa & p̄difficilis ad virtutes via est, dulcis ad vitia. Alii inconstitissime ferunt stimulos carnis: sed hi forte ad eos praueniunt. Alii de erranea seu nimis atta conscientia anguntur: sed certe hi superiorū exemplis aut praeceptis iuuari spernunt, aut quia suo sensu reguntur. Alii quod semper læti & iocundi & nunquam tristes, neque in aliquo conscientia stringat: sed certe hi timorem Dei abiiciunt, & lætam simul & lætam vitam sequuntur vitiorum, quæ ducit ad mortem. Alii quod plurimum audaces existant. Alii quod pusillanimes & timidi: sed certe hi & illi extrema promediis capiunt, nec cogitant quia multa ex timiditate sunt dimissa, quam per audaciam sunt commissa. Alii quod mortem: alii quod fulmina & tempestates timeant: sed certe hi timere desinerent, si verè sperare incepissent, aut eos criminis conscientia non accusaret: quia (vt Sapiens ait) *magna securitas est nihil iniquitasse*. Alii de sua prædestinatione & salute hæsitant: sed parum hi laborant, vt sua sit certa electio. Alii plus quam oportet de Dei bonitate sperant: sed hi futuram Dei iusticiam non satis credunt. Alii quod ob graua ab eis commissa desperare formident: sed certe nemi-

nem grauissima peccata condemnant, si non placeant. Si non vis
 desperare, desine peccare. Adde quia vtrisque, videlicet nimi-
 um sperantibus & desperantibus, timor deficit & spes. Quare
 vtrisque vtrunque est necessarium, scilicet vt Deum timeant, &
 in eum sperent. Timor enim sine spe inducit desperationem.
 Spes vero sine timore in dissolutionem, secundum Hugo. Alii
 de timore inuasionis hostium, visibilium & inuisibilium angun-
 tur: sed hi congrua remedia scienter aspernantur. Alii ob bo-
 norum corporis defectus, aut deformitates queruntur: sed hi non
 satis considerant, fatuum esse, quod seruum lasciuire peroptat, aut
 ornare cupit. Alii senectutem grauiter ferunt, eiusque calami-
 tates detestantur: sed hi parum fore putant cupiditates reliquis-
 se, atque id non posse, quod nolle deberent. Alii de corporis
 debilitate & diuersis morbis, præsertim de oculorum, auditus,
 odoratus, aut loquelæ carentia, siue defectu: sed certe hi cun-
 cta ad corpus referunt ignorantes defectus ipsos plus profecisse
 animæ, quam offecisse corpori. Alii super vitæ breuitate & tem-
 pestiua morte inconsolabiliter torquentur: sed his bonos actus,
 quam multos dies congregare consultius esset: cum non mul-
 tum, sed bene viuere sit laudabile. Alii de eadem imminente,
 de propinqua morte, & de instanti agone, spiritu anguntur: sed
 hoc ideo, quia non satis considerant rudem esse tyrannum, qui à
 pœna liberat, quem punire se putat. Hæc paucula forte & mul-
 ta de huius vitæ diuersis artibus formulisque viuendi, & earum
 ærumnis & afflictionibus à me diserta sunt. Quæ quidem lon-
 giora aut breuiora dici posse scio: verum nec breuitati admo-
 dum studui, nec copiæ, sed prout ex communi omnium mor-
 talium vitæ se obtulerunt scriptis differui: ne legentes vel inopia
 vel fastidio facigare: vt cernat vnusquisque mortalium in qua-
 uis sorte, arte constitutus sit, quid ad vtramque partem dici valeat:
 nec illos blanda resoluant, nec afflictiua conturbent. atque vt dul-
 cia pariter & amara despiciat, sed paratus sit semper ad omnia, prò-
 pter & ad singula.

*Non mul-
 tum sed bo-
 ne viuere
 laudabile
 est.*

Absoluam iam fili mi hunc primum ad te pollicitum librum,
 de cunctis vitæ huius temporalibus artibus & exercitiis, eorum-
 que

que miseris & ærumnis. Verum ex his, quæ ultimo dixi, sensi plane tuum animum non parum titubare. Voluis enim in mente, quoniam (ut ita dixerim) inter dentes mustitas, ne dixerim murmurare. Cum enim audiuius satis ruentis seculi huius calamitates, aduersitates & supplicia, tribulationesque multas & malas, quas passim (ut supra tetigimus) bonis & reprobis, facinorosis & innocentibus communes esse. Eaque pro dolor non tam legimus quam experimur: quarum rerum causas quasdam in genere deduxisti. Verum tantæ tam graui querelæ speciales, urgentioresque causæ congruerunt. Demum quid remedii, quid solaminis mortalibus in tantis ærumnis & vitæ laboribus esse possit, nondum adduxisti. Utinam enim tam prompta congruaque ad eas omnes calamitates leuandas remedia attulisses, quam certa huius vitæ mixta supplicia deplorasti. Usque adeo ut bonos virtuteque præditos viros, absque culpa affligi & torqueri, quippe ab immortalis Dei relictos putemus, sicut & malos prosperari in altumque prouehi indigne conspiciamus. Quo fit, ut diuinam providentiam incusemus, quod quosdam inculpato variis suppliciis, infortuniis, & pœnis cruciari, alios culpæ noxios felicitare permittat. Si enim calamitates huiusmodi (veluti supra disseruisti) non nisi ex culpa mortalibus proueniri contendas, indecens plurimum diuinæ iusticiæ videtur, ut innocens ab eodam fonte affligatur, quo reprobis & iniquis pœna releuatur. Nec aliud deplorabat Hieremias inquit: *Iustus quidem tu es Domine si dispero tecum, verum tamen iusta loquar: quare via impiorum prosperatur?* Et subdit: *Prope es tu orieturum & longe à renibus illorum.* Prope inquam (teste Augustin.) dando eis quicquid volunt & petunt. Et longe à renibus eorum, in nullo videlicet eis displicendo, aut illorum animos conturbando. Sic & Abacuc Propheta eam ipsam depromit querelam: *Quare* (inquit) *Deus non respicit contemptores, & cur taces deuorante impio iustorem se?* Quæ omnia tanto animos hominum in maiorem ducunt admirationem, quanto per eundem Hier. de diuina iusticia scriptum legimus: *Scio Domine Deus quoniam malum iniustumque non libenter respicis: nec potest quis de tua iusticia*

ambitare. Hic est, fili mi, effectus murmuris tui & cunctorum fere mortalium. Et veluti vetus querela sit & multorum animos exagitat, sic multis egeret verbis: breui tamen sermone faciam satis veritati, quo nullis verbis humanæ opinioni respondere possem. Mirari igitur & conqueri, tu, ceterique mortales desinetis, si rem ipsam altius repetitis. In primis itaque illud animo fixum teneamus, neminem absque culpa aut causa affligi aut torqueri oportere, cum scriptum sit: *Oculi Domini super iustos*. Et iterum: *Vultus autem Domini super facientes mala, ut perdat de terra memoriam eorum*. Super quo verbo Cassiodorus: *Errat, inquit, malus dicens, secure facio mala, sed discat quia vultus Domini super facientes mala*. quati dixerit: iustos & iniustos Deus respicit, sed dispariter, iustos enim respicit, ut pie eos exaudiat: sed malos ut puniat, perdatque de terra memoriam eorum. Quam siquidem punitionem siue iacturam memoriæ vitæ & quorumvis temporalium minime absque culpa mortalibus contingere credendum est, nisi culpam non putes illis abuti aut ea ad luxum, ad auariciam, ad superbiam, pompam conuertere, quæ iustissimus Deus tanquam virtutum instrumenta hominibus concessit. De quibus Gregorius pulere dicere visus est: quia *summa & decora iusticia est ut concessa perdat, qui inconcessa captat*. Rursus ut est sanctorum doctorum sententia: *mali non utique impune transeunt, tum quia in fine puniuntur: tum quia ea temporalia bona quibus iniqui in hac vita gaudent, Deus illis concedit ob pauca quæ gesserunt bona*. Sed spiritualia bona, quæ respectu temporalium magna bona existunt, iustis virtutisque redditis referuat tanquam æquissimus iudex; cui maxime congruit, ut bonis det spiritualia, tanquam potiora bona. De reliquis vero eaducis & temporalibus bonis, seu pænis & suppliciis, tantum viris bonis ministret, quantum sufficere conspiciat ad virtutem. Quod per alia verba pulcre Augustinus deducit in *primo & quinto de ciuitate Dei*: quia habentes politicas & humanas virtutes, iuste rebus huius mundi præmiantur: qui vero diuinis pollet virtutibus, præmiatur in rebus D E I. Et subdit Augustinus respondens querentibus: quibus præmiis Romani falsorum Decorum cultores orbis imperium meruerunt? Ait enim, quia bonis moribus hæc temporalia meruerunt, quia

quia veluti nullum malum impunitum, sic nullum bonum irremuneratum. Licet idem August. aliam causam assignet in principio huius libri. Vt igitur ad conceptum sermonem redeamus. Aspera plerumq; & amara Deus iustis immittit, ne in illis timeatur aduersitas: sed & malis fortunę bona concedit, ne in istis quæratur felicitas, quas ipsi reprobi obtinent. Cæterum in hac rerum vicissitudine agit Deus, vt prudentissimus medicus, qui cuncta ordinat ad infirmi obediētis bonam voluntatem. Is enim saepe secat & vrit infirmum, nec illum exaudit deprecantē, vt auertat ab eo dolorem necantem. Adde: quia secundum Grego. *occulta sunt Dei iudicia, sed occultiora sunt cum boni mala recipiunt, & mali bona. sed si curiose causam inuestigare libet: ideo malos bona recipere putandum est, quia cum boni hic delinquant, in iste hic mala recipiunt, vs ab aeterna damnatione eripiantur. Sed & mali bonis hic fruuntur, vt inde posterum ad tormenta trahantur.* Et subdit Grego. exempla præclara, scilicet de vitulis & infirmis. De vitulis inquam. Nam veluti qui mactandi sunt vituli, liberi in pascuis relinquuntur: sic impius ad mortem currens, effrenatis voluptatibus relinquitur. E contra vero iustus à transitorie delectationis iocunditate restringitur: sicut & vitulus ad laboris vsum deputatus, sub doloroso iugo retinetur. Denique exemplo infirmorum id ipsum probatur. Negantur enim iustis in hac vita temporalia, quia ægis, quibus spes viuendi est, nequaquam à medico cuncta, quæ appetunt, conceduntur. Dantur autem reprobis bona, quæ in hac vita appetunt, quia desperatis ægris omne quod desiderant non negatur. Et concludit: *Perpendant ergo iusti mala, quæ iniquis permanent: & nequaquam eorum infelicitati inuideant, quæ percurrit.* Quæ verba omnem mortalibus admirationem & querendi causam submouent. Cæterum secundum August. *super Canticis*, quinque modis & totidem causis, calamitates & flagella mortalibus contingere perspicuum est: vel vt iusti merita per patientiam augeantur, vt Iob: vel ad custodiam virtutum, vt apostolo Paulo: vel ad corrigenda facinora, vt Marthæ lepra: vel ad initium pœnæ, vt Herodi, quatenus hic incipiat, quod in inferno sequitur: vel ad gloriam magnificandam, vt de cæco nato. Ex quibus liquido constat, neminem in hoc seculo sine culpa premi, vel absq; eius vilitate affligi. Quæ omnia agunt,

et in his, quæ diuina providentia mortalibus mittit, prosperis aut aduersis, non murmur nobis sit, non querimonia; sed mens bene conscia potius illis consoletur quam turbetur. Multis enim variisque argumentis facile agnoscemus, quia plurimum expedientia vitia quippe & necessaria nobis sunt laborum, calamitatum, & poenalarum omnium flagella, & quæque huius mundi supplicia. Primo enim dilatant cor hominis ad magna Dei donare recipienda. Nam veluti martellus fabri dilatat metallum ad id quod artifex desiderat: sic Deus aurifaber humanæ creaturæ, per malleum persecutionum & tribulationum cor iustorum dilatat, ut fructum ex eis percipiat, & ducat ad veriora bona, de quo dictum est. Secundo veluti aqua vinum temperat, sic aduersa & quæcumque huius vitæ poenalia vinum temporalis lætitiæ moderatur, ne homini noceant. Quod pulcre Aristot. nō tacuit in *Ethicis*. Ait enim, quia virtuti deditus moderate se habet erga hæc bona fortune, aut adipiscenda vel amittenda: nec gaudiosus erit bene prosperatus, nec infortunatus tristis. quod si aqua tribulationum non temperat vinum prosperitatis, extinguit potius quam iuuat: in cuius figuram scriptum est in Exodo: *Operuit aqua tribulantes eos: unus ex eis nō remansit*. Tertio veluti medicina necessaria est mortalibus, sic aduersitas & afflictio. Vnde August. intelligas homo medicum esse Deum: & aduersitatem medicamentum esse ad salutem, non poenam ad damnationem. Et subdit: *sub medico vreris, secaris, clamas, non audis n. e. licus ad voluntatem, sed audit sanitatē*. Quare fideles conqueri defināt de asperitate infortunii, persecutionis aut poenalaris: quia ea omnia signa sunt potissima diuinæ electionis, ut per aduersa asperum sit iter nostrum, ne (vt August.) *magis delectet diu pergere, quam citius peruenire*. de quib. scriptum est, *in paucis vexati, in multis bene disponuntur*. Quarto vtilis est fidelibus quippe & necessaria aduersitas, tribulatio, & persecutio in hac vita, quia ad meliora compellit. Vnde Gregor. mala quæ hic premunt, ad Deum ire compellunt. Quod non ignorans rex & propheta dicebat: *multiplicatæ sunt infirmitates eorum, & postea accelerauerunt*. Vnde August. *Nullus seruus Christi sine aduersitate tutus uiuit*. Et subdit: *Si putas sine persecutione viuere, nondum cepisti esse Christianus*. Itaque tam vtilia ex huius seculi persecutionibus & calamitatibus colligentes, gaudeamus affligi qui speramus frui. & vt inquit Bernard. *Non*

timea;

timeamus esse derelictos. quinimo semper memores simus verbi Christi ad nos dicentis: *Cum ipso sum in tribulatione.* Et iterum: *Iuxta est Dominus his qui tribulati sunt corde.*

Actum est fili mi de cunctis viuendi attribus, quib. in hac mortali vita seculariter viuatur, tam nobilibus quam ignobilibus, magnificis & plebeis, publicis & priuatis, maximis & infimis. Audisti denique eorundem vitæ generum dulcia pariter & amara. Sed & actum est de omnibus fere malis, incommodis, pœnis & calamitatibus, suppliciis & afflictionibus corporalibus ac mentalibus omnium fere magis nominatarum personarum, incipiendo à nascentis mundi origine. Rursus actum est de causis & rationibus, cur nocentes pariter & innocentes, boni simul & mali, tot afflictionum & pœnalitatum genera patiuntur. Sed & audisti consolationes & congruentia remedia, ad eas omnes releuandas maxitimas, quibus mortales in hoc seculo afficiuntur. Quæ omnia fili mi opto solerter consideres: ex quibus tu cæterique mortales liquido agnosceatis, quid boni aut sinistri omnis vita temporalis obtinet. Verum quia opposita iuxta se posita (teste philosopho) clarius conspiciuntur: superest iuxta pollicitum ordinem, vt cum in hoc primo libro de secularibus officiis & humanæ vitæ artib. me audisti loquentem: te auscultem in sequenti libro de spiritali statu differentem. Ad te enim spectat de spiritali vita agere, quæ in duos diuiditur status, videlicet in statum ecclesiasticum episcoporum & clericorum; deinde in statum religiosorum. Age igitur si placet de his duobus vitæ humanæ generibus, & de excellentia & operatione vtriusque; de dulcibus, amaris vniuscuiusque: vt tandem legentes apertis oculis veluti in lucidissimo speculo conspiciant, quid lateat sub omni vitæ humanæ genere: quo fiet vt securius vnusquisque eliger, quæ frequentius legit, ac maturius digessit, ad laudem Dei omnipotentis, qui est benedictus in secula.

Explicit primus liber de omni statu & vita temporalis.



PROLOGVS IN II. LIBRVM.

Incipit Liber Secundus

DE STATV ET VITA
SPIRITVALI, ECCLESIA-
stica & regulari.

Pauli I.
P nri fex
Maximo



Ordinis ra-
tio.

Irabitur forsan Sanctitas tua, † Beatissime Pa-
ter ac clementissime Domine, quod in hoc o-
pusculo recti ordinis rationem peruerterim.
Et, cum iuxta Gregor. *status spiritualis tanto tem-
porali sit dignior atque excellentior, quanto solis splen-
didissimus fulgor tenebrosis densitatibus, & aurum
plumbi metallo prestat, prius de temporali statu*
egerim, quam de spiritali. Sed certe natura ordo ad id compul-
lit. Primo enim temporales nascimur: sed & prius in temporali sta-
tu versamur, priusque illum experimur. Deinde temporalis sta-
tus imperfectione conspecta, transimus ad spiritualem statum.
Adde: quod non satis excellentiam, perfectionem & internam
mentis tranquillitatem status spiritalis agnoscere mus, nisi prius
temporalem vitam, atque eius incommoda experti essemus. Post-
quam igitur in *superiori libro* de cunctis temporalibus & terrenis,
siue secularibus statibus, & viuendi modis, artibus ac diuersis ho-
minum exercitiis actum est: in quo pro viraque sui parte, tam ad
commédationem, quam ad reprobationem satis disputatum est.
Et quid boni, quid sinistri, quid vtilitatis, quid incommoditatis,
quid quietis, quid laboris, quid securitatis, quid periculi, quid
honesti, quid inhonesti, quid virtutis, quid vitii, omnis tempo-
ralis status & secularis viuendi modus habeat, plene discussum
est. In hoc igitur *secundo libro* dimissa matris introductione, & con-
sanguini-

sanguineorum altercatione, quibus de re incognita differere non licet: decreui ego spirituales ordinem professus, de eodem spiritualis vitæ statu breui aliqua differere. Faciam ego satis non tantæ rei debito, nec tuæ Sanctitatis desiderio, sed conatui meo. Atque vitam tam digne, vtiliter & diserte, de eo eminentissimo statu à me agatur, quam illius maiestas atque immensitas exigit. Subalternatur itaque vitæ spirituali duplex status: quia ipsa vita spiritualis, in duos distinguitur status. Alter est episcoporum & sacerdotum, ac Ecclesiastici ordinis ministrorum: alter est monachorum siue religionum. De his ergo duobus statibus & viuendi modis, hoc libro agendum est. Et quia ad dicendum campus latus est, & materiæ ipsæ non tam diffusæ & profundæ, quàm à multis tractatoribus confusæ reperiantur. Quinimo propter varias scribentium opiniones vix legentes proficere possunt. Multa denique in his materiis, intacta aut non satis diserta inueniuntur. Decreui sub quodam breui compendio, in hoc secundo libro flosculos quosdam, circa hos duos status inserere vbi vtriusque status & vitæ normam, naturam seu efficaciam, nec non excellentiam, laudes, commendationem, & demum eorum labores, difficultates, aculeos & pericula adducam. Demum vero inter se, & alterius ad alterum differentias & comparationes breuiter perstringam. Incipiens à statu Ecclesiastico, & primo à summo pontifice, qui culmen & vertex est totius spiritualis status. Deinde à sacrosanctæ Romanæ Ecclesiæ Cardinalibus. Rursus descendam ad statum archiepiscoporum, episcoporum, ceterorumque prælatorum, curatorum & clericorum sub ecclesiastico ordine degentium. In quo libro materias in tabula in *principio primi libri* descriptas discutiam. Diligens igitur lector ex motius, auctoritatibus & rationibus quæ inferentur, non statim vincatur ad commendationem vel improbationem alterius status: sed motiua, rationes & auctoritates, quæ pro alio statu viuendi genere adducuntur accurate consideret: videbitque, quod hii duo perfectissimi & excellentissimi status, omnium aliorum statuum & vitæ humanæ generum superant dignitatem. Quoniam & si intra gremiū fidei catholicæ existentes, in quocumque degant honesto statu (si pie vixerint) saluari possint: Hi tamen duo spirituales viuendi modi, singularius suos sectatores

Deo proximiores reddunt. Et si uterque status sanctus & Deo acceptus est, alius tamen alio perfectione & dignitate præstat. sed & alter alteris placet & conuenit, secundum naturam, qualitatem, ac vires personatum. Inter se tamen circa eorum perfectionem, habent se sicut excedens & excessa, vt latius per discursum eorum, quæ tradentur in hoc libro videbitur. Ea ergo, de quibus in hoc secundo libro agendus est sermo, in infrascripta capitula distinguuntur.

CAPITVLVM I

De sublimitate & excellentia dignitatis summi pontificatus: & de incomprehensibili eius auctoritate & potestate: & de illius necessitate & utilitate: & de altissimis eius mysteriis.

SUMMI pontificatus excellentiam, dignitatem & auctoritatem huiusque sacratissimi status, laudes, præconia attollere, illiusque necessitatem & utilitatem ostendere, hodie munus suscepi: græde quidem negocium, sed paruum ingenium. Cuius tanta est sublimitas & eminentia, tanta immensitas, vt nullus mortalium, nedum comprehendere, aut satis exprimere, sed nec cogitare possit. Obtrundit enim omnem humanum intellectum illius sacratissimi, & omnium eminentissimi status, maiestas & excellentia: quia scriptum est: *Scrutator maiestatis opprimetur à gloria. Si enim* (teste Ambros.) *nihil in hoc seculo excellentius atque excelsius inueniri potest statu & dignitate simplicium sacerdotum, & particularium præsulum, qui per diuersa orbis loca in partem sollicitudinis assumuntur: quid cogitandum est de eo summo pontifice, qui vices veri Dei gerit in terris? qui ad plenitudinem status, qui ad apostolicum thronum, qui ad culmen omnium dignitatum assumitur? Ex qua certe, vt riuuli à fonte, rami ab arbore procedunt? qui nō ad humanum tantum principatum, sed ad diuinum, non ad principandum solum mortalibus, nec modo hominibus, sed angelis; non ad iudicandum viuos, sed mortuos; non in terra solum, sed in cælo; non ad præsidendum solis fidelibus, sed infidelibus: & (vt paucis agam) qui ad eam ipsam dignitatem, ad eandem iurisdictionem & coactionem, ac vniuersalem*

saletem toto orbe supremum principatum à summo Deo & eius loco super cunctos mortales institutus & euectus est de hoc. De quo per Iob scriptum est, quod *coram eo curuantur qui portant orbem, & reges seculi atque tyranni ridiculum sunt.* qui solus omnem potestatem ambit. Et (sicut scriptura commemorat) *unus est, & secundum non habet.* Et iterum de eo scribitur: *Tu solus & nullus tecum.* Et rursus: *Potens super omnes potentes.* Cuius (teste propheta) *sux sunt iustitia, potestas & imperium.* Quem iterum Dauid signat inquiring: *Dedit ei potestatem & regnum: & omnes populi & lingue seruiunt ei.* Qui (ut canon ait) *terreni simul & caelestis imperii iura suscepit.* Cuius summæ dignitatis fastigium atque maiestas, non modo apud antiquos veteris legis effulsit, ac dignius apud catholicos diuina institutione refulget atque præeminet: sed & apud gentiles summum omnium bonorum & principatuum culmen tenebat. Nam (ut ait Varro) ex ordinatissimo atque eminentissimo gradu pōtificum & sacerdotum gentilium, resultat quidem excellentissimus & sublimissimus status in vno summo pontifice. Hinc Iūdorus: *distinctione, inquit, graduum & ordinum inter pontifices & sacerdotes à gentilibus maxime inueniuntur: quando suos sacerdotes alios simpliciter flamines, alios prothoflamines appellabant, & alium; qui cunctis flaminibus præsidet, in summo gradu locabant.* Quem, ut idem Varro voluit, Iouis assumpta veste insigni curuli & regia ad ornatum diuinitatis plurimum in eo putantes permaxime colebant. Cicero quoque sublimitatem ac excellentiam summi pontificatus gentilium, ex illius mysteriis ostendit; dum in cultu & religione suscipienda primus omnium erat atque vñs ad interpretandū, quæ voluntas esset deorum immortalium, ut statim in *sequenti* ca. tagemus. Huius denique summi pontificatus sublimitas, vtilitas atque necessitas nō facile explicari valeret. Sed ut cetera taceam, non satis plene recteque vniuersitati orbis à Christo, pui sum foret, nec ecclesiæ, quā Christus sanguine redem̃t, morem gessisset, nisi talē tamque eminentem in terris vicariū reliquisset, qui in ea potestate & auctoritatis integritate, toti orbi præsideret, quā ipse Christus in terris manens, quippe qui per prophetam dixerat: *Quid potui facere vineæ meæ & non fecit* Accedit, quoniam solus ipse dirigit omnē humanā creaturā in finē pfectissimū. quod obrem sibi vni Christus clauēs cōtulit regni

*Sacerdotum
institutio à
gentilibus.*

cœlorum, ac potestatem ligandi atq; soluendi in cœlo & in terra. Rursus summi pontificatus sublimitas & excellentia, atque utilitas & necessitas in eo conspicitur: quoniam (teste philosopho) non posset hic mundus regi, nisi vnus esset summus principatus, ad quem vnū perueniendum est, ex quo singula diriguntur & gubernantur: cuius motu & dispositione oēs hierarchici actus ordinantur. Et tandem huius orbis dispositio dirigatur ad instar cœlestis monarchiæ. Nā (teste Dionysio) necessarius est summus hierarcha, qui, quos regit, illuminet. Periret enim omnis ordo rerū, nisi vnus summus pōtifex foret, qui eum ipsum ordinem (vt ita dixerim) ordinet, dirigat & exequatur. Teste enim philosopho: *ubi est ordo & graduum ascensio, ibi necesse est constitui vnus, excellentiam*. Periret rursus & mortalium omnium hominū commercium, nisi foret vnus pontifex vice Dei in terra monarcha; in quo omnes, vt in glutino quodam partium, ad corpus mysticum copulētur, & in quo singuli vt membra sub vno capite gubernentur. Periret fidei vnitas, & ecclesiæ vnanimitas, & cōcordia simul & pax, qua nihil dulcius excogitari aut inueniri potest, nisi foret vnus supremus pontifex, qui cunctos mortales ad vnus fidei & vnitatis vinculū reduceret: dicente Hiero. ob eam rem *in remedium schismatis actum esse, vt vnus omnibus præsit*. Periret deniq; illa cunctis mortalib. necessaria ad Deum meditatio. Teste enim scriptura Romanus Pōtifex longe perfectior, longe dignior & efficacior, inter Deum & populū mediator existit, antiquo illo balbuciente, sed iusto Moyse, ac fratre eius Aaron: qui solum in vno populo, in vna gente, sed & super terrenis meditationis officio fungebantur. Summus vero noster pontifex (teste Apost.) *ex hominibus assumptus, tamen pro hominibus constituitur in his quæ sunt ad Deum, vt offerat sacrificia & dona pro peccatis*. Hic igitur digni⁹ salubriusq; mediator existit populi ad Deum: hic sacrificia: hic holocausta, nō hircorū aut vitulorū, sed veri sacratissimiq; corporis Christi Deo patri offert, eosq; in eodē ministerio instituit, qui iidem faciant in orbe vniuerso pro delictis populorum. Hic igitur peccata diluit: hic animabus fidelium penas condonat, supplicia relaxat. Hic veniam lapsis impartitur. hic errantes corrigit; delinquentes, cum expedit, reducit. Hic incorrigibiles punit; & tandem peccatores summo Deo conciliat

ciliat, illumque iratum placat. De quo Sapiens ait: *Ecce sacerdos magnus, qui in tempore iracundie factus est reconciliatio*. Periret rursus iustitiæ virtus: quia (eodem Philosopho teste) nisi vnus in orbe foret, qui eam cunctis ministraret, & negligentium vicem suppleret, quicquid iustum est periclitaretur. Vnde Augustinus *sine iusticia non potest regi hac respub. humana*. Neq; enim vera aut recta potest esse respublica, nisi vnus omnibus præsit, qui gubernet & regat. qui summus pontifex est immortalis Dei vicarius. periret tandem illa potissima iustitiæ pars, quam Aristotel. *epikeiam* vocat, comuni bono vniuersi orbis per necessaria: per quam summus monarcha dirigit iustum legale, & plerunque scriptam rigidamque iusticiam moderatur, dispensat, detrahit, prout rerum contingentium suppetit diuersitas, & boni communis necessitudo expostulat. Periret demum alia iustitiæ non infima pars, quam *distributivam* vocant; quæ vnus proprie est summi principatus, quæ vnicuique secundum eius dignitatem & merita, circa proportionem præmia elargitur: dignitates, principatus, regna & imperia pro meritis donat, atque instituit; pro demeritis vero transfert de gente in gentem. Quare (& si cetera taceam) huius sacratissimi & eminentissimi status summitas, maiestas atque felicitas simul & necessitas, ac utilitas in eo facile comprehenditur. Nam si (vt aiunt) nulla maior est felicitas, quam multos fecisse felices. Hunc statum beatissimum tanto feliciorem dixerim, quanto plures super omnes mortales, facilius & (vt ita dixerim) felicius feliciores agere potest. Patet igitur huius sacratissimi status excellētia, dignitas & utilitas atque necessitas. Patent eius laudes & præconia non modo ex auctoritate instituentis, ex dignissima institutione, ex causis dignissimis; sed ex fine optatissimo, ex beatis mysteriis, ex propinquitate ad Deum, ex fructu desiderantissimo, ex cunctorum mortalium utilitate & felicitate redundantissima.

*Papa tanto
felicior, quā
eo plures fo-
lices facere
potest.*

CAPITVLVM II.

De spiritualibus incommodis, amaritudinibus, miseriis, aculeis, necnon mentis afflictionibus, periculis & laboribus summi pontificatus: ubi plurima summorum Pontificum calamitates, & spiritus perturbationes narrantur.

STupore non paruo audita est illa omnium dignitatum suprema dignitas, & cunctarum potestatum eminentissimus principatus, summi videlicet pontificatus, visaq; est tanti numinis celsitudo, & auscultata tantæ lucis splendidissima claritas; cuius radiorum iubare totus lustratur orbis atque vegetatur. Sed & ante nostræ mentis oculos contemplata est tanti culminis prærogativa, dignitas atque excellentia, & tanti tribunalis suprema auctoritas. cognita est illius sacratissimi atque diuinissimi status summa utilitas atque necessitas. Demum audita sunt breui eius status laudum præconia: discussæ sunt eiusdem culminis utilia & commoda, dulcia & prospera. Verum quia alternæ sunt rerum omnium vices, nec aliquid ita prosperum est, quod grauissimis aculeis non tangatur. Idcirco iuxta pollicitum & cōsuetum ordinem eiusdem altissimi status adducenda sunt incommoda, amaritudines, labores & pericula atq; prementia: ut cernat quisquis qui in ea sedet, quippe in se experiat: cernant rursus & ceteri mortales, qui in illo status culmine summam omnium felicitatem collocant, verissimum esse, quod Sapiens ait, quia *extrema gaudii luctus occupat: & risus dolori miscebitur.* Et propterea verum esse illud eiusdem Sapientis: *Gaudium & felicitatem dixi errorem.* & felicitati improperabat dicens: *Cui frustra deciperis?* In ea igitur disserenda re, bipartita erit oratio. In prima quidem huius summi pontificis status incommoda & infelicitas, amaritudines & pericula, labores & miseriae, spirituales videlicet & mentales: breui sed amaro calamo describemus. Secundo in loco temporales siue corporales miseriae eius status, labores & incommoda, ac interna latentia & aperta pericula disseremus. In primis enim illud antiquum, sed verissimum Sapientum verbū nostris mentibus repetendū arbitror: quia quicquid in orbe præminet atq; præcellit, multis internis doloribus suis afficit ac premit possessores: sed & infinitis pene mentis aculeis ac amaritudinibus exeruciat, quos demulcet. Ceterū discernenda est (ut puto) dignitas à persona, accidens à subiecto, qualitas ab obiecto. dignitas certe eius est excellētiæ, eius culminis, uti audiuius: quippe de quo sanctorum patrum habent traditiones, quia nemo sanæ mentis dubitat sanctum esse, quem apex tantæ dignitatis attollit. in quo si desunt bona acquisita per meritum, sufficiunt quæ

a Pe-

à Petro loci videlicet præcessore testantur. Adde, quia ea ipsa dignitas (teste Symmacho Papa) aut *claros ad hæc fastigia erigit, aut qui eriguntur illustrat*. Persona vero, cui tanta dignitas hæret, vt tantâ sic sanctitatem vitæ ex ea dignitate cōtingeret, sicut ex loci prærogatiua nomen sanctimonix recipit. Sed prohdolor altitudo dignitatis, virtutis, personæ innocentiam non inducit. Quod si illud eiusdē Symmachi quis obiecerit: quia *Petrus Apostolus perennem meritorum dotem cum hereditate innocentia transmittis ad posteros*. Id nisi fallor de eis summis pontificibus plane intelligit, quos par sanctimonix splendor illuminat. Transmisit igitur Petrus sanctitatem status, non vitæ: transmisit sanctimoniam cathedræ, non personæ: vt heredes essent futuri pontifices suæ bonitatis, atque causam occasionemque bene recteque viuendi, sancte præsidendi reciperent, & sanctitas loci meritaque præcessoris alium hominem facerent, quam natura genuisset. Plerumque enim (teste Isidoro) *dum mutatur status, mutatur mentis affectus*. Accedit, quia sicut excellentiam & dignitatem, ita dignitatis sequelas, videlicet ærumnas & labores Petrus transmisit ad posteros. Quas dum imperturbata mente considero, nescio Romani pontifices tanta miseriarum, laborum, dolorumq; immensitate resperfos felices, nō potius infelices, aut miseros dixerim. Inseparabilis enim & affix^o atq; annexus est huic culmini cunctarum mentis afflictionum & perturbationum acruus grauissimus. Idq; ipse Hier. nō negauit, inquit: quia *non est facile in loco Petri & Pauli tenere cathedrā*. Et Aug. *Sicut nihil in hoc seculo excellentius, itaq; nihil in hac vita laboriosius, nilq; difficilius, ac periculosius pontificatus officio, si eo modo non militetur, quo imperator Christus iubet*. Quod an verum sit, vnusquisque in ea sede locatus non modo experitur, sed patitur: qui plus miseriarum mentisq; amaritudinū in se conspicit, quā legat in codicibus. quod si tā graues huius dignitatis aculeos non sentit, omnium eum miserimū dixerim. Nā (vt aiunt) *propria non nosse miseriam summa miseria est*. Quis enim oro letus? quis felix in tātis miseriis esse potest? quis secur^o inter mille picula nō semel, sed iugiter iactat? Quis rursus felix appellari audebit, in quē vnū omnium mortalium ēt vilissimorum hominum ora, linguæ mordaces, cumulatissime & impune armatur: quæ vtrūq; suū hominē vehemētissime cōturbent. Quis oro Gregoriū

*Altitudo
dignitatis
persona in-
nocentiam
non inducit.*

Gregorium
etiam non
fuit liber à
distractori-
bus.

magnum vnum inter summos pontifices post Petrum clariorem, sanctiorem, aut feliciorem negabit? Is tamen grauissimis mentis tempestatibus & diuersis aduersitatibus siue infelicitatibus *vrge-* batur. Nam curarum sarcina, demum æmulorum detractionibus perturbatus in seque pene distractus (vt canones eius habent) in seipsum indignatus dicebat: *Infelix ego in ecclesia ista quid facio, ubi me episcopi despiciunt & detrahunt: omnipotenti Deo gratias ago.* Quid igitur est, quod felicior post Petrum Pontifex se infelicem appellat? Aut quis in pontificatu felix erit, qui Gregorium non habet in felicitate consortem? Aut cum quò rursus aliquis felix sit, qui cum Gregorio noscitur esse infelix? Equidem tanta miseriarum & perurbationum mole hic beatus summus pontifex refertus fuit: tot mentis perturbationibus & cruciatibus constrictus, vt quemadmodum de seipso in *Registro* ait, tardio rerum victus, nullum maius supplicium, quam illam summam felicitatem putabat. Dicebat rursus, spinosam fore cathedram Romani pontificis, fastigiumque illud summum acutissimis vsquequaquam consertum aculeis, adeo vt corona & purpuratum phrygium nò tam aurea quam ignea censeatur. Idque & Adrianus papa non negabat. Referebat enim sæpe (teste Policrato) quia non iocundis latusque gradibus ascendisset, sed in incude & malleo dilatasset eum Dominus, quem precabatur vt dexteram apponeret: quo insupportabile onus tamq. infelicem (vt ita dixerim) felicitatem ferre posset. Rursus iuxta quendam Sapientem: quia duplex se offert mortalibus via, qua gradiendum est: altera ad laborem, altera ad miseriam ducit. Eligat igitur quam sibi vult summus pontifex: aut enim sese miserum, aut ex libero seruum agnoscat, necesse est. Quo fit vt apud semetipsum quietem, animique tranquillitatem optans, & requiem non inueniens, descendisse non ascendisse recte arbitrabitur. Nam curis multiplicibus implicatus, ascensionem suas afflictiones potius & spiritus molestias æst imabit: quia (teste Gregorio) quanto quis altior erigitur, tanto curis grauioribus oneratur. eisque populis mète & cogitatione supponitur, quibus præponitur dignitate. Quo fit, vt quantocunque ingenio polleat, in tanto curarum tumultu & aduersantium sibi rerum assiduo conspectu quo se ferat, ignoret. Quippe ad spiritualia reddatur imbecillior, qui sibi in terrenis videtur diligentior, quia (vt ait) facile

cale-

cælestia amittuntur, cum terrena diliguntur. Rursus qui in eo fastigio sedet, dum securitatem vitæ æternæ captat, ad interitum, ad periculum currit. Quid ergo felicitatis habet, cui nihil est securitatis? quis enim securum summum pontificem arbitrabitur, qui de portu sciens fugit ad naufragium? Si enim in parua aqua cum tempestate periculose nauigatur, quanto periculosior erit nauigatio in mari magno & spacioſo? vbi reptilia, quorum non est numerus; quorū quædam blandiendo Syrenarum more miseros decipiunt, quosdū eleuant, deiiciunt in profundum maris. Quædam reptilium genera vt glutiant, appropinquant, quæ sua sunt quærun, non quæ salutis nauigantium. Quædam deniq; minus lædunt, dum aperte insidiantur. Quædam in ore beluarū sub amicitia colore nauis appropinquant, vt illā dorso subuertant, quam rectis membris inuadere non valuissent. Et (vt pauſis agā) quid esse potest in tanta tempestate securū? nam (teste Greg.) quid est aliud potestas culminis, nisi tempestas mentis? Distrahit certe tantæ dignitatis cura, & tanta rerū sollicitudo: quæ mēte pontificis, etiam si ferrea marmoreaq; sit, confusionem ingerit & sui ipsius ignorationem. Nā iuxta Greg. *sæpe suscepta cura regiminis per diuersa & aduersa in seipsa colliditur:* & imperfectus quisque inuenitur ad singula, dum confusa mente diuiditur ad multa. Demum in his, quæ diximus, si illud infelicitatis & periculi genus addideris, nihil est cur summi pontificis felicitatem infeliciorem & miseriorem cunctis mortalium miseriis non contendas. Obstat enim suæ supremæ excellentiæ, suæ momentanæ felicitati interioris sui hominis ignis inextinguibilis conscientia remorsus assiduus, vermis qui non consumit nec cōsumitur, sed cruciat. Quæ omnia tanto premunt grauius, quanto quæ suo cōgruunt officio aut nō egisse, aut neglexisse damnabiliter non ignorat. Deniq; si illum periculo proximum dicimus, qui paucarū animarū curam suscepit: quo pacto latus, quo securus erit, qui omnium curas in se vnū tranſtulit? Fortes certe illos humeros dixerim, nisi leuem putet sarcinam, quos pulcre Bernard. tangit inquiens, *grauiori & periculofiori debito tenentur ascripti, qui multis animabus rationem sunt reddituri:* quia iuxta Prophetam: *de manu pastoris peccata populi requiruntur.* Idipsum periculum summi pōtificatus magnus Greg. plangebat, atq; in ipsa sua assumptione

grauissime deplorabat, ut eius *Registro* colligitur. Ait enim: *Cor meum derelinquit me: nolite vocare me Noemi. filios enim perdidisti, id est opera per terrenas curas. Prius eram super altitudines terra: sed post curarum fluctibus & tempestatibus sum depressus.* Et subiicit: *Quis ad hoc sufficit onus? Symia vocari leo potest, sed nunquam fieri, quasi dixerit: vocari in ecclesia possum summus pontifex, sed opere fieri non valeo talis: nisi quæ tali dignitati congruunt, digne peragam.* Hæc paucula inter nimia de summi pontificis spiritualibus miseriis, laboribus, curis & mentis amaritudinibus à me breui disserta sunt. Adde quæ infra tanguntur cum de episcoporum & aliorum ecclesiæ ministrorum aculeis, laboribus & periculis sermo erit.

CAPITVLVM III

De plurimis temporalibus, corporalibus incōmodis, amaritudinibus & miseriis & calamitatibus Romanorum pontificum: & de illorum promptis, & ei coninnctis laboribus & periculis, anxietatibus & inseparabilibus arumnis.

Qui aures audiendi habet, non sine magno mærore audiuit eas spirituales misérias & mentis afflictiones, pauculas quidē ex multis, sed veras atque pergraves: easq; spiritus amaritudines, incōmoditates ac labores, sed & pericula, quæ summum pōtificē comitantur. Superest iuxta pollicitum ordinem, ut cetera incōmoda, aduersa, & pericula temporalia, quæ eisdem summos pontifices (dum in hoc laborioso vitæ præsentis certamine militant) temporaliter siue corporaliter premunt, breuissime audiamus. In quare, magna nobis se offert ad dicendum copia, si esset qui tam grandi negotio parendicēdi vim accommodaret. Demus igitur, atque pro constanti fateamur, quod perquam difficile contingit, & fingamus alicuius summi pontificis tantam aliquando fuisse, aut esse posse gloriam; tantam virtutem, moderationē atq; industriam, ut ei cuncta succedant prospera. Demum honoratus plurimum sit, & in omni orbis plaga laudatus & adoratus, cui omne genu (ut debitum est) flectatur. Obstant tamen his exterioribus

bus felicitatibus, plurimaq; potius cruciant quam fariant, nec tantum delectent quam premant. Primo quidem obstant domesticæ curæ. obstat rursus iniquissima auditas, & (vt ita dixerim) rabidissima rabies propinquos exaltandi, atq; carne & sanguine reuelantibus familiam, genus, stirpem perpetuandi. Volunt enim nonnulli summi pontifices, vt à se iam non vna, sed plurimæ insignes familiarie & nominatissimæ domus incipiāt; illustres principatus nascantur, quorum desiderio non deerunt priscorum exempla pontificum, & longe minus qui huiusmodi proposito faueant. Nam docti pariter & indocti id ipsum suadebunt, alii fabulas, alii scripturas allegabunt, auctoritates retorquebunt prouidentes pontificis aures. ecce inquit *nemo carnem suam odio habuit*. Christus quoque (cuius actiones summus pontifex illius vicarius imitari debet) cum dilexisset suos, *vsque in finem dilexit eos*: qui sibi coniunctos exaltauit: sed ad crucē dixerim. Multi multa dicent, vt placeāt: quia id ipsum placere pontifici non ignorant. Plurima suadebunt vt decipiant. fateor tamen facile est decipere volentem. Sed plerumq; decipiuntur in adinventionibus suis, & inde punire eos diuina providentia ordinat, vnde peccatum insurgit. Nonnunquam enim ingrati sunt nepotes & contribules, ingrati propinqui: vt a rege Lybiæ sumere exemplum libet: cui nepos aduersus fuit, & propinqui vitæ insidiatore, ac fratrum interfectores. Demum si grati erunt, heredes quidem pecuniæ erunt, sed deheredes virtutis. Adde, quia si virtuti dediti, si studiosi fuerint, atque merito diligendi, hii pro eorum virtute plerumque æmulos habent, totaque contra eos armatur indignorum turba. Id tamen raro conspicimus. quinimo sapius qualificatum sanguine, præferunt qualificato sapientia & virtute: putantes ex caritatis ordine excusatos, quam à se & suis incipere aiunt. Quo fit, vt dum summus pontifex eum ipsum caritatis ordinē seruare se simulat, in eū cōmittat. Cum itaq; ordinata caritas id primum exigat, vt coniunctos sanguine, sapientia & virtute præditos diligamus, eosque spiritualibus honoribus ceteris præferamus. Quibus non similibus non beneficia, non promotiones, sed patrimonium si egent relinquamus; naturæque non carni subueniamus. Econtra plerumque fit, Exaltant enim indignos; prætereunt dignos. Sed non diu transi-

Inanes summorum pontificum concursus.

Summi pontifices ab adulatoribus circumueniuntur.

Christi Vicarius Papa.

Puerorum exaltatorum ingratitude.

inulta tam improba personarum acceptio. aut enim taliter exaltati ditatq; illa omnia breui consumunt tempore, quæ alibi longo cruciatu pontifices luituri sunt: aut repentina morte eripiuntur, eosq; in momento perdunt, quos longo studio, maximisq; impendiis, & animæ periculis in altum prouexerunt: & quos exaltarunt in vita, seruare à morte nō valent. Quippe quos heri & nudiustertius ad magna læti duxerunt fastigia; hodie mæsti ad parua ducūt sepulcra. Et (vt paucis agamus) conspiciunt assiduas fratrum, nepotum & carorum præmaturas mortes, ne dixerim cædes. Taceo quod summis pontificibus heres incertus est; successor ingratus atque non placitus, ne dixerim æmulus. Quod si ais, quid ne id pontifici officit? qui dum viuitt super cunctos mortales gloriam & imperium obtinet: & omnes viuentes iudicans à nemine iudicatur? Quippe qui in eum solum obloquuntur, sacrilegi reputantur. Quibus facile respondemus. Primo enim sublimitatem & potentatum non negamus. Sed illud attendere libet; quia quo sublimius quis sedet, eo grauius descendet. Vix enim ex alto sine periculo aut labore descenditur. Sed (vt quidam Sapiens sapienter ait) *hoc inter prudentes & ignauos interest: quia illorum descensus est, istorum vero precipitium atque ruina.* Nam (teste Augustino) *quanto gradus altior, tanto casus grauior.* Et rursus: *Quo plus ceteris quisque potest, eo magis scis sibi esse metuendum.* Quod rursus dicitur, Romanum pontificem super mortales gloriam honoris & laudis nomen obtinere, neminemque in eo, nec verbo prorumpere, in quem sinistri aliquid cogitare nephas punibile iudicatur. Fatendum est, quia non deerunt qui laudent: & in cælum vsq; eius nomen & gestorū suorum facta extollant, colant, venerētur & adorēt. & (vt quidā ex modernis dicebat) *nec deerunt qui obideant, & circumstent summo pontifici, qui demum assistant, ne dixerim resistent.* Sed nec deerunt qui serico terram sternant, cælos apponant mobiles, vt sub vmbra gloriosus pertransseat: sed versauice non deerunt, qui inter ea omnia obsequiorum genera in eum vnū oculos figant, de eo iudicent, obloquantur; actus arguant, quos corā extollunt: verba distorqueant, quæ paulo ante in præsentiarum plena sapientia ac sensum consummatum dixerunt. Nec deerunt, qui famam in theatro lacerent, quam

Summis
pontificibus
incertus he-
res.

quam in palatio laudant: vitam seorsum carpant, quam coram illo commendant. Et quicquid mali, quicquid aduersi accidat, sibi vni vulgus attribuet. Si pacem, si concordiam summi pontificis opera populi suscipiunt, non deerunt qui id negent. alias enim (vt inquit) futurum erat. Si quid vero belli, si quid discordiarum etiam sine pontificis culpa acciderit, ipse vnus causa & fomentum erit. Rursus si vis, eisdem Romanis pontificibus cuncta eis votiuā & prospera succedant: aliqua tamen, imo plurima, eis ipsis omnia habentibus deerunt. Deest primo naturalis videlicet libertas, quā se ex libero seruū constituit; quia merito liber esse nequit, qui seruus esse maluit. Quo enim pacto dum cathenis quis vinctus est, liber esse potest? Aut quomodo piscis liber inter hamos erit? aliud denique Romano pontifici deest, etiam cum cuncta possidenti, forte inepte dixi. Quid enim omnia habenti deesse potest? Certe qui dicat ei verum. à minimo itaque vsque ad magnum, omnes adulationi student, artificiose ei loquuntur vt decipiāt, in dolo suadent vt vincant, fraudulententer supplicanti vt optata pertingant. Et quia adulationē sine dolo non esse nemo dubitat: dolo se se blauditores confederant, ne alter alteri contradicat, & veluti oratoris finis est persuadere verbo, medici farmacia curare, sic adulatoris finis est persuadere verbo dolo. Nam

*Liber esse
nequit: quā
seruus esse
maluit.*

*Adulatores
faciunt con-
spirationem*

Fistula dulce canit volucrem dum decipit auceps.

Etiuxta Hieron. *Nec venena dantur nisi melle circumlinita.* Hi pares faciunt Deo pontifices, diuinos profitentur. Sed (nisi fallor) in eo se pontifices plurimū diuinitatis habere comprobarentur, si tales rapi facerent ad tormenta: & in eo se Dei cultores agnoscerent, si tales deceptores grauissime punirent.

CAPITVLVM IV.

De alia infelicitate & calamitate Romanorum Pontificum, videlicet quia diu non viuunt in pontificatu: & de causis ac rationibus huius breuitatis vitæ, in eisdem summis pontificibus potius quam in aliis monarchis & principatibus.

FELICES & beatos sese summi pontifices arbitrarentur, si his tantum calamitatibus, miseriis, & amaritudinibus, quas paulo

ante natrauimus, non premerentur. sed ultra cæteras ea vna omnium grauissima nusquam à mente decidit; quinimo continue affligit; vrget, & cruciat: cuius comparatione reliqua omnia incommoda, labores & pericula, leuia quidem & tolerabilia, sed & dulcia ab eo reputantur. Cum enim scriptum sit, quia *pellem pro pelle, & cuncta quæ habet homo dabit pro vita sua*: eo fit vt breuius vita & præmatura mors, sicut vltimum est omnium terribilium, sic cunctis periculis & laboribus grauior atque molestior existit. Cunctas enim calamitates & captiuitatis miseras populus Israeliticus pati voluit, vt solum viueret. Dicebat enim, *melius est vt captiui viuentes seruiamus Nabuchodonosor regi*. Est ergo summorum pontificum (vt aiunt) illa summa infelicitas, & tanto statui coniuncta infelicitissima calamitas, quoniam & si cunctis affluant bonis, nunquam (vt aiunt) diutius in pontificatu viuant, vt decorum quolibet scriptura dicere videatur, quia *inse ruinam exaltabitur cor*. Et iterum: *Exaltatus cito consummatus, & in breui explevis tempora multa*: supple, quibus alias viuere debuerat. Et terum in eo ipso, qui primatum super omnes mortales tenet, illud recte impleatur, quia *omnis potentatus visa breuis*. Rapiuntur quidè summi præfules, & citissime post assumptionem moriuntur: adeo vt post eorum prædecessorem Petrum apostolū (qui per quinque circiter annorū iustra ecclesiæ præfuit) nullus post eum successor hoc spacium pontificatus æquauit. Quinimo si moderna libet tempora contemplari, vix ad Romanæ sedis culmen euehitur, qui paucorū metas transcendat annorum. Quæ siquidem brevis vitæ necessitas cum dignitati annexa videatur, merito apud homines natura ipsa viuere cupidos, præcipue sedentes in ea cathedra, omnium mortalium infeliciores & calamitosiores reputandi sunt. Verum quia hæc non recens est querela, sed antiqua concertatio: & apud maiores nostros tam monstruosa & prodigialis calamitas, non solum in stuporem adducta est, sed eius ratio & causa sæpe quæsitæ: nec tamen arbitrato meo satis inuestigata reperitur: decreui succincto sermone disserere: Num ea res ita sit: Demum an sufficiens ratio, siue causa breuitatis vitæ Romanorum pontificum potius, quam aliorum præfidentium assignari valeat. Inter scribentes igitur reperimus Petrum Damiani in scripturis diuinis eruditum, ac virum

Papa omnium infelicior reputandus est.

Causa breuitatis vitæ summorum pontificum.

virum eloquentissimum (ut eius quædam habet epistola) interrogatū fore ab Honorio summo præfule, quid eausc tãtã esset infelicitatis? Is igitur causas & rationes inuestigare conatus, iccirco arbitratur diuinã prouidentiam ita disponere, ut humano generi metum mortis incutiat: & quam despicienda sit temporalis vitæ gloria, in ipso gloriæ principatu euidenter ostendat, quatenus dum præcipuus & supremus omnium hominū, tam angusti tēporis cōpendio moriatur, tremefactus quisq; ad præstolandi sui obitus custodiã prouocetur: Et arbor humani generis dum cacumē & verticē suum tã facile corruisse cōsiderat, statu cōcussa formidinis in suis vndiq; ramusculis contremiscat. Sed subiicit: quispiã fortassis obiiciet: Cur & Regib. Cæsaribusq; hæc eadem viuendi breuitas non occurrat? Nã & Octavianus Augustus, quo imperante saluator mundi de virgine nasci; & David rex, de cuius stirpe dignatus est propagari: alter l. vi. alter xl. annorum circulis, regali fastigio floruerunt. Et post Christi aduētum Iustinianus l. fere annis imperauit. Post quos & alii videl. vtriusq; regnī principes, etsi minusculo, nō tamen ad instar Romanorum pōtificum, breuissimo regnauerunt tempore. Ad q. facile Petrus Damiani respondet: quia cum vnus omni mūdo Papa præsideat, reges aut plurimos in orbe terrarum, sua cuiusq; regni meta cōcludat: & quilibet imperator ad Papæ vestigia corruiat, qui rex est regum, & princeps imperatiū, ac cunctos in carne viuentes, honore & dignitate præcellit. Quo fit, ut quolibet rege defuncto, solū regnum eius destituatur administratione. Cū vero sedis apostolicæ pontifex moritur, vniuersus veluti cōmuni patre mundus orbarur. Quid n. Africa de regibus Asis: aut quid Æthiopia de Hispaniæ principibus sentit? Nam siue moriãtur siue viuant, quia procul à se remota sunt, vtrumq; indifferēter ignorāt. Est & aliud, cur mors cuiuslibet regis non magno pere sit terrori: quoniam seculares principes, qui turbis popularib. præsunt, sæpe gladiis premuntur. Nam (ut de multis paucos adhibeam) Gaius, Claudius, Nero, Galba, Otho, Vitellius, omnes isti imperatores, p. continuã sunt seriem vnus post alterum principati, & excepto Claudio cūcti sunt, vel suis vel hostium gladiis interempti. Postmodum quoq; (sicut Romana tradit historia) Antonius, Alexander, Maximus, Gordianus, Decius, Gallus, Volusianus,

Adri. Pape-
ratione diuul-
gatur quom-
regnum.

nus: omnes hi seriatim sibi met per continuum ordinem succedē-
 res, gladio trucidante prostrati sunt. Seculares ergo principes,
 quia diuersæ mortis casibus exponuntur, cor audientium eorum
 exitum non terretur. Papæ vero vita, quia sola naturalis obitus
 lege concluditur, eius ex hac vita transitus, sine graui formidine
 non auditur. porro quia terreni principes regni sui quisque (vt di-
 ctum est) limitibus includuntur, causa non est, cur per alienas
 mundi prouincias eorum obitus diffundatur. Papa vero, quia so-
 lus est omnium ecclesiarum vniuersalis episcopus, cum luce pri-
 uatur, mors eius per ampla terrarum regna diffunditur. Et sicut
 sol, quia solus lucet, si eclipsim forte sustineat, præsto necesse est,
 vt tenebras totus vbique mundus incurrat. Sic etiam Papa, cum
 ex hac vita recedit, ilico (quia vnus in mundo est) longinqua re-
 gnorum spacia mortis eius fama percurrit. Et consequens est, vt
 quos tam sublimis singularisque personæ casus obturpat, propriæ
 quoque vocationis exitum tremefactis visceribus expauescat. V-
 bi notandum, quam velit omnipotens Deus Romani pontificis
 vitam hominibus in ædificatione prodesse, cuius etiam mortem
 decreuit saluti gentium ministrare: quanto studio debet lucris a-
 nimarum quoad viuit, intendere, cuius mors prouidetur ad cre-
 atorem suum animas hominum reuocare, vt dum se patrem or-
 bis esse considerat, ab impetranda tot filii hereditate desidia non
 torpescat. Hæc est illius Sapientis sententia: quæ & aliis persuasi-
 uis causis & rationibus iuuari potest. Primo quidem, quia cum
 diuina prouidentia nihil in orbe agat, cuius legitima causa non
 præcedat, pie arbitrandum est, quod non nisi ex iustis causis in di-
 uina mente reconditis, vitam summorum pontificum abbreviat.
 Et inter cæteras, vt Christum imitentur in vitæ periodo, quem i-
 mitari debent in viuendi modo. Et vicarius patronum sequatur,
 qui intempestiue & in dimidio annorum suorum ab hac luce sub-
 tractus est. Ipse enim dixit, *qui mihi ministrat me sequatur.* Rursus
 immortalis Deus, iudex rectus vitam donat & adimit, & secundū
 suam nobis incognitam iustissimam distributionem. sed & cum
 æquissimus minister arbiter existat, ita suis ministris & fidelibus
 vitam distribuit, vt nec alter ex recepto beneficio superbiat, nec
 alii eius felicitati inuideant. Obliquaretur siquidem eadem diui-

*Mors papa
 sit exemplo
 aliis mortu-
 libus.*

na & æquissima distributio, si cuncta felicia & prospera, quæ simul singulis denegat, vni concederet. Ea igitur diuina prouidentia, omnia in numero, mensura & pondere æquans, papæ vicario suo, summum omnium felicitatum culmen donauit. sed ne tanta felicitate intumescat, longam adimit vitam. Cæteris vero mortalibus, quod illi vni negauit, recte indulget: vt ille habeat, quo istos excedat: & illi obtineant, de quo ille inuideat. Accedit, quoniam cum omnium mortalium studia, ad viuendum tendant, ordinat iustissimus Deus, vt tam vehemens viuendi studiū, mors præueniat. In eo præsertim qui cæteris potius quam sibi viuere optatus esset. Quare in eo tanto celerius vitam eripit, quanto studiosius illā cupit atq; custodit: quia iuxta Gregor. *quanto mens humana se per desideria dilatat, tanto ad receptionem effectuum angustat*. Et iterum hæc humana vita per momenta deficit, & cum plus viuendi desiderium crescit, ipsa viuendi anxietas desiderio terminatur. Quo fiet, vt ipsi Romani Pontifices, omnia habentes facile agnoscant, quod decipiuntur in cogitationibus suis, dum sibi longam vitam promittūt. Et qui non ignorant, quia *non est hominis via eius*: discant ea desiderare, quæ profint. Et dum per potentiam stare se putant, quā facile cadant, aduertant. Demū negat rectissimus Deus vicario suo, quæ optat ad eius solius vtilitatem, cui donat quæ sunt ad eius veriorē salutem. Nam iuxta Gregor. *multa incommoda incurrunt sæpe homines diu viuendo*. Ex his itaque causis, putarunt nonnulli sapientes & curiosi viri, Romanos pontifices non diu in pontificatu viuere. An autem rationes ipsæ vrgeant, statim subiiciemus.

CAPITVLVM V.

De verissimis causis breuitatis vitæ summorum pontificum: & an sic verum uniformiter, quod parum in papatu viuant: & an in hoc Romani pontifices differant à cæteris mortalibus.

A Signatæ sunt causæ & rationes breuitatis vitæ summorum pontificum, prout quibusdam sapientibus placuit: quæ & si veræ & exemplares ac rationi satis consonæ videantur, pro maxime quod timore mortis ac cōtemptū culminis dignitatū persuas-

dere videantur, & ob eā rem aures demulceāt: quia tamen in mēte diuina reconditæ sunt (cuius iudicia vt abyssus multa) nobis incognitæ sunt. Rursus non auctoritatibus sacrarum scripturarū, sed potius persuasionebus innituntur. credimus rationes ipsas non vsque adeo militare, aut satis sufficere vt fateri oporteat statui & culmini summi pontificatus generaliter tributum esse, aut vniformiter inesse, vt tantum apicem ascendentes digni aut non digni, sancti aut reprobi, pro eo solum quod in pontificatus culmine sedēt, vita longa aut alias eis à diuina prouidentia destinata frustrari debent. Ne autem eos imitemur, qui dum aliena refellunt, sua non cōprobant, alius rē ipsam repetentes plurimis & (nostro iudicio) veridicis fundamentis deducemus; alienum esse à facti veritate, cunctis videl. summis pontificib. vniformiter insitum & propriū esse, vt parum in pontificatu viuāt. Idq; nedum alienum à rei veritate, sed nec recta fide fore credendum arbitramur. quinimo in ea ipsa viuendi conditione, aut breui aut longæua, ipsos summos pontifices à cæteris hominibus non differre. Et si forte, vt plurimum, diutius eos in pontificatu viuere non cernamus, id nō ex natura, aut infelicitate status sue dignitatis Apostolicæ, sed aliunde veluti in cæteris mortalibus contingere. Deducemus igitur primo luce clarius, aliunde Romanos pontifices, & ex aliis potioribus & notioribus causis, diutius non viuere. In sequenti vero capitulo, breui compendio rationes afferemus, quare summo pontificatui non insit vniformiter, vt illum assequentes parum viuant. Primo igitur putamus facti præsuppositum veritate carere, quinimo si summorum pontificum *annalia*, si illorum assumptionum tēpora, si ætates animo recensemus, utiq; reperiemus eosdē pontifices nō modo breuiori, sed longiore tēpore cæteris fidelib. vixisse. Quippe cum vt plurimū non nisi senes ac maturæ ætatis viri, sed & valitudinarii ad summū eligantur pontificium, quid mirum, si parum in papatu sedeant, qui diu ante illum vixerunt? Nilominus plurimos in senectute assumptos legimus diu sedisse. Linus enim XII. annis vixit in papatu: Cletus totidem : Leo quartus licet senex, xv. annis: Fabianus x. & v i i i. Pascalis & Damasus, Vigilus, Innocentius atque Liberius totidem. Leo quartus licet longæuus ætate, & valitudinarius foret, cum cathedram ascendit, viginti

*Papa quidā
senectam as-
sigunt.*

tamen

tamen annis præfuit Alexander XXI. Beatus vero Siluester XXI. annis sedit. Rurfus Adrianus primus XXI. annis, vno minus mense præfedit. Leo vero primus viginti quinque feliciter præfuit annis: sub quo duo ycomenica apud Caledoniam fuerunt congregata concilia. Quid igitur sibi vult illorum infulta positio, qui cunctis in cathedra Petri sedentibus vitam adimunt? cum tamen vnus hominis ad omnes proportionē habita, plus cæteris viuere comprobentur. nisi velimus eos solum, qui Petri cathedram tenent, longiore vita præ cæteris viuere. Aut forte velimus illos tunc naturaliter nasci, tunc viuere incipere, cum assumuntur. Aut forte conqueramur exempli gratia Calixtum secundum post octogesium assumptum annum, præmature raptum, quia quadriennio fere tantum præfedit. quibus illud Nicodemi in Euangelio facere simul & vere dici potest: *Quomodo enim homo potest renasci, cum sit senex?* Aut quomodo viuere incipiet is, cui naturaliter viuere desinendum esset? Satis igitur (vt putamus) viuunt summi pontifices, si recte viuunt: longæque præfident, si diu se viuere & præesse arbitrantur. Sed (nisi fallimur) ideo nonnulli summi pontifices mori præmature arbitrantur, quia citius quam vellent, sed forte tardius quam debent, moriuntur. Mira certe res est. Volunt summi pontifices præceptum adeo esse, vt viuant; sed nolunt quidem viuere, vt præceptum est. Recte igitur cum eis agit diuina prouidentia; qui in eorum vitæ cupiditatis pœnam, tanto celerius rapiuntur, quanto (vt prædiximus) vitam cupiunt atque custodiunt. quia (vt inquit Gregorius) *male viuunt, qui diu se viuuturos desiderant*. Et Socrates dicebat: *Viuere non meretur, cui nihil est in mente nisi vt viuat*, de quo infra tangemus in cap. septimo. Si igitur recte, si vere atque catholice in ea re loquendum est, indubie fatendum erit, breuitatem aut longitudinem vitæ pontificis (sicut & cuiusvis alterius) ex illius persona aut propria natura pendere; non quidem ex statu, sed ex reatu; non ex pontificatu, sed ex actu; nec ex dignitate, sed vitæ qualitate; nec ex culminis excellentia, sed quietis animi indigentia. Et (vt paucis agamus) tres arbitramur potissimas atque vrgentissimas breuitatis vitæ quorundam pontificum causas, rationesque communes omnibus non plus sum-

Papa à natura non est exemptus.

morum pontificum quam infimorum hominum. Quarta prima est natura disconueniens. Secunda culpa puniens. Tertia curarum turba vitam minuens.

Papa à natura non est exemptus.

Prima siquidem causa, naturalis disconuenientia. Cum enim summus pontifex velut cæteri homines ex quatuor sit elementis compactus, natura in eis vim suam æquo exercet vibramine, nisi forte summi pontifices contendant à natura ipsa exemptos: idque ipsi summopere optarent, ut corporis dolores & cruciatus vitarent. Constat autem longioris & breuioris vitæ causam naturalem fore. Nam (Augustin. teste) *& si in manu Dei sit omnis vita & mors, ipse tamen natura plasmatior sic cuncta gubernat & regit, ut naturam motus suos naturales exercere sinat.* Causa igitur naturalis longioris aut breuioris vitæ hominis, secundum quorundam philosophorum sententiam, spiritus siue aer est, eo quod illū videamus instrumentum esse virtutis operatiuum & vitæ inductiuū. quare secundum spiritus proportionē, sic proportionatur & vita. quādoquidē paucus existit, tunc debilitate vitam abbreviat, sicut in melancholicis: quādo vero multus, eo casu exufflando calorē extinguit, veluti ventum videmus extinguere lampadem. Cum autem grossius erit, utiq; virtutū vitalium operationes impedit, sic & quādo nimis exilis: tunc n. de facili spirat: quo fit ut mortem abbreviet & inducat. Aristotelis vero & aliorū philosophantiū schola indubitata cōclusio est, calidum & humidum principia & causas fore longioris vitæ hominū. quāto enim tempore calidū in humido nō consumpto aut non deprauato valet subsistere, & quāto tempore humidū reduci potest, atq; à calido cōuerti, tāto tempore indubitanter vita cuiusuis mortalis durat. Quæ siquidem mensura circa tria potissime attenditur: videl. circa quantitatem, item qualitatem ipsius calidi & humidi, tertio secundū qualitatem membrorum atq; vasorū, in quibus operatur; prout latius in *libro de morte & vita* philosophus tradit. Quādo igitur in humano corpore adest illa disconuenientia; aut cōtingit caliditatis & siccitatis excessus ipso humido radicali, aut consupto aut deprauato, necesse est, ut vita hōinis abbrevietur. Cōtingit aut variis ex causis excessus ipse siue humoris deprauatio, secundū naturalium & medicorum traditiones. id tamē facilius in Principib. cōspicimus; qui putāt se ita esse dominos stomacho-

Principes stomacho-

machorum & ventrum suorum, sicut & omnium subditorum. *rum, sicut & subditorum Dominos se esse putant.*
 quotidie siquidem preciosis atque splendidis sapidisque cibis, variisque modis præparatis passim vescuntur, vinorumque varietate potantur. Et quia maiore quantitate sumitur, quod avidius & sapidius deuoratur; necesse est ex multorum diuersorumque ciborum varietate grauetur stomachus. Quo fit vt edendo edendi appetitus amittatur, generenturque ventositates, inflationes in ventre, tremores in membris, ac febres, & tandē præmatura mors accidat. Hinc Arist. *de secretis secretorum* ad Alex. Nihil (inquit) *p* magis vitam prolonges, quā cauere à superfluitate ciborum: nec est quod n. agis abbreviet, quā comestione[m] comestioni superaddere. Hippocrates enim adeo dietas seruabat, vt debilitatē corporis ex industria sustineret: malens debilis viuere, q̄ robustus & pinguis mori. Dicebat enim, quia malebat comedere vt viueret, q̄ viuere vt comederet: Addens, quia alimenta hominibus natura dedit, propter durabilitatem; non durabilitatem propter cibum. Hinc sapiens Salomō ait: *Æqua vita hominibus in sobrietate, & qui abstinentes est, adiicies & vitam.* Falso igitur culpa personæ dignitati attribuitur; indigne summi pontificatus dignitas, propter ventris ingluuiē diffamatur. Sed rectus est Deus & rectum iudicium suum. pœna certe tenet auctores suos. scriptū est, anima, id est vita, qua peccaueris, ipsa morietur. Et consonum rationi est, vt qui peccat in vitam propriam, in ea puniatur. Ridiculum ergo videtur asserere, mortales & naturales homines determinatum quendam statum, aut dignitatis culmen assequentes, à legibus naturæ exemptos fore. Et præsertim summi Dei vicarium, hominem purum, & naturæ subditum, qui quanto Deo proximior existit, tanto legibus naturæ, vt legibus patroni sui astringitur. Natura enim lex Dei est, quæ eius vicarius ligatur.

Secundam & principalem causam breuitatis vitæ summorum pontificum (sicut & ceterorum hominum) culpam punientem diximus. Nihil enim magis vitam hominum abbreviat, quam peccatum, idq; plurimis diuinis testimoniis comprobatur: quod in eisdem Romanis pōtificibus facile reperiri libet. Nam ad quēdam ex summis & veteribus sacerdotibus, qui typum pro eo tempore summorum pontificum gerebant, Deum per Prophetam dixisse legimus: *præcepta mea cor tuum custodias, longitudinem enim*

2. Causa breuitatis vitæ summorum pontificum.

dierum & annos vitæ & pacem apponent tibi. Demum in expresso alibi summo pontifici longa à deo vita promissa est. Siquidè alius propheta summum sacerdotem designans : *Super aspidem (inquit) & basiliscum ambulabis : & concalcabis leonem & draconem.* Et statim subiicit : *Eripiam eum & glorificabo eum, ac longitudine dierum adimplebo eum.* Nec ab re quidem : cum enim scriptum sit, quia *opus iusticia vitæ est*, merito sancti iustique pontifices longa perfruuntur vita. Vnde alibi scribitur : *Si in lege mea ambulaueris, longos faciam dies tuos.* Et iterum : *Quarite deum & viuetis.* Iniusti vero & reprobi è vestigio vita priuantur : quia ad omnes illa vox dicta est, *Viri iniqui non dimidiabunt dies suos.* Et rursum : *Iniusti mox sicut honorificati fuerint & exaltati, deficient.* Et alibi : *Vidi impium exaltatum & eleuatum sicut cedrum, & transfusi, & ecce non erat.* Quæ siquidem auctoritas proprie summum pontificem signat, cum dicit : *Exaltatum sicut cedrum*, quæ cunctas plantas eminentia & altitudine vincit. Tali bus certe comminatur propheta dicens : *siant dies eius pauci, & episcopatum eius accipiet alter.* Vnde Augustinus pulcre inquit : *Vita hominis media est inter vitam peccantium hominum & innocentium & angelorum, si uiuit homo secundum carnem, peccatoribus comparatur, qui non dimidiabunt dies suos : qui uiuit secundum spiritum, per diurnam vitam angelis comparatur.* Sed dicet quispiam : plerumque reprobi & iniusti diutius, boni vero parcius viuunt. Quod & fateor, & antiqua querela est à prophetis & sanctis viris, deo soli referuata : quantum tamen ipsa diuina prouidentia sanctis intelligere nosseque permisit, illud vtriusque conuenit, illis ne amplius peccent ; istis quia id sibi expedit. *non enim eis mors ipsa pena est, sed remedium, ut molestia & mundi miseria, quæ eos premunt, & alias vinci non poterant, vitæ suæ breuitate vincantur*, secundum Ambrosium. Vnde Senec. *quæ videtur intempestiua mors, iustis est completa vitæ, quia miseriorum finis est.* Quare iubdit : *rudis satis videtur tyrannus, cum potius à pana liberat, quem punire se credit.* Rapiuntur igitur boni pontifices, vt requiescant à laboribus suis ; & ne malitia mutet intellectum illorum. Adde, quia secundum Grego. papam de se loquentem : *quosdam magis deleet pergere quam manere : magis citius præuenire, quam morari : ne dum oblectatur in via, obliuiscatur quod desiderat in patria.* Et iterum idem Grego. aliquando secreto iudicio agitur,

agitur, ut electorum vita abbreviatur, ne viam propriam diligamus. Vt igitur paucis agamus: tunc summi pontifices summe erunt felices, tunc vere beati, tunc gloriam, tunc famam dilatant, tunc nomen perpetuant, tunc longos & incolumes videbunt dies, si ecclesiæ cui præsumt promouent honorem: si fidem, quam exaltare professi sunt, augere conantur: si religionis dilatant cultum: si mores emendant: si superbos humiliant: si exaltant humiles: si sunt munifici in egenos; in copiosos, frugaliores: si sapientiā, si virtutes præmio: si vitia æqua poenarum lance compensant: si iusticia vsquequaque ambulat ante eos, & imponunt in via prudentiæ cunctos gressus suos: si tyrannidem viriliter reprimant: si ad pacem orbis inuigilant: si ab omnibus extremis æquo spacio discedunt: si cessat in eis prodigalitas, abest omnis auaricia; quia illa ecclesiam valet, hæc gloriam mentiri veritas non potest. scriptum est: *Qui odit auaritiā, longā sient dies eius.*

*Papa quo
pōtō diu vi-
uere possit.*

Tertiam causam breuitatis vitæ summorum pontificum, non quidem ipsum pontificatum dixerim, sed vrgentium atque prementium turbam curarum, ac assiduam mentis agitationem; quia scriptum est: *tristis spiritus exsiccat ossa.* Et iterum: *deprimit terrena inhabitatio sensum multa cogitantem.* Hinc Augustin. super illo verbo Iacobi 4. *Vita nostra vapor est admodum parens, ait, cura & assidue cogitationes corpus extenuant; & mentis fatigationes, rerumque inextricabiles questiones, humores omnium exsiccant: frequentia hominem morbidat, tristitia consumunt, negotiorumque sollicitudo coartat.* Hinc & Cassiodorus: *Nihil est quod vitæ hominis magis officiat, & dies eius abbreviet, quam tristitia mentis, languor animi & rerum sollicitudo multarum.* Nam sicut (teste Sapiente) *latus animus floridam reddit faciem, & iocunditas cordis vitæ est consummata hominis: ita anxius & curis fatigatus animus corpus macerat, & vires minuit, humidum consumis, caliditatem auget cum siccitate.* Ex qua re appetitus perditur, & tandem mors acceleratur, ut paulo ante in prima naturali causa deduximus. Has igitur putamus causas verissimas, has rationes, hæc fundamenta breuitatis vitæ summorum pontificum: non quidem ipsius culminis statum & eminentiam, quæ sancta est, & in illo nullo peccauit, sed qui ea abutitur.

In quo assignantur causa & rationes, quare illorum opinio non sit tenenda, qui putarunt, summis pontificibus bonis & reprobis vniiformiter insitum & proprium esse, ut in pontificatu parum uiuant.

Ceterum ut huic articulo finem demus, ne de illorum summo numero, qui ab aliis mature tradita leuiter refellunt, nec causas reddunt: breui rationes & motiua adducemus, quibus aperte siue probatur, opinionem illam non esse ferendam, nec recta fide tenendam, videlicet summis pontificibus vniiformiter insitum esse, ut parum in pontificatu uiuant. Primo igitur id ipsum probat ea, quæ supra tetigimus. Secundo quia facti veritas longe aliter re demonstrat. Tertio ea vitæ breuitas, quatenus nostram tenet iusticiam, in nulla alia totius orbis monarchia, imperio aut principatu ecclesiastico aut mūdano reperitur. Quinimo si veteris legis summos pontifices, reges siue monarchas recolere libet, non eos tali lege taliq; censura cōstrictos reperiemus, veluti de Melchisedech, Moyse & Aaron, Heli, Eleazaro, & plurimis: qui longo admodum tempore in summo sacerdotio vixerunt, ut in *precedenti cap. tactum est*. Quarto quia (nisi fallimur) qui vitæ brevis necessitatem summis pontificibus imponunt, Deum arguunt acceptorem personarum. Nam cum *omnium hominum* (ut scriptum est) *vita est in voluntate Dei*, in quo omnes viuimus, mouemur & sumus, & ita iudicat magnū sicut paruū, quia scriptum est: *Puillum & magnū ipse fecit: & æqualiter cura est Deo de omnibus*, quinimo de hominis vita loquens Propheta ait: *Non accipit personam principis*. Et iterum: *Non subtrahit personam cuiusquam Dominus, qui est omnium dominator*. Subtraheret itaque personam, si præmaturæ vitæ eius præsidentem citius quam alios vita priuaret, atque à terra subtraheret. Quinto non est verisimile, sed à veritate alienum, Deum, cuius cura est de ecclesia sua (de qua per Prophetam dixerat: *quid potui facere vinea mea & non feci?*) velle quouis modo parare occasionem scismatibus & periculis, atque eam discidiis & diuisionibus patenter exponere, quod esset, si lege æterna & vniiformiter ordinasset vicarios eius in terris præ ceteris hominibus parum viuitu-

viuituros. Ex crebris enim huius sedis vacationibus, scismata, pleraque pericula ecclesiæ imminere & sæpe accidere perspicuum est. Absit enim à diuina bonitate, ut hoc fastigium apostolicæ sedis ab eo pro communi ecclesiæ utilitate, eiusque vnitatem institutum, in eius discidium, periculum & detrimentum conuerteret. & ex eo statu necessario scismata proueniunt, in quo sedentes necessario breui viuendum est. Nam (ut ait Hieronymus) *in remedium scismatis actum est, ut unus omnibus præsit.* & ob eam rem sanctorum virorum traditiones, & sacri canones, vacationes huius sedis, & obitus summorum pontificum plurimum formidarunt. Sexto, absit, quod ecclesiæ Dei in traditionibus & consuetudinibus suis, quouis modo erret, quæ spiritu sancto regitur. Ipsa tamen per totum mundum diffusa, sine intermissione pro vita & incolumitate Romani pontificis ad Deum assidue orat. Nam (ut pulchre canon sancti Bonifacii martyris ait) *pro Romani pontificis vita atque perpetuo statu, vniuersitas fidelium tanto instantius orat, quanto suam salutem post Deum ex illius incolumitate animaduertit propensius pendere.* Hæc sunt verba canonis. Ecce formalia verba, quæ omnem dubitationem tollunt. Erraret utique ecclesiæ, & improuide ageret, atque Deo contradiceret, orando pro illius longa vita & incolumitate, qui ex diuina dispositione, quæ eum voluit & præsciuit parum viuere, & sic necessario breui moriturus est. Septimo, ex ea breui & certa necessitate moriendi, aufertur summo pontifici magna utilitas, sed & grande meritum, quod ex incertitudine temporis mortis cunctis fidelibus prouenit. Nam (ut inquit Gregorius super illo verbo,) *qua hora non putatis, & cetera; Tempus mortis ideo Dominus nobis voluit esse ignotum; ut semper possit esse suspectum: & dum illud tempus prauideri non possumus, ad mortem sine intermissione præparemur.* Si ergo Papa parum se viuere sciret, per consequens mortem præuidere posset; quo fieri ut frustraretur tanto bono, videlicet timore mortis; quia secundum Gregorium: *Tanto plus mors timetur, quanto minus prævideri potest.* Præterea cum Papa sit in statu omnium perfectissimo, indignum est, ut propter eandem perfectionem alio proximo bono priuaretur; videlicet grandi merito, quod ex longa vita iustis prouenit. Quanto enim iustis viris magis prolongatur vita corporalis; tanto felicior redditur in effectu

præmii salutaris. Nam (Augustin. teste) *hæc vallis miseria sit eis vallis ubertatis bonorum spiritualium.* Fit etiam campus certaminis & pugna victoriosæ. *Est enim vita nostra* (secundum Bernardum) *locus lucrativus.* Ea dere Paulus longam vitam optauit simul & procurauit, cum submissus in sporta per murum, persecutoris insidias declinauit. Denique ipse Christus dulcissimæ matri suæ, post eius passionem, longam vitam promisit pariter & donauit. Sed & Iohanni Euangelistæ, quem Christus plurimum diligebat, & ad Apostolatam vocauit, non tamen sine suo & plurimorum profectu ad centesimum vsque annum vno minus vitam prolongauit. Quod ergo Christus dilectis suis promisit, donauit atque laudauit; id ipsum vicario suo negare non debet, pro illius ampliori merito & ecclesiæ suæ vtilitate. Octauo, hæc pontificis mors, quam præmaturam dicunt, aut est in illius pœnam, aut in præmium, aut est proprium cathedræ. Non quippe in pœnam, quia nullus sine culpa punitur. Scriptum est enim, *absit à te Domine, ut perdas iustum cum impio.* Iustus & rectus pontifex, si parum in pontificatu viueret, puniretur sine culpa: quod est inconueniens. Sed & alia ratione hæc breuitas vitæ, nec in pœnam nec in præmium esse potest. Quia ex eo quod necessario futurum est; quia *quod quis vitare non valet, non consequitur nec pœnam nec præmium,* secundum Augustinum. Si vero sedi annexum est, tunc sequatur absurdum necesse est, ut videlicet aliunde, quam ex volûrate propria, quis mereatur aut demereatur; consequatur pœnam aut præmium. Adde; quia Christus Romanam ecclesiam instituit duraturam vsq; in finem seculi. Indignum itaq; videtur, ut in sede perpetua sedens breuius viueret, quam in ceteris prophanis & temporalibus cathedris sedentes, imo congruum esset, ut longioris essent vitæ: & quod eis à natura prouenit, Deus, cuius est vicarius, non auferat. Inconueniens enim videtur, ut præsidens in sanctissima cathedra, diminutionem vitæ suscipiat à cathedra, quam bene viuendo honorat, & in ea viuens fidelibus proficit. Sed neque est largitati diuinæ consentaneum, ut abbreviata sit manus eius in vicario & ministro suo: de quo (ut supra tetigimus) per Prophetam promissum est: *quia si in preceptis suis ambulares, eriperet eum, & glorificaret eum, & longitudine dierum impletes illum.* Con-

firmam;

fitmantur prædicta: quia si pontificatus esset proprium parum viuere, Papa Dei vicarius & minister, esset peioris & durioris conditionis quam ceteri homines. Et hoc in duobus. Primo, cum ceteris, imo omnibus hominibus à Deo dictum sit: *ecce dedi ante faciem tuam vitam & mortem, bonum & malum*, si vniformiter breuis esset mors papæ, auferetur ei illud beneficium & istud bonum, vt sit ante faciem eius vita & mors. Secundum, cū Deus in dicta auctoritate appellet vitam bonum, & mortem malum; tunc ea sola ratione, quia eius est vicarius & minister, reciperet ab eo odia & mala, cum potius bona sumere deberet; quia scriptum est: *Qui ei ministrat, vita viuet*. Et iterum: *Ministros eius non derelinquet*. Absit enim vt Deus reddat pro bono malum.

CAPITVLVM VII.

Quo responderetur motibus illorum qui dixerunt, papam parum viuere in papatu. & in quo sensu sit intelligenda prædicta opinio, & quomodo cum veritate possit saluari.

Postremo, vt de statu Romani Pontificis nos absoluamus: quāquam ex supra dictis luculenter responsum sit rationibus & motibus in principio adductis, quibus aliqui sapientes & contemplatiui persuadere potius quam probare vili sunt, Romanis pontificibus vniformiter datum esse; vt parum in papatu viuant: nihilominus particularius satisfacimus prædictis rationibus. Deinde vt morem prædictis sapientibus geramus, qui positionē huiusmodi affirmarunt, deducemus breuissime, quo intellectu, quo sensu eadem positio intelligenda sit, videlicet Romanos pontifices non diu in papatu viuere. Primo igitur dicimus, rationes, persuasiones & motiua prædictorum scribentium ad vnum tantum fundamentum referri. Aiunt enim, vile esse fidelibus Romanorum pontificum breuem vitam, pro eo maxime, quia illius brevis periodus ceteris fidelibus terror est, vt sese ad mortem parent, agantque de commissis pœnitentiam: rursus vt dignitatum culmina facilius contemnāt. quæ omnia vnico verbo soluantur. Dicim⁹ enim, quia hac vilitate ex tali verisimilitudine pueniēti,

non eget ecclesia, præsertim cum illius expresso dispendio & vilitatis incommodo, ac capitis nostri crebra periculosaque subtractione. longe siquidem magis terroris atque timoris, mortalibus ex multorum quàm vnius interitu incutitur. Plusq; maioris ex plurimorum florētium iuuenum præmatura morte concipimus, quam ex senis vnius naturali morte maximis curis & sollicitudinibus constipati. Ad contemptum vero dignitatum alia nobis sunt tradita efficaciora documenta. Adde quia illarum natura potius quam possidentium mors ad eorum contemptū inducere videtur. Cuius illa (teste Boetio) contemnendi summa ratio est: quia recte spernenda est dignitas, quam maligni plerumque assequuntur, & quam plurima pericula comitantur. Ceteræ vero rationes persuasiones verius sunt, quæ contrariis & potioribus persuasionibus tolluntur.

Accedamus ad secundum, quod polliciti sumus, videlicet discutere & declarare, quo sensu intelligenda sit prædicta conclusio eorum, qui dixerunt Romanos pontifices vniformiter parū vivere in papatu. Dicimus igitur, quod multipliciter prædicta positio ad verum sensum reduci posset. pro quorum intelligentia inferimus breuissimas duas conclusiones. Prima est: quod Romanus pontifex recte & pie præsidens, licet paucis annis post papatum in mundo fuerit, longo tamen tempore viuit. cuius ratio est: quia totum tempus sui pontificatus sibi lucratus est, fuitque sibi idem tempus viuum. Secunda conclusio est: quod si Romanus pontifex non recte nec pie in papatu vixerit, licet centum annis in eodē pontificatu fuerit, tamen nō diu imo breuissimo tempore censendus est præsidere. Cuius ratio est: quia residuum imo totum sui pontificatus mortuum est. Vixit ergo mundo, longo tempore; sed Deo, sed fidelibus, sed sibi breuissimo, respectu fructuosa præsentia. Est ergo intelligenda positio prædictorum scribentium, secundum hanc vltimam conclusionem; videlicet quia verissimum est, quod Romanus pontifex non pie nec recte, sed inutiliter præsidens, quantocunque tempore in papatu fuerit, parum tamen in effectū viuit. Nam primo sibi modicum vixit, cum totam pene vitam inutilibus occupationibus perdidit: parum etiam Deo vixit, quo ad spiritualem fructum. Probandus igitur ac rebo-

roborandus est huiusmodi articulus. Primo igitur dicimus, quod Romanus Pontifex, licet longissimo tempore in papatu præfuerit, si tamen plurimis occupationibus inutilibus & curis & sollicitudinibus terrenis tentus sit, parum viuere dicendus sit. Pro cuius declaratione præsupponimus: quia secundum nostrum Senecam *non accepimus breuem vitam, sed fecimus: nec inopes eius sumus, sed prodigi.* Nam veluti amplæ & regix opes, si ad malum dominum venerunt, pereunt in momento: si vero, licet pauca, bono custodi traditæ sunt, vsu crescunt: Ita ætas nostra bene disponenti longa est: imo si ea vti scimus, longissima est; si vero nescimus, breuē vitā facimus. Papa igitur si inutiliter & reprehensibiliter in papatu viuit, parum viuit. Nā (vt aiunt Iuriste) *nihil & inutile æquiparatur: & præsidere non dicitur, qui inutiliter præsidet.* Ait enim scriptura, quia conquerebatur sanctus Iob, *quare impii diu viuunt?* Sed statim subiicit: *Veruntamen non sunt in manu eius bona illius; & numerus dierum illius dimidiatur:* quasi dixerit, non repugnat quod diu uiuant, & modicum uiuant. Nam non diu viuunt, qui diu in sua impietate viuunt, quia scriptum est, *abominatio est Deo vita impii.* Itaque quo ad Deum & effectualiter, paruo tempore viuit. & hoc est quod sub paucis, sed elegantibus verbis refert sapiens Salomon. Ait enim: *si quid impiorum longe vita fuerit, in nihilum computabitur.* Ex quo patet, quod vita eius (licet longa) breuissima reputatur. quod idem Sapiens confirmat. Ait enim: *Ætas senectutis vita immaculata:* quia vita longa, quæ per senectutem designatur, propria est vita immaculata. Ex quo sequitur, quod non viuere aut parum viuere censetur, qui inutiliter aut maculate viuit. Cæterū parum viuit Papa, qui terrenis occupationibus transigit tempus. Si enim Papa ad memoriam reducit, quantum vitæ sibi auferunt lites inutiles, causarum strepitus; quantum illa officiosa omnium rerum, quæ in orbe sunt, notitia; quantum morbi, quos manu sibi facit: videbit quod paucissimos annos sibi habuit, & parum ac breuiter vsus seipso fuit. Quomodo n. longo tempore viuit, qui non sapientiæ? non laudis studiis? non paci? non quieti Christiani populi vacat? Cum scriptum sit: *eruditio & sapientia veram vitam tribuit.* Non ergo diu viuit, cui distinetus animus est qui nihil speculatiuum, nihil intellectuale recipit: sed quicquid admittit, acti-

num & terrenum est. omnia velut inculcata conspicit. quinimo
 (vt quidam Sapiens ait) *viro occupatissimo nihil minus est quam viuere.*
 Si vero papa nihil ex suo tempore inutiliter labi permittit, sibi que
 vacat, eius vita longissima est, licet paucis sit annis computata. Ita-
 que (vt putamus) hic est sensus illius elegantissimæ Salomonis
 sententiæ: *Senectus* (inquit) *venerabilis est, non diuturna nec numero*
annorum computata. Ecce (inquit) *senectus venerabilis est, non diutur-*
na, diu viuendo sed sibi vacando: non diuturna plurimis annis, sed
actionibus sanis, nec numero annorum computata, sed virtute & ocio
 adornata. Itaque longissimo tempore viuuit, qui breui tempore,
 tamen sibi vacans, viuuit. quia quantumcunq; viuuit, id sibi totum
 tribuit. Romano vero pontifici, qui populorum curis angitur, ne-
 cesse est tempus deficere: quia illius vitam populus tollit & eripit:
 quo fit, vt parum ille viuere censendus sit, quia nullum aut modi-
 cum tempus in suos vsus conuertit. Et hoc est, quod idem Seneca
 dicit, quia *decipitur qui propter canos & rugas in fronte putat diu vixisse.*
 Non enim nauigasse putandum est, quem sæua tempestas à portu
 huc atq; illuc tulit, totumq; orbem egit: de quo dicere verum est,
 quia ille non multum fuit peregrinatus, sed plurimum iactatus. Ita-
 que cum Romano pontifici non desunt (vt dictum est) infelices
 & miseræ solitudinis causæ, adeo vt per tot occupationes nō so-
 lum vita non geratur, sed optatur ad negociandum: merito tam
 inutilibus occupationibus pressus, breuissimo tempore viuuit. quia
 qui omne tempus perdidit, paruissimo tempore viuuit. Adde quia
 omne tempus aut fuit, aut est, aut futurum est. Papa n. si pie nō re-
 git, si terrenis occupationibus deditus, nec spiritualibus intentus
 sit, non vacat respicere præterita: & si vacat, molesta est recorda-
 tio. Quomodo n. iocunde recordabitur, si ambitiose cōcupiuit? si
 superbe præfuit? si arroganter ceteros contempsit? si auare cōgre-
 gat, p̄dige effundit: necesse est harum rerum memoriam teneat.
 Nā omnis ætas aut præteritorū obliuiscitur, aut illorum cum mo-
 lestia recordatur. Constat tamen quia præteritum certior est pars
 nostri tēporis. præsens vero tēpus p̄breue est. ante desinit q̄ inci-
 piat. solū tamē hoc tēpus papa habet, q̄ tam breue est, vt teneri nō
 possit. Futurū vero dubiū est. Quo fit, vt Romano pontifici onne
 tempus p̄breue sit. Nam præsens tempus propter sui breuitatem,
 aut

aut nō sentit aut negligit: futura timet: præterita cruciant: sic omne tempus breue est. Rursus aliō sensu papa non diu viuit: quia parum viuit, qui assiduo timore mortis astringitur. Facit enim ipse timor Romanum pontificem vitam perdere: quod est non viuere, quia iuxta Catonem:

Qui metuit mortem, quod viuit perdit id ipsum.

Non sic apostolus Paulus timebat mortem, sed plerumq; optabat. Ille enim quia pie & iuste præfuit: quia nihil sibi conscius erat, intrepide dicebat: *cupio dissolui, & esse cum Christo*: mori non timebat mundo, qui optabat Christo viuere. sed & alibi vitam pœnam putabat, & mori lucrum. Ad hunc sensum dicebat sapiens, quia *iustus cito perit; impius autem multo viuit tempore in malitia sua*. Iustus, (inquam) cito moritur: quia quanquam paucis diebus in seculo manserit, multo præmiorum cumulo floruit. Itaque quo ad numerum dierum, brevis eius fuit vita: sed quo ad fructum & meritum, longissima. Nam (vt inquit Cyprianus) *iustus magis letatur quod breuem (sed bonam) vitam egerit: quam quod longam non viderit*. Impius vero longo tempore viuit in malitia sua: quia licet multis annis in seculo vitam egerit, paruum tamen fructum peregit: qua de re in effectu, breuissimo tempore viuere iudicandus est. Vel alio modo, impius longo tempore viuit, quia cum cogitationes suas in longum ordinat, diesque sibi multos promittit, meditatione & desiderio suo, longo tempore viuit. Vel alio modo: Impius longo viuit tempore: id est, toto vitæ suæ tempore viuit in malitia sua. Totum enim tempus vitæ alicuius licet breue sit, multum dicitur sibi, veluti alias dicitur: quod *multum dat, qui totum dat*. Nec intelligenda verba sunt vt sonāt, quod impius longo annorum tempore viuat, ne contradicat prophetæ sententia, qui ait: *Viri impii non dimidiabunt dies suos*. Denique, aliō sensu papa non diu viuit: quia qui diu viuere cupit, diu viuere non videtur. Vnde Chrysostomus: *maximum vitæ impedimentum est viuendi cupiditas*. Et Cyprianus: *Illius est in mundo remanere velle, quem mundus oblectat*. Et (vt supradiximus cum Gregorio) *male viuunt, qui diu se viuuturos desiderant*. Desideranti enim diu viuere omnis ætas brevis videtur; quippe qui nullā mortis diē videre vellet. Non sic vitam concupiuit rex & propheta Dauid. quia n. pie

& iuste præfuit, non desiderabat diu viuere ; quinimo dolebat, quod incolatus suus prolongatus esset. Cum ergo Romanus pontifex pie regit, semper in eius meditatione mortem præstolatur, illamque exoptat. quare recte parum viuit, quia parum vitam extimat. Non sic de impio, de quo ait Sapiens : *O mors quam amara est memoria tua homini iniusto, habenti pacem cum substantia sua.* Et (vt paucis agamus) sancti prophetæ & qui pie populis præfuerunt, clamabant, desiderantes liberari de carcere mortis huius : & tanquam inuiti detinerentur, voluntarie moriebantur. Quo fiebat, vt iuxta eorum desiderium parum viuerent in seculo. Romani vero Pontifices è contrario mori timentes, clamant desiderantes viuere, quanquam plurimis annis uiuant, cum tamen præter eorum præsentem moriuntur, non tanquam exeant de vita, sed tanquam extrahantur, clamant parum vixisse, quia nunquam mori vellent. Factemur tamen, quia si papa ad fructum spirituales, & ad lucrum animarum ac fidei incrementa, occupationes recipit, longissime viuit, licet breuissimis diebus præfuerit. Idque ager, si iuxta quen-dam Sapientem, totius orbis rationes administrat, tam parce quàm alienas, tam diligenter quam suas, tam religiose quam publicas. Longe diffusius, quam putauimus, egimus de Romani pontificis statu, illiusque sublimitate & excellentia : necnon de eius infelicitate, prosperis & aduersis, dulcibus & amaris. Superest vt trans-eamus ad statum sequentem perfectum & excellentem: videlicet dominorum Cardinalium. Deinde ad omnes alios gradus & ordinis ecclesiastici & spiritualis status.

CAPITVLVM VIII.

De excellentia & prerogatiua status & dignitatis Cardinalatus : & de laudibus & praeconiis eius.

Cardinalatus siquidem dignitas & excellentia, post summum pontificatum vltra omnes Ecclesiæ dignitates supereminet, ac culmen, gloriam & potentiam obtinet : quippe qui eodem summi pontificii splendore coruscat. Quis enim radios splendidi-ssimi solis, ab eius lucis claritate, à gloriæ & laudis immensitate diuellere

uellere conabitur. Aut quis membra à corpore, ramos ab arbore separabit: nisi forte quis dicat: quia plurimum inter hos & illos interest. Truncata siquidem altissima cedro, rami arescunt: eclipsato sole, radii deficiunt: mortificato corpore, membra motu frustrantur. Sed in cardinalibus mystici corporis ecclesiæ, eclipsato morte pontifice, illorum officium non decrescit, sed dignitas virefcit: non confunditur, sed magis diffunditur. quinimo in seipsis tota pene ecclesiæ auctoritas refunditur. Dum tamen agit in humanis, illius & illorum tanquam capitis & membrorum vna est laus, quorum vna est virtus, vna excellentiæ gloria, eadem inseparabilis vnitas. Tanta est enim inter Romanum pontificem & cardinales cōmunio, tanta vnio, vt omnis summi pontificatus excellentia, & culminis eminentia illorum esse videatur, vt vnū corpus reputetur. Nec modo vnio inter eos vnitissima cōsistit, quinimo (vita dixerim) eadem idētitatis, adeo vt q; vel fauore vel odio illa sedem cōcernit, & cœtum cardinalium veluti partes corporis sui tāgere censendum sit. Hinc Sapientes voluerunt ex ea ipsa idētitate, cardinales summæ præfuli fidelitatem aut obediēciam iurare, vel præstare non oportere, veluti nec à seipso quis fidelitatē requirit, cū inter petentē & dantem debeat esse distinctio. Ea igitur de re Romanus pontifex in numero cardinaliū se cōnumerat; sicut Imperatorē legimus in senatorū numero cōputari. Hi sunt præclara ecclesiæ luminaria, & candelabra splendore lucis & decore excellentiæ radiantia: de quibus scriptum est, quia *luminaria cardinalium dederunt lucem*. Hi sunt, de quib. Zacharias propheta ait, quia *tanquam filius splendoris assistit dominatori vniuersæ terre*. Hi sunt bafes & columnæ ecclesiæ sacrosanctæ: vt pote qui suorum virtutibus meritorum, vicarii Iesu Christi latera tenent, & illius amplissimi hostii sunt firmissimi cardines, quib. totus voluitur orbis. Hi sunt sacerdotes Leuitici generis, qui excellentiore iure, quam Leuitico, id est, diuina auctoritate in executione pontificalis officii Romani præfulis, & apostolici throni coadiutores existunt. Hi sunt, qui vt nubes volant per altitudinem status, & eminentiam dignitatis, & quasi columbæ per puritatem ad fenestras suas, id est ad sensum corporalium coercionē. Hii sunt magni cōsiliarii summi pontificis, quorum sapientia mundus regitur, qui ex obscuris

Papa &
Cardinaliū
cōmunio.

aperta faciunt, ex paruis magna, ex partib. tota; qui in privato publicum agunt negociū, & plus vacādo vtilitatis asserūt, quam alii actiones exercendo, veluti nauem gubernātes, licet quieti sedent in puppin, tamen multo maiora & meliora agunt exteris nauigantibus, & cuncta corporis membra mouentibus. Hi ex toto orbe terrarum, pauci ex multis, singulares ex omnibus assumuntur, atq; a vulgaribus officiis educti, ad ipsius orbis regimen euoluuntur, & in marcido corpore exercent mentis vires, eo sapientia & prudentia magis apti negotiis, quo in exercitiis corporis minus possint. Hos gentilitas prae signabat, quos prothoflamine appellabat. Nam istorum typum gerētes magno honoris cumulo fungebantur. Et nedum actu, sed habitu & ornatu à ceteris reip. ducib. differebant: quippe quorum nomina aureis merito litteris scripta erant, apud quos erat auctoritas omnium gerendorum. Hi sunt principes nominati in orbe; principes Leyitarū, offerentes sacrificia. Hi sunt principes, qui congregati sunt cum Deo Abraam, Dei vicario, patre multarum gentium. Hi sub nostro Christo, optimo imperatore, principes sunt constituti super omnē terram, nō utiq; in hac vel illa ciuitate siue prouincia, sed super omnem terrā. Quae res agit, vt non de episcopis principatus ipse intelligi debeat, qui determinatas habent prouincias. Si igitur vnus vrbis rectores in summa gloria habentur, quāto erit gloriosius, totius orbis principes fieri? Hi ad statum perfectum assumpti, Christi vicario assistunt: in quo assistentia genere Apostolorum typum repraesentant, atque assistendo sanctitatem participant. quia scriptum est: *Quos eligit, appropinquabunt ei, & sanctificatur in his qui sibi assistunt.* Et veluti in cœlesti hierarchia cherubin atque seraphin, ceteraq; cœlestium spirituum agmina, singulari quadam assistentia prerogatiua ceteris angelis missis excellentiora sunt: nec aliter in ecclesiastica Hierarchia cardinales statum assistentium tenentes, ceteris episcopis & ecclesiæ praelatis, qui missorum statum gerūt, dignitate & gradu merito praecedunt. Congruum enim atque dignum videtur, vt veluti Romana ecclesia prior digniorque omnium existit, tanquam domina & magistra, sic & illius ministri singulari quadam honoris prerogatiua, & dignitatis excellentia ceteris praefulgeat. Hi certe à cardine nomen ducunt, quia veluti

*Prothoflamine
mines praefu-
rabant
cardinales.*

*Hierarchia
ecclesiastica
similis cœle-
sti.*

*Cardinales
ut à card-*

ut in materiali hostio templi duplex est cardinum genus, superius videlicet & inferius, sic in viuis cardinibus duplex consistit mysterium, superius & inferius, spiritualium videlicet & temporalium sedula administratio. Vtrumque igitur in his cardinibus voluitur: quia vitum que ecclesiæ expedire agnoscitur, diuerso camen calle. Alterum quidem vt instrumentum admittitur, alterum vt fructus quaeritur. Deseruit ancilla dominæ, & illam sequitur & obsequitur. Per eosdem certe hostii cardines domina intrat & seruat; sed finito ancillæ ministerio, aut forte vt altera Agar superbiente, eiciatur ancilla foras, & recumbit domina cum spōso: serua non expellitur dum ministrat, sed sustinetur, quia seruit. ideo seruatur, quia decorat statum dominæ, de qua scriptum est: *Cum ancillis gloriosior apparebo.* Absit tamen vt filius ancillæ sit heres cum filio liberæ dominæ. Diuersus est vtriusque finis. modesta temporalium occupatio, dum exteriora sine culpa sollicitat, durabiliora ornatioraque spiritualia facit. Sacra enim cum auro splendent, sordescunt sine gemmis. Nectamen ea temporalium cura excellentiam, aut status perfectionem in cardinalibus minuit, dum non sit affectanda pro libito, sed utilis, sed officiosa pro ministerio. quinimo plerumque perfectionem auget, dum per eadem temporalia proximorum saluti prouidetor. Paulus siquidem aliquando ad tempus contemplatione caruit, vt per extrinsecas actiones plurimorum prodesse utilitatibus. Hi sunt alii seraphin, qui ardentes interpretantur siue sustinentes, quia eorū assiduo obtuitu & familiari cōseruatione frequentib. obsequiis spōsi, ecclesiæ ardentissime intendunt: & super eorū humeros non modo Romanæ vrbs, sed orbis vniuersitas, & totius eius machinæ pondus infidet: de quibus scriptum est, quia *Dominus sunt cardines terræ, & posuit super eos orbem.* Hi sunt vigilantes, hi custodes pro omnium salute, quia dormientibus nobis ipsi per uigilant, quasi ratione pro nobis reddituri. Dum enim dormire eos putamus, uigilant animo, hostium insidias, infidelium machinamenta, & persequentium ecclesiam fraudes explorant sagaciter. Hi anticipant cōsilia malignantium, deprehendunt laqueos, elidunt tendiculas, retiacula dissipant, iniqua impiorū cōsilia frustrantur. Hi tandem omnia tolerant, orantes pro populo & sancta ciuitate. Vc-

ne non
occupant.

totius orbis
& orbis ma-
china cardinibus
custodibus in-
fide-

rum quia ecclesia ciuitas est propter collectionem, sponsa propter dilectionem, grex propter pascua: Cardinales Ecclesie recte custodiam & concordiam inuigilant, quia ciuitas est: inuigilant pastui, quia grex est: inuigilant ornatui, quia sponsa est. De quibus propheta ait: *Super muros tuos constitui custodes.* Et iterum: *cardines ostiorum domus Domini interioris sancti sanctorum, & ostiorum domus templi ex auro erant purissima.* Ex his igitur apertissime noscitur huius spiritualis status eminentia, sublimitas & excellentia: illiusque necessitas & summa utilitas. Colligitur denique, quanta sit huius status felicitas & commoditas. Superest tandem, ut illius calamitates & miseriae, infelicitates atque pericula breuissima audiamus.

CAPITULUM IX.

De plurimis anxietatibus & aculeis, laboribus & periculis, status & dignitatus Cardinalatus: & de oneribus, quae incumbunt huic dignitati.

Felix certe & totius prosperitatis honoratior atque beatioret, si Cardineae dignitas: nisi plures longe, miseriae atque calamitates illam premerent, quam felicitatis & dulcedinis cumulus demulceret. Quo fit, ut qui rectus, qui iustus, qui aequus huius rei censor extiterit, utique reperiet statum illum multis calamitatibus & amaritudinibus respersum esse, ut de eisdem in hoc status culmine sedentibus Augustinus dicere videatur, quia *summis felicitatibus Deus amaritudines immiscet, ut alia queratur felicitas, cuius dulcedo non est fallax.* Fallax certe istius status sublimitas est, fallax gloria, si se falli permiserit, nisi illius dulcia ut amara confideret. Illa enim sumentem reuoluerit, experietur utique, quia potius grauat quam subleuet, plus premit quam praemiat. Cuius est proprium, teste Chrysostomo, *ut sic suis applaudat, ut noceat: sic in via fortunatos demulceat, ut in fine perniciem operetur.* ab initio siquidem propinat dulcia, ut cum inebriati fuerint, letale virus commisceat. In primis itaque sciremur, hunc statum cardineum sublimem fore atque gloriosum, si bene in eo voluit orbis. Si ita ecclesiae status

status voluitur, vt non potius inuoluatur: Si in eo iusticiæ rectitudo immobiliter voluitur, & constanter vertitur, vt cum expedit, volubiler permaneat: Vnde Hieronymus qui eodem decore fulgebat, de se & illis dicere videtur: *Grandis est (inquit) dignitas, grande officium, si quæ illo digna sunt, perscimus.* Errurus: *Lætatur de ascensu, sed non timemus lapsum.* Et subdit: *non enim tanti est gaudii excelsa tenuisse, quanti maris dignitatis onera non impleuisse.* Itaque vt putamus, qui in hoc statu lætabundi sedent, lætari desinent, si illius sarcinas, si onera, si misérias recta mente penſauerint, id quæ si quadam supina aut affectata ignorantia ignorare voluerint, in ea tempeſtate eos periclitari necesse est. vt enim inquit Augustin. *Eger co mori propinquior est, quo à proprii morbi cognitione est remotior.* Agnoscant ergo, qui hoc culmen tenent, dignitatis naturam, quæ plerumque possessorum animos per abrupta elationis rapit. Et quia eo quisque extollitur, qui se supra alios videt, in superbiam & abufionem erigitur: non curat prodesse, sed gloriatur præſſe: præſumit ſe meliorem: quia ſe cernit ſuperiorem: priores dedignatur amicos, notos ignorat, contemnit antiquos: vultum auertit, cernicem erigit, grandia loquitur, cum exigua operetur, ſublimia meditatur: ſubefſe non patitur, qui præſſe molitur. Utinam ex conſideratione veri domini decreſceret tumor ſuæ dominationis, vt dicere poſſit: *nec ambulau in magnis, nec in mirabilibus ſuper me.* Rurſus gloriari deſinent, ſi pondus ſeruitutis, ſi molem ſollicitudinum, ſi turham curarum & anxietatum, ad mentem adduxerunt. De quibus ait Iob: *Ecce gigantes gemunt ſub aquis.* Vbi Gregorius: *Quanto quis altior erigitur, tanto curis grauioribus oneratur.* Et ſequitur: *Homo in ſublime poſitus, tantos ſupra ſe ſuſtinet, quantos dignitate præcellit.* Ideo gigantes in eccleſia potentes, videlicet cardines, recte gemunt ſub aquis, id eſt, ſub populis. Et quia ſcriptum eſt: *Aque multe populi multi.* ſub quibus contremiſcunt, quia illorum aſſidua cura grauantur, & illorum peccatis damnantur.

Deniq; non gloriantur cardines ipſi, quia ſponſo eccleſiæ aſſiſtunt; eiusque adiutores atq; conſultores inſtituti ſunt. Si enim ad mentis acie redaxerint, quâtis laboribus plena ſit ac ærumnis, ea Romani pontificis aſſiſtentia, ea conſulendi & iuuandi neceſſitudo; quantique periculis reſerta ſit illa. deſiderata ad Papam pro-

xiinitas; cythara gaudii vertetur in luctum. Quanto enim Lucifer fuit Deo propinquior, tanto grauius peccauit atque ruit.

Nimia propinquitas auers.

Nimia plerumque propinquitas nocet: nec ignis lædit, nisi appropinquantem: Cognoscant igitur, quia assistentes sunt, non insistentes, ne dixerim obistentes: coadiutores, non impeditores: assistentes bono, resistentes malo: applaudentes bonis, impugnantes peruersos: ut sint, de quibus scriptura ait; *Qui assistis, assistat quasi Gyon in die vindemia. Gyon conflictus vel lucta dicitur. In vindemia vero mali fructum rapiunt.* Qui igitur summo pontifici assistit, conflictum aggreditur contra eos, qui fidem & ecclesiam impugnant. Assistere ergo quippe & resistere, iuuareque omni tempore sint cardines parati, non modo in prosperis, sed aduersis: ne de illis Romanus pontifex recte conqueratur, quia ei assistunt, non autem in oportunitatibus, non in tribulatione. cum autem tribulatio proxima est, non est qui adiuet. Demum propinqui sint, ut consultant, non ut consumant, sicut scriptum est: *Quos eligit, appropinquabunt ei, nec derelinquent eum.* Utinam qui tam proximi sunt in dignitate, propinqui sint in sanctitate; ut de eis Romanus ipse pontifex recte dicere possit, quod in Leuitico ad Leuitas dicebat summus Sacerdos: *Sanctificabor in his, qui appropinquant mihi.* Sed prohdolor, verendum est potius, ne nimia propinquitate ipsi dracones sint iuxta arcam domini: ne de illis dicat ecclesie sponsus: *aduersus me appropinquauerunt.* Videant rursus, quia difficillima res est tanto tribunali assistere; difficilior sic consulere, ut simul prosint & placeant; & longe omnium difficillimum, ut in assistendo sit animus, in consulendo liber, non odio, affectui, non passioni obnoxius. Nam iuxta quendam Sapientem apud magnum tribunal difficile est sic consiliari, ut sit in verbo veritas, in consilio fides, in commissio silentium. Ille siquidem (teste Ambrosio) recte consulit, qui utiliter assistit, qui seipsum formam & exemplum exhibet in doctrina, in grauitate, ut sit eius sermo salubris, consiliū vtile, vita honesta, sententia decora. Denique quantum curæ, quantum sollicitudinis, quantumque miserie, laboris atque periculi in ea assistentia vertitur, illud aperte indicat; quia quicquid egrū, quicquid marcidū, quicquid turbulētū, aut inquietum in orbe erit, totū eis curandū tribuitur. Quicquid deformationis, aut morū corruptionis in mūdo erit, summo pontifici

De consiliariis. Conditiones boni consiliarii.

Omnia vicia totius orbis ascribuntur papa & cardinalibus.

tifici simul & cardinalibus imputatur. Si pestis, si fames, si in Deum & proximos fideles peccauerint, si vitia excreuerint, eis imputabitur, qui (vt Scriptura ait) *comedunt peccata populorum*. Nam (iuxta Ambrosi.) *cum populus indisciplinatus reperitur, signum est, quia sacerdos non est sanus*. Vnde Gregor. in quadam Homelia: *vbi subiectus ex sua culpa moritur, ibi is qui præest mortis causa inuenitur*. Et (vt paucis agamus) tot sunt Cardinalium miseriae & calamitates: tot mentis & conscientiae remotiones: quot sunt præceptorum & rerum eis incumbentium transgressiones. Quae omnia enumerare per quam difficile foret.

Ceterum congruit gradui, congruit ordini cardinalium, expedit honori, conuenit oneri & periculo, vt considerent se cardines fore, atque custodes ostiorum domus Dei: per quæ nemo facile intrat, nisi per cardinum ministeria. Ad eos igitur circumspicere pertinet, quis ingreditur & egreditur. Cœntur itaq; vt intrēt habētes vestes nuptiales, & qui digni reputētur, claudantq; indignis. Clausa erat Iherico, vbi positi erant principes, vt viderent intrantes & egredientes. Et in libris Iudicū: *Custodes vigilabant clausis diligentissime ostiis domus Dei*. Sed caueant, ne claudant ostia his qui intrare deberent, percutiētes eos qui foris sunt, quos scriptura commemorat, quia *claudunt ostium cum intrinsecus fuerint*. Rursus inuigilent custodiz cardines ipsi, duo enim Simones eis occurrerent, assidue inuicē cōtēdentes, quos nō equa lance amplectātur. alterū sequantur, alterū persequātur. Simonē magū corrūpere nītentē expellant: Simonem Petrum ei maledicentem admittant. Simonem magum & filiam eius eiiciant, quia ad eosdem cardines scriptura ait: *Claudite ostia, ne simas eis eam intrare*. Et iterū in libris Regum: *Eiice eam, & claudite ostium*. Vterq; Simon negociatur vt intret, sed longe dispariter. Simon Petrus iniqua domus Dei commertia damnat: alter Simon admittit. ille terrena vendit, vt cœlestia assequatur: iste spiritalia emit, vt temporalia adipiscatur. Ille dum gratis accipit, gratis dat: Ille id precio vendit, q; precio emit. Simō magus ait: *Accipe nummos, vt habea gratia Dei largitionē*: Simon Petrus ait: *Pecunia tua recūsis in perditionē*. Ille nihil habēs terreni, multum diuini muneris clargitur, cū ait, *Quicquid habeo tibi do*. Ille plurima habens nihil dat virtutis, quia eximauit donum Dei posse

pecunia comparari. Intret denique Simon Petrus, cuncta visitet & operetur; pellatur Simon inagus, qui vulnerat, nec medetur. Ille claudos sanat & grotantes; iste sanos efficit claudicantes. Ille curat aliorum oculos; iste implet suorum loculos. Ille intret qui ait: *surgere & ambula*: Alter expellatur dicens: *qui venerit ad me, non eiciam foras*. Ille in nomine Iesu Nazareni suscitatur mortuos: hic in nomine Zabuli mortificat viuos.

*De vestium
pompa.*

Demum expedit cardinalibus iactantiam & ornatum exteriorum fugere. Non sint de illorum numero in quibus cernitur vestium cultus plurimus; virtutum autem nullus aut exiguus. Pompa enim vestium toleranda pro tempore, non affectanda pro libito: permittenda pro status decencia, dimittenda pro scâdalo. Auaritiam, ut scorpionem, cardines fugiant, quia de illis scribitur: *Percute cardinem & commoveantur super liminaria: quia auaritia in capite & plateis eorum, propterea nouissima eorum consumam*. Post aurum non eant: Christum, non quæstum sequantur. affluentiam rerum non quærant, nisi virtutum & donorum spiritualium. Viten mensuram luxuriam, congeriem vasorum: quia hoc non est ornare ecclesiam, sed spoliare: non est decorem maiestatemque custodire, sed perdere: non est defendere, sed exponere. Rursus exponant semetipsum pro domo Domini. Exeant ex aduerso potentibus seculi. Regibus se exhibeant imperterritos, ut Iohannem: iniustis, ut Moysen Ægyptiis: fornicantibus, ut Fincees: Idolatris, ut Heliam: auaris ut Elizeum: ut Petrum blasphemantibus: ut Paulum persequentibus: vulgum non spernant, sed instruunt: diuitem non palpent, sed terreat: pauperem non grauent, sed foueant: dignos promoueant, indignos expellant. Et (ut inquit Canon) *querant eos in ecclesia columnas erigere, quos plus cognoscunt prodesse: non quos vel ipsi amant, vel quorum sunt precibus & seruitio delinquenti, vel pro quibus ut prælati fiant, muneribus impetrarunt*. Et cum Apostolorum typum teneant, distribuatur dignitas pro meritis, non pro volitis: distribuant unicuique prout opus est non sibi, sed populo. Iuvenes doceant, non exaltent: minas principum non paueant, sed contemnant: ecclesias non spolient, sed ornent: marsupia non exhauriant, sed corda reficiant, & crimina corrigant: studiosos diligant, ignorantes ignorent, quia scriptum est: *ignorans*

igno-

ignorabitur. De dote viduæ & patrimonio Crucifixi, pauperes pascant, non in conspectu hominum, sed Dei. Nec reprehendimus quosdam, qui pauculas escas egenis erogant, quæ de sua & suorum superest mensa: sed eos inculpamus, qui preciosiora recondunt, more illorum, de quibus Matthæus ait, quia decimant mentam & anetum acciminum: & relinquunt quæ grauiora sunt: quoniam hæc oportet facere, & illa non omittere.

Iubentur denique cardines viriliter stare pro afflictis, & iudicare æquitatem pro mansuetis terræ. Iubentur denique vacare morum correctioni, insistere concordie, inuigilare paci, infidelium expugnationi & fideli augmento intendere, eamque usque ad sanguinem tueri, in cuius typo rubei pilei insigniis decorantur. Sint denique in loquendo modesti, in aduersitate securi, in prosperitate deuoti, in hospitio non dissoluti, in conuiuio non effusi. Demum sint pontifici fideles, infidelibus comportabiles. sint ad petendum verecundi, ad negandum iusta difficiles. Sint grati postquam acceperunt; sint largissimi exhibitores, & parcissimi promissores. Et (vt finem verbis, sed non mentis dolori imponamus) tales interius exteriusque cardines ecclesiæ existant, quales se velle esse professi sunt. Tales sibi appareant, quales ab hominibus reputari cupiunt. hoc sit illis pudor, alios esse, & alios apparere. Fuere quidem multi, quibus expediens minime fuit apparere & conspici. Sed (proh dolor) in omni statu experimur alios esse, alios apparere: vt illud Anticlaudianus apud omnes verum sit, quia aliquando non sunt homines quod videntur: sape vero plures sunt, quam appareant: vt gloriæ eis sit ascendisse. Postremo id vellem cardinalium cordibus semper defixum sit, quia si tandem diuersis illecebris delitescunt, nec eis onera incumbencia pertimescunt, vereor ne illud Amos Prophetæ audiant: *Stridebunt* (inquit) *cardines domus Dei in illa die.* Et iterum illud Esaïæ: *Super muros tuos constitui custodes: ipsi vero, sicut locusta vineam depasti sunt.*

De sublimitate, excellentia & dignitate status patriarcharum, archiepiscoporum, episcoporum, praelatorum, presbyterorum & minorum ecclesiarum & de perfectione status eorum.

Cogit ordo pollicitus, ut attingamus ceteros status hierargicos vitæ spiritualis: videlicet patriarcharum, archiepiscoporum, episcoporum, archidiaconorum, curatorum, & aliorum clericorum sub ecclesiastico ordine degentium. Cuius status, dignitas & excellentia, non satis à mortalibus laudari; extolli & commendari potest. Conficeremus quidem magna volumina, si ea omnia adduceremus, quæ illorum excellentiam & sublimitatem demonstrant. Pauculatamen sub quodam breui epilogo perstringemus; quantum præsertim ad propositi rationem pertinet; quoniam latius excellentiâ huius status deducimus in libro *Defensorii status ecclesiastici*, ubi prædicta comprobamus non solum ex fundamentis iuris naturalis, sed testimoniis & exemplis veteris legis, ac etiam ex ipsa gentilium obseruantia, necnon testimoniis nouæ & euangelicæ legis, & demû auctoritatibus & fundamentis iuris humani. Nam (ut cetera taceam) quis dubitat pontificem ac sacerdotalem dignitatē principiū sumpsisse ex ipso naturali iure? quo (ut inquit Philosophus in *politico*) homines naturaliter inclinatur ad sacrificia: quæ non nisi per pontifices & sacerdotes, etiam ipsa antiquitas, instituenda celebrandaque duxit. Sed illa gentilitas naturalituri innitens, hanc pontificum & sacerdotum summam super omnes mortales dignitatem & excellentiam, nedum institutis, sed humili ac deuota obseruatione professâ est. Nam (vi Plutarcho placuit & Policratus refert) apud gentiles, eos, qui religionis cultui præerant, quos pontifices appellabant, quasi typum animæ in corpore humano tenentes, super omnes mortales venerabantur, eisque subiiciebantur. Sicut itaque anima totius corporis habet principatum, cunctaque membra vegetat, eique obsequuntur, & illorum gerit principatum: ita pontifices, quos ipse Plutarchus etiam *præfectos diuino cultui* vocat, toti corporis communitati præsint oportet. Subdens, quia & Augustus Cæsar sacrorum pontificibus co-

ulque

Ordo sacerdotalis ex iure naturalis principium sumfit.

usque subiectus fuit, donec & ipse (ne cui mortalium subesseret) Vestalis creatus est pontifex. Demum *in ipsa veteri lege hic excellentissimus ordo institutus est, & in noua plenius confirmatus*, vt inquit Isidorus. Nam sancti doctores sacrificium, & per consequens sacerdotiū a Abel & Chayn incepisse aiunt, qui primo sacrificarunt Deo. Vnde creditur Adam in spiritu & iussu Domini, docuisse filios sacrificare Deo. quare dicunt ordinem sacerdotii tunc primo incepisse. Sed putamus vtrumq; recte stare posse. quoniā ante legē, sacerdotium & sacrificium incepit ab Adam & filiis eius, videlicet implicite & sub quadā figura: sub lege vero explicite & expresse iussu Domini incepit ab Aaron. Alii a Melchisedech, iuxta illud: *Tuesacerdos in aeternum secundum ordinem Melchisedech*. Sed, vt diximus, *sub lege Aaron primus iubente Domino victimas obtulit*, vt inquit Isidorus. Quocūq; modo sit, ex ipsa temporis primitate & diuturnitate, ac instituentis excellentia, sancti status sanctitas atq; sublimitas apertissime cōprobatur. Demum vero ipsa pōrtificalis & sacerdotialis excellentia & sanctimonia ex hoc agnoscitur: quoniam sublimiori nomine, quā cogitari potest, in sacra scriptura episcopi, sacerdotes & ecclesiæ ministri nominātur. Appellantur enim *dii*. Sacerdotes dii appellantur. Vnde in Exodo scribitur: *Diis non detrahes*: per Deos, episcopos & sacerdotes intelligens, vt ait quidā Canon. Rursus ordo ac status ipse in eo eminētissimus atq; sanctissimus est, quia typū tenet celestis hierarchiæ. Nā ipsi ecclesiæ ministri ecclesiasticā cōficiūt hierarchiam. Ipsi quoq; in sortē Dei electi sunt, & ipse fors illorū est. Ipsi denique tantæ excellentiæ & dignitatis existunt, vt merito a cunctis seculi principibus & christianæ fidei cultoribus *patres* appellentur. Vnde Greg. *Quis dubitet ecclesiastici ordinis viros, venerandos fore, quos Regum & Principum, omniumq; fidelium patres & magistros censeri compertum est?* Et sequitur: *Nonne miserabilis insania esse videtur si filius patrem, discipulus magistrum nō honorent?* Et iniquis obligationibus illum potestatis sua subiicere, a quo credit non solum in terra, sed in caelis ligari posse & solui: Et iterum idem Gregor. circa principium Pastoralis inquit: *Honor & sublimitas nullis poterit comparationibus adaequari: si Regum fulgori compares, & Principum diazemat, longe inferius eris: quam si plumbi metallum & auri fulgorem compares. Quippe cum videamus Regum colla & Principum submitti genibus sacerdotum, &*

osculata eorum dextra orationibus eorum credant se contineri. Et Ambrosius in pastoralis: Magna est excellentia & sublimitas episcoporum: quae sicut maxima est, ita maximam debet habere cautelam: quia honor grandis, grandiori debet sollicitudine circumvallari. Et rursus Ambrosius: Nihil in seculo excellentius sacerdotibus, nihil episcopis sublimius reperiri potest: ut cum dignitatem eorum oculis demonstramus, digne noscamus quod sumus: & quod sumus professione, actione etiam demonstremus, ne si: gradus excelsus, & deformis excessus. Denique Ioannes Chrysostomus huius status gradum & excellentiam signans ait: Sacerdotibus ecclesia Deus cunctos voluit esse subiectos, ad quos uniuersa, quae in ecclesia occurrunt, voluerit pertinere. Et Augustinus clericorum statum & ecclesiastici ordinis sublimitatem & sanctimoniam designans, ait ad Mauritium: Sacerdotibus & Levitis ecclesiae non ex terrena potestate Dominus noster, sed excellenti potentia, propter eum cuius serui sunt, ita eis dominatur, ut debitam eis cuncti ventremiam impendant. Et subdit: nam in diuinis eloquiis ecclesiastici ordinis, clerici & sacerdotes aliquando dii, aliquando angeli vocantur. Nam & ad Moysen de eo, qui ad iura deducendus erat, dicitur: Applica eum ad Deos, videlicet ad sacerdotes. Et rursus scriptum est: Deus non detrahas, id est seculi sacerdotes. Et iterum: Ego dixi, dii estis. Et Propheta ait: Labia sacerdotum custodiunt scientiam, & legem de ore eius requirant, quia angelus Domini exercituum est. Quid ergo mirum, si Reges, si Principes, si cuncti fideles eos honorent, quibus in suo eloquio honorem tribuens, aut Angelos, aut Christos, aut Deos, Deus ipse appellat? Grandis ergo est excellentia status & ordinis clericorum & pontificum, veluti qui eius locum tenent super terram, qui caelum & terram condidit, & omnia quae in eis sunt: quibus tantam tribuit potestatem, ut quos ipsi absoluunt vel ligant super terram, ipse ligatos solutosque habet in caelis, dicente eis Salvatore: quorum peccata remiseritis, remittuntur eis. Sed quid de huius ecclesiastici status dignitate & excellentia dicere

fas est? Potius certe tempus, quam dicendi materia de-

esse.

CAPIT

Sacerdotes
aliquando
dii aliquan-
do angeli
vocantur.

CAPITVLVM XI.

De differentia & comparatione Ecclesiasticorum; videlicet Episcoporum, & aliorum inferiorum praelatorum, & clericorum inter se ad inuicem: & quid gradus alteri sit dignior & perfectior.

EXigit ergo idem ordo pollicetur, vt ecclesiasticorum, siue clericorum ordinem inter se inuicem discernamus, & comparemus: quod breuissime tanquam manifesta absoluemus. Aliqui enim in minoribus ordinibus sunt constituti, alii subdiaconi, alii diaconi, alii presbyteri, alii episcopi, archiepiscopi & patriarchæ: inter quos longa valde differentia est. Nam etiam ex Christi institutione maiorum & minorum sacerdotum discretio facta est, quando Apostolos, tanquam maiores, & septuaginta duos discipulos quasi minores sacerdotes instituit, vt patet Luc. x. vbi Glossa, quod sicut in Apostolis forma episcoporum, sic septuaginta duobus forma presbyterorum, quasi secundi ordinis est præscripta. Postea autem Apostoli hanc formam secuti sunt, & in singulis ciuitatibus episcopos, in parochiis presbyteros ordinarunt. Procedente vero tempore, & crescente mense Domini, Apostoli ordinarunt diaconos, quorum maximus fuit Stephanus. subdiaconos vero & alios minores ordines, ecclesia per temporis discursum sibi constituit; quamuis nonnulli dicant subdiaconatum ab Apostolis fuisse institutum, sed per eos inter sacros non numeratum, postea tamen ab ecclesia aggregatum. Veruntamen Dionysius, qui Pauli discipulus fuit, in *Ecclesiastica hierarchia*, tres tantum ordines describit. Episcoporum ordinem dicit maximum, & perfectiorem, presbyterorum vero illuminatiorem, diaconorum purgatium. Nee solum distinguitur quo ad sublimitatem, & pro excellentia & prærogantia dignitatis, sed prout inducit quandam seruitutem propter Deum oppositam statui libertatis. Nam secundum sententiam Doctorum, circa istos gradus tria possent considerari, sicut tribus modis perfectio status, aut vitæ sanctitas acquiratur. Primo perfectio status sumitur communiter & large, per actus dilectionem. Secundo magis proprie per officii administrationem. Tertio pro-

*Tripliciter
est aliquis in
status perfe-
ctior.*

priissime per voti perpetuam obligationem. Primo igitur modo, omnes in caritate existentes sunt in perfectionis statu: quia (vt Apostolus a 1) *sola caritas vinculum est perfectionis*. Et hoc modo perfectio opponitur ruinæ peccati & culpæ, secundum quem modum dicit Apostolus: *Qui existimat se stare, videat ne cadat*. Secundo vero modo, omnes qui assumuntur ad officia Ecclesiastica, possent dici esse in statu perfectionis respectu laicorum. Sunt enim ipsi quasi medii inter Deum & populum. Vnde quanto propinquiore Deo ratione officii, quod ministrant, tanto perfectiores. Vnde in canone scribitur: *Non solum Episcopi, sed presbyteri & diaconi debent magnopere providere, vt cunctum populum, cui president, observatione, vita & doctrina excedant*. id etiam agere debent inferiores gradus, puta exoristæ, lectores, & alii. Sed tertio modo solum Episcopi, Archiepiscopi, ac Patriarchæ, ac etiam religiosi, illi videlicet, qui per votum in perpetuam seruitutem se tradunt ad seruendum Christo & hominibus propter ipsum, in his quæ sunt circa opera perfectionis, tales sunt propriissime in perfectionis statu. Et hoc modo in hac parte, accipitur *status*, vt videl. sonet in quandam seruitutem oppositam statui libertatis: quia per talem statum fit mutatio status libertatis in perpetuam Christi seruitutem, vt supra diximus. Et hic propriissime est status perfectionis vitæ Apostolicæ in hac parte. secundum quem modum accipitur status. *quest. vi. si quando in causa capituli vel status interpellatum fuerit. Non* (inquit) *per procuratores, sed per seipsos est agendum*. Cæteri ergo ministri Ecclesiæ indubie sunt in statu perfectionis, propter officii administrationem. talis tamen perfectio status magis accipitur comparatiue quam proprie. Nam canones, inferiorum clericorum, statum magis appellant *gradum*, quam *statum*. Vnde, dicitur in quodam canone: *Pro gradu officii, unusquisque studere oportet ad meliora*. Et hoc dictum sit, quantum ad Episcopos & ministros Ecclesiæ inter seipsos comparatos.

CAPITVLVM XII.

De plurimis difficultatibus & aculeis, laboribus & periculis status archiepiscoporum, episcoporum, & ceterorum clericorum: & de malis ministris ecclesiæ: ac de multis abusibus, vitiis & inordinationibus illorum in genere & in communi.

Vlta excellentia dignitatis, & sublimitate status Ecclesiastici in genere, ac differentia & comparatione inter se: superest agere in communi de eius periculo, aculeis, & difficultate. Et adducentur in medium auctoritates & rationes, quibus non inepte probari videntur huius status difficultates, pericula & incommoda. Indignum enim videtur, ut si quos episcopos aut clericos huius status sublimia & dulcia delectant, amara & aspera moderentur, nec in eo statu securos se reputantes plurimum extollantur, qui tam proximi ruinæ insistant. In primis itaque nemo sibi blandiatur ex sanctimonia huius eminentis status ecclesiastici: nemo certe de eius excellentia extollatur: nemo de illius dignitate confidat. Cogitet enim, quia (ut inquit canon) *non loca, non dignitates, non cathedra status faciunt, sed vita & mores.* Vnde ex officio & dignitate non licentiam peccandi, sed necessitatem bene uiuendi, ecclesiastici viri se nouerint affecturos. nec ex eminentia status, audaciam delinquendi sibi sumant: pro co maxime, quia (ut in præcedentibus diximus) nullus sanctum dubitare debet, quæ apex tantæ dignitatis attollit. In quo si desunt bona acquisita per meritum, sufficiunt quæ à loco & cathedra testantur. Et iterum; *Cathedra aut elaros ad hæc fastigia erigit, aut qui eriguntur illustrat.* Ad quæ dicimus plurimū falli eos, qui de loci dignitate latantur. Nam Symmachus Papa seipsum declarans, prædicta de illis intelligit, qui per bonos actus, sanctos prædecessores imitantur. Vnde subdit: quod ea, quæ de cathedræ sanctitate dixerat, ad illos pertinent, quos conuersationis splendor illuminat. Sed pro tanto sanctis vocat, quia propter loci & cathedræ sanctitatem boni & sancti præsumuntur. Vnde Hieronymus: *Non sanctorum filii sunt, qui tenent loca sanctorum: sed qui exercent opera sanctorum.*

*De status
dignitate
memoramus
scilicet: sed com-
memoramus.*

Itaque non reddat ecclesiasticos viros securos dignitatis fastigiū, status periculum. Vnde Gregor. *Nos qui presumus non cathedra, non dignitatis, non ordinis vel gentis prerogativa, sed moribus confidere debemus: quia (ut inquit Canon) non dignitates aut ordines creatori proximis faciunt, sed nos aut propriis meritis coniungunt, aut mala disiungunt.* Non ergo latentur episcopi ex sanctitate cathedrae: non sacerdotes confidant ex sacerdotii dignitate, sed potius cōtremiscant ex imminenti calamitate & periculi pronitate. Quid enim dignitas affert, si vita obest? Nam (teste Gregorio) *quid paradisi altius, tutius atque iocundius? quid caelo securius? Et tamen homo de paradiso peccando, angeli de caelo ceciderunt, ut posteris cederet in exemplum, quia non loci, nec dignitatis amplitudo securitatem tribuat, sed vita innocentia.* quia (ut idem Gregorius subiicit) *instum quippe est, ut nobilitate loci ac dignitate officii non inuuetur, qui dignitatem Dei à se abiicit.* Vnde Chrysostomus ad episcopos de dignitate, excellentia se effequentes, nec illius eminentia pericula praevidentes, pulchre ait: *Videre, inquam, fratres, quod non sedetis supra cathedram: quia non cathedra facit sacerdotem, sed sacerdos facit cathedram: non locus sanctificat hominem, sed homo locū: nec omnis sacerdos sanctus est, sed omnis sanctus sacerdos.* Et sequitur: *Qui bene sederit super cathedram, honorem accipit cathedra. Et iterum: Malus sacerdos ex sacerdotio suo crimen acquirit, non dignitatem.*

Secundo ecclesiastici status incommoda & onera, difficultates & aculeos, ærumnas atque pericula ex ipso nomine satis comprehendere possumus. Si enim episcopi, sacerdotis aut clerici nomen solum perterret, quāto amplius ipsius rei defectus, quam nomen importat? *Episcopus* enim superintendens aut speculator dicitur: *Sacerdos* vero dictus quod sacra det aut doceat: *Clericus* vero appellatus quod in Dei sortem electus sit. Qui ergo non superintendit, qui non speculatur, qui à longe non prospicit incommoda subditorum, nonne episcopi falsum nomen usurpat? Sed & qui sacra nec dat, nec docet, nonne falsum sacerdotis titulum sumit? *Clericus* vero quomodo fors Dei dictus est, quem mundus, quem seculum, quem denique ipse infernus de illo verius sortiuntur? Hos itaque pulchre Bernhardus describit: *Mirum est quod clerici aliud videri cupiunt quam sint: videlicet habitum milites, quasi clerici, atque neutrum exhibent: non enim pugnant ut milites, nec evangelizant ut clerici.*

Episcopi, sacerdotis & clerici nomen terribile.

Sacerdotis & clerici nomen falsum usurpat.

Clerici habitum milites, quasi clerici, atque neutrum esse volunt.

clerici, nec laborant ut ministri. Cuius igitur ordinis sunt, cū vtrumque esse cupiunt, & vtrumque deserunt & confundunt? Et sequitur: Vnusquisque (inquit Apostolus) in ordine suo resurget: sed isti in quo? Sed certe quia nullū tenent ordinem, sine ordine peribunt. Et cum Sapiens Deus ut veraciter creditur, à summo vsq; deorsum nihil inordinate reliquerit: vereor certe nō alibi esse ordinandos, quā ibi, vbi nullus ordo, sed sempiternus horror inhabitat.

Ad hos præterea sic nominatos pastores, & pastorem curā deserentes, per prophetam Deus acerbissime cōminatur. Ait enim: *Si non fueris locutus, ut se custodiat impius à via sua, & ille iniquitate sua morietur, sanguinē eius de manu tua exquiram.* Quod ergo maius periculum cogitari potest, quā aliorum iniquitate damnari? In ceteris siquidem statib. seu viuendi modis culpa tenet auctores suos, quilibet proprio suo peccato punitur, quia scriptum est: *Anima quæ peccauerit, ipsa morietur.* In hoc tamen periculo viuendi genere nedū suo, sed aliorum scelere pastor plectitur. Damnantur n. pastores, populorum iniquitate. Quis ergo sanæ mentis ad illud vitæ genus aspiret, ut animam suā teneri obligariq; baratro eligat, si alii peccauerint? In exordio humani generis Cain ipse licet reprobus, tãtæ tamen intelligentiæ fuit, ut vitæ alienæ curam abiiceret, inquit: *Nunquid ego custos fratris mei sum?* Repellebat ille à se caute fratris curam, ne incautius pro fratre teneretur. Ille etiam vterini fratris curam recusabat, nunc proh dolor ad extraneorum curā cum aperto periculo properamus. Quis (oro) tam sibi impius, quis tam sui oblitus existit, quis sponso rem seu alienæ vitæ se constitui fideiussorem optat, qui vitam propriam vix tueri possunt? Aut quid tam insanum, quid tam inconsideratum, quā alienarum culparum districtam rationem sese redditurū promittere, qui sua aut non videt, aut nō intelligit? Quid tam dementiæ proximum, quā alienorum facinorum fieri diligens indagator, qui suorum est negligētissimus inquisitor? aut quis aliena peccata portare se pollicetur, qui suis premitur? Quis purgandi alios onus suscipit, qui purgatore indiget? Aut illuminādi plurimos officium accipit, qui cæcus est: & qui se non videt, quomodo alios considerat? Periculosa certe atque grauis sarcina est, cura pastoris. Nam cuiuslibet ouis deperditio, illius periculum est, ad quem propheta ait: *Eserit anima sua pro anima illius.* Demum illius status periculum in eo

*Episcopos &
clericos con-
tendere in-
docens.*

conspicitur: quoniam (teste Gregor.) *praelati tot mortibus digni sunt, quos ad suos subditos perditionis exempla transmittunt.* Inter cetera vero detestanda exempla vnum est illud, quoniam & si scriptum sit, *seruos Dei non oportet litigare*: Episcopi tamen & clerici, qui spiritualis sunt, & lites ac contentiones vitare specialius iubentur, pro pudor, tam acerbe, tam impie, tam crebro litigant, ut omnes vincant in contendendo laicos: & sub colore iustitiae obrepit impietas. Iam non modo pro episcopatu litigatur, sed bellatur: non modo pro sacerdotio contenditur, sed pugnatur. Et plerumque non sine orbis & urbis periculo bellatur in ecclesia, quae pax est filiis ut pia mater permittit. Aiunt enim, *gloriam nostram non damus alteri*: qui dum vanam retinent, veram & aeternam amittunt: ad gloriam currunt, sed gloria eorum in confusione erit. Christus iubet tunicam proximo dimitti, quippe & in faciem percuti ne lit genti: isti eligunt percutere quam parcere: malunt periclitari Ecclesias, quam non honorari.

Tertio ille hominum status nedum difficilis & laboriosus, sed & periculosus videtur, ex quo plures seductores & schismatum seminatores in ecclesia oriuntur. quos certe ex sacerdotum & episcoporum statu prodisse cōperimus. Vnde Hieron. *Veteres perscrutans historias, reperire non valeo, alios ecclesiam Dei scidisse, populos seduxisse, praeter eos qui sacerdotes appellati sunt.* Accedit, quoniam ille videtur, periculosior, difficiliior atque incommodior viuendi modus, de quo plures cadunt & plures periclitantur. Constat autem plures cadere in via salutis; & longe plures ex statu ecclesiastico periclitari, propter plurima, & praesertim propter temporalium affluentiam: sicut certe plures deuiant in prosperis, quam in aduersis; de quibus putandum est prophetam dixisse: *Cadent à latere tuo mille, & decem millia à dextris tuis.* Dexteram quidem honoratiorem partem episcopi & praelati in ecclesia tenent; ceteri sinistram. Si igitur de ceteris statibus ad sinistram cadent mille, profecto de istis cadent decem millia.

Quarto, eligere curam animarum, nihil aliud est, quam exponere se ad manifesta & indubitata pericula: quia (ut inquit Gregorius) *taliter appetere est mentis tempestas*, nam nihil aliud est potestas culminis quam tempestas mentis. Quis enim tam audax: aut verius, quis tam temerarius est, qui in alto & tempestuoso mari nauigare peroptat? Quis illius navis cupit fieri gubernator, quam perituram de proximo cō-

spicit?

Spicite teste Gregorio, *quieto mari imperitus nauta nauem dirigere potest: turbato autem tempestatis fluctibus etiam peritus nauta se confundit atque perturbat.* Profecto nil aliud est curam animarum suscipere, sacerdotium aut pontificatum sumere, quam scienter se naufragiis mergere. Solent homines de tempestate in portum fugere: qui vero animarum pastores fieri desiderant, de portu in tempestatem sibenter fugiunt; de quibus propheta dicere videtur: *Qui descendunt mare in nauibus facientes operationes in aquis multis, & descendunt usque ad abyssum: quorum anima in eis tabescit propter negotiorum multiplicitatem procellam: quare turbati sunt & moti sicut ebrii, & tandem omnis sapientia eorum deuorata est.* Mirum certe videtur, ut non satis difficile aut graue videatur, vni episcopo vnus animæ curam sumere, nisi omnium curas in se suscipiat. Vnde quidam Sapiens de tam graui sarcina dicebat: *Fortes humeri qui talia sustinent: aut fortis ambitio ad id animos cogens, ubi futurum periculum sciunt.* Quod si Pontifex in altum se locatum gaudeat, consideret quia tanto erit ei casus grauior. vix enim ex alto sine labore aut periculo descenditur. Sed (ut paucis concludam) cura animarum si recte geritur, summus est honor: sed summus labor, summum onus, summa seruitus. Si vero male agitur, summum animæ periculum, summum malum: quia anceps ex omni parte negotium est.

Cura pastoris ex omni parte anceps est.

Quinto non est proposito alienum considerare; quoniam (ut ait Chrysostomus in canone) *homo Christianus fortiter cadit in peccatum, propter duas causas: aut propter magnitudinem peccati, aut propter altitudinem dignitatis.* Hæ igitur duæ periclitandi causæ ecclesiasticos viros fortiter ruere cogunt. Primo magnitudo peccati. scienter enim & ex contemptu peccant. Nam *qui scit voluntatem Domini & non facit, iuxta verba Saluatoris, vapulabit plagis multis.* Secundo altitudo dignitatis: quia quantum dignitas altior, tanto casus grauior. Et (teste Gregorio) *quanto quis in sede superiori locatus est, tanto in maiori periculo versatur.* Et Augustinus: *Sublimitas honorum, magnitudo scelerum est.* Et Hieronym. *In maiori gradu maior est sine dubio poena.* Et iterum Chrysostomus in canone: *Honoris magnitudo his qui indigne viuunt honore, maximus cumulus incipit esse poenarum.* Et iterum Augustinus: *Clerici officium si persunctorie gerunt, nil apud Deum miserius, truius & damabilius.*

*Episcopi &
clerici solum
sunt dispen-
satores.*

Sexto ex episcoporum & clericorum administratione pericula, difficultates & incommoda apertissime demonstrantur. Non enim episcopi & clerici domini sunt bonorum ecclesia: sed (vt Hieronymus ait) procuratores, sed dispensatores rerum alienarum; & velut sacrilegos plectendos esse, si quod pauperibus est erogandum, sibi retinent plusquam eius statui sufficit. Quomodo ergo securi sunt clerici, qui non solum ex mala aut desidiola administratione, sed ex cupida retentione damnantur? Vnde pulchre de se & cæteris presbyteris dicebat Hieronymus: *Quomodo possumus aliena fideliter distribuere, qui nostra timide reservamus?* Hinc Augustinus ad episcopos & presbyteros ait: *Esurientium panis est, quem tu desines: nudorum vestimentum, quod tu recludis: miserorum redemptio est pecunia, quam tu resedis: infirmorum solatia sunt delicta, quibus tu lascivis: tantorum ergo scias bona te innuadere, quantis possis prestare quod velis.* Sed & Bernhardus in epistola ad Falconem ait: *Ne tibi, ô pontifex, ô sacerdos blandiaris: quo tuis contentus alia non arripias. Rapis enim cum luxuriaris, vt de altario superbias: de quibus quod præter necessarium ac simplicem victum retines, tuum non est; rapina est & sacrilegium. Habentes (inquit Apostolus) victum & vestitum; non victum & ornatum, non delictis, non vestibus, quibus lasciuimus.* Et iterum idem Bernhardus ad Senonensem archiepiscopum: *Clamant nudi, clamant famelici, conqueruntur pauperes; dicunt,*

Dicite pontifices, in sancto quid facit aurum, Nobis fame, frigore miserabiliter laborantibus? Quid conferimus tot mutatoria vel extensa in perticis? vel plicata in manicis? nostrum est quod effunditis: nobis crudeliter subtrahitur, quod inuenter expenditis. Hinc Hieronymus ad pontifices & clericos comminans ait: *Ecclesia principes, qui deliciis affluunt, propheticus sermo describit, quod eiiciendi sunt de spaciosis domibus lautisque conuiuiis.* Et sequitur: *Si vos scire, quomodo eiiciendi sunt in tenebras, videlicet exteriores, ubi erit stetus & stridor dentium.* Item idē Bernhard. ad clericos ait: *Multiplac præbendas, habe archidiaconatum, aspira ad episcopatum: gradusim ascende, & in puncto ad inferos sine omni gradu descendes.*

Septimo pericula, incōmoda, aculei, & difficultates huius status ecclesiastici, ex eo euidentius apparent; quoniam si prophetarum, si patriarcharum, si totius sacrae scripturae reperitur annalia,

nulli m

nullum reperiemus genus hominum, quos Deus vehementius arguat, & seuerius comminetur, & crudelius puniat, quam pontifices, pastores & sacerdotes. Discurre per Prophetas & scripturam lege, quid audis, nisi pastores populi mei prauaricati sunt in me. propterea adhuc in iudicio contendam vobiscum. Et iterum: Stulte egerunt pastores. Et sequitur: Propterea euellam eos de terra. Rursus ad eos: Omnes pastores meos pascite ventus. Et alibi: *Va pastoribus qui dispergunt gregem meum.* Et iterum: *Va pastoribus Israel, qui pascunt seipsos.* Et sequitur: *Collidi in te pastorem & gregem.* Denique ad Iohellem Prophetam transi. quid nisi cōminationis pœnas: quid nisi clamores plangentium sacerdotum & pontificum audis? Aitenim: *Plangite sacerdotes: ululate ministri altaris.* Ausculta Ezechielem: *va pastoribus Israel qui pascunt seipsos.* Et iterum: *super pastores iratus est furor meus.* Malachias quoque: nō tacet eorū exterminium. *Ad vos* (inquit *sacerdotes, qui despiciitis nomen meum: ad vos est mandatū, o sacerdotes. ecce ego proniciam vobis brachium iræ meæ: & dispergam super vultum vestrum stercus.* Et iterum: *Dedi vos contemnibiles omnibus populis.* Sed & Amos Prophetā, quam dure prælatos & pastores ecclesiæ comminetur, audiamus. ait enim: *Va vobis, qui opulenti estis in Syon: & confiditis in monte Samaria, optimates, capita populorum ingredientes pompæ domum Dei. qui aormitis in lectis eburneis, & lasciuitis in stratis vestris.* Deinde contra huius status & vitæ hominis scriptum est: *Quicumque desiderauerit primatū in terra, inueniet confusionem in cælis.* Et iterum: *Inter seruos Dei non computabitur, qui de primatu tractauerit.* Sed & Christus in Euangelio has illis pœnas & cōmminationes confirmat. ait enim: *Va vobis qui diligitis primas cathedras.* Sed quid hæc commemoramus? Plena est sacra scriptura huiusmodi increpationibus & cōmminationibus. Quis ergo dubitat periculosum, difficilem, & cunctis aculeis, miseriis refertum esse illum hominum statum cui tot maledictionum & anathematum, tot cōmminationum genera: tot pœnarum & suppliciorum mala Prophetæ, Patriarchæ, sancti, ipse quoque Deus in scripturis sanctis imprecantur: Vnde Chrysost. super illud: *Obedite præpositis vestris.* *O pontifex, o prælate, conspice quanto igni supponis caput tuum.* Et subiicit: *Miror si quem contingat saluari de his, qui principantur, & præsumunt in tantis iniquis, & in tanta pigritia: in tantis increpationibus, & in tanta desidia.* Video tamē carientes & sponte se submittentem in pericula: con-

*Simoniam
hæresin.*

*Epilogus vi-
ciorum sa-
cerdotum.*

tra quos durissimum iudicium his qui præ sunt, scilicet male. De bonis vero scribitur prouerbiôrum 12. *non in iustus animas iumentorum suorum.* Sed quid de periculo & incommoditate; & aculeis ecclesiastici status dicâ? Cum episcopis & clericis ipsa simonia (quæ hæresis appellatur) tam familiaris & cara sit, ut vix sine illa in domo Domini incedant. Quibus etiam inuidia domestica, auaricia annexa, libido, ira & superbia, in rerum abundantia videtur. Sunt in hoc statu Patriarchæ pomposi, episcopi negligentes, decanus tumidus, archidiaconus elatus, canonici extra chororum vagantes, vicarius in litibus tabellio falsus, presbyter imprudens, curatus ingnarus, confessor leuis, diaconus euangelia nesciens, subdiaconus epistolam ignorat, cantor latrat, thesaurarius fabricam defraudat, sacerdos sacramenta vendit, capellanus venalis: ut statim latius tangemus in capitulis sequentibus, ubi singulariter de quolibet gradu & officio ecclesiastici status succincte agemus.

C A P I T V L V M X I I I .

De dignitate & prerogatiua officii decanatus in ecclesia: & de illius honore & veneratione: & de his, quæ ei competunt: demum de plurimis oneribus & afflictionibus ac asectibus & periculis Decanorum.

Audita sunt præconia, laudes, necnon excellentia, præeminentia ac sanctimonia status ecclesiastici in genere & cōmuni. Audita denique sunt eius vitæ formulæ incommoda, calamitates & miseriæ, afflictiones & pericula. Quo fit, ut facile eiusdem status dulcia & amara cuilibet recte intuenti parere possint. Verum quamquam ea, quæ in ea re breui diserta sunt, ad omnes ecclesiæ status secundum ordinem & officiorum differentias applicari possunt, qui omnes clericorum nomen & ministrorum officium ecclesia sortiti sunt: quia tamē particularius episcopos & prælatos respicere videntur, superest ut ad ceteros inferiores ecclesiæ status gradus & ordines, breuis & singularis sermo decurrat. Consuetum igitur ordinem sequentes vnumquemque inferiorum clericorum gradum siue statum tangemus: & quid laudis, quid excellentiæ, quid utili-

utilitatis, deum quid calamitatis, afflictionis & periculi habeat; sed & quod defectus eos damnabiliter comitantur, succincte afferemus. Primo igitur post Episcopum decanus siue præpositus existit. nec id ratione caret, quia (ut inquit Canon, Calixti papæ & martyris) *decanorum dignitas recte maior post pontificalem appellatur*. Nam Decano post pontificem maior ac principalior cura, & collegii administratio congruit. Rursus proximior est episcopo dignitate & honore, cui propinquior est in consilio & assistentia. Ipse collegium, necnon personas ac res collegii iudicat & tuetur. Hinc in Exodo: *inter iudicantes universitatem decanus constitui iubetur*. quare sacri Canones venerandam eam dignitatem decreverunt. Est enim decanus collegii caput, de quo scriptum est: *constituit eum Dominus in caput*, non in caudam, quod ceteris corporis membris auctoritate & iudicio præcellit. idque primitas loci in ecclesia indicat. Habet denique decanus in capitulo & collegio primam vocem, primas salutationes, primos recubitus. Sed iam audi huius dignitatis onera, huius status calamitates, miseras, defectus & pericula. In primis igitur fateor: grandis est huius status prærogativa. Sed utinam tam bene huius dignitatis onera agnoscerentur, quam ipsa appetitur. Dicam verius, tam vtiliter ei incumbentia implerentur, quam ab omnibus sciuntur. Gaudent certe decani & præpositi de honoris excellentia: sed utinam dignitatem virtus sequeretur. *Virtus enim (ut quidam ait Sapiens) non solet esse iactatrix, aut sui miratrix, sed alieni imitatrix, non de extrinseco honore, sed de conscientia onere cogitat*. si illud delectat, istud cruciat. Virtus non de se confidit, non arrogat. si hoc esse tempus militiæ & laboris, non delectationis, non pompæ, non fastus. Fateor denique, decanus collegii & capituli caput existit. Sed vide ne dignitas ipsa, qua tantopere delectaris, conterat caput tuum. Sic age, ne de te ecclesia dicat, quod scriptum est: *caput meum doleo*. Videat decanus, qui se collegii caput iactat, ne ceteri de improvido capite capita sua moueant. Cernat, si eius facta ingerunt commotionem capituli in populis: quia omne caput languidum à pede usque verticem, non est in eo sanitas. Caueat decanus, ne sit illud caput, de quo scriptum est: *Facti sunt hostes eius in caput eius*. Aduertat Decanus, ne caput serpentis sit:

Decanus si
recte agit
episcopo o di-
osus sit ne-
cessario, si
collegii ami-
cus esse cupit
est contra-
rio.

cetera membra nedum vegetans, sed inficiens. quia Deus confringet capita draconum in aquis. Verendum est plurimum, ne sint illa capita, di quibus scriptum est: *In vniuersis capitibus eius caluicium*, id est, deformitatis viciū. Decanus siquidem, si recte agat, episcopo odiosus sit necesse est: adeo vt illius sit hostis, si collegii amicus esse cupit. Si vero à præsule amatur, à capitulo odietur. Pro eo enim caput capituli est constitutus, vt nonnunquam cupiditatibus aut episcopi insolentis resistat, qui priuilegia, qui libertates, qui bona, qui redditus ecclesiæ plerunque vsurpat. Ideo certe decanus caput est, vt collapsa collegii erigat, sparsa colligat, recuperet perdita, deformia reformet. Caput tunc esse definit, cū singulorum de collegio crimina palpat, ne eorum fauores perdat, atque vt eum eligant, honorent & venerentur. Sed fateor labiis honorabunt, non animo: cor autem longe est ab eis. Collegium rursum regendum decanus suscipit, imo verius feram indomitam gubernandam. Parua enim domus ægre & difficulter regitur. Magna collegia, præsertim sine sapientia aut virtute, tanto reguntur difficilius, quanto quot sunt singuli, tot singularibus feruntur opinionibus. Si igitur decanus latatur de honoris dignitate, metuat onera, metuat pericula: quæ tot sunt, vt enarrari facile non possint. Quis enim est decanus, qui episcopo non sit grauis & contumax? quin potius contra eum conspiret, qui in eius contemptum non abstinet à diuinis, qui sigillat litteras sine capituli assensu, qui sibi communia ecclesiæ appropriat, qui non residentes agit vt percipiant fructus, licet non facientes seruitium; qui grauant subditos, qui eos non defendunt, qui eos tolerant pro pecunia in peccatis, qui inhoneste incedunt, inhonestius viuunt. Paucula huius dignitatis onera, pericula & afflictiones atque defectus enarrauimus: quia in sequentibus ecclesiæ officiis & gradibus plurima adducemus, quæ merito eidem dignitati aptari possunt. Qui igitur aures habet audiendi audiat, & inter tot periculorum anfractus sit cautus. Facile enim vitabit cruciatum, siue-

lit vitare reatum.

CAPITVLVM XIV.

De dignitate & prerogatiua officii archidiaconorum: ac de honore & veneratione ei debitis, & de his quæ ad eum spectant. Demum de plurimis oneribus & afflictionibus, defectibus & periculis archidiaconorum.

Archidiaconi dignitas non paruam in ecclesia militanti prærogatiuā, nec infimum honoris gradum habere dignoscitur. Ipse enim præcipuus oculus episcopi dicitur, pro eo quod cuncta ad episcopum expectantia videre ac solerter providere tenetur; veluti qui a canonibus vicarius est illius constitutus. Ad archidiaconorum siquidem præ ceteris ecclesiæ gradibus pro singulari quadam excellentia examinare pertinet ordinandos, idoneosque admittere, inhabiles vero repellere. Qui (vt Canones aiunt) prælatus merito existit, quia post episcopum præminentiam, iurisdictionem & auctoritatem obtinet, præsertim coercitiuam & contentiosam. Rursus illi corrigendi atque visitandi non tam clærum quam populum fas est. Ipse denique præsidere debet, cum archipresbyter eligitur, ipsumque instituit & pro meritis destituit, si contraria non extet consuetudo. Ipse tandem tantæ dignitatis est, vt coadiutor episcopi ecclesiæ principis recte dicatur. Sed & ad eum pertinet, vacantes custodire ecclesias. Ex quibus præfatæ dignitatis eximius honor simul & vtilitas facile comprehenditur. Verum audi amara huius status, tu, qui dulcia degustasti, atque in primis ea repete, quæ supra proxime attulimus, signanter in præcedentibus capitulis, vbi de episcopis & clericis in genere egimus. Sed & illa hic inferere, quæ paulo ante de decanis diximus. Adde: quia fateor, archidiaconi ampla, sed & honoranda est dignitas, si tu ea digna existis: non parua est præminentia, si quos potestate regis, virtute præmines: honoris est prærogatiua, si ceteros humilitate præcellis. Quod si secus agis, utique experieris illud sapientis senatoris, quia *dignitas ipsa parem vicem improbis reddit; qui non tam à possidente deturpatur, quam ipsum deturpat.* denique non parum, si eos cruciat ipsa assidua diraque ambien-

tium crux. Quis enim est archidiaconus, qui non præpositus aut decanus: ille episcopus aut archiepiscopus: ille patriarcha: ille cardinalis: ille tandem Romanus pontifex assumi non velit? Quis archidiaconus præficitur, nisi ut potentior aut ditior sit: & contra iusticiæ præcepta præesse quærat, qui prodesse nescit? Et magnæ classis gubernacula quærat, qui paruam scfam dirigere non nouit? Taceo intrinsecas eorum calamitates; qui plerumque spem emunt dignitatum: & (ut quidam Sapiens dicebat) vertigo est omnium pessima, ut ad ea nunc currant certatim homines, quæ fugere iubentur: ab hisque retrahi non velint, quæ olim alpernari consueuerunt: quippe & debuerunt. Fateor rursus, archidiaconus oculus episcopi describitur: nonnunquam tamen tales ipsi præfules sunt, talesque eorum oculi, ut alter altero orbari vellet; adeo ut episcopus & de cisis oculis dicere cogatur: *Contenebrati sunt oculi mei.* Et iterum cum alio Propheta: *Nihil respiciunt oculi mei nisi mala.* Quibus alius Propheta ait: *Dedit tibi Dominus deficientes oculos.* Et Hierem. *Oculi eorum pleni sunt puluere, qui aperti palpebris nihil videant: quia oculos habent & non videbunt.* Quis enim episcopus de his oculis gratias agit, ut dicere valeat, *nec elati sunt oculi mei*: qui ita episcopi sui negligentias suppleant, ut de eis dicat: *Imperfectum meum viderunt oculi mei*, id est, archidiaconi? Hi certe sunt oculi, de quibus ait Propheta: *Ponam oculos eorum super malum, & non super bonum.* Quid enim aliud vident archidiaconi, nisi munera? Conferunt beneficia non meritorum, sed pecuniarum cumulo: non virtuti, sed sanguini: qui ad sacros ordines deordinandos ordinant; implent inutilibus atque ignatis ministris ecclesias, ut bursas repleant. Hi propter obsequia, delicta non puniunt: arcas, non personas visitant: nec ad lucrum animarum, sed quæstum & grauamen visitandi officium vertunt. Hi res pauperum pauperibus non erogant; sese secularibus exhibent, qui contemnunt presbyteros; qui principum curias sequuntur, ut ad cathedram pestilentie pestilenter ascendant. Hi certe (ut cum Propheta loquar) *vinificant morituros, & mortificans viuifuros*: excommunicant sine cognitione, absolunt excommunicandos. Hi magis lauta conuiuia, quam diuina sequuntur officia. Adde, quia quæ ad eos pertinent, negligunt, aliena vero

vsur-

vsurpant: & cum eorū tota pene iurisdictio ex consuetudine pendear, contra episcopum præscribunt, in eius ordinariam messem extraordinariam falcem mittunt. Taceo eorū impudiciam; quæ tanta est, vt subditos agat impudicos; qui facile maiorum imitantur exempla. Ad quos Hieremias in Threnis ait: *Subtrahunt ministri domus Dei à templo aurum & argentum, & erogant illud in semetipsos.* Et sequitur: *Dant autem ex illo prostitutas, & meretrices ornant: hi non liberantur ab arugine & tinea.* Illos certe signat Malachias: *Recessistis (inquit) à via vestra, scandalisastis plurimos in lege: propterea dedi vos contemptibiles & humiles omnibus populis.* Pauca certe ex multis huius officii calamitates & afflictiones, miseria, defectus atque pericula enarrauimus; cum longe plura sint, quam scribere libeat: quæ cum quis in eo constitutus ordine secum ipse considerat, nihil est cur non intus plurimum crucietur; cuius apertissimi sunt defectus & paucissimi profectus. Quare qui habeat aures audiendi, audiat; & in tantis periculis constitutus sit cautus. non enim timebit supplicia, si studebit fugare vicia.

CAPITVLVM XV.

De dignitate & prerogatiua officii cantoris & primicerii: & de honore ac veneratione ei debitis: & de his quæ ad eum pertinent: demum de plurimis oneribus & calamitatibus, defectibus & periculis cantorum.

Cantor siue primicerius singulari honoris & dignitatis prerogatiua in ecclesia fungitur: cuius ministerium ad cœlestes laudes, ad cultus diuini augmentum principaliter ordinatur. Hic (vt canonica tradit institutio) accolitos & ceteros ecclesiæ inferiores gradus ac ministros ad diuina dirigit officia canendi, legendi hymnos & psalmodiam præuidet atque instruit. Sed & quicquid diuinæ laudis in communi choro decantatur, pereū sollicitè præordinatur. psallēdi ordinem, orandi modum ipse committit: negligentes aut discolos punit. Et (vt paucis agamus) eius

oneri in cūbit, vt diuina officia gnauiter & ordinate altissimo perfoluantur: vt iuxta Apostolum, *omnia secundum ordinem fiant in ecclesia*. Tanto igitur cantoris dignitas apud Deum dignior acceptiorque est, quanto principalius cœlestibus laudibus occupatur. Nemo enim dubitat, quantum Deo nostro sit iocunda decoraque laudatio. Hinc amico Dei Moyſi pro speciali quadam excellentia dictum est: *Elige ad iudicandum populum viros, qui oderunt auariciam: tu autem insiste in his, quæ ad Deum sunt, vt laudes & ceremonias offeras Deo tuo*. Sed & Esaias super cuncta, quæ in ecclesia Dei geri præsignabat, modernis Dei ministris ait: *Tu (inquit) bene cantas: frequēta canticū*. Et iterum scriptura ait: *Vociferabuntur Levitæ: & ego exaudia eos*. Verum heu heu dixerim, cecidit corona de capite eorū; & cantus illorum versus est in luctum: quia carmen lugubre in ore eorum. Cantores siquidem moderni in ecclesia nec canunt Deo laudes, nec vt alii eas perfoluant, efficiunt: quos comminatur scriptura inquiring: *Non claudas ora canentium: Deo enim gratum est obsequium eorum*. Hi ex officio canere debent domino, quia bona tribuit sibi. Hi nequaquam dicere possunt: *Exultabunt labia mea, cum cantauero tibi*. Quomodo enim tacent, qui cantare iubentur: quibus Propheta ait: *Psallite domino in vociferatione*. Cantant plerumq; sed nō cum grauitate & modestia. qui vtinam ex eorum numero essent, qui dicere possent: *In populo graui laudabo te*. Non enim cantat Domino, qui ex corde non psallit: cuius viæ impiæ sunt, & ad secularia debachantur. Quem & similes alius Propheta signat inquiring: *Voces & victima impiorum non placent Domino*. Et iterum: *Cantica eorum quasi panis lugentium*. Et rursum alibi: *Non psallebant ad me in corde suo ministri altaris, sed ululabant in cubilibus suis*. Quomodo enim ecclesiæ cantores septies in die laudem dicunt Domino, qui vtinam semel chorum ingrederentur? Quippe verècundum hodie putant canere domino, qui cantores appellari gestiunt. Oppositum apponunt in obiecto, & monstro simile tentant, cum cantores esse volunt, & cantare dedignantur. Non igitur canentes aut psallentes, sed potius silentes dicantur: quare nec vt canentes manducant; quippe vt silentes mendicent. Magna itaque ministeria; magna calamitas; sed & magnum periculum est, id negligere quod sunt, & ita agere

agere, ne nomen consonet rebus. Canebāt enim antiqui ecclesiæ ministri, sed diuerso calle. Nonnulli enim psallebāt cum gaudio, quia suum persoluebant ministerium; quos rex & propheta signat inquires: *Exultate iusti in Domino, quia rectos decet decantatio*. Alii vero cantabant Domino corde & voce; nec eos tenebat psallendi fastidium, quos delectabat perueniendi desiderium. Sic canebat Dauid inquiens: *Cantabiles mihi erant iustificationes tue in omni tempore*. Hos certe cantores laudat; extollit & commendat ecclesiæ: non utiq; eos, qui totum psallendi finem in vocis dulcedine collocant. Quæ de re sancti viri & sapientes diuersas circa ecclesiæ cantum tulere sententias. Athanasius enim meditans cantilenas animos hominum plerumque inanes vanosque efficere posse, cauendum canendi vsum in ecclesiâ interdixit. Meminerat enim sanctus vir, canendi delectationem vanos nonnunquam gignere conceptus; memor multorum nominatorum Principum, qui incredibilem curam vocis habuere, velut de Gaio Cæsare legimus. Taceo de Nerone, qui vltima vitæ suæ hora prima inter querelas, quas propinqua mors afferebat, illa fuit, non quod tantus princeps, sed quod tantus musicus periret. Veruntamen beatissimus præsul Ambros. pietatis appetens diuinique cultus auctor & institutor, ut in ecclesiâ caneretur instituit. Aurelius vero Augustinus vtrumque se passum ait, difficileque negotium iudicauit, ut in libro *Confessionum* asseritur. Adde, quæ dicemus cum de canonicis agemus. Qui igitur aures habet audiendi, audiat: ac si inter tanta pericula constitutus secure incedere cupit, agat iuxta præcepta sui gradus, nec vsquam erit ei finis paruus.

CAPITVLVM XVI.

De dignitate & honore officii thesaurarii vel custodis ecclesiæ. & de his, quæ ad eum pertinent: deinde de plurimis oneribus & calamitatibus, afflictionibus, defectibus & periculis illorum, qui talia officia habent.

Thesaurarius siue custos præcipua quadam prærogatiua ac honoris præminetia in sacrosanctâ Ecclesiâ fulget. Illorum

enim dignitati & officio basilicarum primo incumbit custodia & tuitio, hostiatorum institutio, luminarium incensio & præparatio, cura deniq; conſtitendi conſeruandiq; baptiſmatis, dirigendi baptiſterii, valorum quoq; ſanctorum ac ſacerdotalium veſtium, necnon ſacratum reliquiarum, & tandem totius eccleſiæ theſauri ad eum principalius pertinet custodia: ſed & inter eccleſiæ miniſtros pro modo obſequiū & perſonarum differentiis redditus & oblationes diuidit. Merito igitur ſancta ſynodus idipſum dignitatis officium, vt vnā eccleſiæ columnam ſummo ſtudio eligendam honoriq; habendā decreuit, vt nulliq; in ea niſi ſanctior & melior ordinetur. Sed ordo exigit pollicitus, vt huius dignitatis onera, afflictiones & pericula breuiſſime audiamus. Inprimis igitur ſacriſtæ ſiue theſaurarii eccleſiæ aut cuiuſuis reip. recte ſtomacho corporis naturalis cōparatur. Veluti enim ſtomachus recipit quippe & conſeruat ſumma diligentia, alimenta humano corpori neceſſaria, quæ tamen refundit virtualiter & effectualiter in mēbra ſingula: nec aliter theſaurarius conſeruat eccleſiæ theſauros, & à ſua diſpoſitione expenſarū ſubſidia infunduntur, aut in ærariū eccleſiæ, aut in ſingulorum neceſſitates Principis aut cōmunitatis iuſſu. Et veluti ſtomachus peſtifer eſt, qui multa recipit & recepta minime refundit in mēbra pro eorum nutrimento: ſic theſaurarius aut eccleſiæ cuſtos multa ab eccleſia recipiens, & non conſeruās, nec æqualiter ꝑ ſingulorum vtilitate diſtribuens, peſtifer eſt, multoſque morbos in corpore eccleſiæ generans. Et de talibus ait Hieremias: *Ventrem meum doleo.* Et iterum Eſaias: *Transgreſſorem ex ventre vocauit te.* Si vero fideliter conſeruat, atq; pro membrorum & perſonarum eccleſiæ qualitate, & præſidentis diſpoſitione vtiliter diſtribuit, tanquam ſaluberrimus commendandus eſt. Hinc Polycratus recitat fictam, ſed facetam ac vtilem fabulam de altercatione & diſcordia inter mēbra & ſtomachum, eo quod ille deuorabat omnes labores eorum. Nā (vt ait Eccleſiaſticus) *omnis labor hominis in ore ipſius.* Tandem cum veniſſent ad iudiciū coram ratione, quæ erat iudex; & ratio iudicaſſet mēbra nihil debere dare ſtomacho; ilico mēbra debilitata ſunt, & tremores in cūctis mēbris aderant. quare eiſdem membris conquerentibus, iterum ratio iudicauit, vt alimenta ſtomacho à membris miniſtrarentur.

Quo

*Theſaurarii
ſtomacho
corporis na-
turalis com-
parantur.*

Quo facto, membra refocillata sunt, & pax confirmata est. Et ob eam rem Policratus subdit, quod thesaurarii ecclesiarum, & qui Principum tenent æraria, non sibi, sed communitati & totius corporis reip. coaceruare debet thesauros ipsos & ecclesiæ redditus. Si enim aut sibi tenaciter conseruat, aut nimia largitate exinani- tus fuerit, nihil habebit quod ministris & Ecclesiæ membris dis- tribuat. Sed iam specialius ad huius officii labores, difficultates, incommoda atque pericula descendamus.

Thesaurarii itaque siue custodis dignitas fateor perdulcis est: *Theaurarii nomen ab auro, ideo dulce.* idque eius nomen indicat ab auro dictum: nec mirum, si nomen delectet, cuius rem mortales tam auide perquirimus. Delectan- tia certe nomina, sed difficilia officia, si recte gerantur: alio- quin periculosa plurimum atque mortifera. iocundum nomen, sed mœstus effectus atque promptum periculum, si reddenda est aliquando de receptis ratio. Taceo de neglectu, cum scriptum sit: *Maledictus homo qui agit opus Domini desidiose.* Basilicarum igitur sacrorumque utensilium ac vniuersi Ecclesiæ thesauri custo- dia, atque illi vni pro pudor tuitioni verecunde committitur, qui plerumque sui non rectam gerit custodiam, qui aut puer est, aut minus idoneus, nec satis notus. Et quod periculosius est, cui nec ætas, nec ingenium, nec mores, nec industria ad parua do- mus custodiam satis sufficeret, matricis principalisque Ecclesiæ templa, non modo turribus munita, sed sacris preciosisque io- calibus ditissima, illorumque conseruatio intrepide demanda- tur. Mira confidentia, aut magna dementia; miranda facili- tas, aut stulta securitas. Vereor ne hi sint illi custodes, quos Da- niel signat inquiens: *Custodes tui quasi locusta.* Sed oro, quo pa- do luminaria in Ecclesia accendent, ne lucis in domo Dei de- sit splendor, qui semper obscuri existunt? Aut quomodo qui dormiunt in tenebris & umbra mortis, aliis lucebunt? Quomodo rursus sacra tuetur, qui prophana intruetur? Quomodo reliquiarum sanctarum preciosa pignora venerabitur, qui titulum non vidit, nec eius auris audiuit, nec in cor ascendit de reliquiis & veneratione sanctorum? Quomodo dominum cum corpus reuerenter tenet, qui spur- citiis adheret? Quomodo solerter præstabit exactam custodiam care- rarum rerum spiritualium, cui assidua est cura rerum secularium. Adde,

eni sacrarium carcer est, altare exilium. Iubentur siquidem custodes (vt in *libris Numerorum* legitur) excubare in custodiis tabernaculi: quippe custodiam contra custodiam diligentissime adhibere: sed hi, vt alii filii Heli, concubinas mittunt ad custodiã domus Dei. Deniq; redditus ac oblationes thesaurarius recipit; quas vtinam æquali lance diuideret: sed (forte male dixerim) diuidunt, inquam, sed non vt Apostoli, prout vnicuique opus est, sed habēti dant, & non habenti subtrahunt, id quod habere debeat: non nunquam vero non seruienti, sed absenti tribuunt. Diuidit, inquam, à fratribus, non à se: sic partes distribuunt, vt totum retineant: expensas graues defalcant, qui lucra sensu: nō parua damna supputat, qui vltra sortem extorsit, & more proditoris dispensatoris sacrum de sacro eripit, atque dignitatis emolumentum in sacrilegium vertit. Ex quibus huius officii defectus, calamitates & pericula facile conspicias. Si igitur aures habes audiendi, audias: & inter tot discrimina & pericula versatus, sis prouidus. Tutus enim in hac via gradieris, si quod ordo requirit, sequeris.

CAPITVLVM XVII

De dignitate & prerogatiua officii scholastici in ecclesia: & de his, quæ ad officium spectant: Demum de plurimis oneribus, afflictionibus & calamitatibus ac defectibus & periculis scholasticorum.

Scholastici officium siue dignitas non modo honoranda, sed summe necessaria in Ecclesia fore dinoscitur. Vt enim ait Honorius in canone: *scholarum magistri velut stellæ in perpetuas æternitates doctrine lumen infundunt.* Hos merito Ecclesia honorat, & præbendis atque redditibus non modo præmiat, sed dicit: vt in vnaquaque cathedrâ ecclesia clericos & cæteros scholares pauperes gratis instruant. Quare illis ea de re tam opulenter prouider, vt & docentis releuetur necessitas, & via pateat discipulis ad doctrinam. Sed huius officii calamitas, defectus, afflictio & periculum breui audire libet. Atque in primis *Scholasticus*, quia sapientiæ schola nomen trahit, nequaquam (vt puto) tam fastuoso nomine oblectaretur, si vera sapientiâ fulgeret, vt enim inquit Laureatus

Scholasticus nomen à schola sapientiæ trahit.

reatus Poeta : *non eget titulis sapientia solida. per seipsam clara est.*

Quis lucernam, vt videatur, soli adhibet ? Plurimi scholastici, doctoris aut magistri dignitate insigniunt, cum h's titulis obscuri, & absque illis clarissimi euasere. Sed verum est, quia hodie mortales titulos quærunt, non rem : laudem petunt, præmium certe inane, exiguum atque sordidum. Quæ res egentis ingenii signum est, quia umbris gloriari ac opinione, non veritate duci volunt. Rursus necesse est illud noscat, qui scholastici dignitatem assumit : quia docendi, non lasciuendi nomen assumit. Doce-

re enim eum oportet non nuda litterarum instrumenta, sed morum præclara documenta, vt quod docet, in se teneat. Sed pro dolor assumuntur quidem scholastici in hac temporis tempestate ad huiusmodi Ecclesiæ officium, vt honoris assequantur dignitatem, licet nullam scientiæ habeant facultatem. Appellatur quod

*Scholastici
plus dicunt
esse volum.*

non sunt : nec vnquam didicerunt, quod docere contendunt : & quod verecundius dicam, & periculosius est, qui nusquam scholas viderunt, scholas regere profitentur. Magistri vocantur, qui nondum fuerunt discipuli : aut si velis, magistri sunt erroris, qui nunquam fuerunt discipuli veritatis. peritiam docendi pollicentur, qui aperte ignorantiam confitentur. facundiam dicendi hoc officium exigit, sed assumuntur, qui barbarissimis vtuntur. Subtilitatem denique sacras interpretandi scripturas ea dignitas exquirat : vtinam eligerentur qui simplicem intelligerent litteram. Magna certe miseria, magna est magistri confusio, id ignorare, quod

vocari delectat, vt recte ei Apostolus dicat : *Qui alium doces, teipsum non doces ?* Hos quidem ignorantia præceptores monet Sapiens, cum ait : *Antequam loquaris & doceas, disce audiendo.* Quid enim tam turpe, quam profiteri artem, quam nō nouit ? Et in eam committere, quæ eum decorat ? Taceo eorum mores omni sanæ doctrinæ aduersos, cum dicat Boetius : *Vas putridum corrumpit aquas : & omnis doctrina vilescit ex ignominiosa vita docentis.* Sed vtinam quod per se non valent, per doctos probosque viros explerent. Sed verum est, quia hoc habet omnis ignorans, vt tales cæteros appetat doctosque persequatur : quia non facile per cæteros explet, quod ipse oderit. Qui igitur habet aures audiendi, audiat : atque inter tot calamitatum & defectuum pericula constitutus,

sit cautus; quia nulla ei nocebit aduersitas, si nulla dominatur iniquitas.

CAPITVLVM XVIII.

De præcæmentia & utilitate officii archipresbyteri, & quanta sit venerationis: & de his quæ ei competunt: demum de plurimis oneribus & afflictionibus, defectibus & promptis periculis archipresbyterorum.

Archipresbyter non paruum honoris & prærogatiuæ gradum in Dei ecclesia obrinet. Hic enim maior presbyterorum dicitur, quia illis præest, & in eos iurisdictionem & coercionem exercet. cui visitatio (vt sacri habent canones) aliquando personarum, regulariter vero ecclesiarum ac fabricarum competit. Sed & qua deuotione, quoue ordine baptismi cæteraque à presbyteris conferantur sacramenta, cura ei pertinet. Hic ex singulari prærogatiua, absente episcopo, missas solennes in ciuitatibus celebrat; sacerdotesque ad missas & diuina officia decantanda deputat. Hic largo nomine prælatus, licet ruralis nuncupatur. magna certe dignitas, cui magna committuntur. Verum quanta sit huius officii & status calamitas, quanta afflictio, quantum periculum, ex eo conspiciere libet, quia ipse archipresbyter, qui maior presbyteris nominatur, nomen solum retinet, rem autem ipsam diu perdidit: atque vtinam cæteris presbyteris non minor esset vita & idoneitate ipse, qui gaudet nomini maiori. Maiores sunt, vt potestatem exerceant, non quidem in rectitudine & humilitate, sed in rapinis, superbia & abusione. sacrum est archipresbyteri nomen, sed exercens, profanus: clarus titulus, obscurares. Magna certe calamitas est ex dulci fauore amaritudinem fundere. Visitat archipresbyter, qui plerumque visitandus esset: corrigere contendit, qui ad vitiatendit: Ecclesias visitat, vt eas spoliaret, non vt ornet: fabricarum curam gerit, sed domus suæ, non murorum templi. Hi sunt, quos propheta commemorat: *Suscitabo pastorem qui delicta non visitet.* Adde, quia si visitant, non quidem in virga iniquitatis subditorum, aut in verberibus peccata eorum: nec ea visitatione, qua scriptum est: *Requiram oues meas, & visitabo eas, sicut pastor vi-*

Archipresbyter maior presbyteris nominatur.

Archipresbyteri nomen sacrum.

visitat

*ſtat oues ſuas: ſed viſitant burſas, palpant delicta; qui merito au-
dient: Vos diſſerſiſtis gregem, deieciſtis eos & non viſitaſtis: quod craſſum
eſt comediſtis: quod infirmum, non viſitaſtis: quare, inquit propheta:
Viſitabo prauaricationes Syon. Et iterum: Viſitabo ſuper viros deſixos ſe-
cibus, voluptatis videlicet & auaritiæ. Qui igitur habet aures au-
diendi, audiat: & in tantis periculis conſtitutus, ſit cautus, agat
iuxta eius officio incumbentiæ, & vitabit cuncta discrimina no-
centia.*

CAPITVLVM XIX.

*De prerogatiua & magna utilitate officii canonicorum; & quanti ſit
honoris & reputationis; & quid eis congruat: demum de innu-
meris huius ſtatûs oneribus & afflictionibus, defectibus & peri-
culis.*

CAnonicus, ſicut honeſtum habet nomen, ſic ſaluberrimum
in Eccleſia miniſterium gerit. dictus eſt enim à canone vel
regula, quæ cuncta ordinat & dirigit. Canonici itaque regulati &
disciplinati dicuntur: quippe quia ſua electione, regulatione ac
diſpoſitione episcopus eligitur, qui eſt vertex & norma cuiusli-
bet eccleſiæ; qui & ſecundum ſacros canones cunctorum eſt
præordinator. Nec ab re ſancti patres canonicos, conſiliarios e-
piſcopi fore decreuerunt. quare in corpore rei pub. cordi recte
comparantur. Nam veluti à corde in corpore naturali eſt vita & Canonici
comparantur
cordi.
regimen, ſic à canonicis episcopum eligentibus & ei conſulenti-
bus, omnium pene in eccleſia agendorum regimen & directio præ-
cedit. Quæ res agit, vt non parua ſit canonicorum honoris & ti-
tuli prærogatiua: qui primum in eccleſia gradum eligunt ſimul &
dirigunt. quare huiusmodi ſtatus & vitæ forma non modo hono-
ris, ſed & emolumenti in Dei eccleſia plurimum habet. Demum
hic viuendi modus tranquilluſ atq; ſecuruſ admodum eſt, nullâ
curæ animarum ſarcinam habēs. quo ſit, vt minor doctrinæ atq;
ætatis idoneitas eis ſufficere videatur. Adde, quia libertatis obri-
net ſatis, nec ad ſacros artatur ordines: quippe quibus ad ſeculum
redire, & ſub ſancto viuere matrimonio libet. Verum huius vitæ
miſerias, cruciatus & defectus, calamitates ac pericula tuiſe

audi: qui tam libenter huius status dulcia auscultasti. In primis itaque canonicus, qui (vt ais) nomen à regula traxit, an sub regula viuat, oro considera: atque hic repete quæ supra de episcopis & cæteris clericis in communi diximus xii. *huius libri capitulo*. Demum quopacto canonicus à regula dicatur, ignoro: qui canonicus & sub regula nō viuut: qui (vt cætera taceā) secundum regulas canonum plures præbendas obtinet, & vnus ipse plurimorum (forſan meliorum) loca occupat: quippe cum non ſatis eſt vt vnus ſeruiat, damnabiliter multorum ſeruitia intercipit. Demū quāto liberiores ſunt canonici, tātō licentiꝛ in plurima debachātur vicia; nec vna vni ſufficit muliercula, niſi retentam in domo habeat vt vxorem: concubinas vero & aduleſcentulas, quarū non eſt numerus. Sed & quomodo ſub regula viuant non video; qui episcopis non obediunt, ſed reſiſtunt: tepeq; in eos conſpirant, armaq; mouent, atq; ne iuſte ab eccleſiæ Principibus puniantur, iniuſte ſe Principibus ſeculi ſederantur, ſed & famulantur. Et (vt paucis agā) in tribus locis canonici verſatur officiū: in altari videl. in choro ac in capitulo. In altari, inquam, reuerentia exquiritur; in choro honeſtas & diuinorum deuota decantatio; in capitulo, morum correctio, ac agendorum vnitas & vtilitas. Pro his canonici in altari irreuerentiam vendicant, in choro diſſolutionem, in capitulo lites. Ad altare, inquam, irreuerenter accedunt: qui (vt ait Hugo) *licet ablutis manibus, lota ſacie, albis veſtibus appropinquent; tamen peruerſo opere, polluto ore, immundo corde Chriſti corpus, ſacra vaſa pertingere non erubescunt*. Denique ad altare accedit, elatus ad humilem, iratus ad mitem, crudelis ad elementem. Accedit ſeruus ad Dominum, non charitatis ſupernæ amore, ſed perdendi corporalis ſtipendii timore: non deuotione, ſed coactione. Accedit ruſus turbatus ab aliquo, aut alios turbans. Accedit, inquam, canonicus ad altare vanus, curioſus, voluptati ſubditus. Accedit ad menſam Chriſti, non niſi aliquid temporaliter accepturus: ſed verum eſt quia acceſſit ad Iheſum Petrus, tamen acceſſit & Iudas. ſed quopacto deuote accedent, qui legem Domini nec ſciunt nec diſcunt. Vacant enim ocio & comellationibus, non libris, non contemplationi, non vtili actioni ſtudent. terrenis inhiunt, temporalia ſapiunt, aſſidui in plateis, in eccleſia rari, tardi ad prædicandum,

para-

*Brefſioris
plurality
damnabilis*

*Concubina
vxoꝝ ſu
bi
Canonici
episcopos
adientes*

*Canonici
officiis
apꝛix*

parati ad leporis vestigia inuestigandum, volociores ad congregandos canes quam ad alendos pauperes: plures illis ad mensam seruiunt, ad missam nullus: citharus eorum calice preciosior, equus missali charior: cappa eorum casula pulchrior, camisia delicatior alba. Non igitur eorum sacrificiis Deus placatur, sed indignatur, quia scriptum est: *Oratio iusti inpinguat altare, deprecatio impii non liberabit eum.* Et iterum: *Spreuit Dominus altare suum propter iniquitatem ministrantium.* Rursus qualiter in choro versentur, discutendum est. vbi tanto deteriores in honestioresque canonici degunt, quanto honestiores esse deberent: vbi mente vagi, attolunt oculis, habituque dissoluti prospiciunt per cancellos, non pauperulas, sed mulierculas: aliud cantant, aliud cogitant. In choro sunt corpore, in foro sunt mente: mane in theatro, sero in ecclesia: ibique nunc intus, nunc foris exeunt inquieti: psalmorum verba non pronunciant, qui cantare pudori existimant; quod si verba aliquando proferunt, eorum sensum non attendunt, nescientes illud Gregorii, quia *vox psalmodie cum ex cordis deuotione agitur, Deo per intentionem mentis coniungitur.* Alii cantant, sed non quod libri habent: cantant, ut placeant populo magis quam Deo, tanta quibusdam leuitas est vocis, quanta & mentis: frangit vocem, qui non frangit voluntatem: seruat consonantiam vocum, non morum; quibus ait Gregorius: *Quid prodest dulcedo vocis, si adeest asperitas mentis?* Tandem cantant non cum Dauid iuxta arcam Domini, sed in palatio cum Herodiade, ut placeant discubentibus. Merito igitur chorus eorum non exultationis, sed deplorationis effectus est: ut dicere cogantur cum Hieremia: *Versus est* (inquit) *in luctum chorus noster.* Sed quid hæc? Vereor ne verum sit, canonicos nostri temporis fructus non facere suos: cum plurimi chorum non essent ingressuri, nisi aliquid extorquerent. Alii vniuersis interessentes horæ, totius diei emolumenta rapiunt. Alii sterilibus officiis sterile exhibent obsequium; pinguiora vero officia frequentant. Alii falso infirmantur, ut distributiones percipiant, etsi in domibus delitescant. Alii (ut ita dixerim) infortunata hora, qua interfunt non diuinorum decantationi, sed secularium negotiationi; nec diuinis officiis, sed humanis commerciis: nec orationi, sed vanæ confabulationi vacant. Denique ad capitulum

de choro.

Quare templa iis canonicis.

De capitulo.

*Capitulum
exant cano-
nici parum.*

lū canonici accedunt, sed vt litigent: vt (prohdolor) vbi litigia sopiri deberent, ibi nascantur: ibi culpa augeatur, vbi deleri debuit: ibi discordias gignunt, partes constituunt. Et (vt paucis agam) quotiens canonicus capitulum ingreditur, totiens domum per- iurus redit: prece enim, aut precio, odio, fauore aut timore lon- ge aliud consulit, quam aut conscientiz aut ecclesiz utilitas ex- poscunt. ibi non modesta discussio, sed clamorosa confusio: sitq; capitulum officina discordiz, cum esse debuit mater concordiz. Congregantur non vt se corrigant, sed detrahant: nec fit de ani- mabus sermo, sed ipsi loquuntur de extrinsecis. ducunt ad capitu- lum oues & boues. Et (vt paucis concludam) ibi nec Maria locum habet: nec Martha cōpescitur: quia nec bona actio ventilatur, nec

*De electio-
ne
episcoporum.*

Mariz silentium custoditur. Taceo de electione episcoporum: in qua caro & sanguis ac mammona iniquitatis longe plus possunt, quam ordo iusticiz & vnitatis. Cum vero capitulum canonicos creat, aut cetera confert beneficia; non ad merita, sed ad volua di- rigunt vota sua: nec ad longiora obsequia, sed propinquiora tra- huntur commercia: veluti vnus ex sanctis ecclesiz doctoribus, non tam eleganter quam facere in ecclesia Argentina accidisse refert. In ea enim, cum de conferendis certis in ecclesia vacan- tibus præbendis discordarent, altero nepotem puerum, altero fi- lium, altero ignobilem fratrem nominantibus; quidam Roma- nus inibi canonicus asellum, qui plusquam XX. annis ei seruie- rat, nominauit, asserens in conscientia, quia propter d. iuturna ser- uitia, quæ asinus ecclesiz fecerat, dignior cunctis nominatis erat.

*Asellus no
minatur in
anagim.*

Quis igitur ea omnia recolens, iocundus, tranquillus aut securus esse potest? Et (vt inquit Bernhardus) *quis in tantis periculis constitutus, ac tantis bonis destitutus, non imra urgetur, nō vritur, non cruciatur? Qui igitur habet aures audiendi, audiat: & inter tot misérias, laqueos & pericula sit cautus: viuaturque sub regula, qui à regula nomen ac- cepit. non enim timebit æterna supplicia, si studebit vitare secu- li vicia.*

CAPITVLVM XX.

De præminetia, necessitate & utilitate officii sacerdotum curatorum, rectorum curam animarum habentium: Demum de plurimis hu- ius status laboribus & calamitatibus, defectibus & periculis.

Rectoris

Rectoris Curatique sacerdotis eximia est dignitas, atq; per-
 necessarium saluberrimumque ministerium. Habet enim im-
 primis illum familiarissimum atque salutiferum ad veri corporis
 Christi accessum assiduum; in quo est redemptio, vita & salus no-
 stra. Demum quanti honoris & emolumenti temporalis hoc ec-
 clesiae officium existat, beatus Augustinus patenter insinauit. Nā
 illud apostoli exponens, *presbyteri qui bene præsunt duplici honore di-
 gni habentur*: sic ait: *Presbyteri qui bene præsunt, vita & doctrina digni cer-
 te habentur à subditis duplici honore, sc. ut spiritualiter eis obediant, & ex-
 teriora bona ministrant.* Nec solū honore sublimi præmiari debēt, sed
 & terreat, ut non cōtistantur indigentia sumptuū temporalīū, &
 gaudeant obedientia spiritualiū. Demum ex eo rectoris & curati
 dignitas, honor & utilitas cōprehenditur, quoniam (ut inquit Gre-
 gorius Nazianzenus) *spirituale est eius officium, mediatorem esse populi
 apud Deū.* Vnde Rabanus: *Non qualiscunq; dignitas sacerdotum est. Huius
 enim sorte datū est, ut mediator sit inter Deum & hominē, ut per eos genus
 humanū reconcilietur.* Adde, hic pro populo orat, hic sordes eius ab-
 luit, hic vice Christi peccata condonat, hic clauēs regni cœlorum
 pœnitentibus aperit, hic baptismū (quo Christi nomine censemur
 & ei coniungimur) ceteraq; ministrat saluberrima sacramenta, ut
 merito de illo dici possit, q̄ scriptū est: *quia ipse comedit peccata popu-
 lorū.* Superest, ut huius officii calamitates, afflictiones, defectus &
 pericula succin̄te narremus, quorū plurima in *duodecimo huius se-
 cūdi libri capitulo* disseruimus, cū in cōmuni clericorū omniū mise-
 rias, onera & labores tetigimus: sed & illis nonnulla addenda sunt,
 quę inesse ceteris ecclesiasticis officiis diximus, præsertim cum de
 canonicis egimus. Parua tamen ex mūltis singularibus eis con-
 gruētia afferemus, ut vnusquisque (nisi mente obxatus exi-
 stat) facile huius vitæ formulæ calamitates & pericula conspi-
 ciat.

*Curati qui
 bene præsunt
 duplici ho-
 nore digni
 sunt.*

*Christi summo
 pericula su-
 pra narrato
 sunt.*

Fateor igitur, summa est dignitas, summus honor, curam ani-
 marum habere: quod ex eo facile conspicitur, quoniā summa est
 honoris prærogatiua corporū rerūq; (quib. non parū animæ præ-
 stant) regimen gerere. Sed oro, consideret rector, qualis ipse de-
 beat esse, qui ceteros regendos, immo corrigendos suscipit: quod
 tanto est periculosius, quāto pauci se se corrigāt. Attendat curatus

Curati sint
populo purio-
res.

Curati ex
populi pec-
catis dānā-
tur.

vires suas, qui animarum sarcinam super humeros portat. *Non enim* (teste Chrysostomo) *dignitas, non officium facit sacerdotem, sed sacerdos officium: nec locus sanctificat hominem, sed homo locum.* Ideo subdit, quia malus sacerdos aut rector de suo ministerio crimen acquirit, non dignitatem, qui enim alios purgandi curam suscipit, aliis sanctior purgatorque esse debet. Vnde idem Chrysostomus: *Magna est confusio, magnum periculum sacerdotum, quando laici inveniuntur fide- liores eis atque iustiores.* Quomodo autem non erit confusio, illos esse inferiores subditis, quos etiam æquales esse confusio est? Sed inter cetera, in eo sacerdotum curatorum imminens periculum versatur, quia non modo sua, sed (ut ait Isidorus) *populorum iniquitate damnantur, si eos aut ignorantis non erudiunt, aut peccantes non corrigunt.* quod & beatus Gregorius testatur, ait enim, quia sacerdos causa est ruina populi. Quis enim se pro populi peccatis intercessor obiciet, si sacerdotes, qui eam curam habent, grauiora committant? Quare merito grauissimo supplicio sunt destinati, sunt enim (eodem teste Gregorio) *veluti aqua sacri baptismatis, qua peccata baptismi diluens, illos ad regnum celorum mittit, & ipsa in cloacam descendit.* Qui enim aliorum delicta in se suscipiunt, non tam suam, quam aliorum vitam inspicere debent: quia quorum sudoribus viuunt, quorum sanguine laute pascuntur, dignum est ut eorum culpis plectantur. Hinc idem Gregor. *qui de oblationibus fidelium viuunt, quas illi pro peccatis suis obtulerunt: si comedunt & tacent, eorum certe peccata manducant.* Quare non tam rectorum dignitas extollenda est, quam illorum periculum deplorandum. quod Bernardus summis eiulatibus lacrimatur inquam: *Egressa est iniquitas à sacerdotibus tuis, domine, qui videntur regere populum tuum: non est iam differentia, ut populus sic & sacerdos.* Heu heu Domine Deus, quia ipsi sunt in persecutione tua primi, qui videntur in ecclesia tua populum regere. Quis enim animarum rector intus non affligitur, cum sciat curam subditorum suo periculo suscepisse? De quo scribit Sapiens: *Defixisti apud extraneum animam tuam: illaqueatus es verbis oris tui.* Quis est curatus aut rector, qui infirmetur cum infirmo subdito? Quis cum scandalizato vitetur? Quis cupit fieri pro fratre anathema & subdito? Quis ponit animam suam pro subditis? Quis curatus est Samaritanus, qui liget vulnera subditi? Quis facit secum misericor-

ricordiam? Quis ducit eum in stabulum ecclesiam Dei? Quis reddit, quæ ultra ei necessaria sunt; qui utinam vitæ necessaria nō auferret? Quis curatus hodie est alter Ioseph, qui frumenta in Egypto diuidat, eum sint promptuaria eorum plena? Quis liberat pauperem à potente & inopē, cui non est adiutor? Quis rector est hodie interrentium consolator? Quis vt alter Iob de velleribus ouium suarum, immo ecclesiæ calefacit pauperes? Quis viatoribus hostia aperit? Quis curatorum dicere poterit cum Moysē: *tu scis bene, quia nec asellum, nec quid aliud acceperim ab eis; nec quicquam affluxerim*? Quis cum Samuele audaci animo dicet subditis: *Loquimini coram Domino & coram Christo eis: utrum bouem cuiusquam tulerim aut asinum*; si quempiam calumniatus sum; si oppressi aliquem; si de manu cuiusquam munus accepi, illudque restitui vobis? Quis cum Ambrosio vasa sua conflat, & dat captiuis & pauperibus? Quis cum Paulino Nolano episcopo (vt inquit Gregorius) pro redimendo filio parrochianæ viduæ mitram & baculum & indumenta pontificalia vendit? Sed certe iam mutatus est color optimus, & dispersi sunt lapides sanctuarii: qui merito sunt ecclesiarum rectores, qui dispersi sunt nō solum in plateis, sed in capite platearum: quia publicæ honorari volunt de imagine sanctitatis, in quibus non est virtutis existentia nec veritatis. Sunt enim fermento Phariseorum (quod est hypocrisis) saginati; qui mæsto vultu cum fletu ad altaria Domini virtutum accedunt, in quibus spiritus sanctus non habitat: qui (vt inquit scriptura) effugiet fictum, merito repellit eū Dominus & munera eius, quia non vero corde accedūt. Quos pulchre Malachias signat: *Operiebat, inquit, labrymis altare Domini: & fletu & mugitu gemitatis, vt vos populus sacrificaret*. Et (vt paucis multa pertingā) solū eis curati & rectoris nomen relictū est: cura ipsa atq; regimen periit. deficit eis pietas, mās auctoritas: qui galli erant, castrati effecti sunt; canes nō valentes latrare; rectores plebiū vacce Samariæ sunt, & dirati nō mugiunt, nec via regia gradiuntur. *Illi* (vt dicit Bernhardus) *non tam facile optarent honores, si curæ considerarent labores*. Nec moda ea, quæ diximus, pericula, rectores & sacerdotes comitantur: sed alia contra ordinis & officii sui naturam damnabiliter amplectuntur. Sunt enim inuidi & inobedientes superioribus, quibus invident & detrahunt. Rut-

De magno zelo veritatis curatum.

Curati sumus multi solo nomine.

Curati superioribus inobedientes.

*Curatorum
descriptum.*

lis notum curati facinus committunt. Non enim contentantur ceteris rectoribus viuos, sed & mortuos subtrahere parochianos. procurant enim sibi in testamentis aliquid relinqui. Taceo quod sacramentum pœnitentiæ ministrantes in ipsum sacramentum committunt. Imponunt enim pœnitentibus missas quas ipsi pecunia se celebraturos pollicentur. pœnitentias non discretas imponunt. nulli sunt illis casus referuati: certatim omnes de omnibus absoluunt: missas & cetera eis incumbentia pro defunctis onera non persoluunt: celebrant non reconciliati: vocati confessiones non audiunt: plerumq; sine sacramentis subditi eorum negligentia moriuntur: admittunt excommunica-

*Rectores ac-
desiarum nō
prædicat ne-
que prædica-
re sciunt.*

tos ad diuina: non prædicant populo, sed à populo prædicantur. Quo enim pacto prædicabunt, qui literis operam non dederunt? Aut quomodo alios docebit, quem nullus docuit? Sed verum est illud Cœlestini in quadam epistola, quod ante Hieronymus dixerat: quia *abiectionis partes ante addiscuntur; solum sacerdotium vilius erit, quod ante sumitur quam addiscitur: anidius quaeritur, quam cognoscitur: facilius tribuitur, cum tamen difficilius impleatur.* Denique rectores animarum facti sunt corporum

*Rectores ani-
marum im-
pinguati cor-
pora sua.*

suorum crassatores. impinguati enim, dilatati & incrassati, buccas rubentes habentes, *diuersis epulis saginati, facile (vt inquit Hieronymus) spumant in libidines.* Sed quid tam perfunctorie loquimur de vinolentia, de crapula ac ceteris gulæ irritamentis sacerdotum & aliorum, qui ecclesiastico nomine censentur? Qui aiunt, *comedamus & bibamus & moriamur*: qui viuunt, vt comedant: quorum Deus venter est, quia ventri vacant, & ad ventrem (vt ad eorum summam felicitatem & finem) cuncta ordinant: nec eis satis est vti cibis, qui in ea, qua degunt, patria nascuntur, sed Deum & naturam emendant. Nam vitramarinis & forensibus vinis, ac cum magnis impensis adductis ferculis saginantur: quibus non vna sufficit prouincia; diuersitate vinorum lætantur; non considerantes, quia vnius vini potus patriarcham Noe per sexcentos annos sobrium, temulentum fecit & (vt Hieronymus in quadam epistola ait) *Loth per ebrietatem insciens libidini miscuit incestum:* & (quod dictu mirabile est) quem Sodoma non vicit, vina vicerunt. Sacerdotibus enim

lex

lex prohibet vini vsum: sed & ceteris, qui præsunt, ne obliuiscantur iudiciorum Dei. modernis vero sacerdotibus & ecclesiæ ministris longe magis meræ abhorrenda forent, quibus dignitas honorabilior est & operatio sanctior: quorum vinolentia ac ipsa exquisita epularum auiditas ministerium vilificant, personas dehonestant, conuersationem deturbant, & postremo ceteris lasciuendi causam præbent. Teste enim Gregorio: *cum maiores voluptati deseruiunt, nimirum minoribus lasciuie frena laxantur*. Taceo commemorari dilectam ab eis philargyriam, id est, amorem pecuniæ. plurimi certe eorum aurum sitiunt, aurum bibunt, ut conseruent carni & sanguini. Rectores moderni non pastores, sed ratores: ouium tonsores, non ad viridia pascua ductores: non piscatores, sed negociatores: non dispensatores bonorum Crucifixi, sed voratores. Sic sua falso quærunt, ut quæ vera sua sunt perdant: pro pecuniis celebrant, corpus Christi vendunt cum Iuda, de mammona iniquitatis sacramenta ministrant. Vereor satis, an rem sacramenti conferant. sacramunt, sacra vendunt, sed gratiam non infundunt, quam non habent. Aiunt, *nihil accipimus gratis, nil damus gratis*: dicentes, *quod comparauimus, vendimus*: quia mercatores parati sunt vendere, quæ carius ipsi emerunt. I. d. his lucrum est in bursa, damnum in conscientia: nulla in eis grauitas, & (ut ait Canon) nihil in eis defendit industria. Sed audi, quam acerbe eis comminatur ecclesia, quam offendunt. Ipsa enim clamans ad sponsum ait: *Duplici contritione conterere eos Domine Deus noster*: quia tanta sapacitas, tanta proteruitas, tanta segnities duplici eos poena conterit, anima & corpore: dum hic egere, & in labore inutili viuere, & bonis suis gaudere non sinit, tandem gehennam usque perducit. Qui ergo aures habet audiendi audiat: & inter tot pericula positus, viam quærat securitatis, qui tam propinquus est discrimini tempestatis. Narratâ pericula non pauebit, si curam subditorum digne tenebit.

Paucula certe de cunctis ecclesiastici status dignitatibus, officiis & ordinibus enarrauimus: dulcia pariter & amara tangentes. Quare iam faciemus finem: quia finis non esset, si

quis conaretur plene narrare cunctas miseras & labores, aculeos, & pericula huius status, videlicet pontificalis & sacerdotalis. Veruntamen ne quis ista legens ex tanta multitudine laborum, & perinitate periculorum statum ecclesiasticum perfectum & dignum, aut reprobet aut damnet; intelligat sane prædicta vera esse de illis episcopis & clericis, qui male, negligenter & perfunctorie curam pastorem gerunt, quib. prædicta & maiora pericula parata sunt. Si tamen digne ministrant ea, maiora gloriæ præmia habent destinata. Et hoc est quod paucis verbis dicit Augustinus: quia *nihil periculosius aut damabilius in hoc seculo episcopi & presbyteri officio, si perfunctorie agatur: sicut nec beatus & Deo acceptus, quam si comodo militetur, quo imperator noster iubet.* Itaque non est periculum in statu, sed abutentibus statu: nec est reprobatio in dignitate, sed in deturpantibus dignitatem: in qua nimirum si sit multitudo laborum, ubi est excellentia honorum & præmiorum.

CAPITVLVM XXI.

De secundo statu spirituali, videlicet religiosorum; & de motiuis & autoritatibus ad probandum statum ecclesiastici ordinis simpliciter præferendum esse statui religionis: & per consequens ecclesiasticum ordinem esse præeligendum.

SVpereft agere de secundo statu spirituali, videlicet Religiosorum. Primo adducuntur rationes & motiua ad probandum statum ecclesiasticum simpliciter præferendum esse statui religionis: & per consequens videtur, quod episcopi & ministri ecclesiæ in dignitate & perfectione status sint religiosi præferendi. Primo enim illud aperte probare videtur Hieronymus. Nam & ad Rusticum monachum sic inquit: *Vive in monasterio ut clericus esse merearis.* Et iterum alius Sapiens: *Vix bonus monachus mediocrem clericum facit.* Et iterum ad Heliodorum: *Alia est causa clerici, alia monachi.* Clerici oves pascunt, ego pascor: illi de altari vivunt, ego ut sicuris quasi ad radicem arboris instructus ponere si minus ad altare non offero. Et iterum: *Mibi ante presbyterum sedere non licet. Illi si peccavero, licet me trahere sathana.* Vides ergo dignitatem & excellentiam clericorum super

super monasticam vitam. Denique quis dubitat bonum publicum præferendum esse priuato? Constat autem clericorum & prælatorum vitam magis populo fructuosam fore, quam religionum, ut enim dicit Gregorius, *nullum Deo magis acceptabile est sacrificium quam zelus animarum*. Clerici ergo cum magis fructificent, merito ergo eorum status monasticæ vitæ præferendus est, qui propriè duntaxat salutem intendit. Demum nemo hæsitat, quin Helias longe perfectior fuerit quocunque monastico viro. quod ex eo maxime constat, quia Christus Iohannem, quo inter natos mulierum alius non fuit maior, in perfectione eum inducit, dicens in Euangelio Lucæ: *ipse præbuit ante illum in spiritu & virtute Helia*. Et iterum in Mattheo dicit: *Si vultis scire, ipse est Helias*. Super quo verbo Chrysostomus pulchre ad propositum loquens: *Si talem aliquando mihi adducas monachum, qualis (ut exaggerationem dicam) Helias fuit: non tamen illi comparandus est, qui traditus populis & multorum peccata ferre compulsus, immobilis perseverauit & fortis*. Hi autem sunt ecclesiastici & prælati, qui populorum salutem continuo studet. Sed nec illud obmittendum est: quoniam cui amplius committitur, ille magis meretur, si bene ministrat, quàm ille cui minus commissum est. Constat tamen quod viris ecclesiasticis & prælatis amplius est commissum, quam monasticis viris. Accedit, quoniam perfectio seu sublimitas alicuius status non acquiritur sine charitate, iuxta illud: *Si habuero omnem scientiam & fidem, ita ut montes transferam; charitatem autem non habeam, nihil sum*. Constat tamen charitatem proximorum magis inesse clericorum statui propter animarum curam, quam habent. Præterea si meritum utriusque status considerare libet, illud verissimum est, quoniam meritum hominis consistit in liberando innocentes de manibus fortiorum & tyrannorum: in quorum persona dicebat Iob: *Conterebam malos ab iniquo, & de dentibus illius aufererebam pradam*. Quod magis fit per statum clericorum & prælatorum, quam monachorum. Vnde Hieronymus ad Paulinum ait, quod *sancta simplicitas solum sibi prodest*. Et quanto plus ædificat Ecclesiam Dei ex vitæ merito, tanto plus nocet, si contradicentibus non resistit. Demum magnitudo meriti consistit in magnitudine conatus ad vincendum magnam promptitudinem, & incitantium ad peccatum: quia inquit Ecclesiasti-

cus: *Perfectus & beatus est, qui potuit transgredi, & non est transgressus: facere mala, & non fecit.* Talis ergo magnitudo conatus potius est in statu Ecclesiasticorum, quam religiosorum. Possent in hac re plurima adduci, sed breuitatis gratia prædictis rationibus sum contentus: quibus quidam probare videntur, episcopos & cæteros ministros ecclesiæ in status & dignitatis eminentia & perfectione præferendos esse religiosiis: & per consequens ecclesiasticum statum esse præligendum. Veruntamen quid tenendum sit in sequentibus capitulis explicabitur.

CAPITVLVM XXII.

De prima comparatione horum duorum statuum, videlicet qualiter hi duo status clericorum & monachorum se habent alter ad alterum comparatus: & quis eorum sit simpliciter eligibilior quantum ad eminentiam & perfectionem status, ac etiam vitæ & sanctitatis.

CONsiderandum rursus occurrit atque discutiendum, qualiter hi duo status seu viuendi modi, ecclesiasticorum videlicet & religiosorum, inuicem se habent alter ad alterum comparatus, respectu eminentioris vitæ & perfectioris status. In quo articulo licet plurima dici possent, breuissime tamen & sub quodam epilogo dicendum est, secundum sanctorum doctorum sententias illud esse verissimum, videlicet episcopos non solum cæteros omnes ordines & ministros ecclesiæ militantis, sed & cunctos religiosos & regulares viros perfectiori modo repræsentare Apostolos; & ideo super omnes eminentiores & in perfectiori statu fore. Nam manifestum est, quod episcopi succedunt Apostolis in regimine ecclesiæ. Vnde Paulus ad eos ait: *Attendite vobis & uniuerso gregi, in quo Spiritus sanctus posuit vos episcopos regere ecclesiam Dei, quam acquisiuit sanguine suo.* Pro qua re apertius declaranda præsupponendum duximus, quod quatuor principaliter & singulariter fuerunt collata Apostolis à Christo & episcopis eorum successoribus: quæ magnam in eis excellentiam & status perfectionem designant: & in quibus episcopi Apostolis succedunt, & eos præ cæteris imitantur. Primo virga potestativa in susce-

*Apostoli
quatuor
à Christo
acceperunt.*

susceptione temporalium stipendiorum. Vnde in Mattheo legimus: *Præcepit eis ne quid tollerent in via, nisi virgam*: vt nomine virgæ potestatem à Christo receptam de recipiendo temporalia stipendia intelligamus secundum Augustinum. Secundo clauus in iurisdictione administrationis sacramentorum. Vnde ait Christus Petro: *Tibi dabo clauis regni cælorum*. Tertio data est insufflatio spiritus in remissione peccatorum. Vnde apud Iohannem legimus: *Insufflauit & dixit, accipite Spiritum sanctum, quorum peccata remiseritis, & cætera*. Super quo verbo Gregorius inquit: *Licet intueri in quantum culmen gloriæ perducti sunt Apostoli, vt vice Dei quibusdam peccata relaxent, quibusdam retineant: quorum nunc in ecclesiis episcopi locum tenent*. Quarto data est dispartitio linguarum in prædicatione verbi Dei, vt in actibus Apostolorum legimus, quia apparuerunt Apostolis dispartitæ linguæ ad prædicandum verbum Dei. In his ergo quatuor episcopi Apostolos excellentiori modo repræsentant, quam quicunque religiosi: & ideo sunt in perfectiori statu. Adde quintum, propter votum perpetuæ curæ ouium suarum vsque ad animam & sanguinem. In qua re perfectiori modo Apostolos repræsentant, quam omnes religiosi. Quod votum curæ animarum, in consecratione sua fecerunt vouentes animas suas ponere pro ouibus suis: in quo voto tam excelssæ charitatis omnes religiosos excedunt: quia (teste redemptore) *maiores charitatem nemo habet, quam vs animam suam ponat quis pro amicis suis*. Summus ergo gradus perfectionis est in episcopis: quia eorum dignitas perfectam charitatem iam acquisitam requirit, non acquirendam. Si vero seclusis episcopis presbyteros & cæteros ministros ecclesiæ ad religiosos comparare volumus: hoc tripliciter considerare & intelligere possumus. Primo quantum ad humani conatus voluntatem. Secundo quantum ad operis qualitatem. Tertio quâ tum ad vtriusq; status quidditatem seu primitatem. Primo modo præfertur opus operi vel status statui ex voluntate operantis. Qui enim promptiori voluntate & cum maiori conatu facit opus ad quod tenetur, maioris perfectionis & maioris meriti est. Si ergo isto modo opera religiosorum & presbyterorum adinuicem comparentur, incertum est quæ opera sint maioris meriti & maioris perfectionis:

quia planum est, quod illorum opera maioris meriti & perfectioris sunt, qui cum promptiori voluntate & cum maiori conatu ipsa operantur. Secundo vero modo, quantum ad operis qualitatem, virginitas præponitur coniugali vel viduali continentia in bono. In malo vero homicidium præponitur furto. Similiter vita actiua præponitur contemplatiua, quia fructuosior: contemplatiua vero præponitur actiua, quia merito maior & perfectior. secundum quem modum comparando aliqua opera particularia, quæ faciunt presbyteri, sunt perfectiora aliquibus operibus particularibus, quæ religiosi faciunt; sicut magis est intendere salutem animarum quam ieiunare, quam silentium tenere. Et aliqua opera, quæ faciunt religiosi, perfectiora sunt quibusdam operibus, quæ faciunt presbyteri. Et ita isto modo habent se sicut excedens & excessa. sed tertio modo comparando opera religiosorum ad opera presbyterorum in ordine ad primam quidditatem & radicem, à qua progrediuntur: puta in ordine ad radicem illam, quæ religiosi totam eorum vitam Deo vouere, & se & sua in Christi obsequium perpetuo tradiderunt, longe sunt perfectiora quocunque singulari opere presbyterorum. Et eodem modo in perfectione vita religiosorum ad vitam presbyterorum comparatur, sicut infinitum ad finitum: vt dicit Anselmus in libro *de similitudinibus*. Quamuis n. in bono abstinentia sumptioni cibi præferatur: sumere tamē cibum cum aliquo propter charitatem præferatur abstinentia. In malo vero quamuis adulterium præferatur furto: furati tamen gladium ad occidendum est grauius quam adulterium. Sic quamuis presbyteri in aliquo particulari opere possint præferri religiosi: ex adiuncta tamen radice perpetuæ obligationis, quæ se in Christi obsequium religiosi tradiderunt, simpliciter in perfectionis statu præferendi sunt: & hanc opinionem aliqui eximii doctores tenent.

Alii vero affirmant archidiaconos, & curatos, & alios inferiores ecclesiæ ministros esse in excellentiori perfectionis statu: & maxime propter tria, quæ eis specialiter conueniunt. Primo propter potestatem: Secundo propter administrationem officii. Tercio propter honoris præconium. Potestatem enim receperunt à Christo in persona discipulorum, quando dictum est eis Lucæ x.

Ecce

Ecce dedi vobis potestatem calcandi super serpentes & scorpiones & super omnem virtutem inimici, & nihil vobis nocbit : ac si diceret; Dedi vobis potestatem eiiciendi omne genus immundorum spirituum ab obsessis corporibus: ne putaretur esse dictum de bestiis, vt Chrysostomus exponit. Istud autem repræsentant presbyteri in sacramentorum administratione. Administrationis vero officium receperunt, quando dictum est : *In quamcunque domum intraueritis, primum dicite, pax huic domui*: quia enim bonorum omnium pax mater est, sine qua cætera inania sunt, ideo Christus discipulis primo pacem iussit offerre, tanquam bonorum omnium initium, quorum ministros eos faciebat: vt Chrysostomus dicit. Hos autem repræsentant presbyteri in euangelii prædicatione: In quo primo nuncianda est pax: iuxta illud ad Romanos x. *Quam speciosi pedes euangelizantium pacem, euangelizantium bona*. Istud autem repræsentant presbyteri in plebis curæ susceptione; pro qua, donec ipsam tenent, animam & vitam propriam tenentur exponere. Sed honoris præconium receperunt, quando reuersi cum gaudio dixerunt Domino : *Dæmones etiam subiiciuntur nobis in nomine tuo. Gaudebant enim (vt glossa dicit) quod quasi sublimes effecti, terribiles hominibus & demonibus erant*. Hoc autem repræsentantur presbyteri in subditorum iurisdictione & coercionem: à quibus si bene eis præsumt, duplici honore debent haberi: vt dicit Apostolus i. *Timoth. 5*. Per hæc igitur, quæ proxime dicta sunt, concludunt aliqui doctores, etiam inferiores ministros ecclesiæ in eminentia & in perfectione status religionis præferendos esse: vel saltem eos fore in perfectionis statu. Hanc itaque opinionem prædicti doctores roborare videntur per rationes & autoritates superius allegatas, cum de excellentia & perfectione episcoporum & ministrorum Ecclesiæ actum est: ad quas, qui religiosos inferioribus ecclesiæ ministris præferunt, respondent: prout in

xxiv. capi. videbitur.

Admini-
strationis of-
ficium.

CAPITVLVM XXIII.

De alia comparatione horum duorum statuum clericorum & religiosorum inter se adinuicem: videlicet quis sit eligibilior, tanquam simpliciter humanior atque tolerabilior.

*Diffusio
diuina ordi-
nauit tantā
dissensu.*

POST prædictam comparationem horum statuum, videlicet ecclesiasticorum & religiosorum, quantum ad perfectionem status, alia comparatio succedit: quis videlicet horum statuum, clericalis vel regularis, eligibilior sit, tanquam simpliciter humanior & tolerabilior. In qua re, vt mihi sane videtur, quaestio ipsa facti est. vterque enim viuendi modus excellentissimus atque sanctissimus est. In quorum quolibet diuersæ viæ ad salutem reperiri possunt: nec enim ipse Christus sponsus ecclesiæ plene illi prouideret, nisi secundum diuersas infirmitates seu vires suorum fidelium, sic diuersos viuendi modos ad vnum tamen Dei cultum tendentes instituisset. Hinc ipse ait: *In domo patris mei mansiones multæ sunt.* Et iterum scribitur: *In via Domini alius sic, alius sic ibat:* omnes tamen non ad diuersos fines, sed ad vnum properantes, sed vt Deo, diuersis tamen gressibus, famulentur: & si alius currat, alius plane vadens ei non inuideat, cum vterque metam attingat. quæ diuersitas vnitas est, quia ad vnum Dei cultum diuinitus ordinata. Ea igitur decora diuersitate atq; fulgida vnitate floret atque splendet Dei ecclesia, tam pulchra fidelium suorum vnanimi varietate. Nihilominus tamen inter istos status seu viuendi modos (vt supra tactum est) ex diuersis casibus & respectibus, alter istis, alter illis eligibilior est. Vnde ait Dionysius: *Nonnulli sunt in via perficiendorum, & ad perfectionis acquisitionem aliquo indigent, quod aliis non expedit.* Nam ad exprimendas passiones, arcta vita, videlicet per abstinentiam ac exercitia & vigilias expediret: aliis vero non habentibus illas passiones, non congrueret, qui forte defectus suos alio exercitio vel diuinæ gratiæ auxilio supplere possent. Nam veluti secundum doctrinam Apostoli, in vno corpore multa sunt membra non idem officium habentia, & quod vni congruit, alteri plerumq; est nociuum sine offensione corpo-

corporis: sic plerumq; vna viuendi forma, quæ aliquibus est ad salutem, aliis cedit ad perniciem: & e contra. Profecerunt certe sibi & multis in ordine ecclesiastico complures, quos numerare opotum foret: adeo vt dicere mihi recte posset aliquis, *tanquam de stellis cæli, numerassi potes*. Sic Nicolaus fuit; sic Gregorius summus ipse Pontifex; sic Paulinus episcopus Nolanus, licet opulentissimus, sed & in regulari & monastica vita effulsit. Item Basilus, Benedictus, Hieronymus, Dominicus atque Franciscus, & plurimi, quibus domus Domini referta est: inter quos nonnulli aut diuino motu supernaque inspiratione vocati, aut variis ex causis ex altero statu ad alterum aspirarunt; in quo beati euasere, sine tamen prioris status diminutione. Hinc Benedictus, hinc Dominicus, & quam plures strictiore seruire Deo famulari cupientes, & seculi consortia fugientes ex clericorum ordine ad regularem vitam transierunt. Hinc rursus Augustinus, Gregorius eadem vocati inspiratione & proficiendi fidelibus vberius zelo succensi, ex monastica religione ad ecclesiasticum episcopalis ordinis gradum sanctæ & meritorie commearunt. Vnusquisq; igitur prout, secundû Apostolum, destinauit in corde suo, sic hæc vel illam viâ elegit vires suas cõsiderans secundum finem sibi intentum. Est n. vterq; status (vt tactû est) non præcepti, sed cõsiliij & supererogationis; nec imperatur, sed suadetur. Et veluti de virginib. Apostolus ait: *Qui potest capere capiat*. Et de matrimonio secundû eundẽ Apostolum, plerumq; *melius nubere quã vri*. Ita in his statibus dicendum est. In quibusdam forte vtilius foret, vt per spirituale matrimonium ecclesiæ nubant, quasi vltra vires inexpertas substricta regulari vita retro respicientes, vitam deferunt inceptam. Itaq; inexpertis imbecillibus & infirmis putamus, quod status ecclesiastici ordinis tanquam humanior & tolerabilior est præligendus, nisi altiori inspiratione quis desuper ad aliam vitã vocatus, aut spiritali & corporali adiumento roboratus fuerit. Accedit ad hoc, quia eligere actus est voluntatis & virtutis. virtus ergo ipsa consideranda est iuxta philosophum, secundum electionem medij, quod in recta ratione consistit. Ecclesiasticus itaq; status, attẽta humana fragilitate & promptitudine peccandi, quandã viam mediã & rationabilem viuendi habere videtur. *Habet n. religiositatis satis;*

habet & aliquid humanitatis seu laxitatis. Quod si forte dicatur, religionis vitam eodem respectu simpliciter fore eligendam, pro eo quod habet tolerantias & moderationes suas ad iudiciū prælatorum: nec ultra præcipitur, quā rationabiliter supportari possit. Et dato, quod quis in religione cadat, habet resurgēdi remedia propter intencionem ad Deum erectam: habet deniq; fratres, à quibus iuuari potest. Fateor illud verum fore: tamē illud idem, q. eisdem religiosiis ex permissione sit seu indulgentia, clericis sit ex iure cōmuni. quod n. toleratur aut indulgetur, constat legi derogare, atq; aliquando prohiberetur esse. & si aliquādo sine causā indulgeatur, cōscientia vrgetur: & intus bellum nascitur, vbi quietari speratur, maxime propter instituta & artificissimas cuiusq; religionis constitutiones, quib. se artari vouerunt: & ad multa alia, quorum trāsgressio aut contemptus mortale plerumq; inducit peccatum; quæ omnia non ita acriter clericis contingunt. Demum ea ipsa remedia quæ religiosiis competunt ex tolerantia vel fratrum præsidio, etiam clericis communia esse possunt. Circa secundum vero quis status seu viuendi modus prædictorum præligendus sit, tāquam sanctior & perfectior, dictum est in *precedenti capitulo*.

CAPITVLVM XXIV.

Assignantur responsiones ad obiecta cōtra religiosos, pro tuenda opinione illorum, qui sentiunt, religiosos esse in perfectiori statu quā sint decani, archidiaconi, & alii inferiores clerici post episcopum: vbi discutitur, quæ sit perfectior vita, actiua vel cōtēplatiua: & de earum adinuicē comparatione: & de aliis hanc materiā tangētibz.

Libet igitur pro tuenda opinione illa, quæ habet, inferiores ministros ecclesiæ post episcopos non æquari religiosiis, quo ad statum perfectionis, respondere ad nonnulla obiecta superius adducta; quæ probare videntur, archidiaconos, curatos & prædictis inferiores ministros ad religiosos comparatos, perfectiorem aut saltem æqualem statum in Ecclesia obtinere. Et quanq̃ per ea, quæ dicta sunt, satis rationes ipsæ solutæ videantur; particularius tamē ad singulas singulæ fiant satisfactiones.

Primo

Primo igitur dicebatur; quia monachis licitum est transire ad statum presbyterorū, tanquam ad perfectiorem: quia (vt inquit Hieronymus, & transumptiue in *Canone XXIII. quæstio. I* dicitur) *sic uiue in monasterio, ut clericus esse merearis.* Respondetur enim, quod monachus tanquam monachus nō habet officium clerici exercere, verumtamen in quantum litterati & docti sunt, licite possunt promoueri ad presbyteratum & curam monachalem aliorum habere: perfectionem tamen status non habet ex illo transitu, sed ex perpetua obligatione voti. Et ita licet fiat presbyter, non tamen dimittit perfectionem monachalem. ideo subditur in præfato decreto: *Multo tempore discite, quæ postmodum doceas; & inter bonos semper meliores sectare.* Deinde adducebat illud Hieronymus ad Eliodorum: ubi dicebat Hieronymus *Mihi scilicet monacho ante presbyterum sedere non licet. illi, si peccauero, licet me tradere Sathana.* Ex quo uidetur, curam animarum habentes in perfectiori esse statu quibusuis religiosi contemplationi vacantibus; aut saltem in statu perfectionis esse. Sed dicendum est, omnes ministros ecclesiæ esse in perfectionis statu, modo quo supra dictum est, uidelicet propter officii administrationem. sed talis perfectio status secundum eos, qui hanc opinionem tenent, magis accipitur comparatiue quam proprie. Vnde Canones appellant statum clericorum *gradum* quendam, vt inferius latius tangeretur.

Postea vero dicebatur, bonum publicum præferendum esse bono priuato: & cum curati gerant officium publicum, quia curam animarum; quo zelo seu officio secundum Gregorium nullum est Deo acceptabilius: & religiosi solum intendant propriæ salutis, uidetur curatos esse in perfectiori statu. Quibus respondetur, quod quamuis absolute intendere bono publico sit maioris perfectionis, quam intendere bono priuato, hoc est in genere operis perfectio: intendere tamen perfecte bono priuato vel salutis propriæ, præfertur illi, qui imperfecte intendit bono publico. zelus enim animarum sacrificium est acceptum Deo, si ordinate sit. qui ordo est, vt quis primo habeat curam salutis suæ, & postmodum aliorum: quia vt scribitur Matthæi xvi. & transumptiue in Canone: *Quid prodest homini, si uniuersum mundum lucretur, anima uero sua detrimentum patiatur.* Denique re-

spondent alio modo, videlicet quod ea, quæ dicta sunt, bene probant, curatos & inferiores ministros ecclesiæ, si recte agant, posse esse in perfectionis opere, sed non in perfectionis statu: quia prædicti ministri ecclesiæ non suscipiunt plebis aut parochiæ suæ curam cum perpetuo obligationis voto: quod ex eo patet, quia eam deserere possent aut renunciando, aut per religionis ingressum. Soli ergo episcopi cum voto perpetuo suscipiunt curam animarum. & ideo sine licentia apostolicæ sedis illam deserere non possunt.

Rursus quod obiicitur de Helia, de quo Chrysostomus dicit: *Si talem aliquem adducas mihi monachum, qualis Helias fuit, non tamen illi comparandus est, qui traditus est curæ populorum: & cetera.* Ad quod dicitur, quod Chrysostomus non intellexit de simplici presbytero, sed de episcopo. quod si loquatur de simplici presbytero, non intendit præferre statum presbyteri statui religionis: sed intendit, quod periculosior est status habentis curam animarum, quam religiosi in contemplatione viuents: & per consequens, seruare se innocentem in maiori periculo, iudicium est maioris virtutis. Sed quamuis maior virtus requiratur ad hoc, quod aliquis se præseruet immunem à peccato inter populos, quam in religione: maioris tamen virtutis est vitare pericula religionem intrando, quam non vitare pericula inter populos viuendo.

Administratio duplex.

Item obiiciebatur, quia presbyteris & ministris ecclesiæ magis committitur, videlicet cura animarum quam religiosi: & per consequens status est maioris perfectionis & meriti. Ad quod dicitur, quod aliquem agere vel administrare dupliciter contingit. si enim ille, cui plus est commissum, maiora faciat aut plus seruiat, indubie plus meretur, quam ille, cui minus committitur, & minus faciat. sed si ille, cui minus committitur, maiora & perfectiora faciat & plus seruiat, magis meretur, quam ille, cui magis est commissum & minus seruit. In utroque igitur statu clericorum & religiosorum ista duo reperiri possunt, per quæ vis argumenti soluitur.

Ad aliud autem, quod dicebatur de merito & perfectione, quod consistit in cura animarum, supra responsum est in solutione ad

ne ad argumentum, quod fiebat de publico & communi bono priuato præferendo.

Subsequenter non obstat, quod dicebatur, quia liberare innocentes de manu perfidorum maximæ perfectionis & meriti est: adducentes etiam illud Hieronymi, quia *sancta simplicitas solum sibi prodest, sed tanto plus nocet, si contradicentibus non resistit*. Dicendum est, quod illa magnitudo meriti intelligitur ex parte mentis, quando quis tantum proficit in contemplatione, ut propter Deum velit intendere salutem proximorum, etiam cum aliquo detrimento contemplationis. Hoc enim modo certum est, quod ad maiorem perfectionem charitatis pertinet, quam simpliciter vacare contemplationi. Et hoc est, quod Isidorus in libro de Summo bono ait: *Bonum est igitur corporaliter remotum esse à mundo: melius tamen remotum esse voluntate: optimum autem & perfecti meriti est, utroque esse semotum*.

Quod etiam dicebatur, quia magnitudo meriti consistit in magnitudine conatus ad vincendum promptitudinem peccandi: quia *beatus est qui potuit transgredi, & non est transgressus*. Quæ promptitudo magis inest ministris ecclesiæ quam religiosis. Dicendum est, quod magnitudo meriti hominis erga Deum ex tribus potest insurgere. Primo ex parte merentis; secundo ex parte principii formalis, quo quis meretur; tertio ex parte operis meritorii. Si igitur magnitudo meriti pensetur ex parte merentis, quando aliquis cōtemplatione Dei & in Christi amore tantum creuit, ut ad tempus cupiat detrimentum pati suæ fruitionis propter Christi gloriam, ad procurandam proximorum salutem, modo quo dicebat Apostolus ad Rom. cap. ix. *Cupiebam ego esse anathema à Christo pro fratribus meis*. De quo Chrysostomus dicit in libello de Laudibus eius, quod *sicut ferrum in ignem missum non est aliud quam ignis: sic anima Pauli diuina charitate incensa, non erat aliud quam charitas*. Talis ergo (puto) magis meretur in vita actiua salutem proximorum intendens, quam in vita contemplatiua contemplationi vacans. Vnde Paulus hoc elegit tanquam maioris charitatis & maioris meriti. electio enim non est nisi de maiori bono. unde dicit ad Phil. ca. i. *Coartor enim ex duobus desideriis habens dissolui & esse cum Christo, quod mihi multo melius est: permanere autem in charitate necessarium propter vos: & hoc confidens*

Meriti magnitudo tribus modis surgit.

scio, quia permanebo omnibus vobis ad profectum vestrum. Super quo verbo dicit glossa, quod elegit Paulus non quod sibi melius erat, sed quod multis expediebat, propter charitatem, quæ supereminet omnia. Si vero consideretur principium formale, quo quis meretur, putant aliqui quod maioris meriti est contemplatiua vita quam actiua. Cum enim principium formale merendi sit charitas: sicut magis meritorium est diligere Deum secundum se, quam diligere proximum: sic maioris meriti est vita contemplatiua, quæ directe de suo genere ordinatur ad dilectionem Dei. secundum quem modum intelligitur illud Gregorii VI. Moralium ultimo capit. *Martha cura non reprehenditur: Maria vero contemplatio etiam laudatur; quia magna sunt vite actiue merita, sed contemplatiue sunt potiora.* Verum si consideratur opus meritorum, videntur se habere sicut excellentia & excelsa: quia respectu meriti accidentalitatis, cum tale meritum detur secundum genus operis maioris meriti, potest esse actiua vita potior quam contemplatiua. Et isto modo nedum episcopi, sed presbyteri & sacerdotes curam animarum habentes in excellentiore & perfectiore statu sunt, quam religiosi. Er de istis loquitur Augustinus Valerio: *Nihil est in hac vita difficilius, periculosius, laboriosius episcopi, presbyteri aut diaconi officio, si perfunctorie agatur: sed apud Deum nihil beatius, si eo modo militetur, quo noster imperator iubet.* Si vero vtrumque seu vtramque vitam sumimus respectu meriti essentialis, quod respondet charitati tanquam radici merendi: putant aliqui simpliciter maioris meriti esse contemplatiuam quam actiuam. Alii vero famosi & moderni doctores comparando istas duas vitas adinuicem distinguunt, quod quantum ad eorum substantiam simpliciter potior, & per consequens præferenda est contemplatio, vt dicitur in cap. *Niscum pridem, de renunciatione.* Ipsa est enim securior & magis suavis paucissimis indigens, & propter se eligenda tanquam quietissima: quorum contraria contingunt operibus actiue. & secundum hunc modum comparandi, contemplatiua simpliciter est melior, & præferenda actiue. Si vero comparantur quantum ad eorum usum, tunc distinguunt. Nam quia vsus respicit operis executionem: executio autem actionis duo respicit, scilicet ipsos ad quos est scilicet subditus, & ipsum exequentem, scil. prælatum. Si

primo

primo modo cōparentur, sic actiua præferenda est contemplati-
ni, quia pluribus utilis est & magis fructuosa, vt dicitur in *dicta de-
cretali*, licet sit securior & magis suauis : quia in *fecunditate sobolis
lippitudo Lia Rachaelis pulchritudini est prælitā* : vt dicit Gregorius su-
per Ezechielem exponens illud : *Erat Lia lippa, sed facunda*. Si ve-
ro comparentur secundo modo : aut est ad illud dispositus & ido-
neus, aut non. Si non, tunc melior est sibi vsus contemplatiuæ,
quia sibi potest ibi proficere : sed in actiua nec sibi nec aliis. Si ve-
ro est idoneus : aut accedit vocatus & necessitatus, aut propria vo-
luntate. Si secundo modo, contemplatio præcellit, quia actiua
non præcellit, nisi proueniat ex coactione & necessitate : si vero
coactus, tunc simpliciter actiua præcellit quo ad vsum eius, & sic
siue cogatur ab homine vel ex charitate vel propter necessitatem
proximorum : & talibus melior est actiua quam contemplatiua.
Nam per talem actionem augetur charitas, & ad perferendum
aduersa & contemplandum optima : & sic sua actio est melior aliis
quam sua contemplatio : est etiam maioris meriti. Et sic patet,
quod quo ad vsum vitæ præsentis, talis actiua est simpliciter me-
lior & status eius ; & etiam opera magis meritoria. Fatemur ta-
men, quod contemplatio est realiter præeligenda ; quia plures in-
ueniuntur ad hoc idonei, qui in actione deficerent. Si tamen ho-
mo esset assecratus, quod populus indigeret, & quod bene ge-
reret illam curam, etiam sine periculo peccati posset illam deside-
rare & se ingerere ; & velle magis hoc fieri per se quam per alium.
neque hoc esset præsumptuosum : quia licitum est appetere ma-
ius meritum, sicut fecit Esaias. Itaque talis vita tanquam bona sim-
pliciter est præeligenda. Ex quibus aperte monstratur, quomo-
do intelligendæ sunt rationes adductæ pro parte illorum, qui pu-
tant statum clericorum inferiorum ab episcopo perfectiorem ef-
se statu religionis.

CAPITVLVM XXV.

*De excellentia & laudibus vite monastica & religiosa : & de plu-
ribus causis, propter quas præeligenda sit, quam alius viuendi
modus.*

Dd

Monasticam religiosamque vitam præconiis laudibusque conferre non aliud fore quam lucem ipsam facibus adiuuare. habet enim hoc vitæ genus ea omnia, quæ ad bene beateque viuendum conferunt, quæ ad veram felicitatem conducunt: & (vt paucis omnia comprehendam) id habet proprium religiosorum vita, vt Deo propinquior acceptiorque ceteris esse videatur. *qui* enim (inquit Apostolus) *adhaeret Deo, unus Spiritus est cum eo.* Nam & Hieronymus fatetur meliores non posse inueniri, quam qui in monasteriis profecerunt. Vnde & Augustinus in libro *de Operibus monachorum*, illos sanctiores esse testatur, qui a conspectu hominum separati, paucis ad se præbent accessum, sed Deo contemplantur. Quis enim dubitat, quin desidentes mundum & tumultum seculi, & se à seculi oblectamentis segregantes Christo confirmetur, & ab eo facilius confortentur. Quod latius ipse Augustinus prosequitur: & super illud Apocalypsis: *Mulier surgit in solitudinem.* Sed neque illud permittendum est, quoniam in certis huius vitæ occupationibus & viuendi modis, illud hominibus commune est, vt tempora transeant & non redeant. Religiosi tamen viri illud facile agere possunt, non tantum ne tempus fugiat, sed ne pereat. Occupantur quidem religiosi alquando lectione, plerumque oratione: nec altera alteram impedit, sed auget. Succedit demum diuini verbi prædicatio, qua Deo nullagratior occupatio esse potest. Demum itur ad bonarum artium studia. discunt enim, aut docent, scribuntque posteris doctrinam ad erudiendos saluandosque homines, nullumque illis tempus vacuum est. Et cum (teste Cicerone) *nihil dulcius bene impensi temporis memoria*, hac locupletissimi sunt religiosi. In ceteris siquidem viuendi modis consideremus hominum tempora. Primo infantiam ipsam siue pueritiam in vanos ludos: adolescentiam & iuuentutem in libidinem & auaritiam: senectam vero & senium in querelas, in cruciatus & dolores corporis, in suspiria, in lamenta consumimus. Religiosi vero infantiam in artibus addiscendis, in diuino cultu imprimendo: adolescentiam vero in altioribus studiis: senectutem vero in docendo, prædicando Deoque vacando & contemplando fructuose expendunt. Et (vt paucis agamus) inter monasticam vitam & ceteras viuendi for-

di formulas illud interest: quia quo magis illi nituntur vt salui fiant, tantum isti conantur vt pereant. Quinimo quantum illi nos ad saluandum inuitant, adiuuant atque cogunt, tantum nos ipsos præpedimus.

Ceterum religiosorum vita ex quinque causis excellentior atque perfectior ceteris videtur. Primo quidem quia dignior,

veluti quam Christus eligere visus est, & Apostoli secuti sunt. Secundo, quia securior: nam (vt inquit Augustinus) *pro mille cadentibus in religione, cadent decem millia in seculari vita.* Tertio

*Religiosorum
vita excellen-
tior est
vis & quin-
que causis.*

excellentior est vita monastica, quia dulcior atque iocundior. non enim habet amaritudinem conseruatio eius, nec tedium conuietus illius, sed gaudium & læticiam. Quarto, quia san-

ctior & Deo proximior per additionem contemplationis. Vnde quidam Sapiens religiosorum vitam recte per dextram designat: secularem vero vitam per sinistram. vnde super illo: *Leua*

eius sub capite meo: & dextra illius amplexabitur me: recte inquit; *secularis vita sub leua ecclesie ponitur, quia iuuat ad sustentationem: sed dextra, id est vita religiosa, Christum sponsum ecclesie amplexatur, dum eius innocentie & contemplationis amplexibus delectatur.* Sed & his alia

quinque addenda sunt, propter quæ monastica vita perfectissima atque excellentissima habetur. Primo, quia temporalium sollicitudinis minus habet. Secundo quia ad spiritualem adhesionem,

maiores habet aptitudinem. Tertio, quia maiorem recompensationem ab ea sperat. Quarto, quia in ea maior vnusquisque habet sui potestatem & fruitionem. Quinto, quia in ea vnusquisque facilius vitat humanorum periculorum promptitudines. Rursum monastici viri nedum in his, sed plurimis aliis cunctis vitæ modis præferuntur. Alibi enim negociantes foris quietem quærunt, quam religiosi inter se habent. Illi temporalibus student, secularibus implicantur, vanitatibus inuoluuntur: & dum inferiores plurimos habere delectantur, ab interioribus & superioribus elongantur. Distrahuntur alibi homines propter ea quæ foris sunt, & infelicitè amittunt preciosa quæ intra se sunt. vt recte cum Bernhardo dicant:

Quanto magis ad mundum accedimus, tanto magis à Deo recedimus. Considerant enim, qui extra religionem degunt, videri sapientes, dum operum bonorum penuria & vera sapientia stulti

efficiuntur. Credunt foris lucrari, dum se ipsos perdunt: cœlestia appetere videntur, dum carni eis oculi sunt. Quanto magis in temporalibus redduntur solliciti, tanto magis a spiritualibus efficiuntur mendici. Cæci quippe sunt & duces cæcorum. omnia enim disponere, ordinare & scire præsumunt, dum se ipsos distrahunt.

Ille præterea differentia inter seculares & religiosos apertissima est: quoniam (ut inquit Hugo de Sancto Victore) *in illis vigilet spiritus Dei, cum in ceteris dormit: viget in illis ratio, in istis sensus: in his ratio extinguitur: feruet in illis amor Dei, in istis amor mundi: hi mundum diligunt, dum illi relinquunt: illi omnium obliuiscuntur, & unusquisque, unica matris suæ continuo recordatur, isti vero omnium quæ sunt mundi recordantur, & se obliuiscuntur: illi caduca hæc & terrena amplectuntur, & ad ea summo pere aspirant, dum isti ea quæ supra terram sunt, desiderant: hi gressu proprio currunt ad interitum, dum monastici ad salutem festinant: religiosi omnia propter Deum dimittunt, dum temporales viri Deum relinquunt propter omnia.* Sed certe non falluntur. ea enim sunt acacitas vicem eis reddit: quia cum propter eos omnia Deus fecerit, isti propter illa Deum dimittunt. quare iuste eos omnia dimittunt.

Seculares denique prudentiores videntur: in quare huius seculi se homines comprobant: quia (ut scriptum est) *filius huius seculi prudentiores sunt filiis lucis.* Isti ad ea, quæ Dei sunt, tardi, duri, pigri, tepidi atque inettes sunt: nec cogitant quo tendere debeant: viam sciunt, sed scienter deuiant: & si quæ eam nesciunt, illam non inquirunt. Quinimmo religiosorum vitam, quia humilem, quia seculo obiectam, quia mollibus non indutam, abiiciunt & vitam eorum putant insaniam: qui paulo post videbunt, quomodo computati sunt in numero sanctorum, & fors illorum in æternum. Patet ergo huius regularis & monasticæ vitæ summa excellentia & perfectio super ceteros temporales status.

CAPITVLVM XXVI.

De difficultatibus vitæ religiosæ: & de laboribus & aculeis religiosorum in genere.

Religio-

R eligiosam atque monasticam vitam laudabilem atque perfectam & Deo acceptam esse, nemo est qui ambigat. Veruntamen alia aliis congruunt, & diuersi ad diuersa aptiores sunt. Denique aliud est religiosum esse, aliud religiose viuere. multi nomine religiosi sunt, pauci re: plurimi religiose viuere ceperunt, qui superstitiose vitam finierunt. & (vt quidam ait Sapiens) *Multri nomine religio- si sunt, pauci re.* *dulce negocium, iocundum nomen religionis est, sed progressus difficilis,* veluti in quo vitæ statu, hominum libertas, voluntas, ac voluptas, & affluentia adimitur: & (vt breuibus dicam) ipsa quoque, quæ natura concedit, sancta religio prohibet. Fateor in monasteriis, Deus ipse noscitur: ibi Dei notitia, amor & cultus habentur: ea tamen in cæteris vitæ statibus impleri possunt. & vitam tam digne, tam recte implerentur ab hominibus, quam sciuntur. Scit enim vnusquisque, quomodo placere Deo possit: idque si a- *Religiosus esse potest in seculo manens.* *bumilitate Deum colit, & insolentias extirpat.* Fateor ea commodius in monasteriis fieri, si facultas corporis animique vires suppetunt. Denique quietem animi in religione monastica inueniri aiunt. Quibus ego dicere possem, si quietem animi speras aut optas: cur ergo in bello stas? Quocunque igitur in statu viuas, quis tibi bellum inferet, nisi tu vnus? Quod ergo tu tibi aufers, quare in alio statu speras? Denique considera illud Isidori, quoniam *ad Dei quietudinem non acceditur passionibus corporis, sed mentis speculationibus.* Vidisti tu plurimos religioso habitu indutos, per inquietudines discurrentes, apostatantes, alios propter inopiam rerum necessariarum ab incepto opere cadentes: de quibus scriptum est, quoniam *propter inopiam multi deliquerunt.* Quanquam illud fateor, non sacre religioni, sed eorum improbitati imputandum est. veruntamen deliberatione & consilio non paruo opus est. Quare (vt ego puto) monasticæ religioque vita, ab illis potissime eligenda est, qui casum non timeant. iniqui, ereticis enim & fragilibus, & nondum vitiis mortificationem superantibus experiendum dixerim, non profitendum, aut fortius verius differendum. Præterea, religiosi nonnulli huius temporis, ab vtero regulæ suæ aberrantes. quo enim modo conuerterentur, quoue obedientiæ, paupertatis & castitatis tra-

Adonathis
secularibus
negociis se
immiscet.

mitte, religionem obseruent, tu ipse nosti, in quibus (vt mihi videtur) maior est periculi tumor, quam spes proficiendi. Hinc quidam Sapiens illud Threnorum exponens: *lapides sanctuarii dispersi sunt. Planguntur*, inquit, *religiosi, implicati temporalibus negotiis, quia non est actio secularis vita, quam hodie non administrant religiosi*. discutere singulorum occupationes & officia: religiosos adesse videbis. Secularia enim negotia seculariter pertractant. ad quæ utinam proficiendi gratia, aut vocati accederent. Sed proh dolor sese ingerunt, cupiditatis vel adipiscendæ dignitatis gratia, aut forte lasciuitatis & habendæ exemptionis. excutunt collum ab obedientia suorum prælatorum, agentes contra principalia eorum vota, per quorum obligationem positi sunt in statu perfectionis. Et quanquam prauorum hominum facta bonos a bono non retrahant: quinimo sicut pœna suos actores, sic innocentia suos tenet sectatores. Nihilominus hæc quorundam religiosorum praua exempla, & si aliquos à religione penitus non arceant, cogunt tamen vt differrent quousq; se experiantur. ex quibus colligitur hunc statum non parum laboris & difficultatis habere.

CAPITVLVM XXVII.

Particularius & latius de promptitudine periculorum huiusmodi status in specie de malis religiosi & abusibus illorum.

POST difficultates & labores prædictos, quos nonnulli in genere adducunt, circa monasticam vitam afferunt & alia particularius de promptitudine periculi huius status. Aiunt enim, quia pericula monasticæ vitæ ex plurimis conspiciere libet, eo præsertim quia cum peccata effugere vix possimus, constat in eodem genere peccandi longe grauius religiosos peccare, quam cæteros homines. *Quis enim dubitat* (vt sanctus Thomas refert) *religiosum grauius peccare fornicando contra votum continentia, grauius peccare contra votum paupertatis, grauius denique peccare inobediendo contra votum obedientia?* Deinde quis dubitat religiosum grauius peccare ex contemptu: quia (vt sancti aiunt Doctores) *per contemptum* vide-

videtur ingratus beneficii recepti, cum per religionem sublimatus sit ad perfectionis statum: quinimo & Dei filium conculcat atque vituperat per contemptum. Contra quos Hieronymus conqueri videtur inquiring illud Sapientis: *Quid est quod dilectus meus in domo mea facit scelera multa?* Denique grauius peccat propter prompta scandala, cum multi eius vitam vt speculum respiciunt. Quos idem Hieronymus signat. Ait enim cum propheta Hieremia: *vidi similitudinem adulterii, & iter mendacii: & confortauerunt manus pessimorum, non vt conuerteretur vnusquisque à malitia sua.* Confortauerunt, inquam, manus pessimorum, quia malo eorum exemplo mali quodammodo confortari videntur, eos videl. sequendo in sceleribus, quos sequi debuerunt pie & sancte viuendo. Est igitur periculosus contemptus in religioso: quia (vt Thomas ait) *cum religiosus venit in contemptum, incorrigibilis efficitur, & omnium est pessimus.* Adducens illud Hieremiz: *confregisti iugum & dirupisti vincula mea.* Vnde Bernar. ad Eugenium: *Qua maior peruersitas, qui maior contemptus, quam post perfectionis votiuam promissionem, voluntariam obligationem: post sacri habitus susceptionem, post exemplorum virtuosorum patrum multitudinem & perfectionem redire ad peccata, sicut canis ad vomitum: illorum precepta contemnere, quos totius vite & actionis sue iudices loco Dei elegit.* Et subdit: *Magna monachi dignitas, sed magna eius damnatio, sô qua sunt monachi, agere pratermittit.*

Cæterum huius status labores & difficultates non negauit Augustin. ad Vincentium Donatistam. Ait enim: *Fateor caritati vestre coram domino Deo nostro, qui testis est super animam meam, ex quo Deo firmare cepi, quoniam difficile sum expertus, meliores posse inuenire quàm qui in monasteriis profecerunt, ita nec peiores quàm qui in monasteriis defecerunt, vt hinc arbitrer in Apocalypsi esse dictum: Iustus iustificetur adhuc: & qui in sordibus est, sordescat adhuc.* Attendenda ergo sunt Augustini verba. Fatetur enim meliores nō reperiri, quàm qui in monasterio profecerunt: sed nec peiores quàm qui defecerunt. Constat n. longe plures deficere quàm proficere. Nam (vt Hieron. inquit) *rara est virtus atq; difficilis, & à paucis appetitur.* Sed & philosoph⁹ in Ethicis ait: *Difficile admodum fore tenere mediū virtutis, quare lōge plures deficiunt quam attingūt: veluti sagittares ad signum medium plures deficiunt quàm signum tangant.* Vnde quidam Sapiens non miratur, quare plures

*Bonum est
ex integra
causa malis
ex singulis
defectibus*

Boni mona-
chi pauciores

hōmīnes sunt vitioſi quam virtuoſi, maxime quia peccare multis modis contingit, & vnico defectu quis redditur vitioſus: ſed nequaquam quis virtuoſus & innocens erit, niſi omni concurrente virtute, quæ inuicem connexæ noſcuntur. Vnde Saluator *multos fore vocatos ait, ſed paucos electos*. Et propheta clamat, quia *multi quoque deſecerunt*. Et iterum: *Omnes ſimul inutiles facti ſunt, non eſt qui faciat bonum*, vt bonorum raritatem atque paritatem designaret. Cū ergo in omni ſtatu plures deficere arbitrandum ſit, religioſos grauius deficere non eſt ambiguum. Quis enim non cernit religioſorum tam copioſam numeroſitatem; ſed quis non videt tam paucorum ſanctitatem? Quis enim cernit multorum religioſorum ſuperbiā & elationem, ſed quis non videt paucorum humiliationem? Plurimi certe ſunt religioſi; ſed pro dolor tales (vt cum Bernardo loquar) *ſub habitu religionis animum ſecularem, & ſub pannis conuerſationis habere inueniantur cor altum in ſeculo & peruerſum ad religionis opera*. de quibus idem Bernardus ait: *Dolco de multis qui poſt ſpretam populi pompam, conuerſari deberent in ſchola humilitatis, grauius inſoleſcere, & impatientes amplius fieri in clauſtro, quam fuiſſent in ſeculo*. Et quod magis periculoſum eſt, plerique in religione non patuntur haberi ſe contemptui, qui in domo ſua ſeculariter viuentes, non niſi contemptibiles eſſe potuerunt. Præterea in eo verſatur quam maxime religioſorum periculum, quia cum ſint religati Deo, dū ſe ligatos fore dolent, ſe amittunt ſolutos: non conſiderantes quod bene ligata ſeruarius cuſtodiuntur, ſoluta vero facile perduntur.

Multis rurfus aculeis & laboribus, ſtatus religionis eſt reſertus, & plurimis periculis expoſitus. Quis enim dubitat (teſte Bernardo) *gratiſſimum eſſe inter aſſuetas epulas eſurire? inter delicias præteritas macerari? inter veſtes precioſas & multas algere? & inter diuitias, quas oſtendit mundus, offert diabolus, deſiderat noſter appetitus, eas contemnere?* Profecto tanto hæc grauiora exiſtunt, quanto grauius à paucioribus tolerantur. Fateor certe quia (vt Bernardus ait) *non deſunt religioſi in clauſtro, qui hoc pacto volunt eſſe pauperes vt nihil eis deſit*. Denique volo religioſi caſti ſint & pauperes. Quid tamen dices de periculo arrogantix? vanæ gloriæ? quæ non niſi meliores temptat. Vnde Hieronymus: *plus eſt depoſuiſſe animum, quam cultum. difficilius arrogantia, quam auro caremus & gemmis*. His enim abie-

abiectionis, gloriosi interdum tumemus sordibus, & vendibilem paupertatem populari auræ offerimus. Sed ad alia transeamus. Quis talis religiosus est, quem Bernardus ipse describit: qui in nullo prorsus aut resistit prioribus, aut inuideat paribus, aut subiectis plene obsequatur, sociis congruens, subiectis utiliter omnibus condescendens, fugax voluptatis, appetitor laboris, patiens abiectionis, impatiens honoris, pauper in pecunia, diues in scientia, humilis ad merita, superbus ad vicia, qui ita huic mundo moritur, ut soli Deo viuere delectetur? De his Eusebius dicebat: quoniam taliter in monasterio viuere perfectio est, sed aliter conuersari magna damnatio est. sed certe potius eos imitantur, de quibus idem Bernardus ait: quoniam superbia, inobedientia & auaritia student; quarum prima culpa casus attulit, & labor tercia lapsus timetur. his tribus periculis tres claustralium ordines subiiciuntur: scilicet qui sedem praelationis quærunt, & præesse non valent. Alii qui nec obediunt nec obedire volunt. Tercii familiares Iudæ, loculos portantes & in occulto detrahentes. Sed (ut paucis multa comprehendam) si studia, si mores, si vitam plurimorum religio forum cognoscere vis, considera, quia illis capitulum hostis est, extra murmur & inuidia, in nocte nullas vigilias habent, nec in die labores. Laborat monachus, ut fiat abbas. Abbas ventrosus: Prior ingrassatur: Mendicans blanditur potentibus, terrena diligit: suspiciosus Claustralis: Bursarius pecuniosus: Infirmary concubinari: capitofus Sacrista: sine oratione Conuersi fratres ad quæstum prædicant: Guardianus equitat: Prouincialis proclamat: Generalis generat. Præterea de huius status periculo, vide quid Bernardus dicat in quadam epistola: *moriens vix unquam aliquis in cella ad infernum descendit, quia vix unquam in cælo prædestinatus in ea usque ad mortem persistit.* Item labores & pericula huius status, apertissime demonstrat Gregorius in Registro inquiens: *Vos qui viam vitæ extra hominum frequentiam ducitis, tanto maiora certamina pati necesse est, quoniam ad vos magister ipse tentationum accedit.*

Monacho-
rum peruer-
sa conditio-
nes.

Cæterum ex multitudine præceptorum & onerum religionum, periculum & difficultas huius status comprehenditur. Nam (ut dicit Augustinus) *ubi sunt multe præceptiones, ibi multe sunt transgressiones.* Habent enim religiosi longe plura præcepta quam qui-

E c

cunque homines aliorum statuum : immo plerumque (vt supra dixi) quod aliis meritum , sibi ad peccatum & periculum est . nec iuuat , si dicas : non omnia praecepta obligant . Quibus Hieronymus respondet in quadam epistola : *Non ideo putet , qui se Deo obtulit , aliqua contemnenda esse mandata , quia leuia sunt : tam enim maxima illa quam minima imperata sunt : & contemptus vnius praecepti , praeipienti iniuria est .* Et sequitur : *In quocunque enim statu in quouis gradu aequale peccatum est , vel prohibita committere , vel iussa non facere .* & Bernhardus ait : *Iussa sine culpa non negliguntur , & sine crimine non contemuntur .* O quam multa sunt hodie in religionibus praecepta : ô quot vincula multiplicata : ô quam pauca & tarda remedia ! De quibus Christus dicere videtur : *Alligant onera graua & importabilia : & imponunt ea in humeris hominum .* Contra hos multiplicantes praecepta comminatur Deus duas maledictiones . Prima est : *Ve vobis Scribae & Pharisei hypocritae : qui clauditis regnum caelorum ante homines , ubi non intratis , nec permittitis alios intrare .* Secunda est : *Ve vobis Scribae & Pharisei , qui decimatis mentam & anetum , & relinquitis quae graua sunt : scilicet legis iudicium , misericordiam & fidem .* Forte dicet quispiam , fatendum esse , plurima esse religionum praecepta , plurima onera , ex quibus necesse est , plurima sequantur peccata . Fatendum etiam , plurima esse in religione pericula , incommoda , plures difficultates & labores . Veruntamen ex plurimis bonis , quae religiosi agunt , facilius creditur absorberi posse , sed & promptius ab eis resurgere valebunt : praesertim propter intentionem , quam habent ad Deum erectam . Accedit , quia habent socios , à quibus iuuantur . ad quos dici possunt , quae tetigi supra in xxi. capitulo . Demum fateor possibile illud est , sed difficile dixerim . praecepta enim : certa , impletiones dubiae : mandata certa , transgressiones certiores . vitia non occulta sunt , bona non videntur : pericula manifesta existunt , nec sine discrimine incuruntur : remedia vero dubia , nec sine magnis laboribus quaeruntur . Facilius cadimus quam resurgamus . socii vero an iuuent eum , qui se laedere vult , vnusquisque consideret , de quibus quidam Sapiens ait : *Quid iuuat amicus , si animus amicior laedit ?* Fateor tamen bonis & Deo dicatis religiosi pericula , difficultates , labores huiusmodi , quaedam

dam certamina, quædā exercitationes existūt, quæ religiose vinē-
res eo magis coronā, atq; (vt supra dixi, cū de periculis & laborib.
status Ecclesiastici egi) nō est in culpa religio, sed abutētes religio-
ne: nec est improbatio in religione, sed deturpantibus religio-
nem. In qua non est mirum si sit multitudo periculorum, vbi vio-
lentiæ & bene militantibus est cumulus donorum. Nam (vt ait *Hic de Chri-
stiana reli-
gione v. 115.
p. 116. 117.*)
Hugo de sancto Victore) *omni statui benigna est religio: abundans pau-
peri, mediocribus sufficiens, tolerabilis diuiti, infirmis larga, delicatis com-
patiens, pœnitentibus miserans, peruersis seuera, bonis optima.* Chrys-
ostomus: *Religio nunquam senescit, fatigationem non sentit.* Ex quibus
omnibus aperte monstratur huius vitæ & status periculum, labor
& difficultas, simul & necessitas.

CAPITVLVM XXVIII.

*De inclinatione & dispositione naturali: & diuersitate complexio-
num & habitatum hominum, quantum ad religionem; & con-
silio in calibus.*

VLtra prædicta nonnulli cautos agunt & attentos, religio-
nem ingredi violentes, vt inclinationes suas ac dispositiones
naturales & complexiones attendant, viresque suas discuti-
ant. Tandem quidam illis circa prædicta, consilia præbent.
Aiunt enim, quia secundum antiquorum Sapientum senten-
tias, diuersi ad diuersos penitus viuendi modos, aut inclinā-
tūr, aut disponuntur. Diuersitas autem & dissimilitudo aut dis-
paritas viuendi vnus ad alterum (vt in *Politica* inquit Philoso-
phus) ex triplici radice procedit. Primo ex natura siue qualitate
diuersa. nonnullos ex diuersitate complexionis, loci quoque in
quo viuatur, naturaliter ad diuersa ferri videmus. nonnullos enim
inclinari conspicimus ad bene politandam in republic. alios ad
militandum, alios ad sacrificia & cultum diuinum. nec solum ad
hæc exercitia, sed animæ passionēs diuersimode disponuntur: quo-
niā aliqui ad verecundiā, alii ad iram, alii ad tristitiam inclinātur.
Complexionis ergo diuersitas & regionis qualitas, ad diuersa pe-
nitus inclināt, etiam quo ad mores. Quanto enim humana cōple-

*Diuersa in-
clinationes
triplex ra-
dio.*

xio simplicior & purior est, tanto sensus exteriores viuaciores; potentiores atque subtiliores redduntur. Quo fit, vt per consequens intellectus hominis eo magis sit purior & subtilior. Idque

Sensus exteriores intellectui deferuntur.

ex eo patet esse manifestum, quoniam quamdiu sensus ipsi exteriores viuaciores existunt, tanto magis intellectui deferuere possunt, quoniam intellectus ipse nihil agit aut intelligit, quamdiu in homine existit, nisi cum ministerio sensus. quare recte Aristoteles inquit: quia *animæ sequuntur corpora*. Et alibi in libris de Anima ait: *Molles carne aptos mente dicimus*. Anima ergo siue intellectus humanus non exercet operationes suas, nisi mediantibus organis corporis: quia (eodem Philosopho teste) *nihil est in intellectu, quin prius fuerit in sensu*. Ex qua radice procedit illa causa, à multis ignorata: quare intellectus humanus quandoque fatigatur? quod licet improprie dictum sit, tamen intellectum fatigari dicimus, non secundum se, sed secundum sensus exteriores, cum quibus agere debet intellectus ipse. Ex quibus omnibus constat, quod habilitatur seu disponuntur homines adhuc vel illum modum viuendi, secundum quod peius vel melius complexio illorum est disposita. Et quanquam anima ipsa æque perfecta existat, tamē aliquando eligit vnum viuendi modum sibi ac cōmodum; & in eo facilius bene operatur, si organa corporis melius habet disposita & complexionata, quæ inclinatione non completæ ad hoc vel illud disponunt. Secundo diuersitas modi viuendi contingit plerumque ex diuersa consuetudine, quæ naturam imitatur: & illa ad vnum modum viuendi trahit alios; alios ad alium. Tertio, hæc diuersitas viuendi contingit nonnunquā ex spiritali diuina influentia: quæ quādo & quomodo vult, hūc trahit ad vñ viuendi modū, alium ad aliū: sine tamē offensione vniuscuiusque liberi arbitrii. prout suæ inscrutabili placet prouidentia. Quicumque ergo hoc modo trahitur ad vitam monasticam, laudet Deum qui traxit; & properet ad locū, quem sibi monstrat Deus; & relictis vrbibus, & earum illecebris, vadat saluari in Segor. Verum secundus modus cōsuetudinarius eos repente non iuuat, qui delicate in vrbibus nutriti sunt; sed opus est consuetudinē perniciosam contraria consuetudine paulatim deuincere. Si vero primum modum attendunt, recurrant ad complexionem (vt prædiximus) ad naturam suā, ad inclinationem

Intellectui quomodo fatigatur.

Tractatus à Dio ad religionem properat.

clinationem, ad dispositionem interioris hominis sui vnusquisq; *Religionem intrasitum metiatur* recurat, denique ad vires corporis sui & seipſos & intra seipſos *nam naturam & corporis & vires.* diiudicant; & de se magis sibi quā aliis credant. Concludunt ergo & cōsulant nōnulli scribentes, vt qui in deliberatione pender, an religiosam vitā assumat, cuncta an- mo digerat, & id eligat quod portare & continuare possit. Neque volumus, quā tetigimus, dicta esse animo dissuadendi religionis ingressum: maxime quia nō ignoramus, neminem sine graui peccato religionis vitā alicui aut prohibere aut impedire posse, iuuenibus praesertim. *Religionem ingredi volentem impedire sine graui peccato non potes.* Nam adolescenti volenti viam perfectionis dixit Christus: *Vende omnia quā habes, & da pauperibus: & veni, & sequere me.* Vnde quidam Sapiens ait: *Qui adolescentem à religione retrahunt, similes sunt Pharisaeis, quibus ore saluatoris dictum est: Vt vobis, quia nec vos intratis in regnum caelorum; nec alios sinitis intrare.* Verumtamen cum religiosus ingressus de consilio sit: vt de operibus supererogationis vnusquisque (vt dictum est) ad se recurat, viresque suas discutiatur; fragilitati suae, complexioni, naturae, consuetudini consulat; & si potest capere capiat. Dicere enim & religare se Deo, optimum est. Sed cogitet, qui religionem intrat, laboriosam vitā, iter arduum atque difficile aggredi: nec ad tempus; sed quādiu vixerit, religionis onera necesse est sustineat. *Religionis onera ante ingressum cogitanda.* Illudque semper in mentem veniat, quia sic manum ponat ad laboriosum aratrum, ne respiciat retro: quia aptus nō esset regno cēlorum. Fatemur tamen, quia ea, quā tetigimus, inclinatiue non completiue ad hoc vel illud disponunt. Potens est Deus abundare & facere gratiam nobis, qui de lapidibus istis potest suscitare filios Abrahā: de lapidibus, inquam, id est induratis & inflexibilibus animis hominum, nō solum natura vel complexione, sed etiam deprauatione & malicia potest suscitare filios Abrahā, id est reddere eos flexibiles & obsequentissimos ad obedientiam, & cetera onera religionum. nō tamen improbamus; quin vnusquisque fragilitatem viresque suas discutiatur. Et cum consilii sit religionem ingredi (vt supra dictum est) si potest capere, capiat.

CAPITVLVM XXIX.

De comparatione religiosorum inter se adinuicem; & primo de comparatione solitariorum ad socialem vitam agentes: & que vita perfectior sit altera.

*Duplices
sunt monachi.*

Habita est igitur superius comparatio & differentia horum duorum statuum, clericalis videlicet & regularis inter se adinuicem comparatorum: & qualiter alter alteri aut æquatur aut præponatur, quo ad perfectionem statuum: & quis sit eligibilior, prout perfectior, aut prout humanior. Iam superest, ut status religiosorum inter se adinuicem distinguantur, comparentur quo ad perfectionis statum: & primo de religiosis solitariis comparatis ad vitam socialem agentes. Quantum igitur ad religiosorum statum inter se considerandum & comparandum, duplicem fore puto differentiam religiosorum: quorundam, qui solitariam & anachoriticam vitam ducunt; aliorum, qui socialem. De solitariis ergo primo dicendum est, deinde de socialem vitam agentibus.

De primis itaque à nonnullis sanctis doctoribus asseritur: illos omnes ceteros religiosos excellentia vitæ, status perfectione antecellere. sic de Antonio legimus; sic de Paulo primo heremita: necnon Benedicto, & primis Macarionibus, & complurimis aliis: de quibus Augustinus in libro de Operibus monachorum ait, *illos monachos sanctiores esse, qui à conspectu hominum segregati, nulli ad se præbent accessum.* Alii vero distinguendum putant: quia vel loquimur de perfectionis statu, vel de perfectionis opere. utroque autem modo solitaria vita maiorem perfectionem acquirit quam socialis. Quorum ratio est: quoniam vita socialis status est volentium perfici per instructionem in intellectu, & per correctionem in effectu, cum aliquando contingat à via perfectionis deniare: Sed solitaria vita est perfectiorum, & talium qui nullo istorum indigeant. solitarie enim viuentes, & aliorum confortia aspernantes, & ciuilitate & socialitate non conuersantes, necessario (ut Philosophus ait in Politicis) *vel sunt ut bestia, vel sunt homine meliores.* Vnde non solum secundum sanctorum, sed

secun-

secundum Philosophorum sententias solitarie & virtuose viuere perfectorum est: & magis tales debent dici quidam Dii quam homines; vel tanquam supremi & perfectissimi homines, non solum honorandi, sed potius admirandi sunt. Quanto ergo status perfectorum excedit statum perficiendorum, tãto solitaria vita monachorum excedit vitam quorumcunq; religiosorum socialiter viuētium. Si vero loquamur de perfectionis opere, hoc idem putant. Opus enim vitæ solitariae contemplatio est: socialis vero vitæ actio est, vel vtriusque operis in quibusdam commixtio. Planum est autem, quod contemplatio præminet actioni: & est opus magnæ perfectionis, nõ solum propter Christi verba de Martha & Mária communiter recitata, sed propter Christi exemplum imitandum. De quo scribitur apud Lucam, quod *exiit in montem orare, & erat pernoctans in oratione.* & hoc fit propter facilius diuinũ auxiliũ impetrandum. non enim dixit, exit ad turbas aut ad vrbes orare: sed in montem vastæ solitudinis. vbi enim deest auxilium humanum, solitudinis locus aptus est ad impetrandum diuinum auxilium: quia cum ignoramus quid agere debeamus, hoc solum habeamus refugium, vt oculos nostros dirigamus ad Deum. Item quaeritur solitudo propter tumultum seculi fugiendum. *deserens enim mundum & tumultum seculi, & separans se non solum à volupratibus mundi, sed à iocunditate sociali, conformatur à Christo,* vt Glossa ait super illo verbo Apocalypsis XII. *mulier fugit in solitudinem.* Circa prædicta tamen quæ de sanctitate vitæ solitariae dicta sunt, dicam, quod animũ pulsat. Alia est enim ratio illius antiqui temporis, alia moderni. Si enim viros solitarios consideramus: illos videlicet, qui in primitiua ecclesia floruerunt, verissimum puto illos fuisse perfectioris & sanctioris vitæ ceteris socialem vitam agentibus. Eo enim tempore non attabantur fideles tot canonum, decretorum præceptis, censuris aut pœnis: Nec erant tunc (vt ita dixerim) tot laquei legum seu constitutionum, excommunicationum siue censurarum, à quibus vix fideles etiam diligentissimi & timorati respirare & præcauere possunt: Non tot ieiunia indicta, non vigiliæ, non sitientia, non diurna pariter & nocturna diuina officia dietim ac ex præcepto dicenda: non denique tot festa colenda: non tam crebra confessio, & corporis Christi

In primitiua ecclesia non erant tot humana constitutiones.

communicatio: non tot obedientiarum præstationes, sicut modo fideles artantur, aut potius inuoluuntur: ita vt recte de prælati ecclesiæ dici possit illud Christi: qui *alligant opera importabilia*; & cetera. Vnde si aliqua huiusmodi in illa primitiua ecclesiæ seruabantur, erant tamen voluntatis, quæ protunc transgredi peccatum non erat, quia nondum prohibita: nunc vero ea omnia, quæ diximus, & complura alia ab ecclesiâ addita, & quotidie secundum hominum & temporis maliciam expedit vt augeantur, & sub præcepto iniunguntur. Quorum ignorantia aliquem non excusat; & omnes etiâ solitarios ad obseruationem ligant. Cum igitur ea omnia non solum facere, sed & scire difficile sit, & fere impossibile, non solum Anachoritis & in heremo vitam agentibus, qui hominum conuersationes fugiunt, & omnium rerum necessariarum penuriam habent: sed etiam his, qui vrbes incolunt. Ideo putamus sine offensione veritatis probabiliter dici posse, modernis temporibus vitam heremiticam non posse reperire illius perfectioris & sanctimonie, sicut priscis illis temporibus: quinimo periculosam admodum fore, & difficulter cuncta ecclesiæ statuta obseruare posse. Nisi forte aliquis dicat, quod Anachoritæ prædicti iam adeo perfecti sunt, & tam fixum animum in Dei amore habent, vt ab his ligamentis liberi sint, & prædicta præcepta habeant in præparatione animi. Quibus non facile assentio, quia eum de ecclesiâ sint, præceptis ecclesiæ ligari manifestum est, nisi priuilegiati reperiuntur, aut diuinitus aliter fuerit reuelatum.

*Heremitica
vita hac
vix
periculosa
est.*

CAPITVLVM XXX.

De comparatione religiosorum vitam socialem agentium inter se: & quæ religio socialis alteri sociali sit perfectior; & virum religio eo quod artior, sit perfectior.

Consequens est, vt religiosos vitam socialem agētes discernamus, & comparemus quantum ad eorum perfectionem: inter quos (vt sancti doctores tradunt) longa admodum differentia est. Nā (vt inquit, sanctus Thomas secūda secundæ. q. C. lxxxviiij.) *differentia religionis unius ad aliam principaliter quidem attenditur ex parte*

*parte finis, sicut si una religio ordinetur ad peregrinos hospitio recipiendos; & alia ad visitandos vel redimendos captiuos: Secundario autem ex parte exercitii: quia diuersi modi exercitii sunt in diuersis religionibus: puta quia in una religione castigatur corpus per abstinentias ciborum, in alia per exercitium operum manualium, vel per nuditatem, vel aliquid aliud huiusmodi. Et quia non potest aliquid dici altero potius, nisi secundum illud in quo ab eo differt: ideo excellentia vnius religionis super aliam principaliter quidē attenditur secundum religionis finem: secundario autem secundum exercitium; diuersimodetamen secundum eum vtraque comparatio attenditur. Nam comparatio, quæ est secundum finem, est absoluta, eo quod finis propter se quæritur: comparatio autem, quæ est secundum exercitium, quæritur non propter se, sed propter finem: & ideo illa religio alteri præfertur, quæ ordinatur ad finem absolute potiorem, vel quia est maius bonum, vel quia ad plura bona dirigit. Si vero sit idem finis, sed secundario: tunc attenditur præ eminentia religionis, non secundum quantitatem exercitii, sed secundum proportionem eius ad finem intentum. Vnde & in *Collationibus patrum*, introducitur sententia beati Antonii: qui prætulit discretionem, per quam aliquis omnia moderatur, & ieiuniis & vigiliis, & omnibus huiusmodi obseruationibus. Sic ergo dicendum, quod opus vitæ actiuæ est duplex: vnum quidem quod ex plenitudine contemplationis deriuatur, sicut doctrina & prædicatio. Vnde & Gregorius dicit in quinta Homelia super Ezechiel. quod *perfectis viris primo ad contemplationem suam redeuntibus dicitur: Memoriam suauitatis tuæ eructabunt.* Et hæc præfertur simplici contemplationi: sicut est maius illuminare, quam lucere solum: Itā maius est contemplata aliis tradere, quam solum contemplari. Aliud autem est actiuæ vitæ, quod totaliter consistit in occupatione exteriori, sicut eleemosynas dare, hospites recipere, & alia huiusmodi, quæ sunt minora operibus contemplationis, nisi forte in casu necessitatis. Sicut ergo summum gradum in religionibus tenent, qui ordinantur ad docendum & prædicandum; qui etiam propinquissimi sunt perfectioni episcoporum: sicut & in aliis rebus *finis primorum coniunguntur principis secundorum*, vt dicit Dionysius VII. cap. di. IX. Secundum*

*Religiosorum
tres gradus.*

autem gradum tenet ille, qui ordinatur ad contemplationem. Tertium autem, qui occupantur circa exteriores actiones. In singulis autem his gradibus potest attendi præ eminentia, secundum quod una religio ordinatur ad altiore auctum in eodem genere; sicut inter opera actiua potius est redimere captiuos, quam suscipere hospites; & in omnibus operibus contemplatiua potior est oratio quam lectio. Potest etiam attendi præ eminentia, si una earum ad plura horum ordinatur, quam alia; vel cõuenientiora statuta habeat ad finem propositum consequendum. Moderni tamen doctores ad eundem intellectum aliter distinguunt. Tres enim gradus faciunt illorum religiosorum vitam socialem agentium; præsertim qui in paupertate voluntaria propter Christum assumptam regularem vitam elegerunt. Primus gradus fuit quondam, & hodie est quorundam monachorum, qui habentes possessiones in cõmuni, de fructibus & prouentibus ipsarum viuunt; de illis sibi & necessariis vitæ prouident. Secundus modus fuit, & adhuc quorundam est religiosorum, qui mundum spernentes de labore manuum suarum victitant, ac vestium & alia necessaria sibi ex illo ministerio subministrant. secundum quem modum aliquando Paulus Apostolus vixit, ne offendiculum daret Euangelio. Tertius gradus est aliorum religiosorum, qui hodie cõmuni vocabulo Medicantes appellantur; qui spiritualibus principaliter vacantes, & prædicationi & doctrinæ insistentes, de his quæ sibi à fidelibus offeruntur, in voluntaria paupertate Deo famulantur.

*Ordo mendicantium
securior ob
quatuor
causas.*

Hæ igitur religiones habent inter se differentias & proportionem; & aliæ aliis antiquiores sunt, & etiã strictiores. Sed quantum est ad statum vberioris perfectionis, non dubito ultimam, id est Medicantium vitam, maioris esse perfectionis & meriti, ac etiam securitatis ad salutem, propter quatuor causas superius assignatas, cum de excellentia religiosæ & monasticæ vitæ in genere actum est. Primo videlicet, quia temporalium rerum minorem habet sollicitudinem. Secundo, quia ad spirituales cõtemplationem maiorem habet dispositionem annexam. Tertio, quia respectu maiorum bonorum, quæ fidelibus subministrant, & paruum in hoc seculo recompensationem recipiunt. Quarto, quia magis Christi vitam imitantur & Apostolorum. Scribitur enim in Luca, quod *mulieres multe sequebantur*

bantur Christum, ministrantes sibi de facultatibus suis: quam aliqui putant vitam Mendicantium. Fortasse aliquis obiciet, quod non nullæ religiones artioris vitæ sunt, quā Mendicantes: ideo videntur eminentioris atq; perfectioris esse status. Nam dicendum est, ut sancti tradunt doctores, quod ista duo simul stare possunt, aliquam religionem esse artiorē, & tamen minoris perfectionis.

Religio artior minoris perfectionis esse potest tripliciter.

Quod triplici via ostenditur. Primo per Christi exemplum: secundo, per discipulorum documentum: tertio, per ecclesiæ militantis cōmune experimentum. Primo enim patet per exemplum Christi. Nam nulli fidelium debet esse dubium, quod nulla regula vel religio artior esse potest, quam religio Iohannis Baptistæ: de quo dicitur Matthæi 1. quod *vestimentum eius erat de pilis camelorum: esca autem eius locusta, & mel silvestre.* Super quo verbo dicit Hieronymus, quod *mirum erat in humano corpore tantam asperitatem vitæ conspici.* Demum nulli dubium est, quod nulla alia religio, aut viuendi modus perfectior fuerit vita & religione Christi. Unde Matth. 11. dicitur: *Venit Iohannes Baptista, non manducans, nec bibens: & tamen dixistis, quia demonem habet. Venit filius hominis manducans & bibens: & dixistis, Ecce homo vorax & potator vini. & iustificata est sapientia à filiis suis.* Super quo verbo dicit Augustinus, quod *sancti Apostoli intellexerunt regnum Dei non esse in esca & potu, sed in æquanimitate & voluntate tolerandi: quos neque copia subleuat, neque deprimis egestas.* Et sic patet, quod religio Christi, licet fuerit minus arta, tamen longe maioris perfectionis.

Religio Iohannis Baptistæ prior omnibus ceteris.

Secundo hoc patet per doctrinam Apostolorum. Tanta enim fuit Apostolicæ vitæ perfectio, & ecclesiæ primitiæ, ut cunctis possessionibus abdicatis, omnia haberent in communi, & precia possessionum ponebantur ad pedes Apostolorum. à qua perfectionis via aliquatenus posteriores defecerunt; quia possessiones in communi (licite tamen) reseruabant, ut alibi latius diximus, præsertim in eo libro, quem de Christi paupertate edidimus, tetigimus etiam in libro *Defensoris status ecclesiastici.* Nam expresse dicit Augustinus in de Doctrina Christiana: *nullas ecclesias gentium fecisse, quod tempore Apostolorum factum est: & tamen monasteria ex gentibus conuersis congregata, & possessiones in communi seruantes, artioris vitæ*

Religio Christi maioris fuit perfectionis.

Remittit ad librum, nunc de Christi paupertate.

fuerunt, quam religio siue status Apostolorum : Dicit enim Hieronymus in Epistola ad Eustochium : *Decibo vero & potutaceo : cum etiam languentes monachi , aqua frigida utantur , & coctum aliquod comedisse luxuria est.* Fuerunt ergo monachi in primitiua ecclesia artioris vitæ quam Apostoli , sed tamen minoris perfectionis. Quod patet, quia ex eo , quod monachi prædicti possessiones in communi seruabant, Augustinus videtur innuere , eos quodammodo à perfectione Apostolorum defecisse. Tertio hoc etiam conspicitur per militantis nostræ ecclesiæ experimentum. Tenet enim communiter ecclesia religionem siue statum episcoporum perfectiorem esse omni alia religione, tam monachorum quam aliorum : & tamen experimētum docet, q. quælibet religio artioris vita est, quā religio seu status episcoporum. Non ergo se comitantur ista , quod religio quanto artior tanto perfectior. Potest enim esse maior perfectio , cum minori artitudine : & maior artitudo cum minori perfectione. Et licet ecclesia concedat transire ad artio rem illis , qui sunt in laxiori , non propterea id concedit , quasi credat religionem tanto esse perfectiorem quanto artio rem simpliciter : sed credit artio rem instrumentaliter esse perfectiorem respectu illorum, qui per talem artitudinem dicunt commodius posse peruenire ad statum perfectionis. Et hæc quantum ad perfectiorem statum intelligenda sunt.

*Transire de
vno ordine
ad alium ex
hænt.*

Quid autem tenendum sit, quantum ad transitum, canonistæ tractant in c. *Sane, de regula.* Dicunt enim (exempli gratia) quod attenda institutione Regulæ sancti Augustini, & etiam sancti Benedicti, artioris regulæ est ordo sancti Benedicti, & laxior sancti Augustini : videlicet quantum ad transitum de vna religione ad aliam. Itaque nisi constitutiones regulares obstarent, vel obseruantia actualis fratrum Prædicatorum, & aliorum qui Regulam beati Augustini profitentur, certum est eos posse transire ad ordinem sancti Benedicti. Verumtamen in ista materia, quantum ad transitum ad aliam religionē, dicunt doctores, quod capitur latior vel artior, habendo respectum ad actuale obseruantiam Regulæ, etiam ad constitutiones factas ultra Regulam. Vnde quantum ad dictum transitum , non est solum ponde-

ponderanda Regula sancti Benedicti & Augustini, sed sunt ponderanda constitutiones ipsorum ordinum & actuales obseruantia. Et ideo cum fratres Prædicatorum, & sancti Augustini, & aliorum qui tenent Regulam beati Augustini, secundum communem modum viuendi & seruandi regulam, reducti sunt ad instar Mendicantium, ponderata veritate videntur esse arctioris ordinis, quam ordo sancti Benedicti: & non posset transire Frater prædicatorum ad ordinem sancti Benedicti sine Papæ licentia. Tamen quantum ad perfectionem status vtriusque Regulæ simpliciter assumptæ, secundum opinionem multorum Regula beati Benedicti perfectioris status quam sancti Augustini est. Et hæc de comparatione inter se cunctarum religionum vitam socialem habentium breuiter dicta sufficiant.

Conclusio libri ad sanctissimum Dominum Papam.

Accipe, Beatissime Pater, hoc *humane vitæ Speculum*, tuo nomini, sed multorum vtilitati dicatum; vt per te, qui speculum & totius mortalis vitæ norma datus es, cuncti fideles in quouis statu, arte, gradu ac dignitate constituti speculentur atque in eo videant, quid cuique conueniat, quid incumbat; in quoue deuiant à tramite viæ iustæ. Nam veluti naturale speculum cuiuslibet formæ sibi oppositæ imaginariam profert similitudinem, sic hoc speculum omnium mortalium varias viuendi formas recipiet, & quid boni, quid sinistri habeat, distinguet & intuebitur. Ibi enim vitam suam speculabitur omnis homo. Nam *videbit peccator & irascetur*, speculans præuarcationes suas in eo rursus: *Videbunt recti & letabuntur*, quia cernent in quo crescant. Denique in eo: *Videbunt iusti & timebunt*, quia putantes se stare, videant ne cadant. Et tandem videbunt mortales, quia *omnis caro fanum*: & omnis huius sæculi decor, vt sterco. Dabo ergo finem, qui propter magnitudinem vix incepti. Scio, paucula forte & multa de huius mortalis vitæ diuersis artibus & viuendi modis disserui, quæ quidem longiora aut breuiora dici posse non ignoro. Verum nec breuitati admodum studui, nec copiarum, ne legentes aut tædiosis, aut nimia breuitate afficerem. Imitatus sapientem Ecclesiastem,

qui ex multis composuit parabolas sacras, quæ sunt verba vtilia, scribens sermones rectissimos, ac veritate plenos, non sibi, sed futuris prospiciens, ad laudem omnipotentis Dei. qui tandem tuam beatitudinem feliciter protegat & conseruet, & tandem post diuinum huius vitæ cursum, vna cum grege tibi credito perducatur ad vitam æternam, Amen.

Finit Speculum vite humane, omnium Statuum commoda & pericula exactissime describens. in quo si quisquam defectus proprios cum reprehensione lectionauerit, non se, sed vitium scias morderi: neque præstantissimo Rhoderico eius auctori succenseat, sed potius immortales gratias agat, cum utique voluerit animarum salutis consultum iri.

*Iohannes Bötzhemus Abstemius D. D. Iacobus Vuymphelingius S. Pa. L. Symphorianus Pollio Sacerdos, recognouerunt. Iohannes Prys Cuius Argentinus in adibus Lustri, vulgo Zum Thiergarten, impressit. Ad morem gerendum Generoso Domino Philippo Domino in Duno & Lapide superiori, Argentinen-
sis Ecclesia Præposito: & ad preces Pauli Burger
eiusdem Summissarii: Prædie idus Ianuar.*

Anno salutis M. D. VII.

EXIMII MACABRI
SPECVLVM
CHOREÆ MOR-
TVORVM,

VERSIBVS ALEMANICIS,
(id est, in morem ac modos rithmorum Germanico-
rum compositis) *ab eo editum: & à PETRO*
DESREY TRECACIO ORATORE
ante annos circiter sesquicen-
tum emendatum.

SPECVLVM SALV-
TARE CHOREÆ
MACABRI

Ad Spectatores.



Discedite vos Choream cuncti qui cernitis istam,
Quantum prosit honor, gloria, diuitiæ.
Tales estis enim matura morte futuri,
Quales in effigie mortua turba vocat.

Angelus chartam tenens, in qua scriptum.

Hæc pictura decus, pompam, luxumque relegat,
Inque choris nostris linquere festa monet.

In necessitatem Mortis.

Est commune mori: mors nulli parcit honor.
Mors fera, mors nequam, mors nulli parcit, & æquam
Cunctis dat legem, tollit cum paupere Regem.
Ergo time quisquis celsos ascendis honores.

A V C T O R.

Creatura rationalis
Quæ æternam vitam desideras,
Hæc doctrina tibi notabilis
Est, si ipsam bene consideras.
Hic quilibet addiscit choreas,
Hanc Choream MACABRI nominans.

Hæc

S P E C V L V M.

233

Hæc est via super omnes vias,
Nulli parcens, omnia criminans.
In hoc potest Speculo legere
Omnis homo tendens ad tumultum.
Sapiens est qui scit videre:
Mortuus dat viuenti speculum.
Tu maiores vides ad oculum
Hanc Choream conducere: quia
Viuentium corpora singulùm
Fabricantur vna materia.

I.

Mortui sibi cines choreantibus ludentes.

Mos est hic hominis semper cum tempore labi,
Et semper quadam conditione mori.
Est hominis nudum nasci, nudumque reuerti:
Est hominis putrere solo limumque fateri,
Et miseris gradibus in cinerem redigi.
Res & opes præstantur ei, famulantur ad horam:
Est locuples mane, vespere pauper erit.

*Figura quatuor Mortuorum instrumentis musicis
ludentium.*

Omnia Cæsar erat, & gloria Cæsaris esse
Definit; & tumultus vix erat octo pedum.

Mortuus primus musicus Choreæ.

Vos qui diua vero sententia
In diuersis viuitis seculo,
Sequimini Christi vestigia
Prouidendo mortis articulo.
Sero, mane, aut in diluculo
Hanc Choream sic choreabitis.
Suspiciate vestro nos oculo,
Sicut sumus, ita vos eritis.

Gg

Secundus Musicus.

Cur nunc fratres non arbitramini,
 Quod expedit vos omnes sic mori:
 Cotidie veto lætamini,
 Sed potius debetis mœreri.
 Sæpiissime non est sicut heri,
 Cito lætus, cito contristatus.
 Nolite vos fratres demereri
 Hos discere vos expedit saltus.

Tertius Musicus.

O iuvenes, maioresque, senes,
 Dicta nostra bene conspiciate
 Mori decet, hoc scitis vos omnes:
 Nos igitur bene respiciate.
 Mundi huius vana despiciate:
 Parua est res, quæ transit leuiter.
 Vos in cælo semper aspiciate:
 Centum anni transeunt breuiter.

Quartus Mortuus Musicus.

Breuis enim est vita hominum.
 Nam viuentes, veluti dixisti,
 Ante vero præfatum terminum
 Omnes vere morientur isti.
 Quam plurima dicta retulisti,
 Vt quilibet curam accipiat:
 Sed parumper eos retraxisti,
 Nemo timeret, donec recipiat.

I I.

P A P A.

Vado mori: mors certa quidem, nil certius illa
 Hora sit incerta, vel mora: vado mori.

Fig.

Figura Mortis ducentis Papam.

Mors dominum seruo, mors sceptrum ligonibus æquar,
 Dissimiles simili conditione trahens.

M O R S.

Nil dubium, vos omnes viuentes,
 Quamquam tardet, sic choreabitis.
 Solus Deus scit hominum mentes:
 Respicite, quid nunc facietis.
 Summe Papa vos incipietis,
 Vt dignior conducens minores.
 Honoratus taliter eritis:
 Maioribus debentur honores.

P A P A.

Heu quid hoc est? an sic necessitas
 Quod sim primus de choreantibus?
 Quid in terra suprema dignitas,
 Nomen Dei prodest in talibus?
 Ecclesius sum præles omnibus
 Velut Petrus, & nunc obiciens.
 Mihi mors est pulsus honoribus.
 Parum valet honor sic transiens.

III.

I M P E R A T O R.

Vado mori: quid amem, quod finem spondet amaram?
 Cuius inanis amor? non amo: vado mori.

Figura mortis ducentis Imperatorem.

Quid sublime genus? quid opes? quid gloria præstant?
 Quæ mihi tunc aderant, hæc mihi nunc abeunt.

M A C A B R I

M O R S.

Et vos impar & mundi fortior
 Princeps, magnum tenens Imperium:
 Vos oportet dicendo (mori)
 Dimittere pomorum precium.
 Nunc soluetis iura viventium.
 Non eritis statim velut heri.
 Quicquid duco quod est mortaliū,
 Omnes Adæ natos decet mori.

I M P E R A T O R.

Mors me grauat, & tamen nescio
 Coram quibus ius sit appellare.
 Arma modo victus abicio,
 Mors lintheum me cogit portare.
 Super omnes solebam regnare,
 Et moriens ita deficio.
 Heu quid hoc est? mundo imperare
 Maiores non habent ex præmio.

I V.

C A R D I N A L I S.

Vado mori; mortem non hoc, non impedit illud.
 Quo me cumque ferat fors data, vado mori.

Figura Mortis ducentis Cardinalem.

O quam dura premit miseros conditio vitæ!
 Nec mors humano subiacet arbitrio.

M O R S.

Vt apparet, multum turbamini
 Cardinalis, sed nihilo minus

Post

SPECVLVM.

332

Post alios mecum sequimini,
Remedium vobis nullatinus.
Habulistis vestras inter manus
Mundi decus, quod statim nil erit.
Morte data seruus fit dominus:
In honore magno sensus perit.

CARDINALIS.

Nil mirum, si modo perstupeam
Ira videns me tam cito captum.
Mors accessit, moriar, peream:
Nunc video me perstupefactum.
Purpureum linquo vestimentum
Cum pileo capaque rubea.
Iam me tangit cadauer infectum
Lætitie finis mœsticia.

V.

R. P. X.

Vado mori, prae sensu transactis æquiparando.
Si non transiui, transeo, vado mori.

Figura mortis ducentis Regem.

M O R T S.

Nobilis Rex cum vestra corona
Accedite, iam satis fuistis
Formidatus ab omni persona,
Pompis fulgens; nunc pauper eritis.
Nec honores hos importabitis
Ad extremum veniens examen,
De thesauris nullos habebitis.
Diti prius solum lintheamen.

Gg 3

MACABRI

R E X.

Non didici choream facere
 Tam siluestrem, nec odam flebilem
 Imitari. Heu quid est agere
 Contra mortem nimis terribilem:
 Non respicit personam nobilem.
 Genus, forma, & quæque veniunt
 In hoc mundo, nil sunt apud illam.
 Omnes cinis finaliter fiunt.

V I.

LEGATVS A LATERE.

Vado mori; videat quo currat quisque superstes:
 Cursor habet mecum dicere, vado mori.

Figura Mortis ducentis Legati in Pontificium.

M O R S.

Iam Legate per me restabitis,
 Potentia vestra nunc fallitur.
 Huc nec illuc amplius ibitis;
 Nam vis vestra per mortem rapitur.
 Homo sæpe ex se decipitur.
 Prospicite quid est nunc agere.
 Morte autem nemo defraudatur:
 Velle Dei oportet facere.

L E G A T V S.

Heu mihi, qui nuper pergebam
 Vt Legatus partibus Franciæ;
 Mori vero nondum cogitabam,
 Sed ecce nunc finis lætitiæ.
 Mors est autem actus tristiciæ,
 Cuius Deus scit solus terminum.
 Insequamur viam iustitiæ;
 Mors sequitur terminos hominum.

VII. D V X

VII,

D V X.

Vado mori: misero sententia dura, beato
Grata; mori sequitur viuere, vado mori.

Figura Mortis ducentis Ducem.

Es probus, expirat probitas: honestus, honestas:
Si fueris fortis, fortia morte cadunt.

M O R S.

Nobilis Dux, qui famam habetis
Fecisse hinc magnum exercitum,
Mecum statim vos choreabitis,
Nihil prodest grande concupitum.
Sed obsecro ante hunc exitum
Ostendite vestram audaciam
Demonstrando vestrum omne scitum:
Mors rapiet omnem fallaciam.

D V X.

Morte enim sum nunc deprehensus,
Nec possum me ultra defendere;
Sed timeo ne sim reprehensus,
Cum deceat tributum reddere.
Nihil valet arma ostendere.
Nunc attingi diem nouissimum,
Et expedit cælum contendere:
Parum prodest velle grauissimum.

VIII.

P A T R I A R C H A.

Vado mori, cinis in cinerem tandem rediturus;
Ordine, quo cœpi, desino: vado mori.

M A C A B R I

Figura Mortis ducentis Patriarcham.

Iam nihil est totum, quod viximus, omnia secum
 Tempus præteriens hora suprema trahit.

M O R S.

Patriarcha pro vultu demisso
 Non potestis ab hoc acquitari,
 Iure Crucis duplicis amisso
 Oportet vos finaliter mori.
 Non debetis ex hoc admirari,
 Non cogitans pertingere finem
 Quod Papatus studetis honori:
 Spes inepta decipit hominem.

P A T R I A R C H A.

Nunc video quod mundanus honor
 Me decipit modo laticiz.
 Nam ecce nunc quod à morte cogor
 Arripere viam tristiciz.
 Vix dat honor locum scientiz.
 Parum valens est honor mundanus,
 Vbi locus non adest gratiz.
 Ascendentes alta turbat onus.

I X.

C O N N E S T A B I L I S.

Vado mori, sectans alios sectandus & ipse:
 Ultimus aut primus non ero; vado mori.

Figura Mortis ducentis Connestabilem.

M O R S.

Mei iuris est vos conducere
 Ad choream nunc, Connestabilis.

Plus

Plus Carolo Magno vos viuere
 Non oportet, res veritabilis:
 Nihil prodest spara terribilis,
 Nec galea de manu fabrorum.
 Contra mortem nullus est stabilis:
 Dum mors venit, nihil est armorum.

C O N N E S T A B I L I S.

Adhuc ego sperabam vincere
 Multos viros mea potentia,
 Castra, vrbes multas inuadere,
 Et mihi met submittens omnia.
 Sed video quod mors hæc impia
 Nunc me mordet; cuius morsus malus,
 Ad quem nulla vitæ tendit via:
 Contra mortem nulla bona salus.

X.

A R C H I E P I S C O P V S.

Vado mori Præsul: baculum, sandalia, mitram
 Nolens siue volens defero; vado mori.

Figura Mortis ducentis Archiepiscopum.

M O R S.

Qualiter nunc caput retrahitis
 Retro, Pater Archiepiscopo?
 Accedite prope, quid timetis?
 Vobis dat mors vnum recipe.
 Mors ubi vult, præcipit; incipe
 Choreare. sic summam debiti
 Creditam nunc tu gratis accipe.
 Computandum semel est hospiti.

Hh

MACABRI
ARCHIEPISCOPIVS.

Heu nescio quam partem cernere,
Tantum stricte per mortem sum captus.
Quo nunc ibo, vt me adiuuare
Scit aliquis? certe sum deceptus.
Et qui bene cognosceret ictus
Duræ mortis, careret vitio.
Per oportet facere coactus,
Sum districta qualis coactio.

XI.

MILES.

Vado mori. Miles, belli certamine victor
Mortem non didici vincere: vado mori.

Figura Mortis ducentis Militem.

Occurrunt animo pereundi mille figuræ,
Morsque minus pœnæ, quam mora mortis habet.

MORS.

Audax Miles, qui magnos Barônes
Frequentastis, & magnas Dominas:
Obliuisci decet tubas omnes
Propter pulchra tonantes fœminas.
Argenteas aurique catenas
Dimittite patiens: constanter
Diræ mortis attendite minas.
Id quod vnus agit, frangit alter.

MILES.

Heu proh dolor, qui tantum famatus:
Pridem fui, dulcis, amabilis

Domi-

Dominabus benignus & gratus;
 Et nunc mori, res est mirabilis.
 Ad currendas lanceas habilis
 Semper fui, nec aliquid vile
 Vnquam egi. res infallibilis:
 Nihil manet sub cœlo stabile.

XII.

E P I S C O P V S.

Homo natus de muliere, breui vivens tempore repletur multis miseriis; qui quasi flos egreditur, & conseritur; & fugit velut umbra, & nunquam in eodem statu permanet.

Figura Mortis ducentis Episcopum.

M O R S.

Episcopo pastor dignitatis,
 Non obstante vestra Prælatura,
 Nullo bono statim gaudebitis.
 Quicquid vobis dederit natura,
 Vestrum factum stat in aduentura.
 Retro dorsum vestrum mors ululat.
 De subditis nunc res est visura:
 Alta scandens non tutus ambulat.

E P I S C O P V S.

Meum nequit cor iustificari
 Audiendo quid mors vult dicere:
 Mihi dicens; Oportet te mori,
 Veni tua debita solvere.
 Hoc vult iudex supremus audire:
 Quid huic dicam iudici debito?
 Cunctos status facit mors transire:
 Totum perit, excepto merito.

Hh 2

M A C A B R I

XIII.

SCVTIFER.

Vado mori genitus de sanguine nobiliori.
Nec genus inducias dat mihi, vado mori.

Figura mortis ducentis Scutiferum.

Festinate nobilis Scutifer,
Qui noscitis modos chorearum.
Choream nunc vult summus Legisfer
Vobis dare post sonum tubarum.
Nil sub cœlo, quin sit transiturum.
Vos igitur decet accedere
Post mortuos sic choreaturum.
Nihil mortem potest euadere.

SCVTIFER.

Si me tenet mors suis laqueis,
Me deceat ad minus dicere
Duo verba complicitibus meis,
Quos solebam choreis ducere:
Valete vos memores facere
Vota pro me Deum supplicando,
Quod me saluet. Nos oportet vere
Omnes mori, sed nescimus quando.

XIV.

ABBAS.

*Credo quod redemptor meus vivit, & in novissima die de terra surre-
cturus sum, & in carne mea videbo Deum saluatorem meum.*

Figura Mortis ducentis Abbatem.

M O R S.

Pater Abbas nolite fugere,
Sequimini mortem choreando.

Non

Non oportet nunc desiderare
 Abbatiam pro fructu sumendo:
 Cuius fructus late comedendo
 Multum pinguis vos fuistis factus.
 Nunc vermibus esca moriendo
 Magis pinguis primus putrefactus.

A B B A S.

Hoc minime cuperem facere
 Ut ordinem vere conseruarem:
 Sed omnibus conuenit transire,
 Quamuis ob rem libenter manerem.
 Viri fratres non cupiscite rem
 Ecclesie. nam mortales sumus:
 Et propter hoc ad vitam futuram
 Moriendo tarde cogitamus.

XV.

IUDEX INVE PRAESES.

Vado mori Iudex: quia iam plures reprehendi,
 Iudicium mortis horreo, vado mori.

Figura Mortis ducentis Praesidem.

Mors tua, mors Christi, fraus mundi, gloria coeli,
 Et dolor inferni, sunt memoranda tibi.

M O R S.

Vos Balliue, qui iura sapitis
 Iustitiae, quique policiam
 Ciuitatum mundi conducitis,
 Accedite, monstro vobis viam:

M A C A B R I

Veni, vobis assignatam diem,
 Manum ista quæ non variabit.
 Videbitis vestram iustitiam.
 Onus suum quilibet portabit.

B A L L I V V S.

O mi Deus, hæc dies amara;
 Ad hunc ictum non respiciebam.
 Variavit se fortuna dura:
 Nunc aduenit mihi quod timebam.
 Inter omnes honores habebam
 Meam vitam: nunc mors interpellat.
 Non appello, sicut appellabam:
 Nam de morte vane quis appellat.

XVI.

P H I L O S O P H V S.

Vado mori Sapiens: sed quid sapientia nouit
 Mortis cautelâ fallere: vado mori.

Figura Mortis ducentis Philosophum.

M O R S.

Astrologæ respector syderum
 Non videtis per astronomiam
 Quod diuersa potestas astrotum
 Istam mortis impediat viam.
 Respicite genealogiam
 Patris Adæ, pro quo nos punimur,
 Attendentes ad theologiam.
 Nam pro pome nos omnes morimur.

ASTRO-

A S T R O L O G V S.

Pro gradibus, nec pro sapientia
 Nullatenus providere scio.
 Solum quero cum displicentia
 Cito mori: vivere nescio.
 Ecce dies meos nunc transeo:
 Et aduenit vt nullus me iquat.
 Nulla mihi prodest inspectio.
 Qui bene vult mori, bene viuat.

XVII.

C I V I S.

Vado mori, sperans per longum viuere tempus:
 Forte dies hæc est vltima, vado mori.

Figura mortis ducentis Cinem.

Mors facit exosum, res aufert, atque colorem.
 Vermibus exponit, fœtentia corpora reddit.

M O R S.

Festinate venire Burgenfis,
 Non habetis modo diuicias.
 Mors execans cuncta velut ensis.
 Vobis affert suas inducias:
 Si fecistis in mundo res pias,
 Istud opus Deus auctorifat:
 In supremis reprobat alias.
 Homo nescit pro quo thesaurifat.

B V R G E N S I S.

Durum mihi iam sic relinquere
 Diuicias sensus nutritivas.

M A C A B R I

Sed diuitem simul cum paupere
 Tu perire cito mors procuras.
 Non sapiens est qui suas curas
 Ponit bonis terræ, quæ pereunt;
 Et animæ pœnas parent duras.
 Qui plus habent, plus tristes obiunt.

XVIII.

C A N O N I C Y S.

Vado mori: non me tenet ornatus, neque vestis
 Linea, nec mollis culcitra; vado mori.

Figura Mortis ducentis Canonicum.

M O R S.

Canonice multum præbendate,
 Ecclesiæ distributiones
 Modo vobis erunt interdictæ,
 Nec ibitis ad processiones.
 Propter vestras retributiones
 Vitæ via vobis est seclusa.
 Mori decet per leges communes.
 Mors aduenit hora non præuisa.

C A N O N I C Y S.

Hoc me parum confortat audire,
 Vt dimittam curas & præbendas.
 Sed mors fortis me venit ferire.
 Non amplius ascendam cathedras.
 Nunc choreas & mortales odas
 Choreabo, vestes abiciens
 Canonicas & pulchras tunicas.
 Bene mori sit quisque cupiens.

XIX.

M E R C A T O R.

Vado mori, magnus mundi moriturus amator,
Hunc spernens possum dicere, vado mori.

Figura Mortis ducentis Mercatorem.

Es sapiens? marcet sapientia morte: redundans
Diuitiis? lapsu mobiliore fluit.

M O R S.

Hic cernite mercator, qui pridem
Per patrias multas quæsiuistis
Nunc pedester, nunc equester, tandem
Sic nobiscum choreabitis.
Vestrum forum postremum facitis
Hiis choreis, quibus mors præsidet,
Plus lassatus foro non eritis.
Talis cupit qui satis possidet.

M E R C A T O R.

Sub & supra veluti poteram
Iter feci pro pane lucrando;
Nunc equester, nunc pedester eram.
Nunc gaudia perdo moriendo.
Lætus eram semper acquirendo.
Et ecce mors dura, quæ me cogit
Choreare, sic omnia perdo.
Parum stringit, qui nimis colligit.

XX.

M E D I C V S.

Vado mori medicus medicamine non redimendus.
Quicquid agat medici potio, vado mori.

Figura Mortis ducentis Medicum.

O felix mortale genus, si semper haberet
Aeternum præ mente Deum, finemque timeret.

M O R S.

O Medice quid dicis vrina?
Respicite quid sit emendandum.
Vos sciuitis iam in medicina.
Satis enim ad præcipiendum
Tunc eratis vos ad succurrandum:
Sed nunc estis pauper & modicus
Parum sciens ad vosmet curandum.
Qui se sanat, est bonus medicus.

M E D I C V S.

Artem dudum cognoui physica,
Quam studui meis temporibus:
Ultra scire contendens practica
Subueniens multis languoribus.
Nunc crucior mortis terroribus.
Herba, radix nulla modo digna:
Cedo cunctis medicaminibus,
Contra mortem nulla medicina.

XXI.

A M A N S.

Vado mori, non me retinet vitiosa voluptas,
Nec luxus auget viuere; vado mori.

Figura Mortis ducentis Amantem.

M O R S.

Dulcis amans, placens & hilaris
Vestri vultus comparans valorem,

Hic

Hic est passus vobis singularis;
 Captus estis per mortis dolorem.
 Huius mundi finetis languorem.
 Si tulistis vobis stultitiam
 Faciei, mors fugat fulgorem
 Decoratæ formæ fallaciam.

A M A N S.

Heu proh dolor nullus est securus
 Contra mortem, nil valent amores.
 Nimis brevis iuuentus est cursus.
 Capelli nunc valeant & flores.
 Nunc amantes puellæ dulcores
 Cupientes, vestra lasciuiâ
 Mis sit memor. nam venti maiores
 Sæpe cadunt pro parua pluuiâ.

XXII

CARTHUSIENSIS.

Vado mori senior, iam finis temporis instat,
 Iamque patet mortis ianua, vado mori.

Figura Mortis ducentis Carthusiensem.

Bis duo sunt, quæ cordetenus sub pectore misi:
 Mors mea, iudicium, baratri nox, lux paradisi.

M O R S.

Vir sacrate, deuoteque frater
 Semper viuens in abstinentia:
 Arripite citius hoc iter,
 Nulla vobis sit resistentia.
 Hic proderit plus patientia
 Non ad vitam, sed ad pium finem.

M A C A B R I

Respicite, datur sententia
Super omnem mors vincit hominem.

C A R T H V S I E N S I S.

In mundo sum mortuus, vt constat;
Vnde minus cupio viuere:
Quamuis morti quilibet resistat,
Suo posse sic conuenit ire.
Velit Deus meam recipere
Nunc animam dulciter, vt suas
Bonitates possim recipere.
Est hodie talis qui nihil cras.

XXIII.

C. L I E N S.

Vado mori pulcer visu: mors ipsa decori
Vel formæ nescit parcere, vado mori.

Figura Mortis ducentis Clientem gestantem sceptrum in manu.

M O R S.

Cliens virgam Regalem deferens
Vt videtur, vos estis rebellis:
Frustra tamen eritis differens
Choreare sententia. talis
Est chorea cunctis generalis:
Mundi maior transit hac semita.
Mors communis est bonis & malis.
Nec est fortis, quin fortis sit ita.

C L I E N S.

Mors mordere cur me nunc præsumis,
Qui sum Cliens & Regis seruitor?

Tc

Te iudico furiosam nimis,
 Quamuis ego sum tuus debitor.
 Undique sum captus. ecce tortor
 Qui me cædit, nec ultra patitur
 Mors, quod ego sum suus creditor.
 Qui non discit, vix ita moritur.

X X I V.

M O N A C H V S.

Breues dies hominis sunt: numerus mensium eius apud te est. Constituisti terminos, qui præteriri non poterunt.

Figura Mortis ducentis Monachum.

M O R S.

O Magister per me transietis,
 Defendere frustra contendite:
 Vos hominem nunquam terrebitis.
 Post ad iter Monache venite.
 Quid pensatis ad hoc cogitate.
 Nunc os clausum tendetis ad ima.
 Velut ventus & cinis transite.
 Hominis est vitæ res minima.

M O N A C H V S.

Plus in claustro stare diligerem
 Faciendo meum seruitium.
 Est quod ibi deuote manerem
 Fugiendo vias mortalium.
 Velut stultus commisi vitium.
 Ictus mortis nunc periculosus.
 Mihi Deus donet remedium.
 Non quilibet choreans iocosus.

M A C A B R I

X X V.

V S V R A R I V S.

Vado mori diues : aurum vel copia rerum
Nullum respectum dat mihi, vado mori.

*Figura Mortis ducentis Vsurarium, numerantem num-
mos pauperi pro pallio.*

Hæc tua vita brevis, quæ te delectat inique,
Est velut aura levis: te mors expectat ubique.

M O R S.

Accedite nunc vsurarie
Delirate, videte faciem.
Nil vsura valebit hodie:
Propter nummi ardetis speciem.
Vos perdetis cuncta, ni veniam
Deus velit vobis ostendere.
Non oportet transeundo viam
Nisi ictus ad cuncta perdere.

V S V R A R I V S.

Heu mori tam cito mors dura
Nec me possum modo defendere.
Hic non prodest aurum nec vsura:
Nunc me decet cuncta dimittere.
Mors me ferit: sibi resistere
Non valeo. nec pulchros oculos
Quisquis habet, scit bene videre.
Sic percepi implendo loculos.

P A V P E R I N D I G E N S.

Est vsura tam graue peccatum,
Quod quilibet ea qui fruitur,

Cor

Cortaliter habet inflammatum,
 Quod vix mortis sic reminiscitur.
 Per hunc stultum istud approbatur,
 Ad vsuram qui mihi nunc pręstat
 Suos nummos, & tamen moritur.
 Quitus non est, cui debitum restat.

XXVI

P R O F E S S O R.

Vado mori Logicus; alios concludere noui.
 Conclufit breuiter mors mihi: vado mori.

Figura Mortis ducentis Magistrum.

Omnia mors tollit; doctum cecidisse Catonem,
 Atque ipsum Socratem procubuisse ferunt.

M O R S.

Et vos Regens in Achademia,
 Qui plurimos coegistis Studentes,
 Nihil prodest dicere, eyar
 Vestras decet dimittere artes.
 Vestri certe nigrescent dentes.
 Studeate nunc prout Deus soluit.
 Dimittite grammaticę partes.
 Mors hominem subito dissoluit.

M A G I S T E R S C H O L E.

Scientia vero grammatica
 Aliarum est introductio:
 Inuenibus autem hypotheca
 Et artium vera discussio.

Sine illa nullum conspicio
 Ad maiora vlla percipere.
 Sed ecce nunc morte deficio.
 In omnibus decet incipere.

XXVII.

A R M I G E R.

Fortium virorum est magis mortem contemnere, vitam odisse.
 Stultum est timere, quod vitari non potest.

Figura Mortis ducentis Armigerum,

M O R S.

Super equum atque cursarium
 Vos armiger nunquam ascendetis.
 Mors arripit nunc vestrum brauium.
 Aspicite quid huc facietis.
 Mundum vero statim dimittetis.
 Non expedit lanceam currere.
 Vt ego sum, ita vos eritis.
 Quis contra me potest resistere?

A R M I G E R.

Heu non vitæ habeo spatium,
 Quia mortis decet obedire.
 Nunc dimitto Regis seruitium,
 Et cum illa compellor hunc ire.
 Ad pristinum non possum redire.
 Huc tam pie sum conductus modo.
 Sicuti mors cogit me abire.
 Mori decet, nescimus quando.

XXVIII.

ADVOCATVS.

Vado mori variis epulis vinoque repletus.
Hiis vtens restat dicere, vado mori.

Figura Mortis ducentis Aduocatum.

Felix qui potuit tranquillam ducere vitam,
Et latus stabili claudere sine dies.

MORS.

Aduocate finite processus,
Ad choream vadamus inuicem.
Corrigere vidistis excessus
Aliorum: quid vobis prædicem.
Sic ad magnum venire iudicem
Vos oportet, qui iudex est sciens
Leges cunctas vique ad radicem.
Iusticiam præuenit sapiens.

ADVOCATVS.

Hoc iuris est, quod ratio fiat,
Nec quid contra tendo proponere.
Quod mors cuncta mundo surripiat
Sententiæ volo comparere.
Alterius nummos surripere
Dadum ceppi; timeo nimium
Coram tantum iudicem parere
Cuncta reddens ad iustum precium.

XXIX.

MYSTICVS.

Vado mori gaudens. non gaudeo tempore longo:
Mundi dunito gaudia, vado mori.

M A C A B R I

Figura Mortis ducentis Musicum.

Veni mime, qui cantus & odas
 Choreasque cum modulantiâ
 Harmonica choreantibus das
 Arte tua fusa lætitia.
 Cerne si nos in hac præsentia
 Imus bene; pande nobis iter.
 Scientiam sine fallacia
 Bonus debet pandere magister.

M V S I C V S.

Choreare taliter non curo;
 Non gratenter hoc volo facere:
 Si mors adest, viuere non spero:
 Quomodo tunc possum choreare?
 Plus nequibo fonos euomere.
 Mors me tenet calibus in istis.
 Talis vadit choreas ducere,
 Cuius cor est languidus & tristis.

X X X.

P A R O C H V S:

Vado mori, cernens quod mors cunctis dominatur,
 Tensa videns mortis retia vado mori.

Figura Mortis ducentis Parochum.

Mors properat, fuga nulla patet, mortale tributum
 Soluere naturæ lege tenetur.

M O R S:

Transi cito rectæ animarum,
 Qui mortuos & viuos solebas.

Come-

Comedere, causa decimarum
 Et non Dei templis seruiebas.
 Ut ceteris exempla monstrabas,
 Recipies tuum seruitium.
 Tibi fiet, sicut faciebas.
 Omni pœnæ debetur præmium.

C V R A T V S.

Velim nolim cogor me reddere.
 Nullus homo, quem mors non inuadat.
 Meas tædet oues dimittere,
 Has ne lupus dente fero lædat.
 Cum spiritus à corde recedat,
 Virtus abest, relinquitur munus.
 Quid nunc dicam, si iudex accedat?
 Felix ille, quem quitat Dominus.

X X X L

R V S T I C V S.

Vado mori pauper; nil mecum defero, mundo
 Contempto mundus transeo, vado mori.

Figura Mortis ducentis Agricola.

M O R S.

Pauper dolens, languidus, patiens
 Agricultor, te mori conuenit.
 Laborasti viuendo moriens:
 Tibi nullus in pœnis subuenit.
 Huc accede. nam finis aduenit
 Cunctis æqua. Stultus est igitur
 Qui nunquam se casurum meminit,
 Sed viuere semper opínatur.

Kk 2

M A C A B R I

A G R I C V L T O R.

O quotiens te mors peroptaui,
 In pœnis cum tantis languescerem.
 Nunc me terres: te desiderauī.
 Et vtinam te nunquam viderem.
 Si vitare possē te, vitatem.
 Quanquam corpus labore vexetur
 Hac & illac, sed ego nescirem.
 Nulla quies in hoc mundo datur.

XXXII.

P R O M O T O R.

*Corporis & animæ societas non firmo vinculo cohaeret, facile dirimitur.
 Stultum est in eo confidere, quod leui perditur casu.*

Figura Mortis ducentis Promotorem.

Pauperis & Regis communis lex moriendi,
 Dat causam flendi, si bene scripta legis.

M O R S.

Accedite Domine Promotor
 Nunc expedit adire Curiam,
 Respondere decet tanquam motor
 Si fecistis quandam iniuriam.
 Aliis enim fatis penuriam
 Dedistis, & non semper iuste.
 Emendare decet fallaciam.
 Male agit, qui viuīt iniuste.

P R O M O T O R.

Mors heu mihi præstat sudarium
 Et nil prodest hic audientia:

Recepit-

Recepissem meum salarium

Illorum qui sunt in sententia.

Vti decet pro nunc prudentia.

Mors me cogit: sum subito captus.

Nihil prodest quam patientia.

In peccatum raro cadit iustus.

XXXIII.

CVSTOS CARCERIS.

Ferro, peste, flama, vinclis, ardore, calore,
Mille modis lethi miseros mors vana fatigat.

Figura Mortis ducentis Custodem carceris.

M O R S.

Tu etiam magister carceris,

Qui plurimos tenuisti vinctos,

Veni mecum: tu de nostris eris,

Et corporis ero tui custos.

Vigilasti saepe super cunctos:

Sed in terra tibi provideo.

Sic termino iustos & iniustos.

Mori decet quando placet Deo.

CVSTOS CARCERIS.

Heu quot vinctos habebam diuites,

Quorum nummos prope recepissem:

Et sic modò dure me inuites:

Sed huc nunquàm libens accessissem.

Choreare taliter inuicem

Non curarem: illud vere scitur.

Crede mihi illic non iuissem.

Nam scit Deus qui recte loquatur.

P E R E G R I N V S.

Omnes enim mors cadere facit: sed post illam viuentibus
pie celsus iudex Deus miranda promittit.

Figura Mortis ducentis Peregrinum.

Vita quid est hominis, nisi res vallata ruinis?
Et caro nostra cinis, modo principium, modo finis.

M O R S.

Peregrine scitis cucurristis
Hinc & inde, vt bonus aduena:
Vnde sæpe vexatus fuistis.
Cur facies est vestra pallida?
Oratio vobis est valida:
Nam Domino (vt credimus valde).
Omnimodo est semper placida.
Qui laborat, dignus est mercede.

P E R E G R I N V S.

In diuersis vero temporibus
Hinc & inde peregre cupiui:
Vbi fui magnis laboribus
Fatigatus, sed libenter iui.
Nunc gratiam summi Dei viui
Salaris credo recipere.
Nam omnia, vt scio & sciui,
Quamquam tardet, decet dimittere.

XXXV.

P A S T O R.

Non sum securus, hodie vel cras moriturus:
Intus siue foris est plurima causa timoris.

Figura Mortis ducentis Pastorem.

M O R S.

Et vos pastor venite leuiter,
Non expedit hic modo restare:
Oues vestras gregesque breuiter
Dimit etis: sic oportet stare.
Non potestis pro nunc deuiare
Cum præmium iuste acquiritur:
Sic meditor vos alleviare.
Felix ille qui bene moritur.

P A S T O R.

O quam oues magno periculo
Restant sæpe sine conductore.
Nam & lupo semper in angulo
Has deuorat carentes rectore.
Qui regitur à summo pastore
Sæpe vitet pessimam pressuram.
Simus ergo sub illo auctore.
Super cunctos mors facit morsuram.

XXXVI.

M I N O R I T A.

Vado mori, sed nescio quo, sed nescio quando:
Quo me cumque loco vertero, vado mori.

Figura mortis ducentis Cordigerum.

Carnis vita, labor; carnis conceptio, tabes
Menstrua; putredo, finis; origo, lutum.

M O R S.

Vos Cordiger frater sequimini,
Post pastorem satis prædicastis.
De hac morte si moriemini,
Inde minus mirari debetis.
Nam maiores mors mordet, videtis
Expertæ re. quantumque subito
Dicta vestra factis comprobatis.
Semper mors est percutere præsto.

C O R D I G E R.

O mi quid est in mundo viuere?
Nullus tutus stat in hoc sæculo.
Quo vanitas non cessat crescere,
Tunc venit mors cum suo baculo.
Nil mirum est, si modo tremulo
Quam vixerim mundo mendicatus.
Quicquid feci, mecum nunc baiulo.
Sapiens est peccator contritus.

XXXVII.

I N F A N S.

Vado mori iuuenis, quia nil valet ipsa iuuentus.
De nece protegere nequeo, vado mori.

*Figura Mortis ducentis infansem in cunis,
iacentem.*

M O R S

M O R S.

Parue puer nuper infans nate,
 Hic facies moram paruissimam.
 Nam tributum iudex petit à te
 Faciendo finem breuissimam.
 Choreabis odam nouissimam,
 Vt cæteri: mors tibi detur.
 Non teneas illam rem maximam.
 Qui plus viuuit, plus pati tenetur.

P V E R.

A a a a, iam loqui nescio,
 Infans cum sum paruus lingua mutus,
 Heri natus, & nunc deficio
 Ad tumultum parere citatus:
 Intrans mundum tunc soluens exitus.
 Sed stat idem mors cunctis communis.
 Dum Deus vult, deficiunt status,
 Vno motu senis & iuuenis.

XXXVIII.

C L E R I C V S.

Vado mori; miserere mei Rex inclite Christe:
 Omnia dimittens debita, vado mori.

Figura Mortis ducentis Clericum.

Sperma prius, modo saccus olens, post vermibus esca
 In tumulo: pro qua dote superbit homo?

M O R S.

Creditis vos euadere mortem,
 Fugiendo, Clerice? scitis ne

M A C A B R I

Quod dura mors non respicit fortem?
 Nec Clericum pro suo nomine?
 Non propicit mors vestræ coronæ.
 Et si nomen vestrum sit Iohannes
 Aut Guillelmus, est mori commune.
 Dum Deus vult, sic corrigit omnes.

C L E R I C U S.

An deceat Clericum iuuenem
 Cupientem suo seruitio
 Peruenire ad maiorem finem
 Admirari satis hoc nescio.
 Dudum mea fuit intentio
 Vt ditarer, sed multum mihi stat
 Mors obiecta meo principio.
 Vix perficit stultus quod cogitat.

XXXIX.

H E R E M I T A.

Vado mori sperans vitam sine fine manentem,
 Sprenens præsentem: sic bene vado mori.

*Figura mortis ducentis Eremitam, habentem à dorso
 sequentem Mortem.*

Cum fex, cum fimus, cum res vilissima fimus,
 Vnde superbimus? in terram terra redimus.

M O R S.

Venite post pater Heremita,
 Quamuis sitis in loco deserto,
 Choreare vos conuenit ita,
 Exite nunc de loco cooperto.

Oculo

Oculo si vidistis aperto
 Contemplando multa Dei facta,
 Non impedit mortem suo facto.
 Vita non est hereditas tuta.

H E R E M I T A.

Nunc oportet mori, bene credo;
 Condemnatus sum per Parlamentum
 Summi Regis: nec hæc solitudo
 Heremorum tardabit arrestum.
 Deum meum vnum rogo tantum,
 Quod soluat me, quem de limo fecit.
 Effecit me hic mundi contentum.
 Nihil habet, cui nihil sufficit.

M O R S.

Bene dicis, sic debes dicere:
 Nullus liber à morte mortalis.
 Qui se male nouerit viuere,
 Choreate sciat se cum malis.
 Sit igitur quilibet fidelis
 Catholicus sequens Dei vias.
 Subita mors est dubitabilis:
 Non est vnus, qui sciat suum cras.

X L.

L A N C E A R I V S M I L E S.

Paucitas dierum meorum finietur breui. Dimitte ergo me Do-
 mine, vt plangam paululum dolorem meum, antequam vadam.

Figura Mortis ducentis Hystatorem.

Ortus cuncta suos repetunt, matremque requirunt,
 Et redit in nihilum, quod fuit ante nihil.

M O R S.

Super campos, vrbesque, opida
 Comedisti pullas atque pullos.
 Et ego mors sum tibi trepida,
 Quamuis tamen non dimitto vllos.
 Oppressisti magnos & paruulos
 Tanquam hastator quam validissimus.
 Quanti facis bai bam & capillos.
 Valet primus sicut nouissimus.

H A S T A T O R.

Nunc timeo illud passagium.
 Nam mors semper cunctis terribilis.
 Sed est via vera mortalium,
 Quamuis tamen sit mihi crudelis.
 Contra illam nulla res utilis.
 Quid prodesset ergo defendere?
 Cum debitum iuris naturalis
 Vnusquisque tenetur reddere.

X L I.

S T V L T V S.

Vado mori stultus: mors stulto vel sapienti
 Non iungit pacis fœdera; vado mori.

Figura Mortis ducentis Stultum.

M O R S.

Tu fatue, si nunc hic choreas
 A natura hoc tibi prouenit,
 Sed aspice ne modo pereas.
 Sic omnibus pergere conuenit.

In

In Scriptura quilibet inuenit,
 Quod omnibus mori est statutum.
 Stultus est, qui hoc non meminit.
 Nam omnis res tendit ad vltimum.

STVLTVS.

Hic sunt omnes boni amici
 Chöreantes veluti concordēs;
 Quamuis tamen erant inimici
 Quamplurimi, & mundo discordes.
 Pauci vero sunt misericordes.
 Sed idem sunt stultus & sapiens.
 Qui conspicias ergo hoc, memor es.
 Qui non timet Deum, insipiens.

XLII.

Dies mei sicut umbra declinauerunt; & ego sicut fœnum arui. Tu autem Domine in æternum permanes.

Figura Auctoris, habentis ante se iacentem mortuum.

Esto memor, quod puluis eris & vermibus esca,
 In gelida putrens quando iacebis humo.
 Non erit in mundo, qui te velit vltra videre,
 Cum tua rancidior sit caro rupta cane.

ANGELVS in figura tenens chartam cum inscriptis versibus.

Mortales Dominus cunctos in luce creauit
 Vt capiant meritis gaudia summa poli.
 Felix ille quidem, qui mentem iugiter illuc
 Dirigit, atque vigil noxia quæque cauet.

Nec tamen infelix, sceleris quem poenitet acti,
 Quisque suum facinus plangere sepe solet.
 Sed viuunt homines, tanquam mors nulla sequatur,
 Et velut infernus fabula fana foret.
 Cum doceat sensus, viuentes morte resolui,
 Atque herebi poenas pagina sacra probet.
 Quas qui non metuit, infelix prorsus & amens
 Viuit, & exinctus sentiet ille rogum.
 Sic igitur cuncti sapientes viuere certent,
 Vt nihil inferni sit metuenda palus.

A V C T O R.

Vos videntes in hac protractura
 Omnes status mundi choreantes,
 Hic notate qualis sit natura
 Humanorum, dirigite mentes,
 Nunc viuentes, statim inicientes,
 Putrescentes relictis omnibus
 De carnibus vermes nutriendes,
 Omnes status sunt dari vermibus.
 Nil est homo, qui bene cogitat,
 Nisi ventus res transitoria.
 Quisquis videt, clare qui pensitat
 Hanc choream nudam laticia.
 Hæc igitur cunctis historia
 Sit permanens & mente stabilis:
 Vt quilibet fruatur gloria.
 Fœlix ille, qui gaudet in cœlis.
 Vtile est, quod rememoretur
 Mane, sero, nam talis hodie
 Viuit sanus, qui cras morietur.
 Ergo quisque credat historiae.
 Sunt aliqui mundanæ gloriæ
 Tam dediti, quod quidquid agatur
 Nihil credunt, pleni laticia.
 Nunquam credunt quousque rantantur.
 O quanti sunt, qui hic abutuntur,
 Ac non esset verus paradus
 Aut infernus: sed cruciabuntur,
 Vt scriptura testatur omnibus.
 Absoluti cunctis reatibus
 Vos orate, qui nunc hac transitis,
 Vt amici saluentur precibus,
 Cum orate valeat defunctis.

A V C T O R

A V C T O R.

O vos omnes, qui transitis per viam, attendite,
 Qui vt umbra præteritis, oculos hic figite,
 Humanæ mortalitatis intuentes speculum,
 Vt quid estis cognoscatis, & quid præsens seculum.
 In hoc enim quid humana patenter ostenditur
 Vita sit, & res mundana, quæ tantum diligitur.
 Ecce quicquid in præsentis seculo conspicitis,
 Cito transit, instar venti nil aurare cernitis,
 Nam vt fœnum exarescit carnalis viriditas,
 Et vt fumus euanescit mundana iocunditas.
 Transít honor mundialis, transit & potentia,
 Pulchritudo mundialis, mundique prudentia.
 Mortem ergo cogitare, finem transeuntium.
 Nec in mundi vanitate queratis solatium.
 Si mortem attenderitis, huiusque miseriam
 Vitæ, iam inuenietis doloris materiam.
 Vita multis est respecta amaritudinibus,
 Et mors tandem vniuersa tollit cum hominibus.
 Quicquid producit in esse natura mirabilis,
 Tot consummat est necesse mors insatiabilis.
 Nam per pomum, quod gustauit primus parens vetitum,
 Mors in mundum subintravit suæ legi subiectum.
 Vnde per culpam deiecta est humana dignitas.
 Mortis legibus subiecta, totaque posteritas.
 Quis tam prudens? quis tam fortis stetisse legitur,
 Qui gustum amaræ mortis euasisse creditur?
 Samson moritur robustus, Salomon doctissimus,
 Absalon forma venustus, Davidque sanctissimus,
 Christus quoque mortis diræ priusquam substinuit
 Pœnam, ad thronum gloriæ redire non potuit.
 Cum ergo sit certa mortis pœna, quam euadere
 Nequitis, in te terrena nolite spem ponere.
 Qui spem ponit in mundanis, manifeste fatuus
 Comprobarur, nam inanis hunc transit & vacuus.
 Quod profectò rationis oculum habentibus
 Patet huius visionis formam intuentibus.

V I S I O H E R E M I T A E.

Fuit quidam Heremita vitæ commendabilis,
 Cui reuelatur ista visio mirabilis.
 Nocte quadam dum ingressus lectulum quiescere
 Vellet, sopore depressus vidit renitescere
 Quendam habitu regali virum potentissimum,

M A C A B R I

Alium quoque legali iure peritissimum.
 Iuxta quos miri decoris mulier apparuit,
 Quæ gemmis & auro foris adornata nituit.
 Quos cum cerneret latenter in campo consistere,
 Et de vanis se hactanter audiret extollete:
 Mox tres mortuos foetentes putrefactis carnibus,
 Vermibus scaturientes, deformes aspectibus,
 Vidit nimio stupore repletus emergere,
 Et ad viuos cum mœrore statim conuerrere.
 Quorum quilibet patebat vniu. de viu. tibus,
 Quem dire redarguebat de vanis sermonibus.
 Igitur Rex ornamenta indutus regalia
 Stabat mente tumultenta prorumpens in talia:

Non est potestas super terram, quæ comparetur mihi, qui factus sum ut nullum timeam.

V A N A P O T E N T I A.

Quis stirpe tam generosus, tam fortis potentia,
 Tam diues, tam gloriosus status excellentia
 Qui mihi possit æquari, vel me sit sublimior?
 Præsertim qui sine pari cunctos supergradior.
 Mihi incuruantur militesque seruiunt,
 Principes atque Prælati subiecti obediunt.
 Me honore prosequuntur vniuersi populi,
 Et parati assequuntur mea iussa singuli.
 Quem volo, statim ex alto; quem volo, præficio
 Cæteris; atque ex alto quem volo deicio.
 Nec in mundo dominatur tantus, qui opponere
 Se mihi non veratur, vel me iam offendere.
 Aurum, gemmas & cunctorum habens affluentiam,
 Temporalium bonorum nullam indigentiam
 Patior, nullaque cura mea mens deprimitur,
 Nec extrinseca pressura caro mea teritur,
 Corporis in sospitate perseuero iugiter,

Et pa-

Et pacis securitate gaudeo similiter.
Denique boni nullius egens nihilominus
Imperator eximius ego sum & Dominus.

A C T O R.

Regem hæc incaute verba loquentem aggreditur
Mortuus Rex, atque acerba voce sic loquitur:

*Hodie Rex es, & cras morieris: quia omnis
potentatus vita brevis.*

R E X M O R T V V S.

O stulte & insensate, rationis lumine
Carens: ô intus excæcate erroris caligine,
Quid te iactas de labentis potestate seculi,
Cuius carnem morientis comedent vermiculi?
Nosce miser, quod mortalis es & corruptibilis,
Mihi futurus æqualis scetens & horribilis.
Rex inuictus fui dictus, potens & ditissimus;
Sed ecce iam sum relictus sub terra nudissimus.
Quid præterita dulcedo? quid laus? quid imperium
Mihi prodest? qui putredo sum & esca vermium.
Respice cuncta mundana quomodo pertranseunt,
Mente qualiter insana his nimirum pereunt.
Nil hîc verum, nil mansurum, nil firmum, nil stabile,
Sed falsum atque nocivum, caducum & labile.
Est delectamentum mundi, laus, honor, & gloria;
Aurum simul & argentum, cuncta transitoria.
Cito ergo resipisce, depone stultitiam;
Et protinus ingemisce deprecando veniam
Culpis, nec in his terrenis confidas diuitiis,
Ne cœlestibus amœnis careas deliciis.

Mm

Itaque Legis peritus inflatus superbia
Fatur mollibus vestitus hæc & his similia:

*Magnus effectus sum, & præcedo sapientia omnes, qui sunt
& qui ante me fuerunt.*

V A N A P R V D E N T I A.

Merito possum lætari, cui in prudentia
Quis non valet comparari, nec in eloquentia.
Me cæratim venerantur diuites cum pauperibus,
Et pro suis deprecantur causis cum muneribus.
Regum quippe commensalis & consiliarius,
Eorum collateralis sum & necessarius.
Per me regunt & disponunt, decernunt & iudicant,
Promouent atque deponunt, dant & magnificant.
Illum facio priuari suo beneficio,
Hunc honesto deputari procurans officio.
Sic & illum iudicari reum in iudicio,
Istum vero liberari mortis à supplicio.
Veritatem impugnare noui & subuertere:
Necnon mihi aduersantes penitus confundere:
Reum atque criminofum scioque defendere:
Et dum volo virtuosum peruersum ostendere.
Præter ista sum expertus in omni scientia,
Et transcendere repertus cunctos sapientia.
Ad hæc mortuus secundus respondebat acriter,
Et Legistam gemebundus increpabat taliter:

*Ne gloriaris in sapientia: quæ sapientia mundi huius stulti-
tia est apud Deum.*

S A P I E N S M O R T V V S.

Dic destructor veritatis, fraudis & maliciæ
Adiuuentor, æquitatis hostis, & iusticiæ,

Cur

Cur cor tuum eleuatur de tua prudentia,
 Quæ nil ex se comprobatur quam pura dementia.
 Iam stultiloquam compesce linguam, & considera
 Quam vanum sit tuum esse in hac vita misera.
 Nunc potitur sanitate prouectus honoribus,
 Cras cadauer fœditate plenum & fœtoribus.
 Noli ergo te iactare, nolique tumescere,
 Qui mortem nec defraudare nec vales effugere.
 Infelix animaduerte, quid es & vnde veneris:
 Per me sciens, quod certe velut umbra præteriris.
 Prudens etiam & astutus, in lege doctissimus,
 Sed nunc cæno inuolutus putreo vilissimus.
 Magnus quondam & dilectus cum multis hominibus,
 Iam per mortem sum effectus odiosus omnibus.
 Contemplare diligenter quam difformis corpore
 Nunc sum, qui tam eminenter fulsi retro tempore.
 Et tuæ corruptionis frequens meditatio
 Tibi sit conuersionis salubris occasio.

A C T O R.

Fœmina nitens candore & ornatu vario
 Talia tumescens ore profert temerario:

Non est similis mei super terram in aspectu, & pulchritudine, & deornatu membrorum.

V A N A P V L C H R I T V D O.

Non est pulchrior depicta mea quam effigies,
 Nec præclarius amicta mulieris species.
 Me videre delectatur Regia sublimitas,
 Esse mecum reputatur summaque iocunditas.
 Formæ quoque venustate sum incomparabilis,
 Et membrorum quantitate decenti laudabilis:
 Sine ruga, sine forte, non confecta macie,

M m 2

Fulgens veste, læta corde, floridaque facie.
 Vultum meum intuentes admirantur oculi.
 Principes atque potentes me frequentant & populi.
 Nam aspectu gratiosa, vultuque amabilis,
 Omnes certe velut rosa præcello mirabilis.
 Quare merito lætari cæteris plus debeo,
 Quæ decore singulari omnibus præfulgeo.
 Et cum tantæ speciei sim, nullam inopiam
 Patior, mundanæ rei omnis habens copiam.
 Reges enim inflammari amoris incendio
 Mei, semper sunt parati implere quæ cupio.
 Inde prorsus nil deesse mihi posse video,
 Nil nocere, nil obesse. quapropter sic gaudeo.

A C T O R.

Hæc postquam viua prætendit decore conspicua,
 Ipsam dire reprehendit appropinquans mortua:

Fallax igitur est pulchritudo, quæ ad modum floris decedens protinus emarcescit.

F E M I N A M O R T V A.

Cur, inquit, præsumptuosa, cur tantum extolleris?
 Stulta quoq; & ventosa imprudenter loqueris?
 An nescis, quod pulchritudo facile dilabitur?
 Quam tam levis ægritudo tollere dinoscitur.
 Cerne mei iam figuram horrendi cadaveris,
 Et consimilem futuram te pro certo noueris.
 Per me liquet, quod membrorum nil prodest formositas,
 Et nil indumentorum valet præsumptuositas.
 Quondam enim speciosa fui & ornatu fulgida:
 Iam sum vermibus corrosa, & effecta foetida.
 Sic nimirum marcescet decor tui corporis,
 Atque caro computrescet post pusillum temporis.

Et si

Et si tu nunc pulchra foris appares & candida,
 Nigra plenaque fœtoris tunc eris & horrida.
 Nunc dilecta, tunc despecta cunctis ab hominibus
 Luto iacebis proiecta, cibus data vermibus.
 Hæc in animo reuoluas, hæc semper recogita.
 Nam necesse est ut soluas tandem mortis debita.
 Nulla namque fortitudo, nulla namque prudentia
 Liberat, aut pulchritudo mortis ab angustia.

A C T O R.

Mortem ergo timeatis, quæ nec arte fallitur,
 Nec muneribus oblati quibuscumque flectitur,
 Nec terrea potestate, quando cumque vincitur,
 Nec decoris venustate ad parcendum trahitur.
 Mortem autem metuentes declinate viâ,
 Mente semper recolentes Christi beneficia,
 Ut gehennæ fugientes poenam, eius gratia
 Cœli possitis gaudentes intrare palatia

FINIT CHOREA MACABRI.

W



HANOVIAE,
Typis VVeckelianis apud haredes
Joh. Aubrii
M. DC. XIII.